



全宋詞

3

中國詩詞大全
齊東野語
電子圖書系列

江史君

好事近 寿六十

耳顺恰当年 ,甲子方周一数。绛县老人曾
记 ,四百四十五。

孙弘博士适遭逢 ,马援击蛮未遇 ,五福祝
君全备 ,更尊荣安富。

江 万 里

水调歌头 寿二亲

生日重重见，余闰有新春。为吾母寿，
富贵外物总休论。且说家怀旧话，
教学也曾菽水，亲意尽欣欣。只此是真乐，
乐岂在邦君。

吾二老，常说与，要廉勤。庐陵几千万
户，休戚属儿身。三瑞堂中绿醕，
酿就满城和气，端又属人伦。吾亦老吾老，
谁不敬其亲。

江纬

向湖边 江纬读书堂

退处乡关，幽栖林藪，舍宇第须茅盖。
翠巘清泉，启轩窗遥对。遇等闲、邻里过从，
亲朋临顾，草草便成幽会。策杖携壶，向湖
边柳外。

旋买溪鱼，便斫银丝脍。谁复欲痛饮，
如长鲸吞海。共惜醺酣，恐欢娱难再。矧清
风明月非钱卖。休追念、金马玉堂心胆碎，
且斗尊前，有阿谁身在。

江无□

满江红 衡岳词

使节行秋，算天也、知公风力。长啸罢、
烟云尽卷，□□□□。重九汉峰黄泛酒，五
更泰岳□观日。问扬公、去后有谁□，□朝
集。

大□，□□□。今古□，□陈迹。甚牛
山□□，□□□□。□□□嫌□愒薄，高怀
□□□□□。□□□、黄鹤□□□，□相识。

江衍

锦缠绊 黄钟宫

屈曲新堤，占断满村佳气。画檐两行连云际。乱山叠翠水回还，岸边楼阁，金碧遥相倚。

柳阴低，艳映花光美。好升平、为谁初起。大都风物只由人，旧时荒垒，今日香烟地。

江致和

五福降中天

喜元宵三五，纵马御柳沟东。斜日映珠帘，瞥见芳容。秋水娇横俊眼，腻雪轻铺素胸。爱把菱花，笑匀粉面露春葱。

徘徊步懒，奈一点、灵犀未通。怅望七香车去，慢辗春风。云情雨态，愿暂入阳台梦中。路隔烟霞，甚时还许到蓬宫。

蒋捷

贺新郎 秋晓

渺渺啼鸦了。亘鱼天、寒生峭屿，五湖秋晓。竹几一灯人做梦，嘶马谁行古道。起搔首、窥星多少。月有微黄篱无影，挂牵牛、数朵青花小。秋太淡，添红枣。

愁痕倚赖西风扫。被西风、翻催鬓鬢，与秋俱老。旧院隔霜帘不卷，金粉屏边醉倒。计无此、中年怀抱。万里江南吹箫恨，恨参差、白雁横天杪。烟未敛，楚山杳。

又 约友三月旦饮

雁屿晴岚薄。倚层屏、千树高低，粉纤红弱。云隘东风藏不尽，吹艳生香万壑。又散入、汀蘼洲药。扰扰匆匆尘土面，看歌莺、舞燕逢春乐。人共物，知谁错。

宝钗楼上围帘幕。小婵娟、双调弹筝，半霄鸾鹤。我辈中人无此分，琴思诗情当却。也胜似、愁横眉角。芳景三分才过二，便绿阴、门巷杨花落。沽斗酒，且同酌。

又 吴江

浪涌孤亭起。是当年、蓬莱顶上，海风飘

坠。帝遣江神长守护 ,八柱蛟龙缠尾。斗吐出、寒烟寒雨。昨夜鲸翻坤轴动 ,卷雕翠、掷向虚空里。但留得 ,绛虹住。

五湖有客扁舟舫。怕群仙、重游到此 ,翠旌难驻。手拍阑干呼白鹭 ,为我殷勤寄语。奈鹭也、惊飞沙渚。星月一天云万壑 ,览茫茫、宇宙知何处。鼓双楫 ,浩歌去。

又

梦冷黄金屋。叹秦筝、斜鸿阵里 ,素弦尘扑。化作娇莺飞归去 ,犹认纱窗旧绿。正过雨、荆桃如菽。此恨难平君知否 ,似琼台、涌起弹棋局。消瘦影 ,嫌明烛。

鸳楼碎泻东西玉。问芳悰、何时再展 ,翠钗难卜。待把宫眉横云样 ,描上生绡画幅。怕不是、新来妆束。彩扇红牙今都在 ,恨无人、解听开元曲。空掩袖 ,倚寒竹。

又 兵后寓吴

深阁帘垂绣。记家人、软语灯边 ,笑涡红透。万叠城头哀怨角 ,吹落霜花满袖。影厮伴、东奔西走。望断乡关知何处 ,羨寒鸦、到著黄昏后。一点点 ,归杨柳。

相看只有山如旧。叹浮云、本是无心 ,也成苍狗。明日枯荷包冷饭 ,又过前头小阜。趁未发、且尝村酒。醉探枵囊毛锥在 ,问邻翁、要写牛经否。翁不应 ,但摇手。

沁园春 为老人书南堂壁

老子平生 ,辛勤几年 ,始有此庐。也学那

陶潜 篱栽些菊 ,依他杜甫 园种些蔬。除了雕梁 ,肯容紫燕 ,谁管门前长者车。怪近日 ,把一庭明月 ,却借伊渠。

鬓边白发纷如。又何苦招宾约客欤。但夏榻宵眠 ,面风敲枕 ,冬檐昼短 ,背日观书。若有人寻 ,只教僮道 ,这屋主人今自居。休羨彼 ,有摇金宝辔 ,织翠华裾。

又 次强云卿韵

结算平生 ,风流债负 ,请一笔勾。盖攻性之兵 ,花围锦阵 ,毒身之鸩 ,笑齿歌喉。岂识吾儒 ,道中乐地 ,绝胜珠帘十里楼。迷因底 ,叹晴乾不去 ,待雨淋头。

休休。著甚来由。硬铁汉从来气食牛。但只有千篇 ,好诗好曲 ,都无半点 ,闲闷闲愁。自古娇波 ,溺人多矣 ,试问还能溺我不。高抬眼 ,看牵丝傀儡 ,谁弄谁收。

女冠子 元夕

蕙花香也。雪晴池馆如画。春风飞到 ,宝钗楼上 ,一片笙箫 ,琉璃光射。而今灯漫挂。不是暗尘明月 ,那时元夜。况年来、心懒意怯 ,羞与蛾儿争耍。

江城人悄初更打。问繁华谁解 ,再向天公借。剔残红烛。但梦里隐隐 ,钿车罗帕。吴笺银粉砑。待把旧家风景 ,写成闲话。笑绿鬟邻女 ,倚窗犹唱 ,夕阳西下。

又 竞渡

电旗飞舞。双双还又争渡。湘漓云外 ,独

全宋词 蒋捷

醒何在 ,翠药红蘅 ,芳菲如故。深衷全未语。
不似素车白马 ,卷潮起怒。但悄然、千载旧迹 ,
时有闲人吊古。

生平惯受椒兰苦。甚魄沈寒浪 ,更被馋蛟
妒。结琼纫璐。料贝阙隐隐 ,骑鲸烟雾。楚妃
花倚暮。□□琼箫吹了 ,溯波同步。待月明洲
渚 ,小留旌节 ,朗吟骚赋。

大圣乐 陶成之生日

笙月凉边 ,翠翘双舞 ,寿仙曲破。更听得
艳拍流星 ,慢唱寿词初了 ,群唱莲歌。主翁楼
上披鹤氅 ,展一笑、微微红透涡。襟怀好 ,纵炎
官驻伞 ,长是春和。

千年鼻祖事业 ,记曾趁雷声飞快梭。但也
曾三径 ,抚松采菊 ,随分吟哦。富贵云浮 ,荣华
风过 ,淡处还他滋味多。休辞饮 ,有碧荷贮酒 ,
深似金荷。

解连环 岳园牡丹

妒花风恶。吹青阴涨却 ,乱红池阁。驻媚
景、别有仙葩 ,遍琼甃小台 ,翠油疏箔。旧日天
香 ,记曾绕、玉奴弦索。自长安路远 ,腻紫肥
黄 ,但谱东洛。

天津霁虹似昨。听鹃声度月 ,春又寥寞。
散艳魄、飞入江南 ,转湖渺山茫 ,梦境难托。万
叠花愁 ,正困倚、钩阑斜角。待携尊、醉歌醉
舞 ,劝花自乐。

永遇乐 绿阴

清逼池亭 ,润侵山阁 ,雪气凝聚。未有蝉前 ,已无蝶后 ,花事随逝水。西园支径 ,今朝重到 ,半碍醉筇吟袂。除非是、莺身瘦小 ,暗中引雏穿去。

梅檐溜滴 ,风来吹断 ,放得斜阳一缕。玉子敲枰 ,香綃落翦 ,声度深几许。层层离恨 ,凄迷如此 ,点破谩烦轻絮。应难认、争春旧馆 ,倚红杏处。

花心动 南塘元夕

春入南塘 ,粉梅花、盈盈倚风微笑。虹晕贯帘 ,星球攒巷 ,遍地宝光交照。涌金门外楼台影 ,参差浸、西湖波渺。暮天远 ,芙蓉万朵 ,是谁移到。

鬢鬢双仙未老。陪玳席嘉宾 ,暖香云绕。翠箨叩冰 ,银管嘘霜 ,瑞露满钟频酌。醉归深院重歌舞 ,雕盘转、珍珠红小。凤洲柳 ,丝丝淡烟弄晓。

金钗子

练月萦窗 ,梦乍醒、黄花翠竹庭馆。心字夜香消 ,人孤另、双鸂被池羞看。拟待告诉天公 ,减秋声一半。无情雁。正用恁时飞来 ,叫云寻伴。

全宋词 蒋捷

犹记杏栊暖。银烛下、纤影卸佩款。春涡晕 红豆小 ,莺衣嫩 珠痕淡印芳汗。自从信误青骊 ,想笼莺停唤。风刀快 ,翦尽画檐梧桐 ,怎翦愁断。

喜迁莺 暮春

游丝纤弱。谩著意绊春 ,春难凭托。水暖成纹 ,云晴生影 ,双燕又窥帘幕。露添牡丹新艳 ,风摆秋千闲索。对此景 ,动高歌一曲 ,何妨行乐。

行乐。春正好 ,无奈绿窗 ,孤负敲棋约。锦幄调笙 ,银瓶索酒 ,争奈也曾迷著。自从发凋心倦 ,常倚钩阑斜角。翠深处 ,看悠悠几点 ,杨花飞落。

昼锦堂 荷花

染柳烟消 ,敲菰雨断 ,历历犹寄斜阳。掩冉玉妃芳袂 ,拥出灵场。倩他鸳鸯来寄语 ,驻君舴艋亦何妨。渔榔静 ,独奏棹歌 ,邀妃试酌清觞。

湖上云渐暝 ,秋浩荡 ,鲜风支尽蝉粮。赠我非环非佩 ,万斛生香。半蜗茅屋归吹影 ,数螺苔石压波光。鸳鸯笑 ,何似且留双楫 ,翠隐红藏。

水龙吟 效稼轩体招落梅之魂

醉兮琼漉浮觞些。招兮遣巫阳些。君毋

去此 飓风将起 天微黄些。野马尘埃 污君楚楚 白霓裳些。驾空兮云浪 茫洋东下 流君往、他方些。

月满兮西厢些。叫云兮、笛凄凉些。归来为我 重倚蛟背 寒鳞苍些。俯视春红 浩然一笑 吐山香些。翠禽兮弄晓 招君未至 我心伤些。

瑞鹤仙 红叶

缟霜霏霁雪。渐翠没凉痕 猩浮寒血。山窗梦凄切。短吟筇犹倚 莺边新榭。花魂未歇。似追惜、芳消艳灭。挽西风、再入柔柯 误染绀云成缬。

休说。深题锦翰 浅泛琼漪 暗春曾泄。情条万结。依然是 未愁绝。最怜他 南苑空阶堆遍 人隔仙蓬怨别。锁芙蓉、小殿秋深 碎虫诉月。

又 乡城见月

绀烟迷雁迹。渐断鼓零钟 街喧初息。风檠背寒壁。放冰蜍飞到 丝丝帘隙。琼瑰暗泣。念乡关、霜芜似织。漫将身、化鹤归来 忘却旧游端的。

欢极。蓬壶渠浸 花院梨溶 醉连春夕。柯云罢弈。樱桃在 梦难觅。劝清光 乍可幽窗相伴 休照红楼夜笛。怕人间、换谱伊凉 素娥未识。

又 寿东轩立冬前一日

玉霜生穗也。渺洲云翠痕 雁绳低也。层

帘四垂也。锦堂寒早近 ,开炉时也。香风递也。是东篱、花深处也。料此花、伴我仙翁 ,未肯放秋归也。

嬉也。缃波稳舫 ,镜月危楼 ,鬻琼醑也。笼莺睡也。红妆旋、舞衣也。待纱灯客散 ,纱窗日上 ,便是严凝序也。换青毡、小帐围春 ,又还醉也。

又 友人买妾名雪香

素肌元是雪。向雪里带香 ,更添奇绝。梅花太孤洁。问梨花何似 ,风标难说。长洲漾楫。料鸳边、娇蓉乍折。对珠栊、自翦凉衣 ,爱把淡罗轻叠。

清彻。螺心翠靥 ,龙吻琼涎 ,总成虚设。微微醉缣。窗灯晕 ,弄明灭。算银台高处 ,芳菲仙佩 ,步遍纤云万叶。觉来时、人在红帏 ,半廊界月。

木兰花慢 冰

傍池阑倚遍 ,问山影、是谁偷。但鹭敛琼丝 ,鸳藏绣羽 ,碍浴妨浮。寒流。暗冲片响 ,似犀椎、带月静敲秋。因念凉荷院宇 ,粉丸曾泛金瓯。

妆楼。晓涩翠罽油。倦鬓理还休。更有何意绪 ,怜他半夜 ,瓶破梅愁。红裯。泪千万点。待穿来、寄与薄情收。只恐东风未转 ,误人日望归舟。

又 再赋

渺琉璃万顷 ,冷光射、夕阳洲。见败柳漂

全宋词 蒋捷

枝 残芦泛叶 欲去仍留。罗帏。少年梦里 正
窥帘、月浸素肌柔。谁念衰翁自老 断髭冻得
成虬。

凝眸。一望绝飞鸥。宇宙正清幽。漫细
敲紫砚 轻呵翠管 吟思难抽。飕飕。晚风又
起 但时听、碎玉落檐头。多少梅花片脑 醉来
误整香篝。

珍珠帘 寿岳君选

书楼四面筠帘卷。微薰起 翠弄悬签丝
软。楼上读书仙 对宝狻猊转。绣馆钗行云度
影 滟寿觥、盈盈争劝。争劝。奈芸边事切 花
中情浅。

金奏未响昏蝓 早传言放却 舞衫歌扇。
柳雨一窝凉 再展开湘卷。万颗蕖心琼珠辊 细
滴与、银朱小砚。深院。待月满廊腰 玉笙
又远。

高阳台 芙蓉

霞铄帘珠 云蒸篆玉 环楼婉婉飞铃。天
上王郎 飙轮此地曾停。秋香不断台隍远 溢
万丛、锦艳鲜明。事成尘 鸾凤箫中 空度歌
声。

臞翁一点清寒髓 惯餐英菊屿 饮露兰汀。
透屋高红 新营小样花城。霜浓月淡三更梦 梦
曼仙、来倚吟屏。共襟期 不是琼姬 不是芳
卿。

又 送翠英

燕卷晴丝 ,蜂黏落絮 ,天教绾住闲愁。闲里清明 ,匆匆粉涩红羞。灯摇缥晕茸窗冷 ,语未阑、娥影分收。好伤情 ,春也难留 ,人也难留。

芳尘满目悠悠。问萦云佩响 ,还绕谁楼。别酒才斟 ,从前心事都休。飞莺纵有风吹转 ,奈旧家、苑已成秋。莫思量 杨柳湾西 ,且棹吟舟。

又 闰元宵

桥尾星沈 ,街心尘敛 ,天公还把春饶。桂月黄昏 ,金丝柳换星摇。相逢小曲方嫌冷 ,便暖薰、珠络香飘。却怜他、隔岁芳期 ,枉费囊绡。

人情终似娥儿舞 ,到颦翻宿粉 ,怎比初描。认得游踪 ,花骢不住嘶骄。梅梢一寸残红炬 ,喜尚堪、移照樱桃。醉醺醺 ,不记元宵 ,只道花朝。

春夏两相期 寿谢令人

听深深、谢家庭馆。东风对语双燕。似说朝来 ,天上婺星光现。金裁花诰紫泥香 ,绣里藤舆红茵软。散蜡宫辉 ,行鳞厨品 ,至今人羨。

西湖万柳如线。料月仙当此 ,小停飙辇。付与长年 ,教见海心波浅。萦云玉佩五侯门 ,洗雪华桐三春苑。慢拍调莺 ,急鼓催鸾 ,翠阴生院。

念奴娇 寿薛稼堂

稼翁居士 ,有几多抱负 ,几多声价。玉立
绣衣霄汉表 ,曾览八州风化。进退行藏 ,此时
正要 ,一著高天下。黄埃扑面 ,不成也控羸马。

人道云出无心 ,才离山后 ,岂是无心者。
自古达官酣富贵 ,往往遭人描画。只有青门 ,
种瓜闲客 ,千载传佳话。稼翁一笑 ,吾今亦爱
吾稼。

绛都春

春愁怎画。正莺背带雪 ,酴醿花谢。细雨
院深 ,淡月廊斜重帘挂。归时记约烧灯夜。早
拆尽、秋千红架。纵然归近 ,风光又是 ,翠阴初
夏。

娅姹。颦青泫白 ,恨玉佩罢舞 ,芳尘凝榭。
几拟倩人 ,付与兰香秋罗帕。知他堕策斜拢
马。在底处、垂杨楼下。无言暗拥娇鬟 ,凤钗
溜也。

声声慢 秋声

黄花深巷 ,红叶低窗 ,凄凉一片秋声。豆
雨声来 ,中间夹带风声。疏疏二十五点 ,丽譙
门、不锁更声。故人远 ,问谁摇玉佩 ,檐底铃
声。

彩角声吹月堕 ,渐连营马动 ,四起笳声。

闪烁邻灯,灯前尚有砧声。知他诉愁到晓,碎
啾啾、多少蛩声。诉未了,把一半、分与雁声。

尾犯 寒夜

夜倚读书床,敲碎唾壶,灯晕明灭。多事
西风,把斋铃频掣。人共语、温温芋火,雁孤
飞、萧萧桧雪。遍阑干外,万顷鱼天,未了予愁
绝。

鸡边长剑舞,念不到、此样豪杰。瘦骨棱
棱,但凄其衾铁。是非梦、无痕堪记,似双瞳、
缤纷翠缬。浩然心在,我逢著、梅花便说。

满江红

一掬乡心,付杳杳、露莎烟苇。来相伴、凄
然客影,谢他穷鬼。新绿旧红春又老,少玄老
白人生几。况无情、世故荡摩中,凋英伟。

词场笔,行群蚁。战场胄,藏群虬。问何
如清昼,倚藤凭几。流水青山屋上下,束书壶
酒船头尾。任垂涎、斗大印黄金,狂周顛。

又

秋本无愁,奈客里、秋偏岑寂。身老大、恹
敲秦击,懒移陶甓。万误曾因疏处起,一闲且
向贫中觅。笑新来、多事是征鸿,声嘹唳。

双户掩,孤灯剔。书束架,琴悬壁。笑人
间无此,小窗幽阒。浪远微听葭叶响,雨残细
数梧梢滴。正依稀、梦到故人家,谁横笛。

探芳信 菊

翠吟悄。似有人黄裳 ,孤伫埃表。渐老侵芳岁 ,识君恨不早。料应陶令吟魂在 ,凝此秋香妙。傲霜姿 ,尚想前身 ,倚窗余傲。

回首醉年少。控骏马蓉边 ,红骈茸帽。淡泊东篱 ,有谁肯、梦飞到。正襟三诵悠然句 ,聊遣花微笑。酒休赊 ,醒眼看花正好。

梅花引 荆溪阻雪

白鸥问我泊孤舟。是身留。是心留。心若留时、何事锁眉头。风拍小帘灯晕舞 ,对闲影、冷清清 ,忆旧游。

旧游旧游今在不。花外楼。柳下舟。梦也梦也 ,梦不到、寒水空流。漠漠黄云、湿透木绵裘。都道无人愁似我 ,今夜雪 ,有梅花 ,似我愁。

洞仙歌 对雨思友

世间何处 ,最难忘杯酒。惟是停云想亲友。此时无一盞 ,千种离愁 ,西风外 ,长伴枯荷衰柳。

去年深夜语 ,倾倒书□ ,窗烛心悬小红豆。记得到门时 ,雨正萧萧 ,嗟今雨、此情非旧。待与子、相期采黄花 ,又未卜重阳 ,果能晴否。

又 柳

枝枝叶叶 ,受东风调弄。便是莺穿也微

全宋词 蒋捷

动。自鹅黄千缕 ,数到飞绵 ,闲无事 ,谁管将春迎送。

轻柔心性在 ,教得游人 ,酒舞花吟恣狂纵。
更谁家鸾镜里 ,贪学纤蛾 ,移来傍、妆楼新种。
总不道、江头锁清愁 ,正雨渺烟茫 ,翠阴如梦。

最高楼 催春

新春景 ,明媚在何时。宜早不宜迟。软尘巷陌青油幌 ,重帘深院画罗衣。要些儿 ,晴日照 ,暖风吹。

一片片、雪儿休要下。一点点、雨儿休要洒。
才恁地 ,越愆期。悠悠不趁梅花到 ,匆匆枉带柳花飞。
倩黄莺 ,将我语 ,报春归。

祝英台 次韵

柳边楼 ,花下馆。低卷绣帘半。帘外天丝 ,扰扰似情乱。
知他蛾绿纤眉 ,鹅黄小袖 ,在何处、闲游闲玩。

最堪叹。箏面一寸尘深 ,玉柱网斜雁。谱字红蔫 ,剪烛记同看。
几回传语东风 ,将愁吹去 ,怎奈向、东风不管。

风入松 戏人去妾

东风方到旧桃枝。仙梦已云迷。画阑红子擗搦处 ,依然是、春昼帘垂。
恨杀河东狮子 ,惊回海底鸥儿。

全宋词 蒋捷

寻芳小步莫嫌迟。此去却慵移。断肠不在分襟后，元来在、襟未分时。柳岸犹携素手，兰房早掩朱扉。

解佩令 春

春晴也好。春阴也好。著些儿、春雨越好。春雨如丝，绣出花枝红袅。怎禁他、孟婆合皂。

梅花风小。杏花风小。海棠风，蓦地寒峭。岁岁春光，被二十四风吹老。楝花风、尔且慢到。

一剪梅 宿龙游朱氏楼

小巧楼台眼界宽。朝卷帘看。暮卷帘看。故乡一望一心酸。云又迷漫。水又迷漫。

天不教人客梦安。昨夜春寒。今夜春寒。梨花月底两眉攒。敲遍阑干。拍遍阑干。

又 舟过吴江

一片春愁待酒浇。江上舟摇。楼上帘招。秋娘度与泰娘娇。风又飘飘。雨又萧萧。

何日归家洗客袍。银字笙调。心字香烧。流光容易把人抛。红了樱桃。绿了芭蕉。

糖多令 寿东轩

秋碧泻晴湾。楼台云影闲。记仙家、元在蓬山。飞到雁峰尘更少，三万顷、玉无边。

全宋词 蒋捷

金盏倒垂莲。歌摇香雾鬢。任芙蓉、月转朱阑。天气已凉犹未冷，重九后、小春前。

柳梢青 有谈旧娼潘氏

小饮微吟，残灯断雨，静户幽窗。几度花开，几番花谢，又到昏黄。

潘娘不是潘郎。料应也、霜黏鬓旁。鸚鵡阑空，鸳鸯壶破，烟渺云茫。

阮郎归 客中思马迹山

雪飞灯背雁声低。寒生红被池。小屏风畔立多时。闲看番马儿。

新搵泪，旧题诗。一般罗带垂。琼箫夜夜挟愁吹。梅花知不知。

金蕉叶 秋夜不寐

云褰翠幕。满天星碎珠迸索。孤蟾阑外，照我看看过转角。

酒醒寒砧正作。待眠来、梦魂怕恶。枕屏那更，画了平沙断雁落。

忆秦娥 闾閻

山无限。登山试望吴宫殿。吴宫殿。是藏深坞，是临清浅。

全宋词 蒋捷

谒金门 三首全阙

菩萨蛮 二首全阙

卜算子 二首全阙

霜天晓角 五首全阙

点绛唇 二首全阙

昭君怨 卖花人

担子挑春虽小。白白红红都好。卖过巷东家。巷西家。

帘外一声声叫。帘里鸦鬟入报。问道买梅花。买桃花。

如梦令

夜月溪篁鸾影。晓露岩花鹤顶。半世踏红尘,到底输他村景。村景。村景。樵斧耕蓑渔艇。

小重山

晴浦溶溶明断霞。楼台摇影处,是谁家。银红裙衩皱宫纱。风前坐,闲斗郁金芽。
人散树啼鸦。粉团黏不住,旧繁华。双龙尾上月痕斜。而今照,冷淡白菱花。

又

曾伴芳卿锵佩环。西风吹梦断,堕人寰。假饶无分入雕阑。窥妆镜,也合小溪湾。
此地有谁怜。斜阳牛卧处,牧童攀。劝花休苦恨天天。从来道,薄命是朱颜。

白苧

正春晴,又春冷,云低欲落。琼苞未剖,早是东风作恶。旋安排、一双银蒜镇罗幕。幽壑。水生漪,皱嫩绿、潜鳞初跃。恹恹门巷,桃树红才约略。知甚时,霁华烘破青青萼。

忆昨。□□□□,引蝶花边,近来重见,身学垂杨瘦削。问小翠眉山,为谁攒却。斜阳院宇,任蛛丝罥遍,玉笋弦索。户外惟闻,放剪刀

全宋词 蒋捷

声 深在妆阁。料想裁缝 白苧春衫薄。

蝶恋花 风莲

我爱荷花花最软。锦拶云挨 朵朵娇如
颤。一阵微风来自远。红低欲蘸凉波浅。
莫是羊家张静婉。抱月飘烟 舞得腰肢
倦。偷把翠罗香被展。无眠却又频翻转。

虞美人 梳楼

丝丝杨柳丝丝雨。春在溟濛处。楼儿忒
小不藏愁。几度和云飞去、觅归舟。
天怜客子乡关远。借与花消遣。海棠红
近绿阑干。才卷朱帘却又、晚风寒。

又 听雨

少年听雨歌楼上。红烛昏罗帐。壮年听
雨客舟中。江阔云低、断雁叫西风。
而今听雨僧庐下。鬓已星星也。悲欢离
合总无情。一任阶前、点滴到天明。

南乡子

泊雁小汀洲。冷淡湔裙水漫秋。裙上唾
花无觅处 重游。隔柳惟存月半钩。
准拟架层楼。望得伊家见始休。还怕粉
云天未起 悠悠。化作相思一片愁。

又 塘门元宵

翠幌夜游车。不到山边与水涯。随分纸

全宋词 蒋捷

灯三四盏 ,邻家。便做元宵好景夸。

谁解倚梅花。思想灯球坠绛纱。旧说梦华犹未了 ,堪嗟。才百余年又梦华。

步蟾宫 木犀

绿华翦碎娇云瘦。剩妆点、菊前蓉后。娟娟月也染成香 ,又何况、纤罗襟袖。秋窗一夜西风骤。翠奁锁、琼珠花镂。人间富贵总腥膻 ,且和露、攀花三嗅。

又 春景

玉窗掣锁香云涨。唤绿袖、低敲方响。流苏拂处字微讹 ,但斜倚、红梅一饷。

濛濛月在帘衣上。做池馆、春阴模样。春阴模样不如晴 ,这催雪、曲儿休唱。

玉楼春 桃花湾马迹

秦人占得桃源地。说道花深堪避世。桃花湾内岂无花 ,吕政马来拦不住。

明朝与子穿花去。去看霜蹄剌石处。茫茫秦事是耶非 ,万一问花花解语。

恋绣衾

茜金小袖花下行。过桥亭、倚树听莺。被柳线、低萦鬓 ,绀云垂、钗凤半横。

蔷薇影转晴窗昼 ,漾兰心、未到绣缡。奈一点、春来恨 ,在青蛾、弯处又生。

浪淘沙

人爱晓妆鲜。我爱妆残。翠钗扶住欲敲
鬟。印了夜香无事也，月上凉天。

新谱学筝难。愁涌蛾弯。一床衾浪未红
翻。听得人催佯不睬，去洗珠钿。

又 重九

明露浴疏桐。秋满帘栊。掩琴无语意忡
忡。掐破东窗窥皓月，早上芙蓉。

前事渺茫中。烟水孤鸿。一尊重九又成
空。不解吹愁吹帽落，恨杀西风。

燕归梁 风莲

我梦唐宫春昼迟。正舞到、曳裾时。翠云
队仗绛霞衣。慢腾腾、手双垂。

忽然急鼓催将起，似彩凤、乱惊飞。梦回
不见万琼妃。见荷花、被风吹。

步蟾宫 中秋

去年云掩冰轮皎。喜今岁、微阴俱扫。乾
坤一片玉琉璃，怎算得、清光多少。

无歌无酒痴顽老。对愁影、翻嫌分晓。天
公元不负中秋，我自把、中秋误了。

南乡子 黄葵

冷淡是秋花。更比秋花冷淡些。到处芙蓉供醉赏，从他。自有幽人处士夸。

寂寞两三葩。昼日无风也带斜。一片西窗残照里，谁家。卷却湘裙薄薄纱。

行香子 舟宿兰湾

红了樱桃。绿了芭蕉。送春归、客尚蓬飘。昨宵谷水，今夜兰皋。奈云溶溶，风淡淡，雨潇潇。

银字笙调。心字香烧。料芳悰、乍整还凋。待将春恨，都付春潮。过窈娘堤，秋娘渡，泰娘桥。

粉蝶儿 残春

啼鸠声中，春光化成春梦。问东君、仗谁诗送。燕怜晴，莺爱暖，一窗芳哄。奈匆匆、催他柳绵狂纵。

轻罗扇小，桐花又飞么凤。记寒吟、沁梅霜冻。古今□，人易老，莫闲双鞚。尚堪游、荼蘼粉云香洞。

翠羽吟

响林王君本示予越调小梅花引，俾以飞仙步虚之

意为其辞。予谓泛泛言仙,似乎寡味,越调之曲与梅花宜,罗浮梅花,真仙事也。演而成章,名翠羽吟

绀露浓。映素空。楼观峭玲珑。粉冻霁英,冷光摇荡古青松。半规黄昏淡月,梅气山影溟濛。有丽人、步依修竹,萧然态若游龙。绡袂微皱水溶溶。仙茎清瀟,净洗斜红。劝我浮香桂酒,环佩暗解,声飞芳霭中。弄春弱柳垂丝,慢按翠舞娇童。醉不知何处,惊翦翦、凄紧霜风。梦醒寻痕访踪。但留残星挂穹。梅花未老,翠羽双吟,一片晓峰。

贺新郎 乡士以狂得罪,赋此饯行

甚矣君狂笑。想胸中、些儿磊砢,酒浇不去。据我看来何所似,一似韩家五鬼。又一似、杨家风子。怪鸟啾啾鸣未了,被天公、捉在樊笼里。这一错,铁难铸。

濯溪雨涨荆溪水。送君归、斩蛟桥外,水光清处。世上恨无楼百尺,装著许多俊气。做弄得、栖栖如此。临别赠言朋友事,有殷勤、六字君听取。节饮食,慎言语。

又 弹琵琶者

妾有琵琶谱。抱金槽、慢捻轻抛,柳梢莺妒。羽调六么弹遍了,花底灵犀暗度。奈敲断、玉钗纤股。低画屏深朱户掩,卷西风、满地吹尘土。芳事往,蝶空诉。

天天把妾芳心误。小楼东、隐约谁家,凤箫鼃鼓。泪点染衫双袖翠,修竹凄其又暮。背灯影、萧条情互。捐佩洲前裙步步,渺无边、一

片相思苦。春去也，乱红舞。

又 题后院画像

绿堕云垂领。背琵琶、盈盈袖手，粉闲红靥。依约春游归来倦，又似春眠未醒。泔寒泚、低迷蓉影。莺带松声飞过也，柳窗深、尚记停针听。魂浩荡，孤芳景。

金钗断股瓶沈并。问苏城、香销卷子，倩谁题咏。灯晕青红残醉在，小院屏昏帐暝。误瞋怪、眉心慵整。人道真真招得下，任千呼万唤无言应。空对此，泪花冷。

摸鱼子 寿东轩

蝉吟鞭、雁峰高处。曾游长寿仙府。年年长见瑶簪会，霞杪盖芝轻度。开绣户。笑万朵香红，剩染秋光素。清箫丽鼓。任泔玉杯深，鸾酣凤醉，犹未洞天暮。

尘缘误。迷却桃源旧步。飞琼芳梦同赋。朝来闻道仙童宴，翘首翠房玄圃。云又雾。身恍到微茫，认得胎禽舞。遥汀近浦。便一苇渔航，撑烟载雨，归去伴寒鹭。

沁园春 寿岳君举

昔裴晋公，生甲辰岁，秉唐相钧。向东都治第，才娱老眼，北门建节，又绊闲身。燠馆花浓，凉台月淡，不记弓刀千骑尘。谁堪羨，羨南塘居士，做散仙人。

南塘水向晴云。三百树凤洲杨柳春。有

绿衣奏曲 ,金斜小雁 ,彩衣劝酒 ,玉跪双麟。前后同年 ,逸劳异趣 ,中立翻成雌甲辰。斯言也 ,是梅花说与 ,竹里山民。

喜迁莺 金村阻风

风涛如此 ,被闲鸥诮我 ,君行良苦。榭叶深湾 ,芦窠窄港 ,小憩倦篙慵橹。壮年夜吹笛去 ,惊得鱼龙噪舞。怅今老 ,但篷窗紧掩 ,荒凉愁悃。

别浦。云断处。低雁一绳 ,拦断家山路。佩玉无诗 ,飞霞乏序 ,满席快飙谁付。醉中几番重九 ,今度芳尊孤负。便晴否。怕明朝蝶冷 ,黄花秋圃。

又

晴天寥廓。被孤云画出 ,离愁消索。玉局弹棋 ,金钗剪烛 ,芳思可胜摇落。镜妆为慵迟晚 ,笙曲缘愁差错。倒纤指 ,□从头细数 ,年时同乐。

寂寞。花院悄 ,昨夜醉眠 ,梦也难凭托。车角生时 ,马蹄方后 ,才始断伊漂泊。闷无半分消遣 ,春又一番担阁。倚阑久 ,奈东风忒冷 ,红绡单薄。

齐天乐 元夜阅梦华录

银蟾飞到觚棱外。娟娟下窥龙尾。电紫鞘轻 ,云红笈曲 ,雕玉舆穿灯底。峰缯岫绮。沸一簇人声 ,道随竿媚。侍女迎銮 ,燕娇莺姹

炫珠翠。

华胥仙梦未了,被天公颶洞,吹换尘世。淡柳湖山,浓花巷陌,惟说钱塘而已。回头汴水。望当日宸游,万□□□。但有寒芜,夜深青磷起。

念奴娇 梦有奏方响而舞者

夜深清梦,到丛花深处,满襟冰雪。人在琼云方响乐,杳杳冲牙清绝。翠篋翔龙,金枳跃凤,不是蕤宾铁。凄锵仙调,风敲珠树新折。中有五色光开,参差帔影,对舞山香彻。雾阁云窗归去也,笑拥灵君旌节。六曲阑干,一声鸚鵡,霍地空花灭。梦回孤馆,秋笳霜外呜咽。

应天长 次清真韵

柳湖载酒,梅墅除棋,东风袖里寒色。转眼翠笼池阁,含樱荐莺食。匆匆过、春是客。弄细雨、昼阴生寂。似琼花、谪下红裳,再返仙籍。

无限倚阑愁,梦断云箫,鹃叫度青壁。漫有戏龙盘□,盈盈住花宅。骄骢马、嘶巷陌。户半掩、堕鞭无迹。但追想,白苧裁缝,灯下初识。

贺新郎 櫟括杜诗

绝代幽人独。掩芳姿、深居何处,乱云深

谷。自说关中良家子,零落聊依草木。世丧
败、谁收骨肉。轻薄儿郎为夫婿,爱新人、窈窕
颜如玉。千万事,风前烛。

鸳鸯一旦成孤宿。最堪怜、新人欢笑,旧
人哀哭。侍婢卖珠回来后,相与牵萝补屋。漫
采得、柏枝盈掬。日暮山中天寒也,翠绡衣、薄
甚肌生粟。空敛袖,倚修竹。

玉漏迟 寿东轩

客窗空翠杪。前生饮惯,长生琼醪。回首
红尘,换了□花幌草。隔水神仙洞府,也只有、
飞霞能到。谁信道。西风送我,还陪清啸。

缥渺。柳侧双楼,正绣幕围春,露深烟悄。
鱼尾停时,雪上鬢云犹少。醉傍芙蓉自语,愿
来此、年年簪帽。青屿小。鹤立淡烟秋晓。

又

傅岩隐木如武林,纳浴堂徐氏女子于客楼。其归
也,亦贮之所居楼上,而图西湖景于楼壁

翠鸳双穗冷。莺声唤转,春风芳景。花涌
□香,此度徐妆偏称。水月仙人院宇,到处有、
西湖如镜,烟岫暝。纤葱误指,莲峰篁岭。

料想小阁初逢,正浪拍红猊,袖飞金饼。
楼倚斜晖,暗把佳期重省。万种惺忪笑语,□
一点、温柔情性。钗倦整。盈盈背灯娇影。

高阳台 江阴道中有怀

宛转怜香,徘徊顾影,临芳更倚苔身。多

谢残英 ,飞来远远随人。回头却望晴檐下 ,等几番、小摘微薰。到而今、独袅鞭梢 ,笑不成春。

愁吟未了烟林晓 ,有垂杨夹路 ,也为轻嘶。今夜山窗 ,还□□绕梨云。行囊不是吴笺少 ,问倩谁、去写花真。待归时 ,叶底红肥 ,细雨如尘。

探春令

玉窗蝇字记春寒 ,满茸丝红处。画翠鸳、双展金蛸翅。未抵我、愁红腻。

芳心一点天涯去。絮濛濛遮住。旧对花、弹阮纤琼指。为粉靥、空弹泪。

秋夜雨 秋夜

黄云水驿秋茄噎。吹人双鬓如雪。愁多无奈处 ,漫碎把、寒花轻撷。

红云转入香心里 ,夜渐深、人语初歇。此际愁更别。雁落影、西窗斜月。

又 蒋正夫令作春夏冬各一阕 ,次前韵

金衣露湿莺喉噎。春情不解分雪。宝箏弦断尽 ,但万缕、闲愁难撷。

长红小白谁亭馆 ,过禁烟、弹指芳歇。今夜休要别。且醉宿、绡桃花月。

又

髡车转急风如噎。冰丝松藕新雪。有人

凉满袖 ,怕汗湿、红绡犹挽。

三更梦断敲荷雨 ,细听来、疏点还歇。茉莉标致别。占断了、纱厨香月。

又

红麟不暖瓶笙噎。炉灰一片晴雪。醉无香嗅醒 ,但手把、新橙闲挽。

更深冻损梅花也 ,听画堂、箫鼓方歇。想是天气别。豫借与、春风三月。

少年游

梨边风紧雪难晴。千点照溪明。吹絮窗低 ,唾茸窗小 ,人隔翠阴行。

而今白鸟横飞处 ,烟树渺乡城。两袖春寒 ,一襟春恨 ,斜日淡无情。

又

枫林红透晚烟青。客思满鸥汀。二十年来 ,无家种竹 ,犹借竹为名。

春风未了秋风到 ,去年万缘轻。只把平生 ,闲吟闲咏 ,谱作棹歌声。

柳梢青 游女

学唱新腔。秋千架上 ,钗股敲双。柳雨花风 ,翠松裙褶 ,红膩鞋帮。

归来门掩银缸。淡月里、疏钟渐撞。娇欲人扶 ,醉嫌人问 ,斜倚楼窗。

全宋词 蒋捷

霜天晓角

人影窗纱。是谁来折花。折则从他折去，
知折去、向谁家。

檐牙。枝最佳。折时高折些。说与折花
人道，须插向、鬓边斜。

蒋氏女

减字木兰花 题雄州驿

朝云横度。辘轳车声如水去。白草黄沙。
月照孤村三两家。

飞鸿过也。万结愁肠无昼夜。渐近燕山。
回首乡关归路难。

蒋元龙

好事近

叶暗乳鸦啼，风定老红犹落。蝴蝶不随春去，入薰风池阁。

休歌金缕劝金卮，酒病煞如昨。帘卷日长人静，任杨花飘泊。

阮郎归 春雨

小池芳草绿初匀。柳寒眉尚颦。东风吹雨细于尘。一庭花脸皴。

莺共蝶，怨还嗔。眼前无好春。这般天气煞愁人。人愁旋旋新。

乌夜啼

小桃落尽残红。夜来风。又是一番春事、不从容。翠屏掩。芳信断。转愁浓。可惜日长闲暇、小帘栊。

蒋璨

青玉案

三年枕上吴中路。遣黄耳、随君去。欲
过松江呼小渡。莫惊鸥鹭，四桥都是，老子
经行处。

辋川图上看春暮。长忆高人右丞句。作
个归期天未许。春衫犹是，小蛮针线，曾湿
西湖雨。

解 昉

永遇乐 春情

风暖莺娇，露浓花重，天气和煦。院落烟收，垂杨舞困，无奈堆金缕。谁家巧纵，青楼弦管，惹起梦云情绪。忆当时、纹衾粲枕，未尝暂孤鸳侣。

芳菲易老，故人难聚。到此翻成轻误。阆苑仙遥，蛮笺纵写、何计传深诉。青山绿水，古今长在，惟有旧欢何处。空赢得、斜阳暮草，淡烟细雨。

阳台梦

仙姿本寓。十二峰前住。千里行云行雨。偶因鹤驭过巫阳。邂逅他、楚襄王。

无端宋玉夸才赋。诬诞人心素。至今狂客到阳台。也有痴心，望妾入、梦中来。

金 德 淑

望江南

春睡起，积雪满燕山。万里长城横玉带，
六街灯火已阑珊，人立蓟楼间。

空懊恼，独客此时还。辔压马头金错落，
鞍笼驼背锦斓班。肠断唱门关。

金 淑 柔

浪淘沙 丰城道中

雨溜和风铃。滴滴丁丁。酿成一枕别离情。可惜当年陶学士，孤负邮亭。
边雁带秋声。音信难凭。花须偷数卜归程。料得到家秋正晚，菊满寒城。

锦 溪

木兰花 和人女试偈

华堂庆晬。一岁应须千百岁，乐事如何。
寿酒斟时妹拜哥。

爹夸利市。笑道看看生舍弟。同著莱衣。
玉树森森奉寿卮。

壶中天 寿陈碧山 十一月十五日

骑鲸直上，问姮娥何日，天生英杰。笑
下琼楼，还报道，甫近迎长佳节。万里无云，
一天如水，拥出新团月。正当此夜，文星飞
下天阙。

蟾苑元有高枝，至今犹待，自是无心折。
只爱林泉供笑傲，吟出阳春白雪。冠玉精神，
希夷仙种，秘受长生诀。蓬壶不老，待看兰
玉英发。

满江红 寿八十老人 十一月十六日

蓬岛仙翁，元来是、神钟岳渎。喜遇生
申时节，一阳来复，萸萸合朝曾舞翠，月华

全宋词 锦 溪

昨夜圆如玉。展红笺、泚笔染新章，从头录。

渭川叟，非钩禄。鲁公子，非微福。况家传、胡氏长生篆。点额婴儿腾好语，殷勤捧献杯中绿。更九番、屈指箴铿年，为君祝。

京 鏗

醉落魄

观碧鸡坊王园海棠次范石湖韵

芳尘休扑。名花唤我相追逐。浅妆不比梅敲竹。深注朱颜，娇面称红烛。

阿娇合贮黄金屋。是谁却遣来空谷。酡颜遍倚阑干曲。一段风流，不枉到西蜀。

好事近 次卢漕国华七夕韵

急雨逐骄阳，洗出长空新月。更对银河风露，觉今宵都别。

不须乞巧拜中庭，枉共天孙说。且信平生拙极，耐岁寒霜雪。

又 同茶漕二使者登大慈寺楼，次前韵

杰阁耸层霄，几度晓风残月。同是鸕行旧侣，慰十年离别。

一杯相属莫留残，试倚阑干说，趁取簪花绿鬓，未骎骎如雪。

定风波 次杨茶使七夕韵

何必穿针上彩楼。剖瓜插竹诉穷愁。闻道天孙相会处，银汉无津，不待泛兰舟。

动是隔年寻素约，何似，每逢清梦且嬉游。但得举杯开笑口，对月临风，总胜鹊桥秋。

又 次韵

休卧元龙百尺楼。眼高照破古今愁。若不擎天为八柱，且学鸱夷，归泛五湖舟。

万里西南天一角，骑气乘风，也作等闲游。莫道玉关人老矣，壮声凌云，依旧不惊秋。

水调歌头 次卢漕韵呈茶漕二使

杨卢万人杰，见我眼俱青。锦官城里胜概，在在款经行。笔底烟云飞走，胸次乾坤吐纳，议论总纵横。觉我形秽处，相并玉壶清。

二使者，弦样直，水般平。岷峨洗净凄怆，威与惠相并。闻道东来有诏，却恐西留无计，顿使雪山轻。滚滚蜀江水，不尽是声名。

满江红 中秋前同二使者赏月

乘兴西来，问谁是、平生相识。算惟有、

瑶台明月，照人如昔。万里清凉银世界，放教千丈冰轮出。便招邀、我辈上层楼，横孤笛。

阴晴事，人难必。欢乐处，天常惜。幸星稀河澹，云收风息。更著两贤陪胜赏，此身如与尘寰隔。笑谪仙、对影足成三，空孤寂。

又 中秋邀茶漕二使者，不见月

喜见中秋，急载酒、登楼邀月。谁料得、狂风作祟，浮云为孽。孤负阑干凝望眼，不教宝鉴悬银阙。但筵前、依旧舞腰斜，歌喉咽。

阴与霁，圆并缺。难指准，休分别。况赏心乐事，从来磨折。常把一尊陪笑语，也胜虚度佳时节。怪坡仙、底事太愁生，惊华发。

又 次卢漕高秋长短句，并呈都大

才近重阳，喜风露、酝成爽气。应料有、悲秋情绪，澹妆慵试。黄菊篱边开遍否，紫鸿塞外归来未。但倚阑、高处望长空，无穷意。

名利鼎，从渠沸。穷达路，非人致。又何须咄咄，向空书字。西风正好狂吹帽，庾尘那解关吾事。纵嬉游、也不学山翁，如泥醉。

木兰花慢 重九

算秋来景物，皆胜赏、况重阳。正露冷

全宋词 京 鏗

欲霜，烟轻不雨，玉宇开张。蜀人从来好事，
遇良辰、不肯负时光。药市家家帘幕，酒楼
处处丝簧。

婆娑老子兴难忘。聊复与平章。也随分
登高，茱萸缀席，菊蕊浮觞。明年未知谁健，
笑杜陵、底事独凄凉。不道频开笑口，年年
落帽何妨。

绛都春 元宵

升平似旧。正锦里元夕，轻寒时候。十
里轮蹄，万户帘帷香风透。火城灯市争辉照。
谁撒□、满空星斗。玉箫声里，金莲影下，
月明如昼。

知否。良辰美景，□丰岁乐国，从来希
有。坐上两贤，白玉为山联翩秀。笙歌一片
围红袖。切莫遣、铜壶催漏。杯行且与邦人，
共开笑口。

满江红 浣花因赋

锦里先生，草堂筑、浣花溪上。料饱看、
阶前雀食，篱边渔网。跨鹄骑鲸归去后，桥
西潭北留佳赏。况依然、一曲抱村流，江痕
涨。

鱼龙戏，相浩荡。禽鸟乐，增舒畅。更
绮罗十里，棹歌来往。上坐英贤今李郭，邦
人应作仙舟想。但□呼、落日未西时，船休
放。

念奴娇 七夕，是年七月九日方立秋

扞参历井，恰匆匆三见，西州七夕。怪得骄阳回避晚，犹去新秋两日。天上良宵，人间佳节，初不分今昔。夜来急雨，洗成风露清绝。

因念万里飘零，君平何在，谁识乘槎客。插竹剖瓜休妄想，巧处那容人乞。院宇初凉，楼台不夜，漫说经年隔。引杯长啸，醉看天地空阔。

水调歌头 中秋

明月四时好，何事喜中秋。瑶台宝鉴，宜挂玉宇最高头。放出白毫千丈，散作太虚一色，万象入吾眸。星斗避光彩，风露助清幽。

等闲来，天一角，岁三周。东奔西走，在处依旧若从游。照我尊前只影，催我镜中华发，蟾兔漫悠悠。连璧有佳客，乘兴且登楼。

洞仙歌 重九药市

三年锦里，见重阳药市。车马喧阗管弦沸。笑篱边孤寂，台上疏狂，争得似，此日西南都会。

痴儿官事了，乐与民同，况值高秋好天

气。□不羞华发，不照衰颜，聊满插、黄花一醉。道物外、高人有时来，问混杂龙蛇，个中谁是。

水龙吟 寿王漕，是日冬至

夜来井络参躔，使星一点明如昼。谁将天上麒麟，钟作人间英秀。从橐仪刑，御屏名姓，暂烦衣绣。问西川父老，新来喜跃，缘何事、曾知否。

今代澄清妙手。为公家、忧心如疚。几年繁赋，一朝输代，恩民特厚。初度佳辰，恰逢长至，从来希有。但只将一部，欢声百万，与公为寿。

汉宫春 寿李都大

看透尘寰。更禅心似水，道力如山。前身青冥跨鹤，紫府乘鸾。世缘一念，便等闲、游戏人间。须信道，云霄步武，不应权牧西南。

此日重临初度，正绣衣辉映，彩服斓斑。人生显途易到，荣养难攀。一时庆事，问谁家、得似门阑。知未艾，百千寿算，慈闱长奉亲欢。

又 元宵十四夜作，是日立春

暖律初回。又烧灯市井，卖酒楼台。谁将星移万点，月满千街。轻车细马，隘通衢、蹴起香埃。今岁好，土牛作伴，挽留春色同

来。

不是天公省事，要一时壮观，特地安排。
何妨彩楼鼓吹，绮席尊罍。良宵胜景，语邦
人、莫惜徘徊。休笑我，痴顽不去，年年烂
醉金钗。

洞仙歌 次王漕邀赏海棠韵

东皇著意，妙出妆春手。点缀名花胜于
绣。向鱼凫国里，琴鹤堂前，仍共赏，蜀锦
堆红炫昼。

妖娆真绝艳，尽是天然，莫恨无香欠檀
口。幸今年风雨，不苦摧残，还肯为、游人
再三留否。算魏紫姚黄号花王，若定价收名，
未应居右。

念奴娇 上巳日游北湖

锦城城北，有平湖、仿佛西湖西畔。载
酒郊垌修禊事，雅称兰舟同泛。麦垅黄轻，
桤林绿重，莫厌春光晚。棹歌声发，飞来鸥
鹭惊散。

好是水涨弥漫，山围周匝，不尽青青岸。
除却钱塘门外见，只说此间奇观。句引游人，
追陪佳客，三载成留恋。古今陈迹，从教分
付弦管。

满江红 次宇文总领上巳日游湖韵

雨后晴初，觉春在、桤村柳陌。修禊事、

郊垞寻胜，特邀君出。缭绕群山疑虎踞，弥漫一水容鲸吸。怪西湖、底事却移来，龟城北。

酬令节，逢佳日。风递暖，烟凝碧。趁兰舟游玩，尽杯中物。十里轮蹄尘不断，几多粉黛花无色。笑杜陵、昔赋丽人行。空遗迹。

念奴娇

次宇文总领游北湖韵，并引伏蒙宫使总领郎中再宠賕鄙句为贶，愈出愈奇。辄复赋一首以谢万分，并述所怀。

郎闾夙望，问何因袖手，双流溪畔。忆昔班行曾接武，今喜一尊同泛。骥枥难淹，鹏程方远，大器成须晚，等闲访我，又惊云雨分散。最是游子悲乡，小人怀土，梦绕江南岸。楚尾吴头家住处，满目山川遐观。归兴虽浓，俞音尚阙，此地非贪恋。东西惟命。去留迟速休管。

水调歌头 井序

伏蒙都运都大判院以某新建驷马楼落成有日，宠赐佳词，为郡邑之光。辄勉继严韵，以谢万分。

百堞龟城北，江势远连空。杠梁济涉，浑似溪涧饮长虹。覆以翠飞华宇，载以鱼浮叠石，守护有神龙。好看发源水，滚滚尽流东。

司马氏，凌云气，盖群公。当年题柱，

从此奉赋动天容。果驾轺车使蜀，能致诸蛮臣汉，邛笮道仍通。寄语登桥者，努力继前功。

念奴娇 并引

某丐归得请，有旨候代者入境方许其去。适修浣花故事，因成长短句，呈都运都大判院，伏冀一噓。

绣天锦地，浣花溪风物，尤为奇绝。无限兰舟相荡漾，缯彩重重装结。冀国遗踪，杜陵陈迹，疑信俱休说。笙歌丛里，旌旗光映林樾。

自笑与蜀缘多，沧浪亭下，饱看烟波阔。屡疏求归才请得，知我家山心切。已是行人，犹陪佳客，莫放回船发。来年今日，相思惟共明月。

洞庭春色 次宇文总领韵

命驾访嵇，泛舟思戴，此兴甚浓。料情侔杨恽，乌乌拊缶，意轻殷浩，咄咄书空。莫讶群芳淹速异，到时序推排元自同。休怅望，任春来桃李，秋后芙蓉。

因嗟锦城四载，漫赢得、齿豁头童。叹里门密迩，易成间阔，诗筒频寄，难续新工。我已怀归今得请，念此地迟回谁似公。经济手，看鸾台凤阁，晚节收功。

满江红 壬子年成都七夕

雨洗新秋，遣凉意、驱除残暑。还又是、天孙河鼓，一番相遇。银汉桥成乌鹊喜，金奁丝巧蜘蛛吐。见几多、结彩拜楼前，穿针女。

舟楫具，将归去。尊俎胜，休匆遽。被西川七夕，四回留住。此地关心能几辈，他年会面知何处。更倚阑、豪饮莫辞频，歌金缕。

贺新郎 中秋

试与姮娥语。问因何、年年此夜，月明如许。万顷溶成银世界，是处玉壶风露。又岂比、寻常三五。变化乾坤同一色，觉星躔、斗柄皆回互。须要我，共分付。

平生脚踏红尘处。漫纷纷、鸡虫厚薄，燕鸿来去。只有婵娟多情在，依旧当时雅素。空自叹、归心难住。留取清光岷江畔，照扁舟、送我章江路。频引满，莫匆遽。

雨中花 重阳

玉局祠前，铜壶阁畔，锦城药市争奇。正紫萸缀席，黄菊浮卮。巷陌联镳并辔，楼台吹竹弹丝。登高望远，一年好景，九日佳期。

自怜行客，犹对佳宾，留连岂是贪痴。
谁会得、心驰北阙，兴寄东篱。惜别未催鹧
首，追欢且醉蛾眉。明年此会，他乡今日，
总是相思。

又 次阎侍郎韵

跨鹤仙姿，掣鲸老手，从来眼赤腰黄。
更词源峡水，才刃干将。处处欢谣载路，时
时秀句盈囊。牛头山畔，烦公敛惠，许我分
光。

逢迎锦里，话旧从容，谁知各整行装。
况正好、登高怀古，择胜寻芳。少缓红莲开
幕，何妨黄菊浮觞。等闲分首，征尘去后，
目断斜阳。

瑞鹤仙 次宇文总领韵

鸳行旧俦侣。问底事、迟回西州西处，
闲居久如许。想邻翁对饮，诗人联句。夤缘
会遇。过高轩、相逢喜舞。正菊天、景物澄
鲜，切莫趣归言去。

看取。星扉月户。雾阁云窗，非公孰住。
从容笑语。人生易别难聚。恨分违有日，留
连无计，满目离愁忍觑。若他时、鱼雁南来，
把书寄与。

水调歌头 次王运使韵

身去日华远，举首望长安。四年留蜀，
那复有梦到金銮。遥想将芜三径，自笑已穷

五技，无语倚阑干。欲作天涯别，犹对俎尊闲。

秋意晚，风色厉，叶声乾。阳关三叠缓唱，一醉且酡颜。聚散燕鸿南北，得失触蛮左右，莫较去仍还。后日相思处，烟水与云山。

水龙吟 次利漕范右司韵

四年留蜀惭无补，好是求归得去。风帆百尺，烟波万里，宁辞掀舞。楚尾吴头，我家何在，西山南浦。想珠帘画栋，倚阑凝望，依然卷云飞雨。

最好九霞光处。见当时、结知明主。冰霜节操，斗星词采，羽仪朝路。邂逅开怀，等闲分手，满斟绿醕。道日边好语，相将飞下，有人知否。

满江红 次潼川漕刘殿院韵

外省抡才，诏书下、芝泥犹湿。应料得、出奇锦绣，争辉金碧。三级浪高鱼已化，九霄路远鹏方息。有宗工、此地独持衡，将专席。

岁月晚，霜风急。嗟老子，为行客。念昔陪班缀，今亲辞色。握手方成同社款，消魂又作歧亭别。也不须、因赋大刀头，归心折。

念奴娇 次洋州王郎中韵

文章太守，问何事、犹带天庭黄色。上界一时官府足，聊下神仙宫阙。剖竹新游，握兰旧梦，此意谁人识。千军笔阵，争先曾夺矛槊。

好是万里相逢，一尊同醉，倾吐平边策。聚散人生浑惯见，莫为分襟呜咽。借箸机筹，著鞭功业，只合从君说。明朝回首，天涯何处风月。

水调歌头 次果州冯宗丞韵

袞袞长江水，策策晓霜风。求归得请，特地送我布帆东。出处何关轻重，去住不拘淹速，社燕与秋鸿。父老休相恋，四载愧无功。

谁知有，楼百尺，卧元龙。来从天上，一麾游戏斗牛中。闻道君王前席，见说从臣虚位，变化待鯤鸿。一笑同锦里，万事付金钟。

水龙吟 次邛州赵守韵

推移随牒红尘里，试问几时肩息。家乡何在，烟迷波渺，云横山屹。分阃无功，临民有愧，裤今襦昔。想征帆万里，阳关三叠，肠空断、人谁忆。

多谢殷勤绮席。苦留连、不容浮鷁。九霞光外，五云深畔，君宜鹄立。自笑衰迟，未能轩轻，漫劳嘘吸。愿锋车趣召，吴天楚地，相逢他日。

酹江月 次眉州李大著韵

螭颐江畔，问收拾多少，山光水色。此是朝宗东去路，准拟鸣鷁浮鷁。儒馆英游，侯藩贤望，便合还丹极。九重渴想，甘泉闻道虚席。

因念北阙同朝，西州联事，久矣心相得。邂逅天涯拚一笑，洗我尘胸俗臆。报国无功，归田有兴，寤寐松坡侧。他时音问，且凭来信鳞翼。

水调歌头 次永康白使君韵

与蜀有缘法，见我眼俱青。征车到处，弦管无限作离声。自笑四年留滞，漫说三边安静，分阃愧长城。一念天地阔，万事羽毛轻。

欲归去，诗入社，酒寻盟。駸駸双鬓，老矣祇觉壮心惊。虽是东西惟命，已断行藏在已，何必问君平。举似铜梁守，怀抱好同倾。

又 奉陪永康白使君游青城再次韵

雪岭倚空白，霜柏傲寒青。千岩万壑奇秀，禽鸟寂无声。好是群贤四集，同访宝仙

九室，中有玉京城。眼底尘嚣远，胸次利名轻。

云山旁，烟水畔，肯渝盟。传呼休要喝道，方外恐猜惊。雅羨林泉胜概，倘遂田园归计，志愿足平生。此意只自解，聊复为君倾。

又 留别茶漕二使者

数月已办去，今日始成行。天公怜我，特地趁晓作霜晴。万里奔驰为米，四载淹留为豆，自笑太劳生。父老漫遮道，抚字愧阳城。

君有命，难俟驾，合兼程。故山心切，猿鹤应是怨仍惊。多谢使华追路，不忍客亭分袂，已醉酒犹倾。莫久西南住，汉代急公卿。

满江红 次杨提刑韵

道骨仙风，合笞凤、鞭鸾归去。底事为、三峨九顶，等闲留住。揽辔聊施经济手，凝旒屡出褒嘉语。算只今、人物更谁归，心如许。

嗟我拙，才不武。惭我陋，文非古。纵策迟鞭钝，也难追步。虽喜故人逢异县，却嫌游子贪行路、但著公、西掖北门中，相期处。

水调歌头

四载分蜀阃，万里下吴樯。老怀易感，

厌听催别笛横羌。自愧谋非经远，更笑才非任剧，安得召公棠。有志但碌碌，无绩可章章。

汉嘉守，明昼似月，洁如霜。邦人鼓舞，爱戴惟恐趣归忙。况是水曹宗派，仍得苏州句法，燕寝昼凝香。且趁东风去，步武近明光。

又 次前黄州李使君见赠韵

挺挺祖风烈，再岁滞偏州。元龙豪气，宜卧百尺最高楼。万丈文章光焰，一段襟怀洒落，风露玉壶秋。乱石惊涛处，也作等闲游。

适相逢，君去骑，我归舟。清都绛阙密迳，切莫小迟留。趁取亲庭强健，好向圣朝倾吐，事业肯悠悠。回首藩宣地，思与大江流。

静山

摸鱼儿 黄时中入郡幕

晓峰高、飞泉如瀑，潜虬鞭驾轩翥。为他一片韩山石，直到红云天尺五。想应道、公皆安在来何暮。金川小渚。那韶石参天，郡纲宜录，为我分南顾。

锦衣昼，满袖尚疑香雾。催人富贵如许。岭云见说今如砥，凤挟九成迎舞。烦道甫。问金镜铁胎，还记开元否。封词寄与。但目送河桥，吟消醉拍，载酒满江浒。

水龙吟 送人归江西

片帆天际归舟，好风动、吹来消息。浪间双桨，回头春杪，去来几日。十八滩头，水飞如舞，石巉如壁。把连樯白粲，等闲卸却，更呼取、舸艖入。

不羨公家事了，羨二难、一番游历。江花江水，无边风月，不知行役。和郁孤词，倚崆峒剑，唤醒龙蛰。试问君，过我青原，听得几声羌笛。

净 端

渔家傲

斗转星移天渐晓。蓦然听得鶺鴒叫。山寺钟声人浩浩。木鱼噪。渡船过岸行官道。

轻舟再奈长江讨。重添香饵为钩钓。钓得锦鳞船里跳。呵呵笑。思量天下渔家好。

又

浪静西溪澄似练。片帆高挂乘风便。始向波心通一线。群鱼见。当头谁敢先吞咽。

闪烁锦鳞如闪电。灵光今古应无变。爱是憎非都已遣。回头转。一轮明月升苍弁。

又

七宝池中堪下钓。八功德水烟波渺。池底金沙齐布了。羨鱼鸟。周回旋绕为阶道。

白鹤孔雀鸚鵡噪。弥陀接引毫光照。不是修行何得到。一般好。西方净土无烦恼。

又

一只孤舟巡海岸。盘陀石上垂钩线。钓得锦鳞鲜又健。堪爱羨。龙王见了将珠换。

钓罢归来莲苑看。满堂尽是真罗汉。便

爇名香三五片。梵□献。原来佛不夺众生愿。

苏幕遮

遇荒年，每常见。就中今年，洪水皆淹遍。父母分离无可恋。幸望豪民，救取庄稼汉。

最堪伤，何忍见。左寺禅林，翻作悲田院。日夜烧香频□□，祷告皇天，救护开方便。

净 圆

望江南 娑婆苦 六首

娑婆苦，长劫受轮回。不断苦因离火宅，
祇随业报入胞胎。辜负这灵台。

朝又暮，寒暑急相催。一个幻身能几日，
百端机巧袞尘埃。何得出头来。

又

娑婆苦，身世一浮萍。蚊蚋睫中争小利，
蜗牛角上窃虚名。一点气难平。

人我盛，日夜长无明。地狱争头成队入，
西方无个肯修行。空死复空生。

又

娑婆苦，情念骤如风。六贼村中无暂息，
四蛇筐内更相攻。谁是主人公。

无慧力，爱网转关笼。一向四楞低搭地，
不思两脚欲梢空。前路更匆匆。

又

娑婆苦，生老病无常。九窍腥臊流秽污，
一包脓血贮皮囊。争弱又争强。

随妄想，耽欲更荒唐。念佛看经云著相，

破斋毁戒却无妨。祇恐有阎王。

又

娑婆苦，终日走尘寰。不觉年光随逝水，
那堪白发换朱颜。六趣任循环。

今与古，谁肯死前闲。危脆利名才入手，
虚华财色便追攀。荣辱片时间。

又

娑婆苦，光影急如流。宠辱悲欢何日了，
是非人我几时休。生死路悠悠。

三界里，水面一浮沤。纵使英雄功盖世，
祇留白骨掩荒丘。何似早回头。

又 西方好 六首

西方好，随念即超群。一点灵光随落日，
万端尘事付浮云。人世自纷纷。

凝望处，决定去栖神。金地经行光里步，
玉楼宴坐定中身。方好任天真。

又

西方好，琼树耸高空。弥覆七重珠宝网，
庄严百亿妙华宫。宫里众天童。

金地上，栏楯绕重重。华雨飘飘香散漫，
乐音嘹亮鼓清风。闻者乐无穷。

又

西方好，七宝甃成池。四色好华敷菡萏，
八功德水泛清漪。除渴又除饥。

池岸上，楼殿势飞翬。碧玉雕栏填玛瑙，
黄金危栋间玻璃。随处发光辉。

又

西方好，群鸟美音声。华下和鸣歌六度，
光中哀雅赞三乘。闻者悟无生。

三恶道，犹自不知名。皆是佛慈亲变化，
欲宣法语警迷情。心地顿圆明。

又

西方好，清旦供尤佳。缥缈仙云随宝仗，
轻盈衣袂贮天华。十万去非赊。

诸佛土，随念遍河沙。莲掌抚摩亲授记，
潮音清妙响频伽。时至即还家。

又

西方好，我佛大慈悲。但具三心圆十念，
即登九品越三祇。神力不思议。

临报尽，接引定无疑。普愿众生同系念，
金台天乐共迎时。弹指到莲池。

鞠 华 翁

桂枝香 过溧水感羊角哀左伯桃遗事

丁丁起处。在纵牧九京，经烧残树。时见鸟鸢饥噪，鸱鹞妖呼。数间老屋团荒堵。算何人、瓣香来注。淡烟斜照，闲花野棠，杳杳年度。

世事几、番云覆雨，独此道嫌人，抛弃尘土。眼里长青，谁也解如山否。三三五五骑牛伴，望前村、吹笛归去。柳青梨白，春浓月淡，蹋歌椎鼓。

绮寮怨 月下残棋

又见花阴如水，两心犹未平。正坐久、主客成三，空无语、影落楸枰。千年人间事业，垂成处、一著容易倾。便解围、小住何妨，机锋在，瞬息天又明。

甚似汉吴对营。纷纷不了，孤光照彻连城。又似残星，向零落，有余情。姮娥笑人迟暮，念才力、底须争。从亏又成。何人正听隔壁声。

菊翁

朝中措 庆友人 八月十三

桂花庭院是蓬壶。行地列仙图。月姊搀先两日，捧觞来庆垂弧。

坝簾伯仲，翁前再拜，彩袖嬉娱。人羨一经教子，君今满屋皆书。

康与之

望江南

重阳日，四面雨垂垂。戏马台前泥拍肚，
龙山路上水平脐。淹浸倒东篱。

茱萸胖，黄菊湿歪歪。落帽孟嘉寻箬笠，
漉巾陶令买蓑衣。都道不如归。

满江红 婺女潘子贱席上作

叹诗书万卷、致君人，番沈陆。……且置
请纓封万户，径须卖剑酬黄犊。恸当年、寂寞
贾长沙，伤时哭。

鹧鸪天

解将天上千年艳，换得人间九日黄。

忆秦娥

春寂寞。长安古道东风恶。胭脂满地，杏
花零落。

臂销不奈黄金约。天寒犹怯春衫薄。春

衫薄。不禁〔珠〕〔朱〕泪 ,为君弹却。

洞仙歌令

若耶溪路。别岸花无数。欲敛娇红向人语。与绿荷、相倚恨 ,回首西风 ,波淼淼、三十六陂烟雨。

新妆明照水 ,汀渚生香 ,不嫁东风被谁误。遣踟蹰、骚客意 ,千里绵绵 ,仙浪远、何处凌波微步。想南浦、潮生画桡归 ,正月晓风清 ,断肠凝伫。

西江月

名与牡丹联谱 ,南珍独比江瑶。闽人入贡冠前朝。露叶风枝袅袅。

香玉满苞仙液 ,绀红圆感蛟绡。华清宫殿蜀山遥。一骑红尘失笑。

曲游春

脸薄难藏泪 ,恨柳风 ,不与吹断行色。...
但掩袖转面面啼红 ,无言应得。

...哭得浑无气力。

舞杨花

牡丹半坼初经雨 ,雕槛翠幕朝阳。娇困倚东风 ,羞谢了群芳。洗烟凝露向清晓 ,步瑶台、

月底霓裳。轻笑淡拂宫黄。浅拟飞燕新妆。

杨柳啼鸦昼永，正秋千庭馆，风絮池塘。三十六宫，簪艳粉浓香。慈宁玉殿庆清赏，占东君、谁比花王。良夜万烛荧煌。影里留住年光。

瑞鹤仙 上元应制

瑞烟浮禁苑。正绛阙春回，新正方半。冰轮桂华满。溢花衢歌市，芙蓉开遍。龙楼两观。见银烛、星球有烂。卷珠帘、尽日笙歌，盛集宝钗金钏。

堪羨。绮罗丛里，兰麝香中，正宜游玩。风柔夜暖。花影乱，笑声喧。闹蛾儿满路，成团打块，簇著冠儿斗转。喜皇都、旧日风光，太平再见。

又 别恨

薄寒罗袖怯。教小玉添香，被翻宫幰。兰缸半明灭。听几声归雁，一帘微月。情波恨叶。索新词、犹自怨别。梦回时、雪暖酥凝，掠鬓宝驾钗折。

凄切。纹窗描绣，旧谱寻棋，变成虚设。同心对结。重来是，甚时节。怅姑苏台上，征帆何许，隐隐遥山万叠。袖红绡、独立无言，偷弹泪血。

汉宫春 慈宁殿元夕被旨作

云海沈沈，峭寒收建章，雪残鸂鶒。华灯

照夜 ,万井禁城行乐。春随鬢影 ,映参差、柳丝梅萼。丹禁杳 ,鳌峰对耸 ,三山上通寥廓。

春衫绣罗香薄。步金莲影下 ,三千绰约。冰轮桂满 ,皓色冷浸楼阁。霓裳帝乐 ,奏升平、天风吹落。留凤辇、通宵宴赏 ,莫放漏声闲却。

喜迁莺 丞相生日

腊残春早。正帘幕护寒 ,楼台清晓。宝运当千 ,佳辰余五 ,嵩岳诞生元老。帝遣阜安宗社 ,人仰雍容廊庙。尽总道 ,是文章孔孟 ,勋庸周召。

师表。方眷遇 ,鱼水君臣 ,须信从来少。玉带金鱼 ,朱颜绿鬢 ,占断世间荣耀。篆刻鼎彝将遍 ,整顿乾坤都了。愿岁岁 ,见柳梢青浅 ,梅英红小。

又 秋夜闻雁

秋寒初劲。看云路雁来 ,碧天如镜。湘浦烟深 ,衡阳沙远 ,风外几行斜阵。回首塞门何处 ,故国关河重省。汉使老 ,认上林欲下 ,徘徊清影。

江南烟水暝。声过小楼 ,烛暗金猊冷。送目鸣琴 ,裁诗挑锦 ,此恨此情无尽。梦想洞庭飞下 ,散入云涛千顷。过尽也 ,奈杜陵人远 ,玉关无信。

丑奴儿令 促养直赴雪夜溪堂之约

冯夷剪碎澄溪练 ,飞下同云。著地无痕。

柳絮梅花处处春。

山阴此夜明如昼,月满前村。莫掩溪门。
恐有扁舟乘兴人。

又 自岭表还临安作

红楼紫陌青春路,柳色皇州。月澹烟柔。
袅袅亭亭不自由。

旧时扶上雕鞍处,此地重游。总是新愁。
柳自轻盈水自流。

诉衷情令 登郁孤台 与施德初同读坡诗作

郁孤台上立多时。烟晚暮云低。山川城
郭良是,回首昔人非。

今古事,只堪悲。此心知。一尊芳酒,慷
慨悲歌,月堕人归。

又 长安怀古

阿房废址汉荒丘。狐兔又群游。豪华尽
成春梦,留下古今愁。

君莫上,古原头。泪难收。夕阳西下,塞
雁南飞,渭水东流。

菩萨蛮令 长安怀古

秦时宫殿咸阳里。千门万户连云起。复
道亘西东。不禁三月风。

汉唐乘王气。万岁千秋计。毕竟是荒丘。
荆榛满地愁。

又 金陵怀古

龙蟠虎踞金陵郡。古来六代豪华盛。缥

凤不来游。台空江自流。

下临全楚地。包举中原势。可惜草连天。
晴郊狐兔眠。

感皇恩 幽居

一雨一番凉,江南秋兴。门掩苍苔锁寒
径。红尘不到,尽日鸟啼人静。绿荷风已过,
摇香柄。

澹阴未解,园林清润。一片花飞堕红影。
残书读尽,袖手高吟清咏。任从车马客,劳方
寸。

卖花声 闺思

蹙损远山眉。幽怨谁知。罗衾滴尽泪胭
脂。夜过春寒愁未起,门外鸦啼。

惆怅阻佳期。人在天涯。东风频动小桃
枝。正是销魂时候也,撩乱花飞。

又 闺思

愁捻断钗金。远信沈沈。秦筝调怨不成
音。郎马不知何处也,楼外春深。

好梦已难寻。夜夜余衾。目穷千里正伤
心。记得当初郎去路,绿树阴阴。

江城子

南溪二月雨初晴。四郊明。暖风轻。一
雨一风,铺地落红英。枝上流莺啼劝我,春欲

去,且留春。

登临行乐慰闲情。过长亭。暮潮平。四面青芜,中是越王城。信马行吟归路晚,山簇簇,柳阴阴。

风入松 春晓

一宵风雨送春归。绿暗红稀。画楼整日无人到,与谁同捻花枝。门外蔷薇开也,枝头梅子酸时。

玉人应是数归期。翠敛愁眉。塞鸿不到双鱼远,叹楼前、流水难西。新恨欲题红叶,东风满院花飞。

又 闺思

碧苔满地衬残红。绿树阴浓。晓莺啼破眉心事,旧愁新恨重重。翠黛不忺重扫,佳时每恨难同。

花开花谢任东风。此恨无穷。梦魂拟逐杨花去,殢人休下帘栊。要见只凭清梦,几时真个相逢。

谒金门 暮春

春又晚。风劲落红如剪。睡起绣床飞絮满。日长门半掩。

不管离肠欲断。听尽梁间双燕。试上小楼还不见。楼前芳草远。

长相思 游西湖

南高峰。北高峰。一片湖光烟霭中。春来愁杀侬。

郎意浓。妾意浓。油壁车轻郎马骢。相逢九里松。

应天长 闺思

管弦绣陌,灯火画桥,尘香旧时归路。肠断萧娘,旧日风帘映朱户。莺能舞,花解语。念后约、顿成轻负。缓雕辔、独自归来,凭栏情绪。

楚岫在何处。香梦悠悠,花月更谁主。惆怅后期,空有鳞鸿寄纨素。枕前泪,窗外雨。翠幕冷、夜凉虚度。未应信、此度相思,寸肠千缕。

玉楼春令

青笺后约无凭据。误我碧桃花下语。谁将消息问刘郎,怅望玉溪溪上路。

春来无限伤情绪。拟欲题红都寄与。东风吹落一庭花,手把新愁无写处。

风入松

画桥流水欲平阑。雨后青山。去年芳草

今年恨 ,恨香车、不逐雕鞍。红杏墙头院落 ,绿杨楼外秋千。

谢娘别后忆前欢。泪滴春衫。柔萸共折香红处 ,劝东风、且与流连。早是相思瘦损 ,梅花谢了春寒。

忆少年令 元夕应制

双龙烛影 ,千门夜色 ,三五宴瑶台。舞蝶随香 ,飞蝉扑鬓 ,人自蕊宫来。

太平箫鼓宸居晓 ,清漏玉壶催。步辇归时 ,绮罗生润 ,花上月徘徊。

风流子

昔贺方回作此道都城旧游。仆谪居岭海 醉中忽有歌之者 ,用其声律 ,再赋一阕。恨方回久下世 ,不见此作

结客少年场。繁华梦 ,当日赏风光。红灯九街 ,买移花市 ,画楼十里 ,特地梅妆。醉魂荡 ,龙跳拗万字 ,鲸饮吸三江。娇随钿车 ,玉骢南陌 ,喜摇双桨 ,红袖横塘。

天涯归期阻 ,衡阳雁不到 ,路隔三湘。难见谢娘诗好 ,苏小歌长。漫自惜鸾胶 ,朱弦何在 ,暗藏罗结 ,红绶消香。歌罢泪沾宫锦 ,襟袖淋浪。

瑞鹤仙令 补足李重光词

樱桃落尽春归去 ,蝶翻金粉双飞。子规啼

恨小楼西。曲屏珠箔晚 ,惆怅卷金泥。

门巷寂寥人去后 ,望残烟草低迷。闲寻旧
曲玉笙悲。关山千里恨 ,云汉月重规。

杏花天 慈宁殿春晚出游

帝城柳色藏春絮。嫩绿满、游人归路。残
红剩蕊留春住。无奈霏微细雨。

南陌上、玉辔钿车 ,怅紫陌、青门日暮。黄
昏院落人归去。犹有流莺对话。

卜算子

潮生浦口云 ,潮落津头树。潮本无心落又
生 ,人自来还去。

今古短长亭 ,送往迎来处。老尽东西南北
人 ,亭下潮如故。

金菊对芙蓉 秋怨

梧叶飘黄 ,万山空翠 ,断霞流水争辉。正
金风西起 ,海燕东归。凭栏不见南来雁 ,望故
人、消息迟迟。木樨开后 ,不应误我 ,好景良
时。

只念独守孤帏。把枕前嘱付 ,一旦分飞。
上秦楼游赏 ,酒殢花迷。谁知别后相思苦 ,悄
为伊、瘦损香肌。花前月下 ,黄昏院落 ,珠泪偷
垂。

满江红 杜鹃

恼杀行人 ,东风里、为谁啼血。正青春未老 ,流莺方歇。蝴蝶枕前颠倒梦 ,杏花枝上朦朧月。问天涯、何事苦关情 ,思离别。

声一唤 ,肠千结。闽岭外 ,江南陌。正长堤杨柳 ,翠条堪折。镇日叮咛千百遍 ,只将一句频频说。道不如归去不如归 ,伤情切。

失调名

玉楼人静。高卷疏帘情迥。

满庭芳 冬景

霜幕风帘 ,闲斋小户 ,素蟾初上雕笼。玉杯醺醖 ,还与可人同。古鼎沈烟篆细 ,玉笋破、橙橘香浓。梳妆懒 ,脂轻粉薄 ,约略淡眉峰。

清新 ,歌几许 ,低随慢唱 ,语笑相供。道文书针线 ,今夜休攻。莫厌兰膏更继 ,明朝又、纷冗匆匆。酩酊也 ,冠儿未卸 ,先把被儿烘。

减字木兰花

杨花飘尽。云压绿阴风乍定。帘幕闲垂。弄语千般燕子飞。

小楼深静。睡起残妆犹未整。梦不成归。泪滴斑斑金缕衣。

采桑子

晚来一霎风兼雨，洗尽炎光。理罢笙簧。
却对菱花淡淡妆。

绛绡缕薄冰肌莹，雪膩酥香。笑语檀郎。
今夜纱厨枕簟凉。

荷叶铺水面 春游

春光艳冶，游人踏绿苔。千红万紫竞香
开。暖风拂鼻籟，蓦地暗香透满怀。

荼蘼似锦裁。娇红间绿白，只怕迅速春
回。误落在尘埃。折向鬢云间、金凤钗。

菩萨蛮

弱柳小腰身。双双蛾翠颦。

康仲伯

忆真妃

匆匆一望关河。听离歌。艇子急催双桨、
下清波。

淋漓醉。阑干泪。奈情何。明日画桥西
畔、暮云多。

可 旻

渔家傲 赞净土 并序

我家渔父，不比泛常。一丈六之身材，三十二之相好。说聪明也，孔仲尼安可开肩；论道德也，李伯阳故应缩首。绝伦武略，独战退八万四千魔兵；盖世良才，复论败九十六种外道。拱身誓水，坐断爱河。披忍辱之蓑衣，遮无明之烟雨。慈悲帆挂，方便风吹。撑般若之扁舟，游死生之苦海。誓山月白，觉海风清。钓汨没之众生，归涅槃之篮笼。如斯旨趣。即是平生。暂歇钓竿，乃留诗曰：
家居常寂本优游。来执鱼竿苦海头。直待众生都入手，此时方始不垂钩。

曾讲弥陀经十遍。孤山疏钞频舒卷。事理圆融文义显。多方便。到头只劝生莲苑。

本性弥陀随体现。唯心净土何曾远。十万程途从事见。体分辨。临终但自亲行转。

又

四色莲华间绿荷。一莲华载一弥陀。莫疑净土程途远，日日人生雨点多。

我佛莲华随步踏。黄金妙相青螺发。因地曾将洪誓发。四十八，众生尽度成菩萨。

宫殿红香华影合。宝阶三道琉璃阔。水鸟树林皆念法。声嘈喷。空中零乱天华撒。

又

行树阴阴布七重。宝华珠网共玲珑。百千种乐俱鸣处，天雨曼陀散碧空。“鸣处”一作“时作”。

彼土因何名极乐。莲华九品无三恶。虽有频伽并白鹤。非彰灼。如来变化宣流作。

九品一生离五浊。自然身挂珠璎珞。宛转白毫生额角。长辉烁。百千业障都消却。

又

六方诸佛说诚言，舌相三千广赞宣。池上托生莲九品，未知生向那枝边。

佛赞西方经现在。广长舌相三千界。为要众生信解。临终迈。不修净业犹何待。

七宝池塘波一派。莲华朵朵车轮大。华内托生真自在。分三辈。阿鞞跋致长无退。

又

但得莲中托化来。从教经劫未华开。华中快乐同切利，不比人间父母胎。

鸚鵡频伽知几只。音声和雅鸣朝夕。演畅五根并五力。令人忆。心飞恨不身生翼。

从是西方十万亿。山长水远谁人识。唯是观门归路直。真消息。坐澄劫水琉璃碧。

又

兀坐初修水观成。微风不动翠波平。幽深境界谁人见，一片琉璃照眼明。

清净乐邦吾本郡。娑婆流浪因贪吝。冉冉思归霜入鬓。深嗟恨。塞鸿不解传音信。

落日尽边沙隐隐。向西望处归应近。天乐是时相接引。宜精进。紫金台上谁无分。

又

乐邦清净本吾家。既有归期岂惮赊。行计会须勤策进，淹留无虑在天涯。

理性本来长自在。灵通昭彻光无碍。因被无明风恼害。真如海。等闲吹动波千派。

五蕴山头云叆叇。遮藏心月无光彩。六贼会须知悔改。除贪爱。刹那跳出娑婆界。

又

混然凡圣本同途。一点灵明体一如。只为妄情随物转，至今颠倒未逢渠。

为厌娑婆求净土。驰情送想存朝暮。谁信不劳移一步。西方去。楼台隐隐云深处。

珠网为光华作雨。金沙布地无尘土。怎不教人思去路。心专注。坐观落日如悬鼓。

又

清风为我拂寥泬，不许残云遮屋角。禅居深掩静无人，坐看一轮红日落。

四相相催生病老。死魔不定朝难保。争似寅昏持佛号。西方好。树林水鸟称三宝。

磨灭等闲髭鬓皓。乐邦行计唯宜早。万亿国邦非远道。休烦恼。一弹指顷能行到。

又

经赞弥陀愿力强。劣夫为喻从轮王。四天一日行周遍，西去应非道路长。

人世罪冤知底数。前程不是无冥府。争似静焚香一炷。无行住。声声称念弥陀父。

罪业尽消生有处。弥陀愿力堪凭据。十念一心存旦暮。西方路。功成足步红莲去。

又

谁知端坐却能游。顷刻心飞到玉楼。竹影月移来户牖，便疑行树在檐头。

万事到头无益已。寻思只有修行是。若送此心游宝地。还容易。坐观落日当西坠。

万顷红光归眼际。眼开眼闭长明媚。此观成时知法味。心欢喜。临终决定生莲里。

又

九品莲华次第排。也应荷叶翠相挨。未知何日生莲界，无奈晨昏甚挂怀。

西望乐邦云杳隔。一钩新月弯弯白。意欲往生何计策。劳魂魄。弥陀一念声千百。

金殿玉楼为屋宅。七重行树强松柏。华里托生非血脉。真高格。乐天不是蓬莱客。

又

遍看玉轴与琅函。若劝劳生脱世凡。净土好修还不肯，莫教披却有毛衫。

富贵经中谈净域。赤珠玛瑙为严饰。彼土众生当晓色。擎衣裓。妙华供养他方佛。

稚小嬉游随没溺。娑婆是苦何曾识。忻厌迎来方有力。从朝夕。静焚一炷香凝碧。

又

既有身心求净土。可无门路去娑婆。修行也只无多子，十念功成一刹那。

文墨尖新无处用。已将名利浑如梦。一串数珠随手弄。休千种。唯闻念佛心欢勇。

滌漾空中仙乐动。笙箫声细天风送。接引凡夫归圣众。香云捧。男儿此日方崇重。

又

览遍经文与律仪。频频唯劝念阿弥。一声消尽千生业，何况唠唠久诵持。

休纵心猿驰意马。牢将系念绳头把。说破十疑因智者。争传写。庐山又结莲华社。

十八大贤居会下。功成五色云西驾。诸上善人都在那。相迎迓。聚头只说无生话。

又

池边行树不全遮。袅袅金桥露半斜。忽见化生新佛子，红莲开处噪频伽。

三十六般包一袋。脓囊臭秽犹贪爱。恰似蛄娘推粪块。无停待。朝朝只在尘中跼。

若解坚心生重悔。宁拘恶逆并魁脍。一念能消千劫罪。生华内。满身瓔珞鸣珂佩。

又

纷纷世态尽空华。讲外无馀挂齿牙。一串数珠新换线，阿弥陀佛做冤家。

一点神魂初托魄。青莲华里琉璃宅。毫相法音非间隔。虽明白。到头不似金台客。

九品高低随报获。或经劫数华方拆。若是我生心性窄。应煎迫。未开须把莲华擘。

又

菊脑姜牙一饭馀。其他安敢费功夫。从今十指无闲暇，且尽平生弄数珠。

净土故乡嗟乍别。天涯流浪经时节。老去染沾眉鬓雪。思归切。闻声愿寄辽天月。

念念时时修净业。临终佛定来迎接。有誓表为诚实说。广长舌。三千遍覆红莲叶。

又

唯将梵诵是平生。夜夜唠唠一二更。只影自怜
尘世外，风前月下恣经行。

善导可嗟今已往。化来老少皆归向。佛
念一声分一镪。声才响。一声一佛虚空上。

八万四千奇妙相。光明寿命皆无量。金
色臂垂千万丈。鹅王掌。誓来迎接归安养。

又

暮鼓晨鸡不住催。逡巡容貌变衰颓。莫言白发
浑闲事，总是无常信息来。

西土纹成东土坏。星飞一点千华界。勿
讶神魂生去快。无遮碍。乐邦只在同居内。

八德池深华又大。跏趺端坐莲华载。耳
听法音心悟解。低头拜。从今跳出胞胎外。

孔德明

水调歌头 龙笛词

玉人揜皓腕 ,纤手映朱唇。龙吟越调孤
喷 ,清浊最堪听。欲度宁王一曲 ,莫学桓伊三
弄 ,听答兀中丁。忆昔知音客 ,鉴别在柯亭。

至更深 ,宜月朗 ,称疏星。天高气爽 ,霜重
水绿与山青。幸遇良宵佳景 ,轰起一声蕲州 ,
耳畔觉泠泠。裂石穿云去 ,万鬼尽潜形。

孔平仲

千秋岁

春风湖外。红杏花初退。孤馆静，愁肠碎。泪馀痕在枕，别久香销带。新睡起。小园戏蝶飞成对。

惆怅人谁会。随处聊倾盖。情暂遣，心何在。锦书消息断，玉漏花阴改。迟日暮，仙山杳杳空云海。

孔 榘

鼓笛慢

数枝凌雪乘冰，嫩英半吐琼酥点。南州故苑，何郎遗咏，风台月观。疏影横斜，暗香浮动，水寒云晚。笑浮花浪蕊，娇春万里，空零落、愁莺燕。

游子寂寥暮景，向天边、几回相见。玉人纤手，殷勤攀赠，欲行微盼。越使归来，汉宫妆罢，昭华流怨。念湘江梦杳，窗前疑是，此情何限。

鹧鸪天

却月凌风度雪清。何郎高咏照花明。一枝弄碧传幽信，半额涂黄拾晚荣。

春思淡，暗香轻。江南雨冷若为情。犹胜远隔潇湘水，忽到窗前梦不成。

孔 夷

水龙吟

岁穷风雪飘零，望迷万里云垂冻。红绡碎剪，凝酥繁缀，烟深霜重。疏影沈波，暗香和月，横斜浮动。怅别来，欲把芳菲寄远，还羌管、吹三弄。

寂寞玉人睡起，污残妆、不胜姣凤。盈盈山馆，纷纷客路，相思谁共。才与风流，赋称清艳，多情唯宋。算襄王，枉被梨花瘦损，又成春梦。

南浦 旅怀

风悲画角，听单于、三弄落谯门。投宿骎骎征骑，飞雪满孤村。酒市渐闲灯火，正敲窗、乱叶舞纷纷。送数声惊雁，下离烟水，嘹唳度寒云。

好在半胧溪月，到如今、无处不销魂。故国梅花归梦，愁损绿罗裙。为问暗香闲艳，也相思、万点付啼痕。算翠屏应是，两眉余恨倚黄昏。

惜余春慢 情景

弄月余花，团风轻絮，露湿池塘春草。
莺莺恋友，燕燕将雏，惆怅睡残清晓。还似
初相见时，携手旗亭，酒香梅小。向登临长
是，伤春滋味，泪弹多少。

因甚却、轻许风流，终非长久，又说分
飞烦恼。罗衣瘦损，绣被香消，那更乱红如
扫。门外无穷路岐，天若有情，和天须老。
念高唐归梦，凄凉何处，水流云绕。

寇寺丞

点绛唇 遗妓

春睡腾腾 , 觉来鸳被堆香暖。起来慵懒。
触目情何限。

深院日斜 , 人静花阴转。柔肠断。凭高不
见。芳草连天远。

寇 准

甘草子

春早。柳丝无力，低拂青门道。暖日笼啼鸟。初坼桃花小。

遥望碧天净如扫。曳一缕、轻烟缥缈。堪惜流年谢芳草。任玉壶倾倒。

踏莎行

春色将阑，莺声渐老。红英落尽青梅小。画堂人静雨濛濛，屏山半掩馀香袅。密约沈沈，离情杳杳。菱花尘满慵将照。倚楼无语欲销魂，长空黯淡连芳草。

阳关引

塞草烟光阔。渭水波声咽。春朝雨霁轻尘歇。征鞍。指青青杨柳，又是轻攀折。动黯然、知有后会甚时节。

更尽一杯酒，歌一阕。叹人生，最难欢聚易离别。且莫辞沈醉，听取阳关彻。念故人、千里自此共明月。

点绛唇

水陌轻寒，社公雨足东风慢。定巢新燕。
湿雨穿花转。

象尺熏炉，拂晓停针线。愁蛾浅。飞红
零乱。侧卧珠帘卷。

江南春

波渺渺，柳依依。孤村芳草远，斜日杏
花飞。江南春尽离肠远，苹满汀洲人未归。

夜度娘

烟波渺渺一千里，白苹香散东风起。日
暮汀洲一望时，柔情不断如春水。

懒堂女子

烛影摇红

绿净湖光 ,浅寒先到芙蓉岛。谢池幽梦属
才郎 ,几度生春草。尘世多情易老。更那堪、
秋风袅袅。晓来羞对 ,香芷汀洲 ,枯荷池沼。

恨锁横波 ,远山浅黛无人扫。湘江人去叹
无依 ,此意从谁表。喜趁良宵月皎。况难逢、
人间两好。莫辞沈醉 ,醉入屏山 ,只愁天晓。

乐婉

卜算子 答施

相思似海深，旧事如天远。泪滴千千万
万行，更使人愁肠断。

要见无因见，了拚终难拚。若是前生未
有缘，待重结、来生愿。

雷 应 春

好事近

梅片作团飞，雨外柳丝金湿。客子短篷无据，倚长风挂席。

回头流水小桥东，烟扫画楼出。楼上有人凝伫，似旧家曾识。

沁园春 官满作

问讯故园，今如之何，还胜昔无。想旧耘兰蕙，依然葱茜，新栽杨柳，亦已扶疏。韭本千畦，芋根一亩，雨老烟荒谁为锄。难忘者，是竹吾爱甚，梅汝知乎。

茅亭低压平湖。有狎鹭驯鸥尚可呼。把绛纱准拟，新官到也，寒毡收拾，贱子归欤。略整柴门，更芟草径，惟有幽人解枉车。丁宁著，与做添棋局，砌换茶垆。

黎 道 静

城头月

阳光子夜开清昼。照了无何有。弱水蓬莱，河车忽动，万顷金波皱。

红铅墨汞相交媾。片饷丹成就。把握阴阳，一钟造化，此诀人知否。

黎廷瑞

大江东去 题项羽庙

鲍鱼腥断 ,楚将军、鞭虎驱龙而起。空费
咸阳三月火 ,铸就金刀神器。垓下兵稀 ,阴陵
道隘 ,月黑云如垒。楚歌哄发 ,山川都姓刘矣。

悲泣呼醒虞姬 ,和伊死别 ,雪刃飞花髓。
霸业休休 雅不逝 ,英气乌江流水。古庙颓垣 ,
斜阳老树 ,遗恨鸦声里。兴亡休问 ,高陵秋草
空翠。

蝶恋花 元旦

密炬瑶霞光颤酒。翠柏红椒 ,细翦青丝
韭。且劝金樽千万寿。年时芳梦休回首。

小雨轻寒风满袖 ,下却帘儿 ,莫遣梅花瘦。
万点鹅黄春色透。玉箫吹上江南柳。

八声甘州 金陵怀古

恨巨灵、多事凿长江 ,消沈几英雄。恨乌
江亭长 ,天机轻泄 ,说与重瞳。更恨南阳耕叟 ,
擘掇紫髯翁。一弹金陵土 ,战虎争龙。

全宋词 黎廷瑞

杯酒凤凰台上,对石城流水,钟阜诸峰。
问六朝陵阙,何处是遗踪。后庭花、更无留响,
渺春潮、残照笛声中。悲欢梦,芜城杨柳、几度
春风。

水龙吟 金陵雪后西望

不知玄武湖中,一瓢春水何人借。裁冰翦
雨,等闲占断,桃花春社。古阜花城,玉龙盐
虎,夕阳图画。是东风吹就,明朝吹散,又还
是、东风也。

回首当时光景,渺秦淮、绿波东下。滔滔
江水,依依山色,悠悠物化。璧月琼花,世间消
得,几多朝夜。笑乌衣、不管春寒,只管说、兴
亡话。

南乡子 乌衣园

醉罢黑瑶池。渺渺春云海峤归。画栋珠
帘成昨梦,谁知。百姓人家几度非。

相对语斜晖。肠断江城柳絮飞。再见玉
郎应不认,堪悲。也被缁尘染素衣。

清平乐 舒州

秋怀骚屑。卧听萧萧叶。四壁寒蛩吟不
歇。旧恨新愁都说。

疏疏雨打栖鸦。月痕犹在窗纱。一夜西
风能紧,明朝瘦也黄花。

全宋词 黎廷瑞

浪淘沙 惜别

别易见时难。万水千山。参商烟树暮云间。料想凤凰城里梦，夜夜归鞍。

杨柳小楼闲。倚遍阑干。东风翦翦雨珊珊。落尽桃花无可落，只管春寒。

浣溪沙 送别

一曲离愁浅黛颦。云帆渺渺下烟津。山长水远客愁新。

柳絮低迷千里梦，桃花荡漾一江春。小楼疏雨可怜人。

祝英台近 闺怨

彩云空，香雨霁。一梦千年事。碧幌如烟，却扇试新睡。恁时杨柳阑干，芙蓉池馆，还只似、如今天气。

远山翠。空相思，淡扫修眉，盈盈照秋水。落日西风，借问雁来未。只愁雁到来时，又无消息，只落得、一番憔悴。

水调歌 寄奥屯竹庵察副留金陵约游扬州不果

腰缠十万贯，骑鹤上扬州。诗翁那得有此，天地一扁舟。二十四番风信，二十四桥风景，正好及春游。挂席欲东下，烟雨暗层楼。

全宋词 黎廷瑞

紫绮冠 绿玉杖 黑貂裘。沧波万里 浩荡
踪迹寄浮鸥。想杀南台御史 笑杀南州孺子，
何事此淹留。远思渺无极 日夜大江流。

满江红 赋竹樽

千亩君封 新移就、美泉天禄。形制古 椰
樽嫌窄 瓠壶嫌俗。爱酒步兵缘业重 平生所
愿何时足。再来生、竟堕此林中 充其腹。

秋入洞 鉴金筑。春出户 跳珠玉。想宜
城九酝 叶光凝绿。驴背夕阳同倒载 醉乡只
在箕筓谷。问东坡、何独饮松醪 还思肉。

唐多令

乙未中秋后二日 同范见心、李思宣饮百花洲上，
待月鲁公亭。呼月润禅师不应 放棹东湖 夜色皎然。
见心用龙洲少年游韵赋词 因次韵。

回棹百花洲。迢迢碧玉流。听笛声、何处
高楼。如此江山无此客 虽有酒、奈何秋。

呼月出云头。问渠能饮不。笑人间、元自
无愁。可惜月翁呼不出 呼得出、载同游。

朝中措 送春

游丝千万暖风柔。只系得春愁。恨杀啼
莺句引 孤他语燕攀留。

纵然留住 香红吹尽 春也堪羞。去去不
堪回首 斜阳一点西楼。

眼儿媚 寓城思归竹庵留行赋呈

暖云挟雨洗香埃。划地峭寒催。燕儿知否，莺儿知否，厮句春回。

小楼日日重帘卷，应是把人猜。杏花如许，桃花如许，不见归来。

诉衷情 濡溪悼旧

曲屏深院赴幽期。心事梦云知。佩环零乱何处，江上草离离。

日平西，天似幕，月如眉。依稀还记，两岸杨花，送上船时。

贺新郎 落星寺

帆影斜阳里。与芦花、分风飞过、落星遗此。瓦老苔荒钟鼓陋，斑剥残碑无几。想此处、阅人多矣。天上白榆犹落去，况人间、一瞬浮花蕊。问五老，笑而已。

仙翁当日曾挥麈。拍阑干、浩歌音响，振鱼龙耳。九十余年无人问，遗韵半江烟水。慨宇宙、风涛如许。安得六丁移此石，去横身、作个中流砥。长唱罢，冥鸿起。

青玉案 泛大江

巨舟双橹鸣鹅鹳。千万顷、玻璃面。宇宙

浮萍堪永叹。黄唐开辟，秦隋争战。不把江山换。

芦花新雪秋撩乱。何处渔舟起孤莞。一片古愁萦不断。平沙矮树，溪烟荒岸。落日西风雁。

酹江月 题永平监前刘氏小楼

远山如簇，对楼前、浓抹淡妆新翠。应是西湖湖上景，移过江南千里。旧日春光，重归杨柳，苒苒黄金缕。市声分付，画桥之外流水。

最好叠观泥金，危城带粉，文笔双峰倚。烟寺晚钟渔浦笛，都入王维画里。敲枕方床，凭阑往古，世界浮萍耳。湖天风紧，白鸥欲下还起。

又 呈谭龙山

锦袍何处，向旧江、衰草寒芦萧瑟。瀛馆神仙挥玉麈，唤醒诗酒魂魄。走电飞虹，惊涛触石，举目乾坤窄。油然归去，短篷多载风月。

好在雨外云根，水边石上，鸥鹭盟重结。见说西湖湖上路，香沁梅梢新雪。驾白麒麟，鞭青鸾凤，次第孤山客。吾今西啸，寄诗先与逋仙说。

一翦梅 菊酒

小小黄花尔许愁。楚事悠悠。晋事悠悠。荒芜三径渺中洲。开几番秋。落几番秋。

不是孤芳万古留。餐亦堪羞。采亦堪羞。

全宋词 黎廷瑞

离骚赋罢酒新筩。醒也风流。醉也风流。

水龙吟 九日登城

荒城落日西风，满街芳草无行路。楼台羽化，萤飞故苑，蛩吟残础。不减承平，半湖秋月，隔溪烟树。慨江南风景，一朝如许，教人恨、王夷甫。

对酒强推愁去。酒醒来、愁还如故。青萍三尺，阴符一卷，土花尘蠹。试问黄花，花知余否，沈吟无语。拍阑干，空羨平沙落雁，沧波归鹭。

清平乐 雨中春怀呈准轩

清明寒食。过了空相忆。千里音书无处觅。渺渺乱芜摇碧。

苍天雨细风斜。小楼燕子谁家。只道春寒都尽，一分犹在桐花。

秦楼月 梅花十阙

云根屋。东风四壁花如玉。花如玉。水仙伤婉，山矾伤俗。

高标懒趁时妆束。一丘一壑便幽独。便幽独。商山四皓，首阳孤竹。

又

罗浮暮。青松林下相逢处。相逢处。缟衣素袂，沈吟无语。

行云飞入瑶台路。梦回飘渺香风度。香
风度。参横月落 几声翠羽。

又

叶叶里。一枝冷浸铜瓶水。铜瓶水。飞
英簇簇。砚屏香几。

夜阑雪片敲窗纸。半衾芳梦相料理。相
料理。梨花漠漠 江南千里。

又

春脉脉。含章檐下妆宫额。也还点画 村
烟茅结。

人间天上俱清绝。风流大似东坡客。东
坡客。玉堂如玉。雪堂如雪。

又

红苞拆。巡檐一笑风情别。风情别。广
平空道 心肠如铁。

灞桥更有狂吟客。短鞭破帽貂裘窄。貂
裘窄。瘦驴卓耳 一鞍风雪。

又

春来了。孤根矫树花开早。花开早。水
村山郭 嫩红清晓。

陇头何处鳞鸿杳。一枝欲寄行人少。行
人少。大江南岸 北风低草。

又

齐山顶。扫开残雪簪花饮。簪花饮。樽
前人唱 暗香疏影。

枝南枝北迢迢恨。春风旧梦难重省。难
重省。小窗斜月 薄醒残醒。

又

花孤冷。海棠聘与花应肯。花应肯。海棠只是，无香堪恨。

香无却有仙风韵。能争几日芳期近。芳期近。东风何事，不留花等。

又

醒人眼。一枝玉雪疏篱晚。疏篱晚。精神旷逸，风姿凝远。

幽香零乱无人管。依依春恨天涯满。天涯满。霜城戍角。月楼羌管。

又

幽香歇。玉龙吹彻花如雪。花如雪。小桥流水，不胜愁绝。

横梢翦入生绡墨。翠阴青子盈盈结。盈盈结。淡烟微雨，江南三月。

李邦献

菩萨蛮 蜡梅

薰沈刻蜡工夫巧。蜜脾锁碎金钟小。别是一般香。解教人断肠。

冰霜相与瘦。清在江梅右。念我忍寒来。怜君特地开。

李 壁

浣溪沙 人日过灵泉寺次韵少庄

只记梅花破腊前。恼人春色又薰然。山头井似陆公泉。

上客长谣追楚些，娇娃短舞看胡旋。崇桃积李自年年。

朝中措 人口螭颐席间和韵

东风歌吹发重闾。飞旆入山新。小雨不妨酥润，江头一并霜晴。

年年心似，输他钗燕，蟠带迎春。怎得樽前避酒，史君精鉴如神。

小重山

数椽甫葺，知府载酒宠临，辄次日近环湖所赋韵为一杯寿

燕雀风轻二月天。一枝何处是家园。有花不惜是谁怜。生嫌怕，不为老人妍。

眉黛拥连娟。高情时载酒、雁湖边。略无雕饰自天然。新诗好，品第入朱弦。

满江红

知府丈宠教和蒋洋州乐府，蒋亦有书遗某，问所赠石君无恙。辄次韵上呈，并以寄洋州也。

帘卷东风，□林外、鸟啼姑恶。政迤邐、花梢红绽，柳梢黄著。散策丘园容懒□，折冲樽俎须雄略。但有书盈屋酒盈缸，还堪乐。

嗟每被，浮云缚。黄梁梦，新来觉。悄只愁湖海，故交辽邈。一纸素书来问我，数峰苍玉何如昨。更几时、夜雨落檐花，同春酌。

南歌子

偶与子建小酌，知府秘书惠然临顾，此一段奇也。辄成小阕，呈二使君

紫绶新符竹，叶颙老弟兄。西风吹棹过湖亭。杨柳夫渠相伴、也多情。

况是瀛洲侣，来同酒盏倾。白沔浑不避双旌。一种风流人似、玉壶清。

好事近 饯交代劝酒

莫惜一樽留，共醉锦屏山色。多少飞花悠飏，送征轮南陌。

曲湖归去未多时，还捧诏黄湿。生怕别来凄断，看满园行迹。

江神子 劝酒

露荷香泛小池台。水云堆。好风催。宝扇胡床，无事且徘徊。帘外海榴裙一色，判共酌、两三杯。

此怀能得几番开。玉山颓。不须推。回首慈恩，前梦老堪哈。好是上林多少树，应早晚、待公来。

阮郎归 劝袁制机酒

苏台一别费三年。锦书凭雁传。风姿重见阆江边。玉壶秋井泉。

翻短舞，趁么弦。篆香同夕烟。多情莫惜为留连。落花中酒天。

鹧鸪天 燕史君席间和韵

岸柳阴阴跃锦鳞。并湖莲子恰尝新。谁教故岁应官去，会老堂中少个人。

归未久，意弥亲。吹香不断酒倾银。行藏判已天公付，且斗而今见在身。

西江月 和提刑昂席新赋

又送鹏程轩翥，几看驹隙推移。多端时事只天知。不饮沈忧如醉。

白首已甘蓬艾，苍生正倚丞疑。楚台风转一帆吹。朝列问君来未。

李邴

汉宫春

潇洒江梅，向竹梢疏处，横两三枝。东君也不爱惜，雪压霜欺。无情燕子，怕春寒、轻失花期。却是有，年年塞雁，归来曾见开时。

清浅小溪如练，问玉堂何似，茅舍疏篱。伤心故人去后，冷落新诗。微云淡月，对江天、分付他谁。空自忆，清香未减，风流不在人知。

洞仙歌

一团娇软，是将春揉做，撩乱随风到何处。自长亭、人去后，烟草萋迷，归来了、装点离愁无数。

飘扬无个事，刚被絮牵，长是黄昏怕微雨。记那回，深院静，帘幕低垂，花阴下、霎时留住。又只恐、伊家太轻狂，蓦地和春，带将归去。

玉蝴蝶

壮岁分符方面，惠风草偃，禾稼春融。
报政朝天，归去稳步鳌宫。望尧蓂、九重绛
阙，颁汉诏、五色芝封。湛恩浓。锦衣槐里，
重继三公。

雍容。临歧祖帐，绮罗环列，冠盖云丛。
满城桃李，尽将芳意谢东风。柳烟轻、万条
离恨，花露重、千点啼红。莫匆匆。且陪珠
履，同醉金钟。

念奴娇

素光练净，映秋山、隐隐修眉横绿。鸂
鶒楼高天似水，碧瓦寒生银粟。千丈斜晖，
奔云涌雾，飞过卢仝屋。更无尘气，满庭风
碎梧竹。

谁念鹤发仙翁，当年曾共赏，紫岩飞瀑。
对影三人聊痛饮，一洗离愁千斛。斗转参横，
翩然归去，万里骑黄鹄。满川霜晓，叫云吹
断横玉。

小冲山 立春

谁劝东风腊里来。不知天待雪，恼江梅。
东郊寒色尚徘徊。双彩燕，飞傍鬓云堆。

玉冷晓妆台。宜春金缕字，拂香腮。红
罗先绣踏青鞋。春犹浅，花信更须催。

木兰花 美人书字

沈吟不语晴窗畔。小字银钩题欲遍。云情散乱未成篇，花骨敲斜终带软。重重说尽情和怨。珍重提携常在眼。暂时得近玉纤纤，翻羨缕金红象管。

清平乐 闺怀

露花烟柳。春思浓如酒。几阵狂风新雨后。满地落红铺绣。

风流何处疏狂。厌厌恨结柔肠。又是危阑独倚，一川烟草斜阳。

满庭芳

又喜椒觞到手，宝胜里、仍剪金花。

玉楼春

一年适尽莲花漏，翠井屠苏沈冻酒。

满庭芳

凉风吹帽，横槊试登高。想见征西旧事，龙山会、宾主俱豪。

女冠子 上元

帝城三五。灯光花市盈路。天街游处。此时方信，凤阙都民，奢华豪富。纱笼才过处。喝道转身，一壁小来且住。见许多、才子艳质，携手并肩低语。

东来西往谁家女。买玉梅争戴，缓步香风度。北观南顾。见画烛影里，神仙无数。引人魂似醉，不如趁早，步月归去。这一双情眼，怎生禁得，许多胡觑。

调笑令

伏似长安丽人，杜工部水边瞥见；洛川神女，陈思王梦里相逢。虽赋咏之尽工，亦纤秣之未备。若乃吟烟吐月，镂玉雕花。众中唤做百宜娇，诗里装成十样锦。汉鬟楚腰呈妙伎，竹枝桃叶换新声。彩袖初呈，传踏来至。

睡起斜痕印枕檀。弄羞未怕指尖寒。紫绵香软红膏滑，不惜春娇对舞鸾。袅鬓细鬟金罥鬋，春工只在纤纤玉。却月弯环未要深，留著伊来画双绿。

双绿。淡匀拂。两脸春融光透玉。起来却怕东风触。本是一团香玉。飞鸾台上看未足。贮向阿娇金屋。

李伯虎

朝中措

史君清德比清湘。妙政古相望。闲暇恩波万井，笑谈风月千章。

殷勤劝驾，几人怀德，刻意腾骧。试问匣中长剑，也应增焕光芒。

李 沈

水调歌头 次琼山韵

足迹半天下，家说在琼川。往来无定，蓬头垢面任憎嫌。挥扫笔头万字，贯穿胸中千古，不记受生年。海角一相遇，缘契似从前。

钟离歌，吕公篆，醉张颠。恍如赤城龙凤，来过我鲸仙。笑我未离世网，不染个中尘土，饥食困来眠。拟问君家祖，兜率乐天天。

六州歌头 吊武穆鄂王忠烈庙

高皇神武，善驾驭豪英。攘北狄，驱群盗，命天膺。救苍生。奈梦绕沙漠，隔温清，屈和好，召大将，归兵柄，列枢庭。公指汴京。威已振河洛，不顾身烹。失一机会，嗟左衽吾民。痛岳家军。孰扶倾。

久沈冤愤，七十载，还复遇，帝王真。表遗烈，锡王号，日照临。激士心。始识安刘计，宁祸己，是忠臣。我乘传，访壁垒，想精明。英气凛然若在，仍题扁、昭揭天恩。笑原头芳草，一死不能春。交怨人神。

李持正

明月逐人来

星河明淡。春来深浅。红莲正、满城开遍。禁街行乐，暗尘香拂面。皓月随人近远。

天半鳌山，光动凤楼两观。东风静、珠帘不卷。玉辇待归，云外闻弦管。认得宫花影转。

人月圆令

小桃枝上春风早，初试薄罗衣。年年乐事，华灯竞处，人月圆时。

禁街箫鼓，寒轻夜永，纤手重携。更阑人散，千门笑语，声在帘帏。

李处全

水调歌头 丁丑岁 吴门为外舅蒋宣卿寿

金节照南国，画戟壮陪都。严譙鼓角霜晓，雄胜压全吴。葱茜采香古径，缥缈折梅新奏，春事早关渠。谁识使君意，行乐与民俱。

披绣幌，薰宝篆，引琼酥。黄堂富暇，宾幕谈笑足欢娱。看取十行丹诏，遥指五云深处，归路接亨衢。玉佩映鸳缀，不老奉轩虞。

又 送王景文

上马趣携酒，送客古朱方。秋风斜日山际，低草见牛羊。酩酊不知更漏，但见横江白露，清映月如霜。平睨广寒殿，谁说路歧长。

醉还醒，时起舞，念吾乡。江山尔尔，回首千载几兴亡。一笑书生事业，谁信管城居士，不换碧油幢。好在中冷水，击楫奏伊凉。

又

明月浸瑶碧，河汉水交流。偏来照我，知我白发不胜愁。客里山中三载，枕上人间一梦，曾忆到瀛洲。矫首蓬壶路，两腋已飕飕。

记扁舟，浮震泽，趁中秋。垂虹亭上，与客千里快凝眸。看剑引杯狂醉，饮水曲肱高卧，

鹏鷃本同游。起舞三人耳，横笛唤沙鸥。

又 冒大风渡沙子

落日暝云合，客子意如何。定知今日，封六翼二弄干戈。四望际天空阔，一叶凌涛掀舞，壮志未消磨。为向吴儿道，听我扣舷歌。

我常欲，利剑戟，斩蛟鼉。胡尘未扫，指挥壮士挽天河。谁料半生忧患，成就如今老态，白发逐年多。对此貌无恐，心亦畏风波。

又

春事已如许，柳眼早依依。故园桃李何似，芳蕊想团枝。此地高高名里，信美元非吾土，清梦绕瀍伊。扶杖欲行乐，还使我心悲。

对琴书，歌一阕，引千卮。昔曾击楫，今日投老叹吾衰。睡起推窗凝睇，失喜柔桑微绿，便拟作春衣。搔首长吟处，此意有谁知。

又 咏梅

微雨眼明处，春信著南枝。百花头上消息，为我赴襟期。松下凌霜古干，竹外横窗疏影，同是岁寒姿。唤取我曹赏，莫使俗流知。

对风前，看雪后，总相宜。碧天如洗，何许羌笛月边吹。一段出群标格，合得水仙兄事，千古豫章诗。鼎鼎付佳实，终待麦秋时。

又 前篇既出，诸君皆有属和，因自用韵

飞雪已传信，端叶未分枝。莫嫌开晚，前月曾付小春期。谁道梳风洗雨，不许调脂弄粉，容易浣天姿。眼界未多见，鼻观已先知。

昔西湖，今北客，各从宜。要渠烂漫，趣得

暖律为渠吹。犹记石亭攀折，浑似扬州观赏，
清兴欲寻诗。三嗅不离手，如得和篇时。

又 除夕

今夕定何夕，今夕岁还除。团栾儿女，
尽情灯火照围炉。但惜年从节换，便觉身随日
老，踪迹尚沈浮。万事古如此，聊作旧桃符。

任东风，吹缟鬓，戏臞儒。韶颜壮齿，背人
去似隙中驹。杯酌犹倾腊酒，漏箭已传春夜，
何处不歌呼。惟愿长穷健，命酌且欢娱。

又 处州烟雨楼落成，欲就中秋，后值雨

楼观数南国，烟雨压东州。溪山雄胜，天
开图画肖瀛洲。我破瀛洲客梦，来剖仙都符
竹，乐岁又云秋。聊作幻师戏，肯遗后人愁。

趁佳时，招我辈，共凝眸。君侯胸次邱壑，
意匠付冥搜。刻日落成华栋，对月难并清景，
千丈素光流。老子兴何极，小子趣觥筹。

满江红 镇安女兄生日

清晓高堂，春晚处、旧红新绿。耸曩昔、蟠
桃初种，更并潭菊。强健老人松下鹤，森荣孙
子霜中竹。看共持、寿斝祝期颐。倾醪醑。

烘晴昼，炉烟馥。连永夜，笙歌簇。喜一
时欢意，何人兼足。早愿诸甥成宅相，便从明岁
开汤沐。向年年、今日度新腔，调仙曲。

临江仙 木犀

畴昔方壶游戏地，群仙步履相从。明黄衫

全宋词 李处全

子御西风。佩环金错落，羽葆翠璁珑。

骑鹄翩然归去路，吹箫横度青峰。夜深河汉冷秋容。前驱香十里，飘堕月轮东。

念奴娇 京口上元雪夜招唐元明

一天春意，趁东皇幽赏，重飞端叶。造物有心成伟观，来伴红蕖开彻。桂魄初圆，梅腮全放，节物俱奇绝。冷官门巷，望中北固楼堞。

遐想篷底高人，拥衾无寐，九曲肠增结。我亦低窗翻蠹纸，失喜瑶花盈尺。拥鼻孤吟，搔头危坐，所欠惟佳客。须君来此，脸纹相对生缬。

满庭芳 初春

乳燕将雏，啼莺求友，江南梅子黄时。欲晴还雨，烟外看成丝。迎袂风来麦陇，吹饼饵、香入书帷。行吟处，溪翁说我，不似去年衰。

方池。荷出水，朱榴倚槛，粉箨穿篱。有吾曹我辈，把酒寻诗。醉去黑甜一枕，炉烟袅、花影斜晖。家山乐，南窗寄傲，唯有晦庵知。

鹧鸪天 社日落成烟雨楼二首

烟雨溟溟趁落成。只应天欲称佳名。万丝明灭青山映，匹素浓纤绿水萦。

民亦乐，美能并。酒杯莫惜十分倾。要知社下平生志，觴政聊须为主盟。

又

缥缈危楼百尺雄。淡烟疏雨暗帘栊。偶
妨清赏中秋夕,为忆名言玉局翁。

贤达意,古今同。凉天佳月会相逢。老蟾
一跃三千丈,却唤姮娥驾阆风。

柳梢青 茶

九天圆月。香尘碎玉,素涛翻雪。石乳香
甘,松风汤嫩,一时三绝。

元宵好尽欢娱,奈明日、扶头怎说。整顿
颓山,殷勤春露,余甘齿颊。

又 汤

余甘齿颊。酒□半酣,漏声频促。月下传
呼,风前掺别,无因留客。

丁宁玉笋磨香,为料理、十分醒著。后会
何时,前欢未尽,明朝重约。

朝中措 夜坐有感

晦庵四至似天宽。生计有心田。闲弄炉
薰茗碗,困寻纸帐蒲团。

商山橘隐,须弥芥纳,容与湖天。谁笑先
生贫窶,东篱无数金钱。

又 初夏

薰风庭院燕双飞。园柳啭黄鹂。是处蜂
狂蝶乱,元来绿暗红稀。

衫笼白苧,琴推绿绮,满眼新诗。好个江

南风景 杜鹃犹自催归。

菩萨蛮

续前意 时溧阳之行有日矣

杜鹃只管催归去。知渠教我归何处。故国泪生痕。那堪枕上闻。

严装吾已具。泛宅吴中路。弭棹唤东邻。江东日暮云。

又

中秋已近 木犀未开 戏作菩萨蛮以催之。西湖有月轮山名 柳氏云 三秋桂子 山名载于图经 余顷为郡掾 尝见之

晦庵老子修行久。问禅金粟曾回首。截竹是禅机。吹破粟玉枝。

西湖秋好处。承得昭阳露。香透月轮低。来薰打坐时。

又 菊花

四时皆有司花女。杪秋犹见花如许。想得紫金丹。工夫造化间。

春莺留弱羽。更渍蔷薇露。莫取落英餐。留供醉眼看。

浣溪沙

儿辈欲九日词而尚远 用“满城风雨近重阳”填成浣溪沙

宋玉应当久断肠。满城风雨近重阳。年年戏马忆吾乡。

全宋词 李处全

催促东篱金蕊放 ,佳人更绣紫萸囊。白衣
才到共飞觞。

西江月 重阳再作

窗户风薰端午 ,楼台月满中秋。阴晴寒暑
总无忧。几事不如重九。

落帽何羞种种 ,看山都付悠悠。黄花已作
醉乡游。梦觉黄花在手。

又 芍药

婷婷妆楼红袖 ,亭亭将阃清油。东皇天巧
世无俦。定有司花妙手。

十里香风晓霁 ,千家绮陌春游。竹西路转
古扬州。歌吹只应如旧。

又 二月旦侍女兄游高斋

南国一分春色 ,东窗八面光风。女兄欢笑
酒尊同。满眼儿孙群从。

但愿年逾百岁 ,何妨时醉千钟。朱颜绿发
照青铜。要看如龙如凤。

生查子 拒霜花

庭户晓光中 ,帘幕秋光里。曲沼绮疏横 ,
几处新妆洗。

红脸露轻匀 ,翠袖风频倚。鸾鉴不须开 ,
自有窗前水。

又 正月十六日周仲先劝酒

温柔属东南 ,和冷经三五。几夜德星明 ,

果应荀陈聚。

分虎屈雄姿。展骥淹遐步。除诏已涂芝，
便看朝天去。

减字木兰花 预作菊词，俾歌之，至时以侑酒

今年菊早。想到重阳花正好。玉冷金寒。
全似东篱挹露看。

色庄香重。直与梅花堪伯仲。待唤渊明。
三友相从盖为倾。

又 咏木犀

谁将翡翠。闲屑黄金攄巧思。缀就花钿。
飞上秋云入鬓蝉。

一枝斜倚。披拂香风多少意。午镜重匀。
娇额妆成宫样新。

又 甲午九月末在婺州韩守坐上和陈尚书韵

更生观尽。双壁蒹葭那敢并。四海无人。
笑语从容许我亲。

平生此客。复与太丘登醉白。病里颦眉。
贪看惺惺骑马归。

相见欢 见月闻笛八月五夜

新凉襟袂冷然。乍晴天。风送谁家羌管、
月便娟。

云散尽 秋空碧 玉钩悬。洗耳时听三弄、
等团圆。

江城子 重阳

一番风雨一番凉。炯秋光。又重阳。潇
洒东篱，浑学汉宫妆。今日且须开口笑，花露
裛，鬓云香。

泼醅新取淡鹅黄。趁幽芳。趣飞觞。落
帽当时，□发少年狂。万事破除惟有此，尘外
客，醉中乡。

阮郎归 寮生朝

佳人偏爱菊花天。玉钗金附蝉。歌声缥
缈紫云边。博山沈水烟。

须斗酒，泛觥船。乃翁能百篇。高堂此会
看年年。夜深人醉眠。

忆秦娥 海棠

春山寂。佳人凝笑山南陌。山南陌。东
风寒浅，绛罗衫窄。

阑干倚处云如幂。晚来雨过胭脂滴。胭
脂滴。啼妆难劝，且须欢伯。

又

莺花寂。为渠游冶长安陌。长安陌。今
朝风景，酒肠宽容。

锦茵闲把薰笼幂。嫩红倚绿娇如滴。娇
如滴。古今高咏，老泉仙伯。

好事近 荼蘼

香雪弄春妍 ,柳外黄昏池阁。要看月华相映 ,卷东风帘幕。

更倾壶酒伴芳姿 ,名字胜桑落。直与岭梅兄弟 ,是醍醐酥酪。

蓦山溪

梨花过雨 ,已是春强半。花恼欲颠狂 ,兴浑在、秋千架畔。搔头无语 ,斜日上帘栊 ,飞上下 ,语呢喃 ,又见双双燕。

鱼吹细浪 ,镜面摇歌扇。藉草倒芳尊 ,衬香茵、落红千片。追奔蜗角 ,回首醉初醒 ,逢节物 ,且欢娱 ,莫待流年换。

卜算子

春事忆松江 ,江上花无数。一枕匆匆醉梦中 ,芳草隳庵路。

携手度虹梁 ,洗眼看渔具。盐鼓莼羹是处无 ,早买扁舟去。

又 即席奉女兄寿

芍药斗新妆 ,杨柳飞轻雪。著意留连不放春 ,已向东皇说。

况是谪仙家 ,自有长生诀。方士呼来借玉蟾 ,要吸杯中月。

诉衷情

疏烟明淡雨膏如。青入烧痕初。开到无言桃李,春事喜敷腴。

随杖履,有琴书。酒盈壶。风前花下,睡起醒时,著我篮舆。

醉蓬莱 毛氏女兄生朝三月二十八日

政余春眷眷,首夏骎骎,清和时候。晓色瞳眈,瑞霭凝轩牖。著子青梅,袅枝红药,物物俱情厚。绿绮朱弦,檀槽铁拨,华堂称寿。

季父高怀,庆钟吾姊,富贵长年,自应兼有。更看诸郎,谢砌芝兰秀。蚤晚成名,雁行亲膝,无忌胜如舅。沆瀣朝霞,蓬莱弱水,酿为春酒。

贺新郎 和俞叔夜七夕

秋意生何许。对玉钩、微云避舍,素风吹暑。银汉桥成天路稳,乾鹊声声媚妩。送仙仗、年年须度。离合悲欢多少话,想今宵、缱绻难深诉。千古恨,无新故。

聊须作意成欢绪。为佳时、金针戏把,翠觞频举。莫念匆匆轻掺袂,天上元无间阻。况好是、新凉庭户。倦客天涯嗟老大,趁珠帘、绣额高楼处。乞些巧,调儿女。

又 再和

心事知谁许。政吾曹、摛辞弄翰,邀凉蠲

全宋词 李处全

暑。节物于人俱可喜，今夕渠偏媚妩。笑曝腹、书生风度。河鼓天孙非世俗，纵惊云，急雨休轻诉。忆倾盖，便如故。

良辰欢意宽离绪。称仙家、瑶台缥缈，霓裳掀举。应想尘寰空怅望，月路谁曾隔阻。是处有、绮窗朱户。我爱五湖烟水阔，待扁舟、寻到搢机处。访婺女，共婺女。

四和香 立春

香雪新苞偏胜韵。领袖催花信。华节良辰人有分。看士女、幡垂鬓。

莫向春风寻旧恨。乐事随方寸。眉寿故应天不吝。浮大白、吾无闷。

玉楼春 守岁

年光箭脱无留计。才过立春还守岁。要知一岁已寻侬，听打个惊人喷嚏。

椒盘荐寿休辞醉。坐听爆竹浑无寐。明朝末后饮屠苏，白发从渠相点缀。

南乡子 除夕又作

和气作春妍。已作寒归塞地天。岁月翩翩人老矣，华颠。胆冷更长自不眠。

全宋词 李处全

节物映椒盘。柏酒香浮白玉船。捧劝大家相祝愿，何言，但愿今年胜去年。

李从周

玲珑四犯

初拨琵琶，未肯信，知音真个稀少。尽日芳情，萦系玉人怀抱。须待化作杨花，特地过、旧家池沼。想绮窗、刺绣迟了，半缕茜茸微绕。

旧时眉妩贪相恼。到春来、为谁浓扫。新归燕子都曾识，不敢教知道。长是倦出绣幕，向梦里、重谋一笑。怎得同携手，花阶月地，把愁勾了。

抛球乐

风霄蔕红雨易晴。病花中酒过清明，绮窗幽梦乱于柳，罗袖泪痕凝似饧。冷地思量著，春色三停早二停。

谒金门

花似匝。两点翠蛾愁压。人又不来春且恰。谁留春一霎。消尽水沈金鸭。写尽杏笺红蜡。可奈薄

情如此黠。寄书浑不答。

一丛花令

梨花随月过中庭。月色冷如银。金闺平帖阳台路，恨酥雨、不扫行云。妆褪臂闲，髻慵簪卸，盟海浪花沈。

洞箫清吹最关情。腔拍懒温寻。知音一去教谁听，再拈起、指法都生。天阔雁稀，帘空莺悄，相傍又春深。

风流子

双燕立虹梁。东风外、烟雨湿流光。望芳草云连，怕经南浦，葡萄波涨，怎博西凉。空记省，浅妆眉晕敛，胷袖唾痕香。春满绮罗，小莺捎蝶，夜留弦索，么凤求凰。

江湖飘零久，频回首、无奈触绪难忘。谁信温柔牢落，翻坠愁乡。仗玉笏铜爵，花间陶写，宝钗金镜，月底平章，十二主家楼苑，应念萧郎。

清平乐

美人娇小。镜里容颜好。秀色侵人春帐晓。郎去几时重到。

叮咛记取儿家。碧云隐映红霞。直下小桥流水，门前一树桃花。

风入松 冬至

霜风连夜做冬晴。晓日千门。香葭暖透黄钟管，正玉台、彩笔书云。竹外南枝意早，数花开对清樽。

香闺女伴笑轻盈。倦绣停针。花砖一线添红景，看从今、迤邐新春。寒食相逢何处，百单五个黄昏。

乌夜啼

径藓痕沿碧鹜，檐花影压红阑。今年春事浑无几，游冶懒情慳。

旧梦莺莺沁水，新愁燕燕长干。重门十二帘休卷，三月尚春寒。

清平乐

东风无用。吹得愁眉重。有意迎春无意送。门外湿云如梦。

韶光九十慳慳。俊游回首关山。燕子可怜人去，海棠不分春寒。

鹧鸪天

绿色吴笺覆古苔。濡毫重拟赋幽怀。杏花帘外莺将老，杨柳楼前燕不来。

全宋词 李从周

倚玉枕，坠瑶钗。午窗轻梦绕秦淮。玉
鞭何处贪游冶，寻遍春风十二街。

李德载

眼儿媚

雪儿魂在水云乡。犹忆学梅妆。玻璃枝上，体薰山麝，色带飞霜。
水边竹外愁多少，不断俗人肠。如何伴我，黄昏携手，步月斜廊。

早梅芳近

深院静，小阑傍。标致不寻常。尽他桃杏占风光。谁敢斗新妆。
玉堂中，梁苑里。休把雪来轻比。莫吹长笛巧摧残。留取月中看。

又

残腊里，早梅芳。春信报新阳。晓来枝上斗寒光。轻点寿阳妆。
雪难欺，霜莫妒。别是一般风措。望林人意正天饶。又看长新条。

李敦诗

卜算子

南北利名人，常恨家居少。每到春时听子规，无不伤怀抱。

好去向长安，细与公卿道。待得功成名遂时，不似归来早。

李纲

水龙吟

笑不知天命，明珠玉斗，漫撞令碎。

又 光武战昆阳

汉家炎运中微，坐令闰位馀分据。南阳自有，真人膺历，龙翔虎步。初起昆城，旋驱乌合，块然当路。想莽军百万，旌旗千里，应道是、探囊取。

豁达刘郎大度。对峽故、安恬无惧。提兵夹击，声喧天壤，雷风借助。虎豹哀号，戈鋌委地，一时休去。早复收旧物，扫清氛寝，作中兴主。

念奴娇 汉武巡朔方

茂陵仙客，算真是、天与雄才宏略。猎取天骄驰卫霍，如使鹰鹞驱雀。鏖战皋兰，犁庭龙碛，饮亚行勋爵。中华强盛，坐令夷狄衰弱。

追想当日巡行，勒兵十万骑，横临边朔。亲总貔貅谈笑看，黠虏心惊胆落。寄语单于，

两君相见，何苦逃沙漠。英风如在，卓然千古高著。

喜迁莺 晋师胜淝上

长江千里。限南北、雪浪云涛无际。天险难逾，人谋克壮，索虑岂能吞噬。阿坚百万南牧，倏忽长驱吾地。破强敌，在谢公处画，从容颐指。

奇伟。淝水上，八千戈甲，结阵当蛇豕。鞭弭周旋，旌旗麾动，坐却北军风靡。夜闻数声鸣鹤，尽道王师将至。延晋祚，庇烝民，周雅何曾专美。

水龙吟 太宗临渭上

古来夷狄难驯，射飞择肉天骄子。唐家建国，北边雄盛，无如颉利。万马崩腾，皂旗毡帐，远临清渭。向效原驰突，凭陵仓卒，知战守、难为计。

须信君王神武。觐虜营、只从七骑。长弓大箭，据鞍诘问，单于非义。戈甲鲜明，旌麾光彩，六军随至。怅敌情震慑，鱼循鼠伏，请坚盟誓。

念奴娇 宪宗平淮西

晚唐姑息，有多少方镇，飞扬跋扈。淮蔡雄藩联四郡，千里公然旅拒。同恶相资，

潜伤宰辅，谁敢分明语。媿媿群议，共云旄节应付。

于穆天子英明，不疑不贰处，登庸裴度。往督全师威令使，擒贼功名归愬。半夜衔枚，满城深雪，忽已亡悬瓠。明堂坐治，中兴高映千古。

雨霖铃 明皇幸西蜀

蛾眉修绿。正君王恩宠，曼舞丝竹。华清赐浴瑶甃，五家会处。花盈山谷。百里遗簪堕珥，尽宝钿珠玉。听突骑、鼙鼓声喧，寂寞霓裳羽衣曲。

金舆远幸匆匆速。奈六军不发人争目。明眸皓齿难恋，肠断处、绣囊犹馥。剑阁峥嵘，何况铃声，带雨相续。谩留与、千古伤神，尽入生绡幅。

喜迁莺

真宗幸澶渊

边城寒早。恣骄虏、远牧甘泉丰草。铁马嘶风，毡裘凌雪，坐使一方云扰。庙堂折冲无策，欲幸坤维江表。叱群议，赖寇公力挽，亲行天讨。

缥缈。銮辂动，霓旌龙旆，遥指澶渊道。日照金戈，云随黄伞，径渡大河清晓。六军万姓呼舞，箭发狄酋难保。虏情慑，誓书来，从此年年修好。

减字木兰花 读神仙传

茫茫云海。方丈蓬壶何处。拟泛轻舟。
一到金鳌背上游。

琼楼珠室。千岁蟠桃初结实。月冷风清。
试倩双成吸玉笙。

又

龟台金母。绀发芳容超复古。绛节霓旌。
青岛传言若可凭。

瑶池罢宴。零落碧桃香片片。八骏西巡。
更有何人继后尘。

永遇乐 秋夜有感

秋色方浓，好天凉夜，风雨初霁。缺月
如钩，微云半掩，的烁星河碎。爽来轩户，
凉生枕簟，夜永悄然无寐。起徘徊，凭栏凝
伫，片时万情千意。

江湖倦客，年来衰病，坐叹岁华空逝。
往事成尘，新愁似锁，谁是知心底。五陵箫
瑟，中原杳杳，但有满襟清泪。烛兰缸，呼
童取酒，且图径醉。

望江南 池阳道中

归去客，迂骑过江乡。茅店鸡声寒逗月，
板桥人迹晓凝霜。一望楚天长。春信早，山
路野梅香。映水酒帘斜扬日，隔林渔艇静鸣

榔。杳杳下残阳。

水调歌头 同德久诸季小饮，出示所作，即席答之

律吕自相召，韶护不难谐。致君泽物，
古来何世不须才。幸可山林高卧，袖手何妨
闲处，醇酒醉朋侪。千里故人驾，不怕物情
猜。

秋夜永，更秉烛，且衔杯。五年离索，
谁谓谈笑豁幽怀，况我早衰多病，屏迹云山
深处，俗客不曾来。此日扫花径，蓬户为君
开。

又

与李致远、似之、张柔直会饮

如意始身退，此事古难谐。中年醉饮，
多病闲去正当才。长爱兰亭公子，弋钓溪山
娱适，甘旨及朋侪。衰疾卧江海，鸥鸟莫惊
猜。

酒初熟，招我友，共一杯。碧天云卷，
高挂明月照人怀。我醉欲眠君去，醉醒君如
有意，依旧抱琴来。尚有一壶酒，当复为君
开。

又 似之、申伯、叔阳皆作，再次前韵

物我本虚幻，世事若俳谐。功名富贵，
当得须是个般才。幸有山林云水，造物端如
有意，分付与吾侪。寄语旧猿鹤，不用苦相
猜。

醉中适，一杯尽，复一杯。坐间有客，

超诣言笑可忘怀。况是清风明月，如会幽人高意，千里自飞来。共笑陶彭泽，空对菊花开。

念奴娇 中秋独坐

暮云四卷，淡星河、天影茫茫垂碧。皓月浮空，人尽道，端的清圆如璧。丹桂扶疏。银蟾依约，千古佳今夕。寒光委照，有人独坐秋色。

怅念老子平生，粗令婚嫁了，超然闲适。误缚簪缨遭世故，空有当时胸臆。苒苒流年，春鸿秋燕，来往终何益。云山深处，这回真是休息。

感皇恩

九日菊花迟，茱萸却早。嫩蕊浓香自妍好。一簪华发，只恐西风吹帽。细看还遍插，人忘老。

千古此时，清欢多少。铁马台空但荒草。旅愁如海，须把金尊销了。暮天秋影碧，云如扫。

渔家傲 九月将尽，菊花始有开者

木落霜清秋色霁。菊苞渐吐金英碎。佳节不随东去水。谁得会。黄花开日重阳至。

三径旧栽烟水外。故园凝望空流泪。香

色向人如有意。撏落蕊。金尊满满从教醉。

水调歌头 和李似之横山对月

秋杪暑方退，清若玉壶冰。高楼对月，天上宫殿不曾扃。散下凄然风露，影照江山如昼，浑觉俗缘轻。弋者欲何慕，鸿羽正冥冥。

世间法，唯此事，最堪凭。太虚心量，聊假梨枣制颓龄。但使心安身健，静看草根泉际，吟蚓与飞萤。一坐小千劫，无念契无生。

江城子 新酒初熟

老饕嗜酒若鸱夷。拣珠玑。自蒸炊。箸尽云腴，浮蚁在瑶卮。有客相过同一醉，无客至，独中之。

曲生风味有谁知。豁心脾。展愁眉。玉颊红潮，还似少年时。醉倒不知天地大，浑忘却，是和非。

又 九日与诸季登高

客中重九共登高。逼烟霄。见秋毫。云涌群山，山外海翻涛。回首中原何处是，天似幕，碧周遭。

茱萸蕊绽菊方苞。左倾醪。右持螯。莫把闲愁，空使寸心劳。会取八荒皆我室，随节物，且游遨。

感皇恩 枕上

西阁夜初寒，炉烟轻袅。竹枕绡衾素屏小。片时清梦，又被木鱼惊觉。半窗残月影，天将晓。

幻境去来，胶胶扰扰。追想平生发孤笑。壮怀消散，尽付败荷衰草。个中还得趣，从他老。

望江南

新阁就，向日借清光。广厦生风非我志，小窗容膝正相当。聊此傲羲皇。猿尾拂，高挂木绳床。老病维摩谁问疾，散花天女为焚香。恰好细商量。

又

新酒熟，云液满香篝。溜溜清声归小瓮，温温玉色照瓷瓯。饮兴浩难收。嘉客至，一酌散千忧。顾我老方齐物论，与君同作醉乡游。万事总休休。

又

新雨足，一夜满南塘。稂稻向成初吐秀，芰荷虽败尚馀香。爽气入轩窗。

澄霁后，远岫更青苍。两部蛙声鸣鼓吹，一天星月浸光铉。秋色陡凄凉。

又

新月出，清影尚苍茫。学扇欲生青海上，

全宋词 李纲

如钩先挂碧霄傍。星斗焕文章。林下客，把酒挹孤光。斟酌嫦娥怜我老，故窥书幌照人床。此意自难忘。

江城子 瀑布

琉璃滑处玉花飞。溅珠玑。喷霏微。谁遣银河，一派九天垂。昨夜白虹来涧饮，留不去，许多时。

幽人独坐石嵌崎。赏清奇。濯涟漪。不怕深沈，潭底有蛟螭。鸿洞但闻金石奏，猿鸟乐，共忘归。

减字木兰花 荔枝二首

华清赐浴。宝瓮温泉浇膩玉。笑靥开时。一骑红尘献荔枝。

明珠乍剖。自擘轻红香满手。锦袜罗囊。犹瘦当年驿路旁。

又

仙姝丽绝。被服红绡肤玉雪。火齐堆盘。常得杨妃带笑看。

劳生重马。远贡长为千古话。林下甘芳。却准幽人饕餮尝。

丑奴儿 木犀

幽芳不为春光发，直待秋风。直待秋风。

香比馀花分外浓。

步摇金翠人如玉，吹动珑璁。吹动珑璁。
恰似瑶台月下逢。

又

枝头万点妆金蕊，十里清香。十里清香。
解引幽人雅思长。

玉壶贮水花难老，净几明窗。净几明窗。
褪下残英蔌蔌黄。

江城子

去年九日在衡阳。满林霜。俯潇湘。回
雁峰头，依约雁南翔。遥想茱萸方遍插，唯
少我，一枝香。

今年佳节幸相将。陟层冈。举华觴。地
暖风和，犹未菊开黄。此会明年知健否，判
酩酊，醉秋光。

水调歌头 李太白画像

太白乃吾祖，逸气薄青云。开元有道，
聊复乘兴一来宾。天子呼来方醉，洒面清泉
微醒，馀吐拭龙巾。词翰不加点，歌阁满宫
春。

笔风雨，心锦绣，极清新。大儿中令，
神契兼有坐忘人。不识将军高贵，醉里指污
吾足，乃敢尚衣嗔。千载已仙去，图象耸风
神。

水龙吟 次韵任世初送林商叟海道还闽中

际天云海无涯，径从一叶舟中渡。天容海色，浪平风稳，何尝有颺。鳞甲千山，笙镛群籁，了无遮护。笑读君佳阕，追寻往事，须信道、忘来去。

闻说钓鲸公子，为才名、鹗书交举。高怀澹泊，柏台兰省，留连莫住。万里闽山，不从海道，寄声何处。怅七年契阔，无因握手，与开怀语。

又

上巳日出郊，呈知宗安抚、张参、观文汪相二首

莫春清淑之初，尝心最乐惟修禊。兰亭序饮，泛觴流咏，萧然适意。旧弼宗英，文章贤牧，肯临垆外。向碧山深处，寻花问柳，有佳气、随旌旆。

寥落幽人寓止。借僧园、缭云萦水。栽花种竹，凿池开径，渊明岂愧。美景良辰，玉颜方老，欲留何计。对残红嫩绿，开怀笑语，且须同醉。

水调歌头 前题

花径不曾扫，蓬户为君开。元戎小队，清晓佳客与同来。我为衰迟多病，且恁浇花艺药，随分葺池台。多谢故人意，迂访白云隈。

暮春月，修禊事，会兰斋。一觴一咏，
何愧当日畅幽怀。况是茂林修竹，映带清流
湍激，山色碧崔嵬。勿复叹陈迹，且为醉金
杯。

江城子 再游武夷，至晞真馆，与道士泛月而归

武夷山里一溪横。晚风清。断霞明。行
至鸬真、馆下月华生。仙迹灵踪知几许，云
缥缈，石峥嵘。

羽人同载小舟轻。玉壶倾。荐芳馨。酣
饮高歌，时作步虚声。一梦游仙非偶尔，回
棹远，翠烟凝。

又 池阳泛舟作

春来江上打头风。吼层空。卷飞蓬。多
少云涛，雪浪暮江中。早是客情多感慨，烟
漠漠，雨蒙蒙。

梁溪只在太湖东。长儿童。学庞翁。谁
信家书，三月不曾通。见说浙河金鼓震，何
日到，羨归鸿。

又

晓来江口转南风。静烟空。整云蓬。满
眼高帆，隐映画图中。呕轧数声离岸橹，云
暗淡，雪溟蒙。

扁舟归去五湖东。狎樵童。侣渔翁。不
管人间，荣辱与穷通。试作五噫歌汉室，从
隐遁，作梁鸿。

望江南 过分水岭

征骑远，千里别沙阳。泛碧斋傍凝翠阁，
栖云寺里印心堂。回首意茫茫。

分水岭，烟雨正凄凉。南望瓯闽连海峤，
北归吴越过江乡。极目暮云长。

又

云岭水，南北自分流。触目澜翻飞雪浪，
赴溪盘屈转琼钩。呜咽不胜愁。

归去客，征骑远闽州。路入江南春信未，
日行北陆冷光浮。还揽旧貂裘。

又

予在沙阳，尝作满庭芳一阕，寄陆惇礼。末句
云：“何时得，恩来日下，蓑笠老江湖。”今蒙恩北
归，当践斯言，因作渔父四时词以道意，调寄望江
南

云棹远，南浦绿波春。日暖风和初解冻，
饵香竿袅好垂纶。一钓得金鳞。

风乍起，吹皱碧渊沦。红脰斫来龙更美，
白醪酤得旨兼醇。一醉武陵人。

又

清昼永，幽致夏来多。远岸参差风扬柳，
平湖清浅露翻荷。移棹钓烟波。凉一霎，飞
雨洒轻蓑。满眼生涯千顷浪，放怀乐事一声
歌。不醉欲如何。

又

烟艇稳，浦溆正清秋。风细波平宜进楫，

月明江静好沈钩。横笛起汀洲。

鲈鳜美，新酿蚁醅浮。休问六朝兴废事，
白苹红蓼正凝愁。千古一渔舟。

又

江上雪，独立钓渔翁。箬笠但闻冰散响，
蓑衣时振玉花空。图画若为工。

云水暮，归去远烟中。茅舍竹篱依小屿，
缩鳊圆鲫入轻笼。欢笑有儿童。

六么令 次韵和贺方回金陵怀古，鄱阳席上作

长江千里，烟澹水云阔。歌沈玉树，古
寺空有疏钟发。六代兴亡如梦，苒苒惊时月。
兵戈凌灭。豪华销尽，几见银蟾自圆缺。

潮落潮生波渺，江树森如发。谁念迁客
归来，老大伤名节。纵使岁寒途远，此志应
难夺。高楼谁设。倚阑凝望，独立渔翁满江
雪。

喜迁莺 自池阳泛舟

江天霜晓。对万顷雪浪，云涛淼渺远岫
参差，烟树微茫，阅尽往来人老。浅沙别浦
极望，满目馀霞残照。暮云敛，放一轮明月，
窥人怀抱。

杳杳。千里恨，玉人一别，梦断无音耗。
手捻江梅，枝头春信，欲寄算应难到。画船
片帆浮碧，更值风高波浩。几时得向尊前，

销却许多烦恼。

又 塞上词

边城寒早。对漠漠暮秋，霜风烟草。战
□长闲，刁斗无声，空使荷戈人老。陇头立
马极目，万里长城古道。感怀处，问仲宣云
乐，从军多少。

缥缈。云岭外，夕烽一点，塞上传光小。
玉帐尊罍，青油谈笑，肯把壮怀销了。画楼
数声残角，吹彻梅花霜晓。愿岁岁静烟尘，
羌虏常修邻好。

一翦梅

数点梅花玉雪娇。烟水篱边，半袅青梢。
横斜疏影月黄昏，谁使天香，暗淡飘飘。

半醉佳人酒未消。宝髻偏时，插更斜袅。
尊前还唱早梅词，琼醕何如，□□□□。

玉蝴蝶

万古秣陵江国，舣舟烟岸，千里云林。
故垒高楼，凝望远水遥岑。景阳钟、那闻旧
响，玉树唱、空有馀音。感春心。六朝遗事，
萧索难寻。

甘泉法从弟兄芝玉，顾我情深，契阔相
思，岂知今日共登临。对尊俎、休辞痛饮，
伤志节、须且高吟。柳摇金。断霞轻霭，残
照西沈。

水龙吟 次韵和质夫、子瞻杨花词

晚春天气融和，乍惊密雪烟空坠。因风飘荡，千门万户，牵情惹思。青眼初开，翠眉才展，小园长闭。又谁知化作，琼花玉屑，共榆荚、漫天起。

深院美人慵困乱云鬟、尽从妆缀。小廊回处，氍毹重叠，轻拈却碎。飞入楼台，舞穿帘幕，总归流水。怅青春又过，年年此恨，满东风泪。

满庭芳

何时得，恩来日下，蓑笠老江湖。

西江月 赠友人家侍儿名莺莺者

意态何如恹恹，轻盈只恐飞飞。华堂偏傍主人栖。好与安巢稳戏。

揽断楼中风月，且看掌上腰支。谪仙词赋少陵诗。万语千言总记。

苏武令

塞上风高，渔阳秋早。惆怅翠华音杳。驿使空驰，征鸿归尽，不寄双龙消耗。念白衣、金殿除恩，归黄阁、未成图报。

谁信我、致主丹衷，伤时多故，未作救

全宋词 李纲

民方召。调鼎为霖，登坛作将，燕然即须平扫。拥精兵十万，横行沙漠，奉迎天表。

李公麟

四时乐

春

桃李花开春雨晴。声声布谷迎村鸣。家家场头酹酒觥。为告庄主东作兴。黄犊先破东南村。

夏

火云蔽日当空浮。田头耨草汗欲流。绿竹人寂鸟声休。暂来歇午乘清幽。山妻送饷扇遮头。

秋

黄云万里秋有成。村村酒熟家家迎。封羊赛社人未醒。醉后鼓腹歌升平。欣然同乐仓满盈。

冬

寒风十月雪欲飞。居人木榻添纸帏。地炉活火酒频煨。瓦杯不设羊羔肥。醉来曲肱歌声微。

李 冠

蝶恋花 春暮

遥夜亭皋闲信步。才过清明，渐觉伤春暮。数点雨声风约住。朦胧淡月云来去。
桃杏依稀香暗度。谁在秋千，笑里轻轻语。一寸相思千万绪。人间没个安排处。

六州歌头 骊山

凄凉绣岭，宫殿倚山阿。明皇帝。曾游地。锁烟萝。郁嵯峨。忆昔真妃子。艳倾国，方姝丽。朝复暮。嬪嫔妒。宠偏颇。三尺玉泉新浴，莲羞吐、红浸秋波。听花奴，敲羯鼓，酣奏鸣鼙。体不胜罗。舞婆娑。

正霓裳曳。惊烽燧。千万骑。拥雕戈。情宛转。魂空乱。蹙双蛾。奈兵何。痛惜三春暮，委妖丽，马嵬坡。平寇乱。回宸辇。忍重过。香奁紫囊犹有，鸿都客、钿合应讹。使行人到此，千古只伤歌。事往愁多。

又

秦亡草昧，刘项起吞并。鞭寰宇。驱龙

全宋词 李冠

虎。扫欃枪。斩长鲸。血染中原战。视馀耳，
皆鹰犬。平祸乱。归炎汉。势奔倾。兵散月
明。风急旌旗乱，刁斗三更。共虞姬相对，
泣听楚歌声。玉帐魂惊。

泪盈盈。念花无主。凝愁苦。挥雪刃，
掩泉扃。时不利。骓不逝。困阴陵。叱追兵。
暗鸣摧天地，望归路，忍偷生。功盖世，何
处见遗灵。江静水寒烟冷，波纹细、古木凋
零。遣行人到此，追念益伤情。胜负难凭。

蝶恋花 佳人

贴鬓香云双绾绿。柳弱花娇，一点春心
足。不肯玉箫闲度曲。恼人特把青蛾蹙。
静夜溪桥霜薄屋。独影行歌，惊起双鸾
宿。愁破酒阑闺梦熟。月斜窗外风敲竹。

千秋万岁

杏花好、子细君须辨。比早梅深、夭桃
浅。把鲛绡、淡拂鲜红面。蜡融紫萼重重
现。烟外悄，风中笑，香满院。

欲绽全开俱可羨。粹美妖娆无处选。除
卿卿似寻常见。倚天真、艳冶轻朱粉，分
明洗出胭脂面。追往事，绕芳榭，千千遍。

李光

水调歌头

丞相李公伯纪寄示水调一阕，咏叹李太白，词采秀发。然予于太白窃有恨焉，因以陶渊明为答，盖有激云耳

元亮赋归去，富贵比浮云。常于闹里，端的认得主和宾。肯羨当年轩冕，时引壶觞独酌，一笑落冠巾。园圃日成趣，桃李几番春。

挹清风，追往躅，事如新。遗编讽咏，敛衽千载友斯人。君爱谪仙风调，我恨楼船迫胁，终污永王璘。何似北窗下，寂寞可栖神。

又

过桐江，经严濑，慨然有感。予方力丐宫祠，有终焉之志，因和致道水调歌头，呈子我、行简

兵气暗吴楚，江汉久凄凉。当年俊杰安在，酌酒酹严光。南顾豺狼吞噬，北望中原板荡，矫首讯穹苍。归去谢宾友，客路饱风霜。

闭柴扉，窥千载，考三皇。兰亭胜处，依旧流水绕修篁。傍有湖光千顷，时泛扁舟

一叶，啸傲水云乡。寄语骑鲸客，何事返南荒。

又

清明俯近，感叹偶成，寄子贱舍人

自笑客行久，新火起新烟。园林春半风暖，花落柳飞绵。坐想稽山佳处，贺老门前湖水，敲侧钓鱼船。何事成淹泊，流转海南边。

水中影，镜中像，慢流连。此心未住，赢得忧患苦相缠。行尽荒烟蛮瘴，深入维那境界，参透祖师禅。宴坐超三际，潇洒任吾年。

又

昌化郡长桥词

昌化郡城之北，长桥跨江，风月之夕，气象甚胜。庚午八月望夜，士友悉赴郡会。杖策独游，颇怀平生故人，作水调歌以自释。予自长年，粗闻养生之术。放逐以来，又得司马子微叙王屋山清虚洞所刻坐忘论一编，因得专意宴坐，心息相依。虽不敢仰希乔松之寿，度未即死，庶有会合之期。

独步长桥上，今夕是中秋。群黎怪我何事，流转古儋州。风定潮平如练，云散月明如昼，孤兴在扁舟。笑尽一杯酒，水调杂蛮讴。

少年场，金兰契，尽白头。相望万里，悲我已是十年流。晚遇玉霄仙子，授我王屋奇书，归路指蓬邱。不用乘风御，八极可神游。

南歌子 重九日宴琼台

佳节多离恨，难逢笑口开。使君携客上层台。不用篱边凝望、白衣来。且看花经眼，休辞酒满杯。玉人低唱管弦催。归去琐窗无梦、月徘徊。

又

民先兄寄野花数枝，状似蓼而丛生。夜置几案，幽香袭人，戏成一阕

南圃秋香过，东篱菊未英。蓼花无数满寒汀。中有一枝纤软、吐微馨。被冷沈烟细，灯青梦水成。皎如明月入窗棂。天女维摩相对、两忘情。

临江仙

甲子中秋微雨，闻施君家宴，戏赠

画栋朱楼凌缥缈，全家住在层城，中秋风露助凄清。香凝燕寝，遮莫下帘旌。佳节喜逢今夕月，后房重按新声。姮娥端解妒娉婷。微云点缀，不放十分明。

减字木兰花

客赠梅花一枝，香色奇绝，为赋此词

芳心一点。瘴雾难侵尘不染。冷澹谁看。月转霜林怯夜寒。

全宋词 李光

一枝孤静。梦破小窗曾记省。烛影参差。
脉脉还如背立时。

念奴娇

符昌言写寄朱胡梅词，酬唱语皆不凡，因次其韵

榕林叶暗，见一枝独放，霜华争白。写我精神惟赖有，潇洒西湖词客。玉骨清羸，冰容冷落，似恨关山隔。蛮烟侵妒。未应减动肌雪。

幽梦时绕芳枝，夜寒谁见我，身为蝴蝶。抱蕊窥丛惊睡觉，窗影横斜和月。谢馆池边，松风亭下，忍使香消歇。多情饶恨，算应天解磨折。

汉宫春

琼台元夕次太守韵

危阁临流，渺沧波万顷，涌出冰轮。星河澹澹，天衢迥绝纤尘。琼楼玉馆，遍人间、水月精神。□□□，清江瘴海，乘流处处分身。

邦侯盛集嘉宾。有香风缥缈，和气氤氲。华灯耀添绮席，笑语烘春。窥帘映牖，看素娥、偏顾幽人。空怅望，通明观阙，遥瞻一朵红云。

鹧鸪天

逢时使君出示所作送春佳词，引楚襄事，因次

其韵

踏舞贪看赤脚娘。送春春去莫悲伤。飞花逐水归何处，落絮沾泥不解狂。都是醉，任飞扬。百年三万六千场。使君亲按新歌舞，魂梦相逢笑楚襄。

武陵春

陈逢时置酒宾宴堂，仍携爱姬。晚值雨作，见示佳词，辄次韵

漠漠春阴人似雾，那用绣帘垂。不道持杯是阿谁。须拚倒金罍。

人世浑如天上月，离合比盈亏。冒雨须来带雨归。神女解相随。

渔家傲

予顷在琼山，见桃李甚盛，但腊月已开尽，三春未尝见桃花，每以为恨。今岁寓昌江，二月三日与客游黎氏园，偶见桃花一枝。羊君荆华折以见赠，恍然如逢故人。归插净瓶中，累日不凋。予既作二小诗，同行皆属和。忽忆吾乡桃花坞之盛，每至花发，乡中人多醪会往游。醉后歌呼，今岂复得，缅怀畴昔，不无感叹，因成长短句，寄商叟、德矩二友。若悟此空花，即不复以存没介怀也

海外无寒花发早。一枝不忍簪风帽。归插净瓶花转好。维摩老。年来却被花枝恼。

忽忆故乡花满道。狂歌痛饮俱年少。桃坞花开如野烧，都醉倒。花深往往眠芳草。

水调歌头 罢政东归，十八日晚抵西兴

晚渡呼舟疾，寒日正苍茫。西兴浦口云树，真个是吾乡。闻□蜗庐好在，小圃犹存松菊，三径未全荒。收拾桑榆景，蓑笠换金章。

珥金貂，拥珠履，在岩廊。回头万事何有，一枕梦黄粮。十载人间忧患，赢得萧萧华发，清镜照星霜。醉倒休扶我，身世永相忘。

李 好 古

八声甘州 扬州

壮东南、飞观切云高，峻堞缭波长。望
蔽空楼櫓，重关警柝，跨水飞梁。百万貔貅
夜筑，形胜隐金汤。坐落诸蕃胆，扁榜安江。

游子凭阑凄断，百年故国，飞鸟斜阳。
恨当时肉食，一掷赌封疆。骨冷英雄何在，
望荒烟、残戍触悲凉。无言处、西楼画角，
风转牙樯。

又

古扬州、壮丽压长淮，形胜绝东南。问
竹西歌吹，蜀冈何许，杨柳鬢鬢。行乐谁家
年少，两两更三三。知我江南客，走马来看。

过却长亭烟树，云山点点，烟浪漫漫。
料桐花飞尽，夜合绕阑干。倦绣闲庭昼永，
望天涯、芳草忆征鞍。平安使，吴笺谩遣，
欲寄愁难。

江城子

从来难翦是离愁。这些愁。几时休。才

趁风樯，千里到扬州。见说苍茫云海外，天杳杳，水悠悠。

男儿三十敝貂裘。强追游。梦魂羞。可解筹边，谈笑觅封侯。休傍塞垣酹酒去，伤望眼，怕层楼。

又

平沙浅草接天长。路茫茫。几兴亡。昨夜波声，洗岸骨如霜。千古英雄成底事，徒感慨，谩悲凉。

少年有意伏中行。馘名王。扫沙场。击楫中流，曾记泪沾裳。欲上治安双阙远，空怅望，过维扬。

水调歌头 和金焦

历历江南树，半在水云间。不须回首，且来著眼向淮山。过尽金山晕碧，望断焦山空翠，杨柳绕江边。此意无人会。独自久凭阑。

夜吹箫，朝问法，记坡仙。祇今何许，当时三峡倒词源。水调翻成新唱，高压风流前辈，使我百忧宽。有酒更如海，容我醉时眠。

酹江月

西风横荡，渐霜余黄落，空山乔木。照水依然冰雪在，耿耿梅花幽独。抖擞征尘，扶携短策，步绕沧浪曲。怅然心事，浮生翻覆。

覆陵谷。

试向商乐亭前，冷风台上，把酒招黄鹄。四十男儿当富贵，谁念漂零南北。百亩春耕，三间云卧，此计何时卜。功名休问，卖书归买黄犊。

又

平生英气，叹年来、都付山林泉石。不作云霄轩冕梦，祇拟纶竿蓑笠。见说湖阴，飞飞鸥鹭，半是君曾识。梅花时节，试来相与寻觅。

休漫汨没尘埃，浮生能几，镜里催华发。趁取尊前强健在，莫负花前倾碧。自遣长须，亲题短句，去约萧闲客。休教惆怅，梅花飞尽寒食。

贺新郎 僧如梵摘阮

人物风流远。忆当年、江东跌宕，知音南阮。惯倚胡床闲寄傲，妥腹难凭琴桯。妙制拥、银蟾光满。千古不传谁好事，忽茂陵、金碗人间见。轻擘动，思无限。

长安钗鬓春横乱。傲规模、红绦带拨，媚深情浅。安识高山流水趣，儿女空传恩怨。使得似、支郎萧散。听到三闾沈绝处，惨悲风、摇落寒江岸。不肠断，也肠断。

清平乐

清淮北去。千里扬州路。过却瓜州杨柳

树。烟水重重无数。

柁楼才转前湾。云山万点江南。点点尽堪肠断，行人休望长安。

又

瓜州渡口。恰恰城如斗。乱絮飞钱迎马首。也学玉关榆柳。

面前直控金山。极知形胜东南。更愿诸公著意，休教忘了中原。

浣溪沙

为怯赭云挟暑飞。嫩凉故故著征衣。江风吹雨过楼西。

未必男儿生不遇，时来咳唾是珠玑。功名终岂壮心违。

菩萨蛮

东园映叶梅如豆。西园扑地花铺绣。春水晓来深。日华娇漾金。

带烟穿径竹。步入飞虹曲。何处早莺啼。曲桥西复西。

又 垂丝海棠零落

东风一夜都吹损。昼长春殢佳人困。满地委香钿。人情谁肯怜。

诗人犹爱惜。故故频收拾。云彩缕丝丝。娇饶忆旧时。

又

纳红销翠春风里。精神一撮金莲底。不

全宋词 李好古

是睡杨妃。绿珠娇小儿。

一般娇绝处。半带疏疏雨。不解吐繁香。
却教人断肠。

李 好 古

谒金门

花过雨。又是一番红素。燕子归来愁不语。旧巢无觅处。

谁在玉关劳苦。谁在玉楼歌舞。若使胡尘吹得去。东风侯万户。

李好义

谒金门

花过雨。又是一番红素。燕子归来衔绣幕。旧巢无觅处。

谁在玉楼歌舞。谁在玉关辛苦。若使胡尘吹得去。东风侯万户。

望江南

思往事，白尽少年头。曾师三军平蜀难，沿边四郡一齐收。逆党反封侯。

元宵夜，灯火闹啾啾。厅上一员闲总管，门前几个纸灯球。箫鼓胜皇州。

李洪

满庭芳 木犀

香满千岩 ,芳传丛桂 ,小山曾咏幽菲。仙姿冷淡 ,不奈此香奇。翠葆层层障日 ,深爱惜、早被风吹。秋英嫩 ,夜来露浥 ,月底半离披。

谁知。清品贵 ,带装金粟 ,韵透文犀。与降真为侣 ,罗袖相宜。宝鸭休薰百濯 ,清芬在、常惹人衣。姮娥约 ,广寒宫殿 ,留折最高枝。

满江红 和盐田驿驹父留题

梅雨成霖 ,倦永昼、暑行岩曲。爱云梢翠樾 ,枕溪蓬屋。轻木凌波冲卷雪 ,飞泉奔壑鸣哀玉。羨渔翁、终岁老烟波 ,披蓑绿。

嗟客宦 ,荒松菊。颓壮志 ,青编竹。更长年谙尽 ,是非荣辱。钟鼎无心时节异 ,山林有味簞瓢足。感故人、于此赋归欤 ,思之熟。

南乡子 盐田渡

挂席泛安流。细雨斜风到渡头。万叠云鬟真似画 ,云州。自古诗人几个游。旌旆去悠悠。

全宋词 李洪

悠。别驾无功愧食浮。却忆五湖烟浪里，扁舟。第四桥南云水秋。

鹧鸪天 送客至汤泉

十月南闽未有霜。蕉林蔗圃郁相望。压枝橄榄浑如画，透甲香橙半弄黄。斟绿醕，泛沧浪。白沙翠竹近温汤。分明水墨山阴道，只欠冰溪雪月光。

西江月 送客石岳亭

渺渺长汀远壑，萧萧雨叶风枝。几回临水送将归。客里暗添憔悴。

门枕数峰滴翠，舟横几度涟漪。绿秧深处鹭于飞。愈觉田园有味。

菩萨蛮

寒山横抹修眉绿。楼前溪瀑锵鸣玉。车马各西东。行人如转蓬。

阑干成独倚。海阔天无际。云淡隔壶山。鸿飞杳霭间。

浣溪沙 梅菁山遇雪

天矫翔鸾溪上峰。飘萧雪霰打船篷。天花凌乱水晶宫。

飞透纸窗斜取势，吹回溪面舞因风。身游

水墨画图中。

前调 山中清明后一日大雪

碧涧苍崖玉四围。东君翦水散明玳。半开桃杏不胜威。

疑是群仙游阆苑，歌云舞蝶斗高飞。珠幢玉节送人归。

前调 暮春

扫地烧香绝点尘。缘阶绿草又残春。略无闲事挠天真。

时落燕泥沾几席，乱黏飞絮上衣巾。西湖回柁少年人。

念奴娇 晓起观落梅

丽谯吹角，渐疏星明澹，帘筛残月。袅袅霜飙欺翠袖，飞下一庭香雪。半面妆新，回风舞困，此况真奇绝。桄榔林里，苏仙偏感华发。

休怨时暂飘零，玉堂清梦，不惹闲蜂蝶。好似王家丛竹畔，乘兴山阴时节。剪水无情，阆风归去，忍使芳心歇。和羹有待，恁时身到天阙。

卜算子 和宋子闲早梅

南国小春时，常是寒威浅。玉缀香苞已有

全宋词 李洪

梅 疏影无人见。

秋忆故园芳 梦断扬州远。不御铅华自出
尘 赛过徐妃面。

李 宏 模

庆清明 木芙蓉

碧玉云深，彤绡雾薄，芳丛乱迷秋渚。
重城傍水，中有吹箫俦侣。应是琼楼夜冷，
月明谁伴乘鸾女。仙游处。翠帟障尘，红绮
随步。

别岸玉容仁倚，爱浅抹蜂黄，淡笼纨素。
娇羞未语，脉脉悲烟泣露。彩扇何人，妙笔
丹青，招得花魂住。歌声暮。梦入锦江。香
里归路。

李慧之

沁园春 寿韦轩八十一岁 九月初二

八九十翁 ,似婴儿戏 ,汉司马迁。记渭川垂钓 ,一年之长 ,龙山吹帽 ,七日之前。口角春风 ,襟期秋月 ,万事从来只任缘。随渠道 ,更登天富贵 ,陆地神仙。

儿孙绿绶青编。看鼓舞云霄高刺天。但〔阶〕移花影 ,闲寻棋局 ,风斜竹径 ,缓起茶烟。心迹逾清 ,精神越健 ,不用金丹资节宣。洪崖老 ,笑将眉寿 ,祝我老人轩。

李季萼

木兰花 惜春

东风忽起黄昏雨。红紫飘残香满路。凭阑空有惜春心，浓绿满枝无处诉。春光背我堂堂去。纵有黄金难买住。欲将春去问残花，花亦不言春已暮。

李 甲

望云涯引

秋容江上，岸花老，苹洲白。露湿蒹葭，浦屿渐增寒色。闲渔唱晚，鹭雁惊飞处，映远碛。数点轻帆，送天际归客。

凤台人散，漫回首。沈消息。素鲤无凭，楼上暮云凝碧。时向西风下，认远笛。宋玉悲怀，未信金樽消得。

吊严陵

蕙兰香泛，孤屿潮平，惊鸥散雪。迢迢点破，澄江秋色。暝霭向敛，疏雨乍收，染出蓝峰千尺。渔舍孤烟锁寒碛。画鹢翠帆旋解，轻舫晴霞岸侧。正念往悲酸，怀乡惨切。何处引羌笛。

追惜。当时富春佳地，严光钓址空遗迹。华星沈后，扁舟泛去，萧洒闲名图籍。离觞吊终寓目，意断魂消泪滴。渐洞天晚，回首暮云千古碧。

梦玉人引

渐东风暖，陇梅残，霁云碧。嫩草柔条，又回江城春色。乍促银签，便篆香纹蜡有馀迹。愁梦相兼，尽日高无力。

这些离恨，依然是、酒醒又如织。料伊怀情，也应向人端的。何故近日，全然无消息。问伊看，伊教人到此，如何休得。

过秦楼

卖酒炉边，寻芳原上，乱花飞絮悠悠。已蝶稀莺散，便拟把长绳、系日无由。谩道草忘忧。也徒将、酒解闲愁。正江南春尽，行人千里，苹满汀洲。

有翠红径里，盈盈似簇，芳茵襍饮，时笑时讴。当暖风迟景，任相将永日，烂熳狂游。谁信盛狂中，有离情、忽到心头。向尊前拟问，双燕来时，曾过秦楼。

帝台春

芳草碧色。萋萋遍南陌。暖絮乱红，也知人、春愁无力。忆得盈盈拾翠侣，共携赏、凤城寒食。到今来，海角逢春，天涯为客。

愁旋释。还似织。泪暗拭。又偷滴。谩伫立、遍倚危阑，尽黄昏，也只是、暮云凝碧。拚则而今已拚了，忘则怎生便忘得。又

还问鳞鸿，试重寻消息。

击梧桐

杳杳春江阔。收细雨、风蹙波声无歇。雁去汀洲暖，岸芜静，翠染遥山一抹。群鸥聚散，征航来去，隔水相望楚越。对此、凝情久，念往岁上国，嬉游时节。

斗草园林，卖花巷陌，触处风光奇绝。正恁浓欢里，悄不意、顿有天涯离别。看那梅生翠实，柳飘狂絮，没个人共折。把而今、愁烦滋味，教向谁说。

幔卷绡

绝羽沈鳞，埋花葬玉，杳杳悲前事。对一盏寒灯，数点流萤，悄悄画屏，巫山十二。蕤脸星眸，蕙情兰性，一旦成流水。便纵有、甘泉妙手，洪都方士何济。

香闺宝砌。临妆处，迤邐苔痕翠。更不忍看伊，绣残鸳侣，而今尚有，啼红纷渍。好梦不来，断云飞去，黯黯情无际。谩饮尽香醪，奈向愁肠，消遣无计。

望春回

霏霞散晓，射水村渐明，渔火方绝。滩露夜潮痕，注冻濼凄咽。征鸿来时应负书，见疏柳、更忆伊同折。异乡憔悴，那堪更逢，

岁穷时节。

东风暗回暖律。算拆遍江梅，消尽岩雪。唯有这愁肠，也依旧千结。私言窃语些誓约，便眠思梦想无休歇。这些离恨，除非对著、说似明月。

少年游

江国陆郎封寄后，独自冠群芳。折时雪里，带时灯下，香面讶争光。

而今不怕吹羌管，一任更繁霜。玳筵赏处，玉纤整后，犹胜岭头香。

李结

浣溪沙

花圃萦回曲径通。小亭风卷绣帘重。秋
千闲倚画桥东。

双蝶舞馀红便旋，交莺啼处绿葱珑。远山
眉黛晚来浓。

西江月

若将花卉论行藏。盍在凌烟阁上。

李 敬 则

沁园春 寿徐知院

南渡盛时，壬寅之秋，生此伟人。是皇家柱石，端平君子，吾儒宗主，意一先生。自起丹山，晋登紫府，天下欣然望太平。至夷狄，亦慕吾中国，司马声名。

愿君为尧舜之君。举一世民皆尧舜民。羨当年三渐，直声已著，近来四蜀，先虑尤深。事验平凉，眷隆当宁，指日须还公秉钧。愿公寿，以寿吾国脉，以寿斯文。

李久善

念奴娇

东君试手，向南枝著意，争先时节。纵有丹青谁便忍，轻点肌肤冰雪。色借琼瑰，香分兰麝，元自标孤洁。冲寒独秀，误他多少蜂蝶。

缟练不染缁尘，算来□合是，广寒宫阙。未问阳和先占取，前村一溪风月。留取清芬，主张真态，驿使休轻折。梢头青子，异时风味甚别。

蝶恋花

莺掷垂杨，一点黄金溜。

李居仁

天香 宛委山房拟赋龙涎香

瀛峤浮烟 , 沧波挂月 , 潜虬睡起清晓。万里槎程 , 一番花信 , 付与露薇冰脑。纤云渐暖 , 凝翠席、氤氲不了。银叶重调火活 , 珠帘日垂风悄。

螺屏酒醒梦好。绣罗帏、依旧痕少。几度试拈心字 , 暗惊芳抱。隐约仙舟路杳。漫佩影、玲珑护娇小。素手金篝 , 春情未老。

水龙吟 浮翠山房拟赋白莲

蕊仙群拥宸游 , 素肌似怯波心冷。霜裳缟夜 , 冰壶凝露 , 红尘洗尽。弄玉轻盈 , 飞琼绰约 , 淡妆临镜。更多情、一片碧云不掩 , 笼娇面、回清影。

菱唱数声乍听。载名娃、藕丝萦艇。雪鸥沙鹭 , 夜来同梦 , 晓风吹醒。酒晕全消 , 粉痕微渍 , 色明香莹。问此花 , 盍贮瑶池 , 应未许、繁红并。

李君行

沁园春 刘山春新居

三岛十洲 ,移掇者谁 ,玉城稚仙。解运诗之巧 ,裁山剪水 ,用诗之力 ,斡地回天。大笑宋初 ,秀才屋子 ,著不得官家十万钱。又谁说 ,李膺豪放 ,门号龙门。

我家呼喝山川。道今日山春莺已迁。汝南山顶上 ,虎毋久卧 ,秀溪底下 ,龙莫长眠。打起精神 ,护持诗府 ,推出诗城障山边。山川道 ,如稚仙肯出 ,当拜君言。

李 莱 老

惜红衣 寄弁阳翁

笛送西泠，帆过杜曲。昼阴芳绿。门巷
清风，还寻故人屋。苍华发冷，笑瘦影、相
看如竹。幽谷。烟树晚莺，诉经年愁独。

残阳古木。书画归船，匆匆又南北。苹
洲鸥鹭素熟。旧盟续。甚日浩歌招隐，听雨
弁阳同宿。料重来时候，香荡几湾红玉。

青玉案 题草窗词卷

吟情老尽江南句。几千万、垂丝缕。花
冷絮飞寒食路。渔烟鸥雨，燕昏莺晓，总入
昭华谱。

红衣妆靓凉生渚。环碧斜阳旧时树。拈
叶分题觞咏处。荀香犹在，庾愁何许，云冷
西湖赋。

扬州慢 琼花次韵

玉倚风轻，粉凝冰薄，土花祠冷无人。
听吹箫月底，传暮草金城。笑红紫、纷纷成

雨，溯空如蝶，恐堕珠尘。叹而今、杜郎还见，应赋悲春。

佩环何许，纵无情、莺燕犹惊。怅朱槛香消，绿屏梦渺，肠断瑶琼。九曲迷楼依旧，沈沈夜、想觅行云。但荒烟幽翠，东风吹作秋声。

谒金门

春意态。闲却远山横黛。香径莓苔嗟粉坏。凤靴双斗彩。

折得花枝懒戴。犹恋鸳鸯飞盖。旧恨新愁都只在。东风吹柳带。

浪淘沙

榆火换新烟。翠柳朱檐。东风吹得落花颠。帘影翠梭悬绣带，人倚秋千。

犹忆十年前。西子湖边。斜阳吹入画楼船。归醉夜堂歌舞月，拚却春眠。

生查子

妾情歌柳枝，郎意怜桃叶。罗带绾同心，谁信愁千结。

楼上数残更，马上看新月。绣被怨春寒，怕学鸳鸯叠。

全宋词 李莱老

高阳台 落梅

门掩香残，屏摇梦冷，珠钿糝缀芳尘。
临水拏花，流来疑是行云。蕤梢空挂凄凉月，
想鹤归、犹怨黄昏。黯消凝。人老天涯，雁影沈沈。

断肠不在听横笛，在江皋解佩，翳玉飞琼。
烟湿荒村，背春无限愁深。迎风点点飘寒粉，
怅秋娘、燕袖啼痕。更关情。青子悬枝，绿树成阴。

木兰花慢 寄题荪壁山房

向烟霞堆里，著吟屋、最高层。望海日翻红，
林霏散白，猿鸟幽深。双岑。倚天翠湿，看浮云、
收尽雨还晴。晓色千松逗冷，照人眼底长青。

闲情。玉麈风生。摹茧字，校鹅经。爱静翻缃帙，
芸台棐几，荷制兰纓。分明。晋人旧隐，掩岩扉、
月午籁沈沈。三十六梯树杪，溯空遥想登临。

清平乐

绿窗初晓。枕上闻啼鸟。不恨王孙归不早。
只恨天涯芳草。

锦书红泪千行。一春无限思量。折得垂杨寄与，
丝丝都是愁肠。

台城路 寄弁阳翁

半空河影流云碎，亭皋嫩凉收雨。井叶还惊，江莲乱落，弦月初生商素。堂深几许。渐爽入云帟，翠绡千缕。纨扇恩疏，晚萤光冷照窗户。

文园憔悴顿老，又西风暗换，丝鬓无数。灯外残砧，琴边瘦枕，一一情伤迟暮。故人倦旅。料渭水长安，感时吟苦。正自多愁，砌蛩终夜语。

浪淘沙

宝押绣帘斜。莺燕谁家。银筝初试合琵琶。柳色春罗裁袖小，双戴桃花。

芳草满天涯。流水韶华。晚风杨柳绿交加。闲倚阑干无藉在，数尽归鸦。

杏花天

年时中酒风流病。正雨暗、麝芜深径。人家寒食烟初禁。狼藉梨花雪影。

西湖梦、红沈翠冷。记舞板、歌裙厮趁。斜阳苦与黄昏近。生怕画船归尽。

小重山

画檐簷柳碧如城。一帘风雨里，近清明。

吹箫门巷冷无声。梨花月，今夜负中庭。

远岫敛修颦。春愁吟入谱，付莺莺。红尘没马翠埋轮。西泠曲，欢梦絮飘零。

倦寻芳

繚墙黏藓，糝径飞梅，春绪无赖。绣压垂帘，骨有许多寒在。宝幄香消龙麝饼，钿车尘冷鸳鸯带。想西园，被一程风雨，群芳都碍。

逗晓色、莺啼人起，倦倚银屏，愁沁眉黛。待拚千金，却恨好晴难买。翠苑欢游孤解佩。青门佳约妨挑菜。柳初黄，罩池塘、万丝愁霭。

点绛唇

绿染春波，袖罗金缕双鸂鶒。小桃匀碧。香衬蝉云湿。

舞带歌钿，闲傍秋千立。情何极。燕莺尘迹。芳草斜阳笛。

西江月 海棠

绿染晓云冉冉，红酣晴雾冥冥。银簪悬烛锦宫城。困倚墙头半影。

雨后遍饶艳冶，燕来同作清明。更深犹唤玉靴笙。不管西池露冷。

全宋词 李莱老

清平乐 题草窗词

日寒风细。庭馆浮花气。白发潘郎吟欲醉。绿暗蘼芜千里。

西园南浦东城。一春多少闲情。日暮采苹歌远，梦回唤得愁生。

李 刘

贺新郎 上赵侍郎生日

鹄立通明殿。又重逢、揆余初度，梦庚华旦。不学花奴簪红槿，且看秋香宜晚。任甲子、从新重换。天欲东都修车马，故降神生甫维周翰。歌崧岳，咏江汉。

明堂朝罢夷琛献。引星辰、万人共听，风尘长算。清昼山东诸将捷，席卷黄河两岸。问谁在、玉皇香案。师保万民功业别，向西京、原庙行圭瓚。定郊鄜，卜瀍涧。

鱼游春水 寿卫大参

湖南三千里。百万人家争送喜。元戎初度，和气水流山峙。荆楚中间寿域开，翼轸傍边台躔起。崧岳降神，维箕骑尾。

见说君王注倚。问舟楫、盐梅谁是。国人争望周公，东归几几。功名多载旗常上，福禄平分天壤里。家家弦管，年年弧矢。

水调歌头 寿赵茶马

万里碧鸡使，叱驭问邛崃。枪旗有烨，

川秦奔走送龙媒。好在灵均初度，唤起长庚佳梦，霜月照金罍。寿似武侯柏，香在草堂梅。

舞娉婷，斟凿落，沃崔嵬。神尧孙子，向来八九上三台。挂了桑弧蓬矢，便恐彤弓秬瓞，分宝下天阶。归赋梁园雪，试唤长卿来。

酹江月 寿漕使

汉庭用老，想君王也忆、潜郎白首。底事煌煌金玉节，奔走天涯许久。江右风流，湖南清绝，更借诗翁手。明年七十，人间此事希有。

固是守得堂间，鲂斋亭下，要称归来柳。上恐夜深〔□〕贾傅，便有锋车迎候。寿岳峰前，寿星池畔，且寿长沙酒。期颐三万，祖风应管依旧。

满庭芳 上程宪卓，程尚书大昌侄

郑履声传，倪经业绍，半千贤运重开。妙年阔步，高折桂枝回。卿月郎星历遍，都贪把、符竹南来。棠阴永，仍持玉节，臬事副钦哉。

吾生，真幸会，旧家桃李，曾费栽培。更春风次第，吹到寒荄。遥望绂麟祥旦，霄躔邈、阻奉琅杯。谁知道，清源路远，直上即蓬莱。

生查子 寿谢宪，在四川类省试院

湘江贯地维，衡岳生人杰。谁遣益州星，
暂伴峨眉月。

初度庆今朝，绣斧双龙节。为国罩嘉鱼，
趣觐黄金阙。

浣溪沙 庆董内机

濯锦江边玉树明。碧油幢里彩衣荣。当
年此日下长庚。

细酌成都千岁酒，闲着岷谷一阳春。归
听云母隔屏声。

朝中措 自寿

我生辰在斗牛中。并路有何功。运转峨
眉山月，按行雪界天风。

归欤老矣，愁添鬓白，酒借颜红。丘壑
堪容我辈，轩裳分付诸公。

水调歌头 寿丘漕 九月初三

端正九秋月，今夜始生明。扬辉毓秀，
飘然海上跨长鲸。认得灵均初度，直用望舒
为御，重耀紫枢庭。何事乘槎使，尚藉执圭
卿。

合东西，瞻使节，镜中行。腾腾渐渐，

绕枝乌鹊不须惊。太白擒胡了未，即墨降城安否，玉斧仗修成。圆却山河影，捣药兔长生。

鹧鸪天 寿吴倅 九月初七

恰则重阳信宿前。菊潭先寿濮阳仙。暂陪明月清风夜，共醉孤云落照边。

群玉府，紫微天。看看东壁二星连。月中斫桂吴夫子，定是长生不记年。

生查子 寿魏制干 九月十九

万里彩衣远，旬日黄花后。蓬矢纪佳辰，莲幕翻新奏。

更看桂枝香，归献灵椿寿。同对小蟠桃，共醉长生酒。

李流谦

踏莎行 灵泉重阳作

菊露晴黄 ,枫霜晚翠。重阳气候偏如此。
异乡牢落怕登临 ,吾家落照飞云是。举扇尘
低 ,脱巾风细。灵苗医得人憔悴。灯前点检欠
谁人 ,惟有断鸿知此意。

如梦令 前题

老插黄花不称。节物撩人且任。破帽略
遮阑 ,嫌见星星越甚。不饮。不饮。和取蜂愁
蝶恨。

醉蓬莱 同幕中诸公劝虞宣威酒

正红疏绿密 ,浪软波肥 ,放舟时节。载地
擎天 ,识堂堂人杰。万里长江 ,百年骄虏只笑
谈烟灭。葭苇霜秋 ,楼船月晓 ,渔樵能说。

分陕功成 ,沙堤归去 ,袞绣光浮 ,两眉黄
彻。了却中兴 ,看这回勋业。应有命圭相印 ,
都用赏、元功重叠。点检尊前 ,太平气象 ,今朝
浑别。

小重山 绵守白宋瑞席间作

轻暑单衣四月天。重来闲屈指，惜流年。
人间何处有神仙。安排我，花底与尊前。

争道使君贤。笔端驱万马，驻平川。长安
只在日西边。空回首，乔木淡疏烟。

青玉案 和雅守蹇少刘席上韵

相知元早来何暮。社燕送、秋鸿去。春草
春波愁目注。酒香花韵，绮谭妍唱，怎不思量
住。

虚无指点骑鲸路。个是骚人不凡处。画
栋云飞帘卷雨。风流千古，一时人物，好记尊
前语。

虞美人 春怀

一春不识春风面。都为慵开眼。荼蘼雪
白牡丹红。犹及尊前一醉、赏芳秊。东君又是
匆匆去。我亦无多住。四年薄宦老天涯。闲
了故园多少、好花枝。

点绛唇 德茂生朝作

一翦秋光，阿谁洗得无纤滓。冰盘彻底。
人也清如此。

万里归来，著个斑衣戏。慈颜喜。问君不

醉。更遣何人醉。

感皇恩 无害弟生朝作

万绿压庭柯 ,雨晴烟润。三尺金猊麝微
喷。百花香暖 ,酿作九霞仙酝。祝君如此酒 ,
年年饮。

插额汉貂 ,垂腰苏印。趁取如今未华鬢。
三茅兄弟 ,总有丹台名姓。蟠桃熟也未 ,教人
问。

武陵春 德茂乃翁生朝作

晓日帝枕初破睡 ,宝鸭宿薰浓。笑指图中
鹤发翁。仙骨宛然同。

万里郎官遥上寿 ,五马茜衫红。待插华貂
酒满钟。仍是黑头公。

谒金门 晚春

行不记。贪看远峰颦翠。风约柳花吹又
起。故黏行客袂。

老大浑无欢意。不为伤春憔悴。茅屋数
间修竹里。日长春睡美。

又

空伫立。又是冷烟寒食。开尽荼蘼都一
色。东风吹更白。

我是纶竿倦客。道上行人不识。著取蓑
衣拈短笛。沙鸥应认得。

又

春又晚。杨柳晓莺啼断。落尽残红馀片片。风狂都不管。

作客惟嫌酒浅。未敌闲愁一半。人与青山谁近远。可怜春梦短。

又

山数尺。江草江波同碧。晚雨吹风才数滴。行人心更急。

漠漠疏烟如织。遮断客愁不得。肠断故园无信息。灯花闲手剔。

玉漏迟 送官东南

东南应眷倚。当年丽绝，今其馀几。云锦飘香，好在藕花十里。六月长安徂暑，只一雨、滂沱都洗。君好为。携将苏醒，三吴生齿。

总道秦蜀讴吟，但消得雍容，笑谈而致。稍待秋风，也拟买舟东逝。收拾尘编蠹简，更饱看、江山奇伟。歌盛美。还送往趋天陛。

满庭芳 过黄州游雪堂次东坡韵

归去来兮，吾归何处，旧山闲却岷峨。雪堂重到，但觉客愁多。来往真成底事，人应笑、我亦狂歌。凭阑久，云车不至，举盏酌东坡。

少年，浑妄意，斗冲剑气，雷化龙梭。到如今，翻羨白鸟沧波。松柏皆吾手种，依然□烟蕊霜柯。君知否，人间尘事，元不到渔蓑。

殢人娇

痴本无缘 ,闷宁有火。都是你、自缠自锁。
高来也可。低来也可。这宇宙、何曾碍你一个。

休说荣枯 ,强分物我。惺惺地、要须识破。
渔樵不小 ,公侯不大。但赢取、饥餐醉来便卧。

洞仙歌 忆别

云窗雾阁 ,尘满题诗处。枝上流莺解人
语。道别来、知否瘦尽花枝 ,春不管 ,更遣何人
管取。

平生鸥鹭性 ,细雨疏烟 ,惯了江头自来去。
不见鹊桥边 ,只为隔年 ,翻赢得、年年风露。便
学得、无情海中潮 ,纵一日两回 ,如何凭据。

卜算子 前题

生别有相逢 ,死别无消息。说著从前总是
愁 ,只是不相忆。

月堕半窗寒 ,梦里分明识。却似瞋人不忆
他 ,花露盈盈湿。

水调歌头 江上作

江涨解网雨 ,衣润熟梅天。高人何事 ,乘
兴来寄五湖船。才听冬冬叠奏 ,呕轧橹声齐

全宋词 李流谦

发 ,几别故州山。转盼青楼杪 ,已在碧云端。
渡头月 ,临晚霁 ,泊清湾。水空天静 ,高下
相应总团圞。遥想吾家更好 ,尽唤儿曹泛扫 ,
欣赏共婵娟。应念思归客 ,对此不成眠。

于飞乐 为海棠作

薄日烘晴 ,轻烟笼晓 ,春风绣出林塘。笑
溪桃、并坞杏 ,忒煞寻常。东君处 ,没他后、成
甚风光。

翠深深、谁教入骨 ,夜来过雨淋浪。这些
儿颜色 ,已恼乱人肠。如何更道 ,可惜处、只是
无香。

西江月 为木樨作

色似蜡梅浑浅 ,香如薝卜微清。更张绿幄
蔽轻盈。巧著工夫斗钉。

露叶涓涓月晓 ,风英点点秋晴。江南江北
可经行。梦到吴王香径。

眼儿媚 中秋无月作

素娥作意失幽期。我自不凭伊。举杯重
欢 ,帖云微笑 ,应道人痴。

如今老去无情绪 ,只有睡相宜。建溪一
啜 ,木樨数翦 ,酒醒归时。

朝中措 失题

相思两地费三年。明月几回圆。鸥鸟不知许事，清江仍绕青山。

尊前歌板，未终金缕，已到阳关。趁取腊前归去，梅花不奈春寒。

千秋岁 别情

玉林照坐。簌簌花微堕。春院静，烟扉锁。黛轻妆未试，红淡唇微破。清瘦也，算应都是风流过。

把盏对横枝，尚忆年时个。人不见，愁无那。绕林霜掠袂，嚼蕊香黏唾。清梦断，更随月色禁持我。

虞美人 在芜湖待仲甄巨卿未至作

吴波亭畔千行柳。直恁留人久。晚来船槛再三凭。又是一钩新月、照江心。故人有约何时到。白地令人老。只愁酒尽更谁赊。一段闲愁无计、奈何他。

李吕

一落索 送游君安解绵竹尉

琢成玉树。谁解著、云斤月斧。短棹羸
骖，朴樕一怀尘土。叹雄图、伤别绪。

主人不语花能语。苦欲留君、不是留君
处。碧落紫霄，楼观参差烟雾。一樽空、鸿鹄
举。

满庭芳

光拂星榆，轮高金掌，暮烟飘尽澄空。素
娥幽恨，霜艳洗铅红。醉把摩云妙手，教纤翳、
不点青铜。知多少，天高露冷，争占九秋风。

歌钟。邀胜侣，园攀琼树，帘卷珠宫。算
庾楼吟赏，今古应同。多谢秦娥绝唱，声声为、
飘入云中。留仙住，莫教清影，容易转梧桐。

醉落魄 有序

予病足，置酒圃间，江梅渐开，不能一举
爵。对景呻吟，因效山谷道人“陶陶兀兀”之
句，法其体，作此以遣兴云。

全宋词 李吕

休休莫莫。当年不负西湖约。一枝初见
横篱落。嚼蕊闻香,长是醉乡落魄。

而今对酒空斟酌。老来多病情非昨。谁
人伴我临东阁。冷淡吟怀,犹可追前作。

朝中措

展屏山色翠连空。潇洒冠闽中。背郭元
无尘事,披襟时有清风。

君侯雅致,临流句丽,爱月情钟。乐府直
追欧老,堂名新自陶翁。

前调

堂成开宴日无空。景占四时中。画栋翠
飞星汉,雕阑锁断花风。

薰人和气,清谈四坐,雅量千钟。早晚催
归天仗,往来还记溪翁。

鹧鸪天 寄情

脸上残霞酒半消。晚妆匀罢却无聊。金
泥帐小教谁共,银字笙寒懒更调。人悄悄,漏
迢迢。琐窗虚度可怜宵。一从恨满丁香结,几
度春深豆蔻梢。

前调 谢人送牡丹

甲帐春风肯见分。夜陪清梦当炉熏。寻

全宋词 李吕

香若傍阑干晓 ,定见堆红越鄂君。雕玉佩 ,郁金裙。凭谁书叶寄朝云。兰芽九畹虽清绝 ,也要芳心伴小醺。

沁园春 叹老

射虎南山 ,断蛟北海 ,恍如梦中。念少年豪气 ,霜寒一剑 ,清时功业 ,月满雕弓。年去年来成底事 ,已一半消磨成老翁。那堪更 ,病为城绕 ,愁作兵攻。

无惊。慵语西风。正独倚危阑送塞鸿。道酒能消遣 ,酒因病减 ,歌能消遣 ,歌为愁浓。大造不将炉冶去 ,□万卷诗书宁愤穷。都休问 ,且试弹绿绮 ,闲和秋虫。

水调歌头 和伯称

山雨喜开霁 ,爽气涤烦襟。晚秋丹叶飘坠 ,篱菊散黄金。徒倚关河凝望 ,回首光阴轻驶 ,倏忽二毛侵。须信人间世 ,莫放酒杯深。

一星子 ,名与利 ,漫浮沈。塞翁祸福无定、此理古犹今。妙处只应亲到 ,外物从渠舒卷 ,出处我无心。袖手无新语 ,洗耳听清音。

凤栖梧

一岁光阴寒共暑。一日光阴 ,只个朝还暮。有物分明能唤寤。晚钟晨角君听取。

扰扰胶胶劳百虑。究竟思量 ,没个相干

处。只有一般携得去。世人唤作闲家具。

点绛唇

去岁天涯，一灯闲作幽窗伴。酒来须满。
不待旁人劝。

今岁天涯，又是年华晚。凄凉惯。问天不
管。只我何曾管。

调笑令 笑

掩袖低迷情不禁。背人低语两知心。烟
蛾渐放愁边散，细靥从教醉里深。小梅破萼娇
难似。喜色著人吹不起。莫将羽扇掩明波，滟
滟光风生眼尾。

眼尾。寄深意。一点兰膏红破蕊。钿窝
浅浅双痕媚。背面银床斜倚。烛花先报今宵
喜。管定知人心里。

前调 饮

摘蕊和香滴得成。更将白玉琢飞鲸。殢
娇一任香罗浣，更折花枝作令行。香泛金鳞翻
蕊盏。笑里桃花红近眼。粉壶琥珀为君倾，弄
翠揆红归去晚。

归晚。思何限。玉坠金偏云鬓乱。伤春
谁作嬉游伴。只有飞来花片。几回愁映眉山
远。总被东风惊散。

前调 坐

玉笙吹遍古梁州。暗学芙蓉一样愁。倚窗重整金条脱，对槛不卸红臂鞲。浅浅绿靴双凤困。柳弱花慵敛新闷。娇多无力凭熏笼，又报杏园春意尽。

春尽。敛新闷。暗傍银屏撩绿鬓。攒眉不许旁人问。帘外冷红成阵。银缸挑尽睡未肯。肠断秦郎归信。

前调 博

绿檀屏下玉成围。唤拥金盆出注时。多情故与诸郎戏，不惜春娇两鬓垂。珠玑满斗犹慵起。玉马象盘还得意。漏冷铜乌唤不应，更移红烛桃花底。

花底。锦铺地。绣浪琼枝光似洗。一心长在金盆里。翠袖懒遮纤指。珠玑满斗犹慵起。过尽红楼春睡。

前调 歌

贤川六叠小香檀。玉笋纤纤不奈寒。浅破朱唇促新调，红丝短瑟未须弹。锦字两行妆宝扇。扇中鸾影迷娇面。兰叶歌翻春事空，孤凤离鸾两含怨。

含怨。两颦浅。羽髻云鬟低玉燕。绿沈香底金鹅扇。隐隐花枝轻颤。当筵不放红云

转。正是玉壶春满。

临江仙

家在宋墙东畔住，流莺时送芳音。窃香解佩两沈沈。都缘些子事，过却许多春。

日上花梢初睡起，绣衣闲纵金针。错将黄晕压檀心。见人羞不语，偷把泪珠匀。

青玉案 春夜怀故人

参横月落闻街鼓。指杨柳、天边路。冷澹梨花啼玉箸。五云芝检，八花砖影，稳上鳌头去。

吹箫台冷秦云暮，玉勒嘶风弄娇步。四雁峰前凭尺素。壁尘香减，绮窗风静，记得题诗处。

李 昉 英

兰陵王

燕穿幕。春在深深院落。单衣试，龙沫旋薰，又怕东风晓寒薄。别来情绪恶。瘦得腰围柳弱。清明近，正似海棠，怯雨芳踪任飘泊。

钗留去年约。恨易老娇莺，多误灵鹊。碧云杳渺天涯各。望不断芳草，更迷香絮，回文强写字屡错。泪欲注还阁。

孤酌。住春脚。便彩局谁忺，宝轸慵学。阶除拾取飞花嚼。是多少春恨，等闲吞却。阑干猛拍，叹命薄。悔旧诺。

摸鱼儿

晓风痴、绣帘低舞。霏霏香碎红雨。燕忙莺懒春无赖，懒为好花遮护。浑不顾。费多少工夫，做得芳菲聚。休颺百五。却自恨新年，游疏醉少，光景恁虚度。

猊烟瘦，困起庭阴正午。游丝飞絮无据。千林湿翠须臾遍，难绿鬓根霜缕。愁绝处。怎忍听，声声杜宇深深树。东君寄语。道去

也还来，后期长在，紫陌岁相遇。

又 用古“买陂塘旋栽杨柳”韵

敞茅堂、茂林环翠，苔矶低蘸烟浦。青
蓑混入渔家社，斜日断桥船聚。真乐处。坐
芳草，瓦樽满酒频频注。皋禽自舞。惯松径
穿云，梅村踏雪，朗笑自来去。

车乘坠，争似修筇稳步。前尘回首俱误。
安闲得在中年好，抱瓮尚堪蔬圃。高眼觑。
算不识、人间宠辱除巢许。风篁解语。应共
笑群狙，无端喜怒，三四计朝暮。

又 五羊郡圃筑壮猷堂落成

绕西园、粉笼千雉，镜池屏石天造。主
人意匠工收拾，华屋落成闻早。轮奂巧。望
缥缈、五云深处移蓬岛。油幢羽葆。指貔虎
长驱，鲸鲲网取，电走捷旗报。

铙吹发，回庑连屯饮犒。海山波静烟扫。
纶巾萧散环珠履，春满绿杨芳草。人境好。
是握穗五翁，福地无尘到。芝书在道。便整
顿乾坤，经营万宇，栋国要元老。

又 送王子文知太平州

怪朝来、片红初瘦，半分春事风雨。丹
山碧水含离恨，有脚阳春难驻。芳草渡。似
叫住东君，满树黄鹂语。无端杜宇。报采石
矶头，惊涛屋大，寒色要春护。

阳关唱，画鹢徘徊东渚。相逢知又何处。
摩挲老剑雄心在，对酒细评今古。君此去。
几万里东南，只手擎天柱。长生寿母。更稳
步安舆，三槐堂上，好看彩衣舞。

贺新郎 陪广帅方右史登越台

绣谷流明帜。稳飞舆、茵柔草碧，盖敲松翠。遨首意行穷绝顶，彩榭千年胜地。远峰断、莽苍烟水。护日晴云收午暑，飒长风、振叶生秋思。笼雾炷，飘霞袂。

清明官府歌棠芾。且萧闲事外，下看玉城珠市。山色骄人逢此客，麈尾霏霏露碎。一笑又、羊衔新穗。田野欢声和气合，唤觥船、猛为鱼占喜。谁会得，醉翁意。

又 饯广帅马方山赴召

世羨官高大。又谁知、几多卿相，身荣名坏。我辈相逢无愧色，彼此苍颜健在。又容易、分携越海。写出阳关离别恨，看一行、雁字斜飞界。天下宝，愿自爱。

白衣苍狗须臾改。久冥心、鸡虫得失，鸚鵡迟快。君带貂蝉头上立，老我荷衣草带。肯此膝、向人雅拜。远饯元非趋炎者，二十年、相与形骸外。义金石，更坚耐。

又

同年顾君景冲云翼经属官舍白莲盛开，招饮水亭

谁种蓝田玉。碧云深、亭亭月上，水明溪曲。羞作时妆儿女态，冷淡冰餐露沐。出尘外、风标幽独。除了留侯无此貌，便何郎、傅粉终粗俗。意凝远，韵清淑。

凉台向晚微风馥。讶银杯羽化，折取戏浮醽醑。安得梅花如许大，天遣辟除暑溽。

浑不觉、鹭翘鸥浴。可恨妖妃污太液，只东林、社友追游熟。宜夜看，灿瑶烛。

又 赋菊

细与黄花说。是天教、开遇重阳，玉裁金屑。老行要寻松竹伴，雅爱山翁鬓雪。任满插、追陪节物。惟有渊明吾臭味，傍东篱、盘薄芳丛撷。便无酒，也清绝。

芒寒色正孤标洁。惯平生、餐霜饮露，倚风迎月。不比芙蓉偏妩媚，不比茱萸太烈。似隐者、萧闲岩穴。至老枝头犹健在，笑纷纷、红紫尘沙汨。香耐久，看晚节。

又 钱广东吴宪燧时持节宪江西

元日除书湿。到而今、西风老矣，驾轺初入。自是龙颜深注想，孤凤翔而后集。久父老、攀留原隰。庾岭经行梅亦喜，小溪奴、背底惟诗笈。冰雪操，又谁及。

昨来容易风云翕。便三台两地，也只等闲如拾。天马不鸣凡马暗，百步何如五十。况汹汹、波涛方急。此去一言回天力，著高高、百尺竿头立。浇磊砢，快鲸吸。

又 再用韵钱吴宪

过雨璇空湿。浩秋香、光浮桂菊，晓风吹入。柳系牙樯应小驻，草草还成胜集。又追趁、牡车原隰。照座玉人风骨耸，想胸蟠、蕊阙琳琅笈。真作者，世难及。

远山云雾工开翕。共朱阑徙倚，总好锦囊收拾。老我只今才思涩，知二争如知十。夏金缕、檀敲休急。访古夷犹行八境，忆朝

阳、鸣凤台端立。笔也醉，砚池吸。

又 丙辰自寿、游景泰小隐作

天地中间大。纵遨游、登山临水，散人一个。学易已来秋又六，肯趁名缰利锁。得日日、安闲笑过。金马玉堂也曾到，尽不妨、拍手溪头坐。风翦笠，月兰舸。

今朝记是初生我。近小春、黄菊犹葩，早梅将朵。拔宅危颠穷胜践，指点尘寰蚁磨。看涧底、飞泉珠颗。松柏苍苍俱寿相，更千年、雪鹤鸣相和。安期老，举杯贺。

水龙吟 癸丑江西持宪自寿

唱恭初意如何，揭来五十三年矣。犁锄颇熟，诗书粗解，簪绅聊耳。自信柴愚，真成汲黯，却无刘蕡。向高秋初度，同时有菊，淡相对、风霜里。

最癖登山临水。又何心、蜗名蝇利。俗缘未了，强教肉食，何曾知味。无事微吟，会心微笑，逢场微醉。把日生、只恁安排，领取百十二岁。

又 和吴宪韵，且坚郁孤同游之约

驿飞稳驾高秋，迎人满目清新景。秋还有色，芙蓉照水，晨妆对镜。雪卷寒芦，字横过雁，渡浮孤艇。是骚人行处，腔风调月，香满袖、过梅岭。

断岸烟收人静。雨声干、桐疏枫冷。掀髯独笑，仙翁起舞，卧龙呼醒。近小阳春，为梅也合，迟迟鞭影。更郁孤、一笑追欢，

料得坡翁首肯。

又 观竞渡

碧潭新涨浮花，柳阴稠绿波痕腻。一声雷鼓，半空雪浪，双龙惊起。气压鲸鲵，怒掀鳞鬣，擘开烟水。算战争蛮触，雌雄汉楚，总皆一场如此。

点额许教借一，得头筹、欢呼震地。翻嗤浮世，要津搀进，奔波逐利。斗了还休，倩渠衔寄，三闾角黍。会风云、快出为霖，可但颌明珠睡。

水调歌头 题舫斋

郭外足幽胜，潮入涨溪流。舫斋小小一叶，老子日遨游。管领白苹红蓼，披戴绿蓑青箬，直钓任沈浮。玉缕饱鲈鲙，雪阵狎沙鸥。

个中眠，个中坐，个中讴。个中收拾诗料，舫客个中留。休羨乘槎博望，且听洞箫赤壁，乐处是瀛洲。日月荡双桨，天地一虚舟。

又 题斗南楼和刘朔斋韵

万顷黄湾口，千仞白云头。一亭收拾，便觉炎海豁清秋。潮候朝昏来去，山色雨晴浓淡，天末送双眸。绝域远烟外，高浪舞连艘。

风景别，胜滕阁，压黄楼。胡床老子，醉挥珠玉落南州。稳驾大鹏八极，叱起仙羊五石，飞佩过丹丘。一笑人间世，机动早惊

鸥。

又 寿参政徐意一

地位到公辅，耆艾过稀年。几人兼此二美，而况是名贤。松柏苍然长健，姜桂老来愈辣，劲气九秋天。鲠鲠攫鳞语，不改铁心坚。

说武夷，同此月，瑞三仙。公虽居后，瓌奇伟特却光前。续得紫阳脉络，了却西山事业，舟楫济商川。饮对黄花榭，一酌岁三千。

又 题登春台

野趣在城市，崛起此台高。谁移蓬岛，冯夷夜半策灵鳌。十万人家鳌碧，四面峰峦涌翠，远岫拍银涛。插汉笔双塔，簸两叶轻舠。

我乘风，时一到，共嬉遨。江山无复偃蹇，弹压有诗豪。宝剑孤横星动，铁笛一声云裂，寒月冰宫袍。沧海一杯酒，世界眇鸿毛。

念奴娇 寿王守母

瑶池高会，见云香凤背，风柔鹤膝。天遣月卿来拜舞，新拜玺书增秩。有母能贤，生儿如此，总是前身佛。孙曾戏彩，慈颜一笑闲逸。

曾向浑尺轩中，共评今古，手写王言綍。个里乃翁棠荫在，映得梅仙山碧。人爱黄堂，祝萱堂寿，拍拍欢声溢。明年宣劝，蟠桃火

枣庭实。

又 宝祐丁巳闰四月，偕十友避暑白云寺

麦秋时候，薄阴罩炎日，山行乘兴。筇屐追随多胜侣，青佩黄冠方领。坐石谈玄，听泉濯暑，直上千山顶。倚风长啸，籁鸣林谷相应。

忽涌云气漫空，海吹急雨，觉冰练微冷。洗尽人间名利障，便是蓬莱仙境。半日偷闲，一生清福，岂在荣钟鼎。青灯深夜，陶然独妙清圣。

瑞鹤仙 甲辰灯夕

玉城春不夜。映月璧寒流，烛蕖光射。鳌山海云驾。拥遨头箫鼓，锦旗红亚。东风近也。趁乐岁、良辰多暇。想阳和、早遍南州，暖得柳娇桃冶。

堪画。纱笼夹道，露重花珠，尘吹兰麝。歌朋舞社。玉梅转，闹蛾耍。且茧占先探，芋郎戏巧，又卜紫姑灯下。听欢声、犹自未归，钿车宝马。

沁园春 监司元宵招饮不赴

才到中年，节物浑闲，赏心顿轻。据随分东风，瓶簪柳雪，应时灯夜，棚缀莲星。自一家春，也三杯酒，巧茧堆香笑语声。又何须，听那西楼弦管，南陌箫笙。

平生。黄卷青灯。肯珠翠奢华八尺檠。

欲趁队闲嬉，雕鞍宝马，回头猛忆，破案囊萤。邻曲渔歌，庭除鹤舞，尘外冰轮彻骨清。人闲处，这炯然方寸，一点长明。

满江红 江西持宪节、登高作

薄冷催霜，碧空豁、飞鸿斜度。□九日、御风绝顶，下看尘宇。滕阁芳筵笺笔妙，龙山胜践旌旗驻。料山灵、也要可人游，成佳趣。

吹帽堕，羞千古。题觞字，非吾侣。却坐间著得，煮茶桑苎。万里寒云迷北斗，望远峰夕照频西顾。且满浮、大白送黄花，剑休舞。

又 和刘朔斋节亭韵

人似梅花，峭玉立、岁寒风节。新圃辟、种梅千树，幻成南雪。池碎瀑声荷捧雨，径涵秋影篔筛月。唤石君、错落坐庭前，红尘绝。

嫌聒耳，纂箏戛。慵著眼，俳优狎。但一觴一咏，放怀开阔。涌地池亭工掩映，擎天柱石觚施設。待枝头、金颗可调羹，休轻折。

菩萨蛮

别刘朔斋后寄词，时朔斋抵峡山拾遗词至

云山叠叠双眸短。梦魂夜趁行人远。千里共襟期。吟风饮月时。

全宋词 李昉英

碧溪穿翠峡。雪意蓬萧飒。安得翅飞来。
冲寒同访梅。

渔家傲

重著夹罗犹怯冷。隔帘拜祝团圆镜。取
片龙涎安古鼎。香阁静。横窗写出梅花影。

寒鹊颤枝飞不定。回纹刺就更筹永。小
玉欣眠呼不醒。霜气紧。丽谯吹动梅花引。

西江月

小鹢载池心月，长虹夸水中天。主人情
重客留连。便欲乘风寒殿。

霜竹且传秋信，镜蕖不作春妍。夜凉正
好倒金船。朔饮而今再见。

浣溪沙

笋玉纤纤拍扇纨。戏拈荷叶起文鸳。水
亭初试小龙团。

拜月深深频祝愿，花枝低压髻云偏。倩
人解梦语喧喧。

城头月

和广帅马方山韵赠斗南楼道士青霞梁弥仙

工夫作用中宵昼。点化无中有。真气长
存，童颜不改，底用呵磨皱。

全宋词 李昉英

一身二五之精媾。积得婴儿就。试问霞
翁，三田熟未，还解飞冲否。

李弥逊

沁园春 寄张仲宗

敲枕深轩 ,散帙虚堂 ,畏景屡移。渐披襟临水 ,搯床就月 ,莲香拂面 ,竹色侵衣。压玉为醪 ,折荷当盏 ,卧看银潢星四垂。人归后 ,伴饥蝉自语。宿鸟相依。

痴儿。莫蹈危机。悟四十九年都尽非。任纡朱拖紫 ,围金佩玉 ,青钱流地 ,白璧如坻。富贵浮云 ,身名零露 ,事事无心归便归。秋风动 ,正吴淞月冷 ,莼长鲈肥。

永遇乐 初夏独坐西山钓台新亭

曲径通幽 ,小亭依翠 ,春事才过。看笋成竿 ,等花著果 ,永昼供闲坐。苍苍晚色 ,临渊小立 ,引首暮鸥飞堕。悄无人 ,一溪山影 ,可惜被渠分破。

百年似梦 ,一身如寄 ,南北去留皆可。我自知鱼 ,悠然濠上 ,不问鱼非我。隔篱呼取 ,举杯对影 ,有唱更凭谁和。知渊明 ,清流临赋 ,得似恁麽。

又 用前韵呈张仲宗、苏粹中

五十劳生 ,紫髯霜换 ,白日驹过。闭户推愁 ,缘崖避俗 ,壁角团蒲坐。提壶人至 ,竹根同卧 ,醉帽尽从敲堕。梦惊回 ,满身疏影 ,露滴月斜云破。

无人自酌 ,有邀皆去 ,我笑两翁多可。忍冻吟诗 ,典衣沽酒 ,二子应嗤我。两忘一笑 ,调同今古 ,谁道郢歌无和。后之人 ,犹今视昔 ,有能继麽。

念奴娇

瑶池倒影 ,露华浓、群玉峰峦如洗。明镜平铺秋水净 ,寒锁一天空翠。荷芰风摇 ,苹蓼波动 ,惊起鱼龙戏。扶疏桂影 ,十分光照人世。

谁似。老子痴顽 ,胡床危坐 ,自引壶觞醉。斗转参横歌未彻 ,屋角乌飞星坠。对影三人 ,停杯一问 ,谁会骑鲸意。金牛何处 ,玉楼高耸十二。

又 坐上次王伯开韵

风帘弄影 ,正闲堂永昼 ,香销人寂。轧轧邻机芳思乱 ,愁入回文新织。燕蹴巢泥 ,莺喧庭柳 ,好梦无踪迹。那堪春事 ,背人何计留得。

谁似爱酒南邻 ,岸巾坦腹 ,醉踏西山碧。彩笔阳春传雁足 ,催我飞觞浮白。老去情怀 ,凭君试看 ,鬓上秋霜色。故园千里 ,月华空照相忆。

又 癸卯亲老生辰寄武昌

楚天木落 ,际平芜千里 ,寒露凝碧。鄂渚

波横何处是 ,当日孙郎赤壁。黄耳音稀 ,白云
望远 ,又见春消息。嘉辰长记 ,谢池梅蕊初摘。

遥想黄鹤楼高 ,兰阶丝管沸 ,传觞如织。
倦客心驰归路绕 ,不及南飞双翼。固著斑衣 ,
重翻锦字 ,寄远供新拍 ,明年欢侍 ,寿期应献千
百。

三段子 次韵苏粹中寄咏筠庄

层林烟霏 ,巨壁天半 ,鸿飞无路。云断处、
两山之间 ,十万琅玕环翠羽。转秀谷、枕苹花
汀渚。短柳疏篱向暮。看卧垄牛归 ,横舟人
去 ,平芜鸥鹭。

并游不见鞭鸾侣。只僧前、松子随步。回
径险、凌风遐想 ,小憩清泉敲茂树。正笋蕨、过
如苏新雨。矾下游鱼可数。纵窈窕、云关长
启 ,寂寂谁争子所。

世上丹毂朱纓 ,春梦觉、南柯何许。况荣
枯无定 ,中有欢离愁聚。尽笑我、诧盘中趣。
为续昌黎赋。会有人 ,秣马膏车 ,相属一尊清
醑。

水调歌头 横山阁对月

清夜月当午 ,轩户踏层冰。楼高百尺 ,缥
缈天阙敞云扃。万里风摇玉树 ,吹我衣裾零
乱、寒入骨毛轻。径欲乘之去 ,高兴送青冥。

神仙说 ,功名事 ,两难成。苇汀筠岫深处、
端可寄余龄。身外营营姑置 ,对景掀髯一笑 ,
引手接飞萤。且尽杯中物 ,日出事还生。

又 次李伯纪韵趣开东阁

安石寓丝竹,方朔杂诙谐。昂霄气概,古来无地可容才。不见骑鲸仙伯,唾手功名事了,猿鹤与同侪。有意谢轩冕,无计避嫌猜。

静中乐,山照座,月浮杯。忘形湛辈,一笑丘壑写高怀。只恐天催玉斧,为破烟尘昏翳,人自日边来。东阁动诗兴,莫待北枝开。

又 次李伯纪春日韵

松柏渐成趣,红紫勿齐开。花神靳惜芳事,日日待公来。遥想金葵侧处,素月华灯相照,妆影满歌台。余韵写宫徵,飞落远山隈。

逃禅客,尊中尽,厌长斋。且愁风絮,断送春色揽离怀。命驾何妨千里,祇恐行云碍辙,直磴插崔嵬。手拍阳春唱,隔岸借残杯。

又 次向伯恭芑林见寄韵

不见隐君子,一月比三秋。惊涛如许,梦魂无路绝横流。安得如云长翮,命驾不须千里,上下逐君游。此计杳难就,注目倚江楼。

西风里,多少恨,寄歌头。飞奴接翼,为我三度下南州。正是天寒日暮,独钓一江残雪,风猎碧莎裘。和子浩然句,一酌散千忧。

又 再用前韵

不上长安道,霜鬓几惊秋。故人何在,时序欺我去如流。赏对洛滨仙伯,共说芑林佳致,魂梦与追游。更唱中秋句,得月上东楼。

云岩底,秋香下,楚江头。十年笑傲,真是骑鹤上扬州。却忆金门联辔,晓殿催班同到,高拱翠云裘。明月今千里,何计缓离忧。

又

八月十五夜集长乐堂 ,月大明 ,常岁所无 ,众客皆欢。戏用伯恭韵作

白发闽江上 ,几度过中秋。阴晴相半 ,曾见玉塔卧寒流。不似今年三五 ,皎皎冰轮初上 ,天阙恍神游。下视人间世 ,万户水明楼。

贤公子 ,追乐事 ,占鳌头。酒酣喝月、腰鼓百面打凉州。沈醉尽扶红袖 ,不管风摇仙掌 ,零露湿轻裘。但恐尊中尽 ,身外复何忧。

蓦山溪 次李伯纪梅花韵

冲寒山意 ,未放江头树。老去恨春迟 ,数花期、朝朝暮暮。疏英冷蕊 ,也为有情忙 ,深夜月 ,小庭中 ,绝胜西城路。

调元妙手 ,便是春来处。酝造十分香 ,更暖借、毫端烟雨。狂歌醉客 ,小摘问东风 ,花谢后 ,子成时 ,趁得和羹否。

又 宣城丞厅双梅

竹边柳外 ,两两寒梅树。疏影上帘栊 ,似却□一枝横暮。玉肌瘦损 ,有恨不禁春 ,萦冰佩 ,整风裳 ,怅望瑶台路。

我来胜赏 ,持酒花深处。天晓酿幽香 ,正一霎、如酥小雨。江山得助 ,臭味许谁同 ,长安远 ,故人疏 ,梦到江南否。

昆明池 次韵尚书兄春晚

帐锦笼庭 ,囊香飘榭 ,过了芳时强半。觅

残红、蜂须趁日,占新绿、莺喉咤暖。数花期、望得春来,春去也、把酒南山谁伴。更帘幕垂垂,恼人飞絮,乱落一轩风晚。

手拍狂歌挥醉碗。笑浪走江头,几逢归燕。忆黄华、曾吹纱帽,讶彩楼、催放纨扇。功名事、于我如云,漫赢得星星,满簪霜换。向棠棣华间,鹓鸪原上,莫厌尊罍频来见。

十月桃 二首 同富季申赋梅花

浮云无定,任春风万点,吹上寒枝。砌外珑璁,暗香夜透帘帟。闲情最宜酒伴,胜黄昏、冷月清溪。风流谢傅,梦到华胥,长是相随。

似凝愁、不语谁知。芳思乱微酸,已带离离。传语花神,任教横竹三吹。枝头要看如豆,趁和羹、百卉开时。十分金蕊,先与东君,一笑相期。

又

一枝三四,弄疏英秀色,特地生寒。刻楮三年,漫夸煮石成丹。梨花带雨难并,似玉妃、寂寞微潜。瑶台空阔,露下星坠,零乱风鬟。

记前回、拥尽西园。花信被山烟,著意邀阑。盏面横斜,大家月底颓然。如今万点难缀,共苍苔、打合成班。诗翁何似,劝春莫交,粉淡香残。

声声慢 木犀

龙涎染就,沈水薰成,分明乱屑琼瑰。一

朵才开 ,人家十里须知。花儿大则不大 ,有许多、潇洒清奇。较量尽 ,诮胜如未利 ,赛过酴醾。

更被秋光断送 ,微放些月照 ,著阵风吹。恼杀多情 ,猛拚沈醉酬伊。朝朝暮暮守定 ,尽忙时、也不分离。睡梦里 ,胆瓶儿、枕畔数枝。

永遇乐

学士兄筑室南山拒梗峰下 ,与西山相对。因生日 ,以词见意

一水如绳 ,两山如翼 ,绿野如绣。松院干霄 ,筠庄枕浪 ,揽尽溪山秀。水南水北 ,竹舆兰棹 ,来往月宵花昼。问人间、天上何处 ,更寻大围小有。

人言拒梗 ,功成仙去 ,丹鼎夜寒光透。唤取云英 ,炼成石髓 ,日月齐长久。烦君挟我 ,朝元真阙 ,两翼羽轻风骤。此时看 ,小茅峰顶 ,有云贯斗。

满庭芳 中秋次刘梦弼韵

荷背翻黄 ,蕉心滴翠 ,雨洗庭院无尘。断云缺处 ,矫首望冰轮。迢迢天垂四幕 ,星杓淡、河汉横银。笙歌散 ,风帘自上 ,寒水满楼明。

刘郎方得计 ,钗摇绣户 ,枕并华裯。笑狂客无眠 ,坐听钟鲸。明月中秋一梦 ,临鸳瓷、三绕殷勤。清光里 ,持杯对影 ,风月两兼并。

水龙吟 上巳

化工收拾芳菲 , 晕酥翦彩迎春袂。江山影里 , 泰阶星聚 , 重寻古意。曲水流觞 , 晚林张宴 , 竹边花外。倩飞英衬地 , 繁枝障日 , 游丝驻 , 羲和旆。

云避清歌自止。放一钩、玉沈寒水。西园飞盖 , 东山携妓 , 古今无愧。闻道东君 , 商量花蕊 , 作明年计。待公归 , 独运丹青妙手 , 忆山阴醉。

洞仙歌 登临漳城咏梅

断桥斜路 , 又是春来也。仙掌掬云半开谢。尽凝酥砌粉 , 不似真香 , 分明对、冰雪肌肤姑射。

天涯伤老大 , 万斛新愁 , 一笑端须问花借。纵广平冷淡 , 铁石心肠 , 未拚得、花里风前月下。为传语、游蜂缓经营 , 且留与山翁 , 醉吟清夜。

又 次李伯纪韵

残烟薄雾 , 仗东风排遣。收拾轻寒做轻暖。问墙隅屋角 , 多少青红 , 春不语 , 行处随人近远。

穿帘花影乱。金鸭香温 , 幽梦醒时午禽啭。任抛书推枕 , 嚼蕊攀条 , 暗消了、清愁一半。且莫放、浮云蔽晴晖 , 怕惹起羁人 , 望中凝恋。

江神子 临安道中

梦中北去又南来。饱风埃。鬓华衰。浮木飞蓬，踪迹为谁催。自笑自悲还自误，一杯酒，鼻如雷。

晓舆行处觉春回。屑琼瑰。糝□苔病眼冲寒，欲闭又还开。近水人家篱落畔，遥认得，一枝梅。

感皇恩 次韵尚书兄老山堂作

入夜月华清，中天方好。更著山光两相照。星稀云净，玉树惊乌三绕。广寒风露近，秋光老。

老山高胜，飞尘不到。亭上仙翁自昏晓。短封新唱，字字令人绝倒。待凭书寄恨，归鸿少。

花心动 七夕

水馆风亭，晚香浓、一番荷芰经雨。簟枕乍闲，襟裾初试，散尽满轩袢暑。断云却送轻雷去，疏林外、玉钩微吐。夜未阑，秋生败叶，暗摧庭树。

天上佳期久阻。星河畔，仙车缥缈云路。旧恨未平，幽欢难驻，洒落半天风露。绮罗人散金猊冷，醉魂到、华胥深处。洞户悄，南楼画角自语。

一寸金

尚书生日光州作。光州芍药甚盛,尚书为品次图之,故未句云

仙李盘根,自有云仍霭芳裔。更溜雨霜皮,临风玉树,紫髯丹颊,长生久视。鹤帐琅书至。长庚梦、当年暗记。佳辰近,回首西风,渐喜秋英弄霜蕊。

暂卷双旌,鸣金吹竹,萱堂伴新戏。对璧月流光,屏山供翠,碧云乍合,飞觞如缀。早晚岩廊侍。终不负、黄楼一醉。丹青手、先与翻阶,万叶增春媚。

蝶恋花 拟古

百尺游丝当绣户。不系春晖,只系闲愁住。拾翠归来芳草路。避人蝴蝶双飞去。

困脸羞眉无意绪。陌上行人,记得清明否。消息未来池阁暮。蒙蒙一饷梨花雨。

又 游南山过陈公立后亭作

足力穷时山已晦。却上轻舟,急棹穿沙背。云影渐随风力退。一川月白寒光碎。

唤客主人陶谢辈。拂石移尊,不管游人醉。罗绮丛中无此会。只疑身在烟霞外。

又 新晴用前韵

清晓天容争显晦。溪上群山,戢戢分驼背。谁似浮云知进退。疏林嫩日黄金碎。

夜枕不眠憎鼠辈。困眼贪晴,拚被风烟

醉。天意有情人不会。分明置我风波外。

又 福州横山阁

百叠青山江一缕。十里人家，路绕南台去。榕叶满川飞白鹭。疏帘半卷黄昏雨。楼阁峥嵘天尺五。荷芰风清，习习消祥暑。老子人间无著处。一尊来作横山主。

又 西山小湖，四月初，莲有一花

小小芙蓉红半展。占早争先，不奈腰肢软。罗袜凌波娇欲颤。向人如诉闺中怨。把酒与君成眷恋。约束新荷，四面低歌扇。不放游人偷眼盼。鸳鸯叶底潜窥见。

虞美人 咏古

上阳迟日千门锁。花外流莺过。一番春去又经秋。惟有深宫明月、照人愁。

暗中白发随芳草。却恨容颜好。更无魂梦到昭阳。肠断一双飞燕、在雕梁。

又 东山海棠

海棠开后春谁主。日日催花雨。可怜新绿遍残枝。不见香腮和粉、晕燕脂。

去年携手听金缕。正是花飞处。老来先自不禁愁。这样愁来欺老、几时休。

又

金泥捍拨春声碎。恨入相思泪。醉欺秋水绿云斜。浑似梦中重到、阿环家。

主人著意留春住。不醉无归去。只愁银

烛晓生寒。明日落花飞絮、满长安。

又 赠富季申别

年年江上清秋节。盏面分霜月。不堪对月已伤离。那更梅花开后、海棠时。

剑溪难驻仙游路。直上云霄去。藕花恰莫碍行舟。要趁潮头八月、到扬州。

又 次韵叶少蕴怀隐庵作

方壶小有人谁到。底事春知早。使君和气粲如花。更筑百花深处、驻春华。

云关远枕苕溪浅。未放归怀展。看残红紫绿阴斜。鸾凤干霄却上、玉皇家。

青玉案

杨花尽做难拘管。也解趁、飞红伴。驄马无情人渐远。沙平浅渡，雨湿孤村，何处长亭晚。

欲凭桃叶传春怨。算不似、斜风情双燕。纵得书来春又换。只将心事，分付眉尖，寂寞梨花院。

菩萨蛮 管邦惠家小鬟善讴

小山娇翠低歌扇。雏莺学语春犹浅。无力响方檀。声随玉笋翻。

垂鬟云乍染。媚靨香微点。未解作轻颦。凝情已动人。

又 新秋

凉飈轻散余霞绮。疏星冷浸明河水。敲

枕画檐风。秋生草际蛩。

雁门离塞晚。不道衡阳远。归恨隔重山。
楼高莫凭栏。

又

风庭瑟瑟灯明灭。碧梧枝上蝉声歇。枕冷梦魂惊。一阶寒水明。

鸟飞人未起。月露清如洗。无语听残更。
愁从两鬓生。

又

富季申见约观月,以病不能往。夜分独卧横山
阁,作此寄之

余霞收尽寒烟绿。江山一片团明玉。敲
枕画楼风。愁生草际蛩。

金茎秋未老。两鬓吴霜早。忍负广寒期。
清尊对语谁。

浣溪沙

小小茅茨隐翠微。桥平双手弄涟漪。好
风还动去年枝。

得雨疏梅肥欲展,人家次第有芳菲。惜花
恰莫探春迟。

又 和蒋丞端午竞渡

箫鼓哀吟乐楚臣。牙樯锦缆簇江濆。调
高彩笔逞尖新。

海角逢时伤老大,莫辞卮酒话情亲。与君
同是异乡人。

又

向日南枝不奈晴。无风绛雪自飘零。画楼更作断肠声。

小侧金荷迎落蕊，高烧银烛照残英。生愁斜月酒初醒。

临江仙 次韵尚书兄送别

枝上子规催去旆，柳条偏系离情。片云留雨锁愁城。不堪明月夜，寂寞照南荣。

莫作东山今日计，风雷已促鹏程。功成来伴赤松行。却寻鸿雁侣，尊酒会如星。

又 次韵富季申九月菊未开

燕去莺来昏又晓，劳生莫负心期。菊花何必待开时。十分浮玉蚁，一拍贯珠词。

少借笔端烟雨力，不须露染风披。芳心微露定因谁。风流今太傅，萧洒古东篱。

又 次李伯纪韵

多病渊明刚止酒，不禁秋蕊浮香。饮船歌板已兼忘。吴霜羞鬓改，无语对红妆。

小捻青枝撩鼻观，绝胜娇额涂黄。独醒滋味怕新凉。归来烛影乱，敲枕听更长。

又 杏花

一片花飞春已减，那堪万点愁人。可能春便负闲身。细思愁不饮，却是自辜春。

且共一尊追落蕊，犹胜陌上成尘。杯行到手莫辞频。杏花须记取，曾与此翁邻。

又 次韵叶少蕴惜春

试问花枝馀几许 ,卷帘细雨随人。风光犹
恋苦吟身。海棠浑怯冷 ,为我强留春。

细听惜花歌白雪 ,不知盏面生尘。吹开吹
谢漫惊频。少陵真有味 ,爱酒觅南邻。

醉花阴

翠箔阴阴笼画阁。昨夜东风恶。香径漫
春泥 ,南陌东郊 ,惆怅妨行乐。伤春比似年时
觉。潘鬓新来薄。何处不禁愁 ,雨滴花腮 ,和
泪胭脂落。

又 木犀

紫菊红萸开犯早。独占秋光老。酿造一
般清 ,比著芝兰 ,犹自争多少。霜刀翦叶呈纤
巧。手捻迎人笑。云鬓一枝斜 ,小阁幽窗 ,是
处都香了。

清平乐 登第

烛花催晓。醉玉颓春酒。一骑东风消息
到。占得鳌头龙首。

长安去路骎骎。明朝跃马芳阴。应是花
繁莺巧 ,东君著意琼林。

又 春晚

一帘红雨。飘荡谁家去。门外垂杨千万
缕。不把东风留住。

旧巢燕子来迟。故园绿暗残枝。肠断画

桥烟水 ,此情不许春知。

浪淘沙 林仲和送芍药 ,再以词为寄 ,次韵谢之

把酒挽芳时。醉袖淋漓。多情楚客为秋悲。未抵香飘红褪也 ,独绕空枝。

天女宝刀迟。露染风披。翠云叠叠拥铢衣。知道筠溪春寂寞 ,来慰相思。

又 连

鹏举坐上次康平仲留别韵

乐事信难逢。莫放匆匆。飞红撩乱减春容。临水不禁频送客 ,风袖龙钟。

小阁画堂东。绮绣相重。尊前谁唱夏云峰。醒后欲寻溪上路 ,烟水无穷。

谒金门 寄远

春又老。愁似落花难扫。一醉一回才忘了。醒来还满抱。

此恨欲凭谁道。柳外数声啼鸟。只恐春风吹不到。断云连碧草。

滴滴金 次韵尚书兄老山堂雪

广平未拚心如铁。恨梅花、隔年别。化工翦水斗春风 ,似南枝和月。

长鲸一饮宁论石。想高歌、醉瑶席。几时归去共尊罍 ,看寒花连陌。

诉衷情 次韵李伯纪桃花

小桃初破两三花。深浅散余霞。东君也解人意 ,次第到山家。

临水岸 ,一枝斜。照笼纱。可怜何事 ,苦爱施朱 ,减尽容华。

好事近 同前

春苑杂花芳 ,诗老剩夸梅格。谁道武陵深处 ,便不如姑射。

莫分红浅与红深 ,点点是春色。生怕一番风雨 ,半飘零江国。

鹤冲天 张仲宗以秋香酒见寄并词 ,次其韵

簞玉液 酿花光。来趁北窗凉。为君小摘蜀葵黄。一似嗅枝香。

饮中仙 ,山中相。也道十分宫样。一般时候最宜尝。竹院月侵床。

天仙子 次富季申韵

飞盖追春春约伫。繁杏枝头红未雨。小楼翠幕不禁风 ,芳草路。无尘处。明月满庭人欲去。

一醉邻翁须记取。见说新妆桃叶女。明年却对此花时 ,留不住。花前语。总向似花人

付与。

清平乐 次韵叶少蕴和程进道梅花

断桥缺月。点点枝头雪。画角吹残声未歇。早是一年春别。

寿阳弄粉成妆。柔肠结结丁香。可怕真梅轻妒，游蜂说与何妨。

又

推愁何计。车下忘乘坠。日上南枝春有意。已讶红酥如缀。

儿童缓整余杯。芒鞋午夜重来。素面应增月冷，真香不逐风回。

又

长红小白。何处寻梅格。日日南山云满额。暗老一分春色。

广平赋罢瑶香。细□花蕊商量。留得笔端雨露，后来收拾群芳。

点绛唇 奉酬富季申

翦翦疏花，托根宛在长松底。蔓柯相倚。便有凌霄志。

丹凤忽来，小队迎秋起。留无计。待公归侍。重与分红翠。

虞美人 宜人生日

梨花院落溶溶雨。弱柳低金缕。画檐风

露为谁明。青翼来时试问、董双成。

去年春酒为眉寿。花影浮金斗。不须更
觅老人星。但愿一年一上、一千龄。

醉花阴 学士生日

池面芙蓉红散绮。鹊噪朱门喜。环佩响
天风,香霭杯盘,更约麻姑侍。

尘寰不隔蓬莱水。束带岩廊戏。瘦鹤与
长松,且伴臞仙,久住人间世。

又 硕人生日

帘卷西风轻雨外。揖数峰横翠。楼上地
行仙,压玉为醪,旋摘黄金蕊。

一觞一阕千秋岁。不愿封侯贵。长伴紫
髯翁,踏月吹箫,笑咏云山里。

感皇恩 学士生日

花院小回廊,庭萱成行。水面红妆翠绡
帐。蓬莱云近,风露一番清旷。星郎来碧落,
长庚象。

素志未酬,丹心益壮。且醉真珠小槽酿。
不须皓齿,拍手狂歌清唱。一尊为寿庆,羲皇
上。

又 端礼节使生日

密竹翦轻绡,华堂初建。卷上虾须待开
宴。寿期春聚,芍药一番开遍。砌成锦步帐,
笼弦管。

全宋词 李弥逊

绛书近颁 ,丹雘重见。花里双双乍归燕。
重重乐事 ,凭仗东风拘管。一时分付与 ,金荷
劝。

小重山 学士生日

鞭凤骖鸾自斗杓。老君亲抱送 ,下层霄。
人间仙李占春饶。千秋里 ,松月伴吹箫。

故国水云遥。谪仙丹荔熟 ,剥红绡。南山
影转卧金蕉。倾寒绿 ,眉寿比山高。

又 同前

星斗心胸锦绣肠。厌随尘土客 ,逐炎凉。
江山风月伴行藏。无人识 ,高卧水云乡。

肘后有仙方。假饶丹未就 ,寿须长。儒冠
多误莫思量。十分酒 ,菡萏小池塘。

花心动 夫人生日

红日当楼 ,绣屏开、风裊舞花随步。绛拂
佩兰 ,香染妆梅 ,仿佛紫烟真侣。雪消池馆年
年会 ,玻璃泛、小槽新注。弄箫语。云璈未彻 ,
暖回芳树。

瑶检曾放寿缕。好系日綦春 ,馭鸾深驻。
桂殿影寒 ,蓬山波阔 ,未似彩衣庭户。坐看鹤
鬓云来戏 ,重重拜、天阶雨露。纵游处。人间
遍寻洞府。

渔家傲 博士生日

海角秋高风力骤。楼台四面山容瘦。季

全宋词 李弥逊

子貂裘寒欲透。悬孤昼。高歌棣萼聊卮酒。
且共追欢宽白首。清闲赢得身长久。世上功名翻覆手。为君寿。腰间要看悬金斗。

阮郎归 硕人生日

黄花犹未拆霜枝。今年秋较迟。六么催泛玉东西。登高庆诞时。
神仙事,古来稀。且为千岁期。戏莱堂上两庞眉。何妨举案齐。

醉落花 同前

霜林变绿。画帘桂子排香粟。一声檀板惊飞鹭。弦管楼高,谁在阑干曲。
人生一笑难相属。满堂何必堆金玉。但求身健儿孙福。鹤发年年,同泛清尊菊。

柳梢青 赵端礼生日

寿烟笼席。采莲新按,舞腰无力。占尽风光,人间天上,今夕何夕。
蓝袍换了莱衣,庆岁岁、君恩屡锡。连夜欢声,满城佳气,和春留得。

点绛唇 富季申生日

花信争老,暗将春意传桃李。寿卿同醉。绿野连珠履。

麟阁丹青 ,眷注耆英裔。眉间喜。日边飞
骑。来促东山起。

十样花

陌上风光浓处。第一寒梅先吐。待得春
来也 ,香销减 ,态凝伫。百花休谩妒。

陌上风光浓处。繁杏枝头春聚。艳态最
娇娆 ,堪比并 ,东邻女。红梅何足数。

陌上风光浓处。日暖山樱红露。结子点
朱唇 ,花谢后 ,君看取。流莺偏嘱咐。

陌上风光浓处。忘却桃源归路。洞口水
流迟 ,香风动 ,红无数。吹愁何处去。

陌上风光浓处。最是海棠风措。翠袖衬
轻红 ,盈盈泪 ,怨春去。黄昏微带雨。

陌上风光浓处。自有花王为主。富艳压
群芳 ,蜂蝶戏 ,燕莺语。东君都付与。

陌上风光浓处。红药一番经雨。把酒绕
芳丛 ,花解语。劝春住。莫教容易去。

菩萨蛮

江城烽火连三月。不堪对酒长亭别。休
作断肠声。老来无泪倾。

风高帆影疾。目送舟痕碧。锦字几时来。
薰风无雁回。

李鼎

清平乐

乱云将雨。飞过鸳鸯浦。人在小楼空翠处。分得一襟离绪。

片帆隐隐归舟。天边雪卷云浮。今夜梦魂何处，青山不隔人愁。

李 南 金

贺新郎 感怀

流落今如许。我亦三生杜牧，为秋娘著句。先自多愁多感慨，更值江南春暮。君看取、落花飞絮。也有吹来穿绣幌，有因风、飘坠随尘土。人世事，总无据。

佳人命薄君休诉。若说与、英雄心事，一生更苦。且尽樽前今日意，休记绿窗眉妩。但春到、儿家庭户。幽恨一帘烟月晓，恐明年、雁亦无寻处。浑欲倩，莺留住。

李彭

渔歌十首 颂尊宿付果山人

汾阳

南院嫡孙唯此个。西河狮子当门坐。绢扇清凉随手簸。君知么。无端吃棒休寻过。

慈明

掌握千差都照破。石霜这汉难关锁。水出高原酬佛陀。哩棱逻。须弥作舞虚空和。

云峰

孤硬云峰无计较。大愚滩上曾垂钓。佛法何曾愁烂了。桶箍爆。通身汗出呵呵笑。

老南

万古黄龙真夭矫。斩新勘破台山媪。佛手驴蹄人不晓。无关窍。胡家一曲非凡调。

晦堂

宝觉禅河波浩浩。五湖衲子来求宝。忽竖拳头宜速道。茫然讨。难逃背触君须到。

真净

贬剥诸方真净老。顶门眼正形枯槁。一

点深藏人莫造。由来妙。光明烜赫机锋峭。

潜庵

积翠十年丹凤穴。当时亲得黄龙钵。掣
电之机难把撮。真奇绝。分明水底天边月。

死心

骂佛骂人新孟八。是非窟里和身拶。不
惜眉毛言便发。门庭滑。红炉大鞴能生杀。

灵源

绝唱灵源求和寡。先牛寻得西家马。顾
陆笔端难拟画。千林谢。吟风摆雪真萧洒。

湛堂

选佛堂中川藟苴。衲僧卑孔头垂下。独
秀握来无一把。杖头挂。从教四海禅徒讶。

李 彭 老

木兰花慢

正千门系柳，赐宫烛、散青烟。看秀靥芳唇，涂妆晕色，试尽春妍。田田。满阶榆荚，弄轻阴、浅冷似秋天。随处饧香杏暖，燕飞斜擘秋千。

朱弦。几换华年。扶浅醉、落花前。记旧时游冶，灯楼倚扇，水院移船。吟边。梦云飞远，有题红、都在薛涛笺。听绝残箫倦笛，夜堂明月窥帘。

壶中天 登寄闲吟台

素飙荡碧，喜云飞寥廓，清透凉宇。倦鹊惊翻台榭迥，叶叶秋声归树。珠斗斜河，冰轮辗雾，万里青冥路。香深屏翠，桂边满袖风露。

烟外冷逼玻璃，渔郎歌渺，击空明归去。怨鹤知更莲漏悄，竹里筛金帘户。短发吹寒，闲情吟远，弄影花前舞。明年今夜，玉樽知醉何处。

高阳台 落梅

飘粉杯宽，盛香袖小，青青半掩苔痕。
竹里遮寒，谁念灭尽芳云。么凤叫晚吹晴雪，
料水空、烟冷西泠。感雕零。残缕遗钿，迤
邐成尘。

东园曾趁花前约，记按箏筹酒，戏挽飞
琼。环佩无声，草暗台榭春深。欲倩怨笛传
清谱，怕断霞、难返吟魂。转消凝。点点随
波，望极江亭。

法曲献仙音 官圃赋梅，继草窗韵

云木槎枒，水荇摇落，瘦影半临清浅。
翠羽迷空，粉容羞晓，年华柱弦频换。甚何
逊、风流在，相逢共寒晚。

总依黯。念当时、看花游冶，曾锦缆移
舟，宝箏随辇。池苑锁荒凉，嗟事逐、鸿飞
天远。香径无人，甚苍藓、黄尘自满。听鸦
啼春寂，暗雨萧萧吹怨。

一萼红 寄弁阳翁

过蔷薇。正风暄云淡，春去未多时。古
岸停桡，单衣试酒，满眼芳草斜晖。故人老、
经年赋别，灯晕里、相对夜何其。泛剡清愁，
买花芳事，一卷新诗。

流水孤帆渐远，想家山猿鹤，喜见重归。

全宋词 李彭老

北阜寻幽，青津问钓，多情杨柳依依。最难忘、吟边旧雨，数菖蒲、花老是来期。几夕相思梦蝶，飞绕苹溪。

高阳台 寄题荪壁山房

石笋埋云，风篁啸晚，翠微高处幽居。缥筒云笈，人间一点尘无。绿深门户啼鹃外，看堆床、宝晋图书。尽萧闲，浴砚临池，滴露研朱。

旧时曾写桃花扇，弄霏香秀笔，春满西湖。松菊依然，柴桑自爱吾庐。冰弦玉柱风流在，更秋兰、香染衣裾。照窗明，小字珠玑，重见欧虞。

探芳讯 湖上春游，继草窗韵

对芳昼。甚怕冷添衣，伤春疏酒。正绯桃如火，相看自依旧。闲帘深掩梨花雨，谁问东阳瘦。几多时，涨绿莺枝，堕红鸳甃。

堤上宝鞍骤。记草色薰晴，波光摇岫。苏小门前，题字尚存否。繁华短梦随流水，空有诗千首。更休言，张绪风流似柳。

祝英台近

杏花初，梅花过，时节又春半。帘影飞梭，轻阴小庭院。旧时月底秋千，吟香醉玉，曾细听、歌珠一串。

全宋词 李彭老

忍重见。描金小字题情，生绡合欢扇。
老了刘郎，天远玉箫伴。几番莺外斜阳，阑
干倚遍，恨杨柳、遮愁不断。

踏莎行 题草窗十拟后

紫曲迷香，绿窗梦月。芳心如对春风说。
蛮笺象管写新声，几番曾试琼壶缺。
庾信书愁，江淹赋别。桃花红雨梨花雪。
周郎先自足风流，何须更拟秦箫咽。

浪淘沙

泼火雨初晴。草色青青。傍檐垂柳卖春
饧。画舫载花花解语，馆燕吟莺。
箫鼓入西泠。一片轻阴。钿车罗盖竞归
城。别有水窗人唤酒，弦月初生。

四字令

兰汤晚凉。鸾钗半妆。红巾腻雪初香。
擘莲房赌双。
罗纨素瑯。冰壶露床。月移花影西厢。
数流萤过墙。

生查子

罗襦隐绣茸，玉合消红豆。深院落梅钿，
寒峭收灯后。

心事卜金钱，月上鹅黄柳。拜了夜香休，
翠被听春漏。

壶中天

水西云北，记前回同载，高阳伴侣。一
色荷花香十里，偷把秋期频数。脆管排云，
轻桡喷雪，不信催诗雨。碧筒呼酒，秀笺题
遍新句。

谁念病损文园，岁华摇落，事与孤鸿去。
露井邀凉吹短发，梦入苹洲菱浦。暗草飞萤，
乔枝翻鹊，看月山中住。一声清唱，醉乡知
有仙路。

木兰花慢 送客

折秦淮露柳，带明月、倚归船。看佩玉
纫兰，囊诗贮锦，江满吴天。吟边。唤回梦
蝶，想故山、薇长已多年。草得梅花赋了，
棹歌远和离舷。

风弦。尽入吟篇。伤倦客、对秋莲。过
旧经行处，渔乡水驿，一路闻蝉。留连。漫
听燕语，便江湖、夜语隔灯前。潮返浔阳暗
水，雁来好寄瑶笺。

祝英台近

载轻寒、低鸣橹。十里杏花雨。露草迷
烟，紫绿过前浦。青青陌上垂杨，绀丝摇佩，

渐遮断、旧曾吟处。

听莺语。吹笙人远天长，谁翻水西谱。
浅黛凝愁，远岫带眉妩。画阑闲倚多时，不
成春醉，趁几点、白鸥归去。

清平乐

合欢扇子。扑蝶花阴里。半醉海棠扶不
起。淡日秋千闲倚。

宝箏弹向谁听。一春能几番晴。帐底柳
绵吹满，不教好梦分明。

章台月

露轻风细。中庭夜色凉如水。荷香柳影
成秋意。萤冷无光，凉入树声碎。

玉箫金缕西楼醉。长吟短舞花阴地。素
娥应笑人憔悴。漏歇帘空，低照半床睡。

青玉案

楚峰十二阳台路。算只有、飞红去。玉
合香囊曾暗度。榴裙翻酒，杏帘吹粉，不识
愁来处。

燕忙莺懒青春暮。蕙带空留断肠句。草
色天涯情几许。荼蘼开尽，旧家池馆，门掩
风和雨。

浣溪沙 题草窗词

玉雪庭心夜色空。移花小槛斗春红。轻衫短帽醉歌重。

彩扇旧题烟雨外，玉箫新谱燕莺中。阑干到处是春风。

天香 宛委山房拟赋龙涎香

捣麝成尘，薰薇注露，风酣百和花气。品重云头，叶翻蕉样，共说内家新制。波浮海沫，谁唤觉、鲛人春睡。清润俱饶片脑，芬馥半是沈水。

相逢酒边花外。火初温、翠炉烟细。不似宝珠金缕，领巾红坠。荀令如今憔悴。消未尽、当时爱香意。烬暖灯寒，秋声素被。

摸鱼子 紫云山房拟赋菹

过垂虹、四桥飞雨，沙痕初涨春水。腥波十里吴歛远，绿蔓半萦船尾。连复碎。爱滑卷青绡，香袅冰丝细。山人隽味。笑杜老无情，香羹碧涧，空只赋芹美。

归期早，谁似季鹰高致。鲈鱼相伴菹米。红尘如海丘园梦，一叶又秋风起。湘湖外。看采撷、芳条际晓随鱼市。旧游漫记。但望里江南，秦鬟贺镜，渺渺隔烟翠。

全宋词 李彭老

失调名

暗雨敲花，柔风过柳。

李祁

减字木兰花

梨花院宇。澹月倾云初过雨。一枕轻寒，
梦入西瑶小道山。

花深入静。帘锁御香清昼永。红药阑干。
玉案春风窈窕间。

点绛唇

楼下清歌，水流歌断春风暮。梦云烟树。
依约江南路。

碧水黄沙。梦到寻梅处。花无数。问花
无语。明月随人去。

青玉案

绿琐窗纱明月透。正清梦、莺啼柳。碧
井银瓶鸣玉甃。翔鸾妆样，粲花衫绣。分付
春风手。

喜入秋波娇欲溜。脉脉青山两眉秀。玉
枕春寒郎知否。归来留取，御香襟袖。同饮

酴醿酒。

鹊桥仙

春阴淡淡，春波渺渺，帘卷花稍香雾。
小舟谁在落梅村，正梦绕、清溪烟雨。碧山
学士，云房娇小，须要五湖同去。桃花流水
鳜鱼肥，恰趁得、江天佳处。

阮郎归

校书学士小蓬山。新参玉笋班。买花归
去五湖间。浣花龙尾湾。

南歌子

袅袅秋风起，萧萧败叶声。岳阳楼上听
哀筝。楼下凄凉江月、为谁明。雾雨沈云梦，
烟波渺洞庭。可怜无处问湘灵。只有无情江
水、绕孤城。

醉桃源

春风碧水满郎湖。水清梅影疏。渡江桃
叶酒家垆。髻鬟云样梳。

吹玉蕊，饮琼腴。不须红袖扶。少年随
意数花须。老来心已无。

朝中措

探梅早春亭，逾凤栖岭，至三山阁，折花而归。用欧公朝中措腔作照江梅词，寄任蕴明。蕴明尝许缘檝载侍儿见过，又于汉籍伎有目成者，因以为戏

郎官湖上探春回。初见照江梅，过尽竹溪流水，无人知道花开。

佳人何处，江南梦远，殊未归来。唤取小丛教看，隔江烟雨楼台。

西江月

拾翠亭前水满，郎官湖上春回。仪龙新碾试琼杯。更觉春江有味。

拄杖行穿翠筱，吹花醉绕江梅。故园心事老相催。此意陶潜能会。

又

云观三山清露，长生万鬣青松。琼璈珠珥下秋空。一笑满天鸾凤。

雾鬓新梳绀绿，霞衣旧佩柔红。更邀豪俊驭南风。此意平生飞动。

如梦令

春水湖塘深处。竹暗沙洲无路。闲伴落花来，却信东风归去。且住。且住。细看两山烟雨。

又

不见玉人清晓。长啸一声云杪。碧水满
阑塘，竹外一枝风袅。奇妙。奇妙。半夜山
空月皎。

水龙吟 郎官湖

碧山横绕清湖，茂林秀麓波光里。南宫
老大，西洲漂荡，危亭重倚。雨步云行，饵
风饮雾，平生游戏。笑此中空洞，都无一物，
有神妙、浩然气。

扫尽云南梦北，看三江五湖秋水。狂歌
两解，清尊一举，超然千里。江汉苍茫，故
人何处，山川良是。待白苹露下，青天月上，
约骑鲸起。

浪淘沙

拍手趁西风。惊起乖龙。青山绿水古今
同。唯有一轮山上月，长照江中。一点落金
钟。浑似虚空。道人不住有云峰。但是人家
清酒瓮，行处相逢。

李璆

满庭霜

白玉肌肤，清冰神彩，仙妃何事烟村。
自然标韵，羞入百花群。不易盈盈瘦质，犯
寒腊、独作春温。溪桥外，斜枝半吐，行客
一销魂。

清香无处著，雪中暗认，月下空闻。算
谁许幽人，相伴芳尊。莫放高楼弄笛，忍教
看、雪落纷纷。堪调鼎，蒙蒙烟雨，滋养待
和羹。

李清臣

失调名

杨花落。燕子穿朱阁。苦恨春醪如水薄。
闲愁无处著。

去年今日王陵舍，鼓角秋风。千岁辽东。
回首人间万事空。

李清照

孤雁儿 并序

世人作梅词，下笔便俗。予试作一篇，乃知前言不妄耳。

藤床纸帐朝眠起。说不尽、无佳思。沈香断续玉炉寒，伴我情怀如水。笛里三弄，梅心惊破，多少春情意。

小风疏雨萧萧地。又催下、千行泪。吹箫人去玉楼空，肠断与谁同倚。一枝折得，人间天上，没个人堪寄。

满庭霜

小阁藏春，闲窗锁昼，画堂无限深幽。篆香烧尽，日影下帘钩。手种江梅更好，又何必、临水登楼。无人到，寂寥浑似，何逊在扬州。

从来，知韵胜，难堪雨藉，不耐风柔。更谁家横笛，吹动浓愁。莫恨香消雪减，须信道、扫迹情留。难言处，良宵淡月，疏影尚风流。

玉楼春

红酥肯放琼苞碎。探著南枝开遍未。不知酝籍几多香，但见包藏无限意。道人憔悴春窗底。闷损阑干愁不倚。要来小酌便来休，未必明朝风不起。

渔家傲

雪里已知春信至。寒梅点缀琼枝腻。香脸半开娇旖旎。当庭际。玉人浴出新妆洗。

造化可能偏有意。故教明月玲珑地。共赏金尊沈绿蚁。莫辞醉。此花不与群花比。

清平乐

年年雪里。常插梅花醉。揆尽梅花无好意。赢得满衣清泪。

今年海角天涯。萧萧两鬓生华。看取晚来风势，故应难看梅花。

南歌子

天上星河转，人间帘幕垂。凉生枕簟泪痕滋。起解罗衣、聊问夜何其。翠贴莲蓬小，金销藕叶稀。旧时天气旧时衣。只有情怀、不似旧家时。

转调满庭芳

芳草池塘，绿阴庭院，晚晴寒透窗纱。
□□金锁，管是客来吵。寂寞尊前席上，惟
□、海角天涯。能留否，酴醾落尽，犹赖有
□□。

当年，曾胜赏，生香薰袖，活火分茶。
□□□龙骄马，流水轻车。不怕风狂雨骤，
恰才称、煮酒残花。如今也，不成怀抱，得
似旧时那。

渔家傲

天接云涛连晓雾。星河欲转千帆舞。仿
佛梦魂归帝所。闻天语。殷勤问我归何处。

我报路长嗟日暮。学诗谩有惊人句。九
万里风鹏正举。风休住。蓬舟吹取三山去。

如梦令

常记溪亭日暮。沈醉不知归路。兴尽晚
回舟，误入藕花深处。争渡。争渡。惊起一
滩鸥鹭。

又

昨夜雨疏风骤。浓睡不消残酒。试问卷
帘人，却道海棠依旧。知否。知否。应是绿
肥红瘦。

多丽 咏白菊

小楼寒，夜长帘幕低垂。恨萧萧、无情风雨，夜来揉损琼肌。也不似、贵妃醉脸，也不似、孙寿愁眉。韩令偷香，徐娘傅粉，莫将比拟未新奇。细看取、屈平陶令，风韵正相宜。微风起，清芬酝藉，不减醪醅。

渐秋阑、雪清玉瘦，向人无限依依。似愁凝、汉皋解佩，似泪洒、纨扇题诗。朗月清风，浓烟暗雨，天教憔悴度芳姿。纵爱惜、不知从此，留得几多时。人情好，何须更忆，泽畔东篱。

菩萨蛮

风柔日薄春犹早。夹衫乍著心情好。睡起觉微寒。梅花鬓上残。

故乡何处是。忘了除非醉。沈水卧时烧。香消酒未消。

又

归鸿声断残云碧。背窗雪落炉烟直。烛底凤钗明。钗头入胜轻。

角声催晓漏。曙色回牛斗。春意看花难。西风留旧寒。

浣溪沙

莫许杯深琥珀浓。未成沈醉意先融。

□□已应晚来风。

瑞脑香消魂梦断，辟寒金小髻鬟松。醒时空对烛花红。

又

小院闲窗春色深。重帘未卷影沈沈。倚楼无语理瑶琴。

远岫出山催薄暮，细风吹雨弄轻阴。梨花欲谢恐难禁。

又

淡荡春光寒食天。玉炉沈水袅残烟。梦回山枕隐花钿。

海燕未来人斗草，江海已过柳生绵。黄昏疏雨湿秋千。

凤凰台上忆吹箫

香冷金猊，被翻红浪，起来人未梳头。任宝奁闲掩，日上帘钩。生怕闲愁暗恨，多少事、欲说还休。今年瘦，非干病酒，不是悲秋。

明朝，这回去也，千万遍阳关，也即难留。念武陵春晚，云锁重楼。记取楼前绿水，应念我、终日凝眸。凝眸处，从今更数，几段新愁。

一翦梅

红藕香残玉簟秋。轻解罗裳，独上兰舟。

云中谁寄锦书来，雁字回时，月满西楼。

花自飘零水自流。一种相思，两处闲愁。
此情无计可消除，才下眉头，却上心头。

蝶恋花

泪湿罗衣脂粉满。四叠阳关，唱到千千遍。人道山长山又断。萧萧微雨闻孤馆。
惜别伤离方寸乱。忘了临行，酒盏深和浅。好把音书凭过雁。东莱不似蓬莱远。

又

暖日晴风初破冻。柳眼梅腮，已觉春心动。酒意诗情谁与共。泪融残粉花钿重。
乍试夹衫金缕缝。山枕斜欹，枕损钗头凤。独抱浓愁无好梦。夜阑犹剪灯花弄。

鹧鸪天

寒日萧萧上锁窗。梧桐应恨夜来霜。酒阑更喜团茶苦，梦断偏宜瑞脑香。

秋已尽，日犹长。仲宣怀远更凄凉。不如随分尊前醉，莫负东篱菊蕊黄。

小重山

春到长门春草青。江梅些子破，未开匀。碧云笼碾玉成尘。留晓梦，惊破一瓿春。

花影压重门。疏帘铺淡月，好黄昏。二

年三度负东君。归来也，著意过今春。

怨王孙

湖上风来波浩渺。秋已暮、红稀香少。
水光山色与人亲，说不尽、无穷好。

莲子已成荷叶老。青露洗、苹花汀草。
眠沙鸥鹭不回头，似也恨、人归早。

临江仙 并序

欧阳公作蝶恋花，有深深深几许之句，予酷爱之。用其语作庭院深深数阕，其声即旧临江仙也。

庭院深深深几许，云窗雾阁常扃。柳梢梅萼渐分明。春归秣陵树，人客远安城。

感月吟风多少事，如今老去无成。谁怜憔悴更雕零。试灯无意思，踏雪没心情。

醉花阴

薄雾浓云愁永昼。瑞脑消金兽。佳节又重阳，玉枕纱厨，半夜凉初透。东篱把酒黄昏后。有暗香盈袖。莫道不消魂，帘卷西风，人似黄花瘦。

好事近

风定落花深，帘外拥红堆雪。长记海棠

开后，正是伤春时节。

酒阑歌罢玉尊空，青缸暗明灭。魂梦不堪幽怨，更一声啼鴂。

诉衷情

夜来沈醉卸妆迟。梅萼插残枝。酒醒熏破春睡，梦远不成归。人悄悄，月依依。翠帘垂。更挼残蕊，更捻余香，更得些时。

行香子

草际鸣蛩。惊落梧桐。正人间、天上愁浓。云阶月地，关锁千重。纵浮槎来，浮槎去，不相逢。

星桥鹊驾，经年才见，想离情、别恨难穷。牵牛织女，莫是离中。甚霎儿晴，霎儿雨，霎儿风。

失调名

犹将歌扇向人遮。
水晶山枕象牙床。
彩云易散月长亏。
几多深恨断人肠。
罗衣消尽恁时香。
闲愁也似月明多。
直送凄凉到画屏。

鹧鸪天

暗淡轻黄体性柔。情疏迹远只香留。何须浅碧深红色，自是花中第一流。

梅定妒，菊应羞。画阑开处冠中秋。骚人可煞无情思，何事当年不见收。

添字丑奴儿

窗前谁种芭蕉树，阴满中庭。阴满中庭。叶叶心心，舒卷有余情。

伤心枕上三更雨，点滴霖霖。点滴霖霖。愁损北人，不惯起来听。

忆秦娥

临高阁。乱山平野烟光薄。烟光薄。栖鸦归后，暮天闻角。

断香残酒情怀恶。西风催衬梧桐落。梧桐落。又还秋色，又还寂寞。

失调名

条脱闲揎系五丝。

又 元旦词

瑞脑烟残，沈香火冷。

念奴娇 春情

萧条庭院，又斜风细雨，重门须闭。宠柳娇花寒食近，种种恼人天气。险韵诗成，扶头酒醒，别是闲滋味。征鸿过尽，万千心事难寄。

楼上几日春寒，帘垂四面，玉阑干慵倚。被冷香消新梦觉，不许愁人不起。清露晨流，新桐初引，多少游春意。日高烟敛，更看今日晴未。

永遇乐

落日熔金，暮云合璧，人在何处。染柳烟浓。吹梅笛怨，春意知几许。元宵佳节，融和天气，次第岂无风雨。来相召、香车宝马，谢他酒朋诗侣。

中州盛日，闺门多暇，记得偏重三五。铺翠冠儿，捻金雪柳，簇带争济楚。如今憔悴，风鬟霜鬓，怕见夜间出去。不如向、帘儿底下，听人笑语。

武陵春 春晚

风住尘香花已尽，日晚倦梳头。物是人非事事休。欲语泪先流。

闻说双溪春尚好，也拟泛轻舟。只恐双溪舴艋舟。载不动、许多愁。

全宋词 李清照

怨王孙 春暮

帝里春晚。重门深院。草绿阶前，暮天雁断。楼上远信谁传。恨绵绵。多情自是多沾惹。难拚舍。又是寒食也。秋千巷陌，人静皎月初斜。浸梨花。

长寿乐 南昌生日

微寒应候。望日边六叶，阶萸初秀。爱景欲挂扶桑，漏残银箭，杓回摇斗。庆高闳此际，掌上一颗明珠剖。有令容淑质，归逢佳偶。到如今，昼锦满堂贵胄。

荣耀，文步紫禁，一一金章绿绶。更值棠棣连阴，虎符熊轼，夹河分守。况青云咫尺，朝暮重入承明后。看彩衣争献，兰羞玉酎。祝千龄，借指松椿比寿。

蝶恋花 上巳召亲族

永夜恹恹欢意少。空梦长安，认取长安道。为报今年春色好。花光月影宜相照。

随意杯盘虽草草。酒美梅酸。恰称人怀抱。醉莫插花花莫笑。可怜春似人将老。

声声慢

寻寻觅觅，冷冷清清，凄凄惨惨戚戚。

全宋词 李清照

乍暖还寒时候，最难将息。三杯两盏淡酒，
怎敌他、晚来风急。雁过也，正伤心，却是
旧时相识。

满地黄花堆积。憔悴损，如今有谁怜摘。
守著窗儿，独自怎生得黑。梧桐更兼细雨，
到黄昏、点点滴滴。这次第，怎一个、愁字
了得。

点绛唇 闺思

寂寞深闺，柔肠一寸愁千缕。惜春春去。
几点催花雨。

倚遍阑干，祇是无情绪。人何处。连天
衰草，望断归来路。

减字木兰花

卖花担上。买得一枝春欲放。泪染轻匀。
犹带彤霞晓露痕。

怕郎猜道。奴面不如花面好。云鬓斜簪。
徒要教郎比并看。

失调名

教我甚情怀。

摊破浣溪沙

揉破黄金万点轻。剪成碧玉叶层层。风

全宋词 李清照

度精神如彥辅，大鲜明。

梅蕊重重何俗甚，丁香千结苦粗生。熏透愁人千里梦，却无情。

又

病起萧萧两鬓华。卧看残月上窗纱。豆蔻连梢煎熟水，莫分茶。

枕上诗书闲处好，门前风景雨来佳。终日向人多酝藉，木犀花。

瑞鹧鸪 双银杏

风韵雍容未甚都。尊前甘橘可为奴。谁怜流落江湖上，玉骨冰肌未肯枯。

谁教并蒂连枝摘，醉后明皇倚太真。居士擘开真有意，要吟风味两家新。

临江仙 梅

庭院深深深几许，云窗雾阁春迟。为谁憔悴损芳姿。夜来清梦好，应是发南枝。

玉瘦檀轻无限恨，南楼羌管休吹。浓香吹尽有谁知。暖风迟日也，别到杏花肥。

庆清朝

禁幄低张，彤阑巧护，就中独占残春。容华淡伫，绰约俱见天真。待得群花过后，一番风露晓妆新。妖娆艳态，妒风笑月，长殢东君。

东城边，南陌上，正日烘池馆，竟走香轮。绮筵散日，谁人可继芳尘。更好明光宫殿，几枝先近日边匀。金尊倒，拚了尽烛，不管黄昏。

浣溪沙

髻子伤春慵更梳。晚风庭院落梅初。淡云来往月疏疏。

玉鸭熏炉闲瑞脑，朱樱斗帐掩流苏。通犀还解辟寒无。

又 闺情

绣面芙蓉一笑开。斜飞宝鸭衬香腮。眼波才动被人猜。

一面风情深有韵，半笺娇恨寄幽怀。月移花影约重来。

菩萨蛮 闺情

绿云鬓上飞金雀。愁眉翠敛春烟薄。香阁掩芙蓉。画屏山几重。

窗寒天欲曙。犹结同心苣。啼粉污罗衣。问郎归几时。

李 铨

点绛唇

一朵千金，帝城霁雨初晴后。粉拖香透。
雅称群芳首。

把酒题诗，遐想欢如旧。花知否。故人
清瘦。长忆同携手。

李 仁 本

桂殿秋 题洞霄

飞翠盖，走篮舆。乱山千叠为先驱。洞天迎目深且窈，满耳天风吹步虚。

又

巉兽石，错虬松。黛岚终日下天风。杖藜携我恣遥望，缥缈霓裳飞碧空。

又

金带重，紫袍宽。到头不似羽衣闲。君王若许供香火，神武门前早挂冠。

李生

渔家傲 赠萧娘

庭院黄昏人悄悄。两情暗约谁知道。咫尺蓬山难一到。明月照。潜身只得听言笑。
特地嗟吁传密耗。芳衷要使郎心表。此际归来愁不少。萦怀抱。卿卿销得人烦恼。

李师中

菩萨蛮

子规啼破城楼月。画船晓载笙歌发。两岸荔枝红。万家烟雨中。

佳人相对泣。泪下罗衣湿。从此信音稀。岭南无雁飞。

李石

如梦令

桥上水光浮雪。桥下柳阴遮月。梦里去寻香，露冷五更时节。胡蝶。胡蝶。飞过闲红千叶。

又 忆别

忆被金尊劝倒。灯下红香围绕。别后有谁怜，一任春残莺老。烦恼。烦恼。肠断绿杨芳草。

生查子 春情

小桃小杏红，和雨和烟瘦。不是点燕脂，素面偏宜酒。

也是惯伤春，可惜闲时候。正要画眉人，与作双蛾斗。

又

新花上苑枝，枝上娇莺语。日日抱花心，啄破燕脂雨。

莺飞莺去时，谁与花为主。守等却飞来，再见花开处。

又

今年花发时 ,燕子双双语。谁与卷珠帘 ,
人在花间住。

明年花发时 ,燕语人何处。且与寄书来 ,
人往江南去。

又

荷花人面红 ,月影波心见。扇子倒拈来 ,
敲落红香片。

窗下剪灯花 ,今日眉深浅。留得镜中看 ,
蹙破春山远。

捣练子 送别

斟别酒 ,问东君。一年一度一回新。看百
花 飘舞茵。

斟别酒 ,问行人。莫将别泪裊罗巾。早归
来 ,依旧春。

又

腰束素 鬓垂鸦。无情笑面醉犹遮。扇儿
搨 ,瞥见些。

双凤小 ,玉钗斜。芙蓉衫子藕花纱。戴一
枝 ,薤卜花。

长相思 暮春

花飞飞。絮飞飞。三月江南烟雨时。楼
台春树迷。

双莺儿。双燕儿。桥北桥南相对啼。行

人犹未归。

又 重午

红藕丝。白藕丝。艾虎衫裁金缕衣。钗头双荔枝。

鬢符儿。背符儿。鬼在心头符怎知。相思十二时。

又 佳人

花深红。花浅红。桃杏浅深花不同。年年吹暖风。

莺语中。燕语中。唤起碧窗春睡浓。日高花影重。

乌夜啼

红软榴花脸晕 绿愁杨柳眉疏。日长院宇闲消遣 荔子赌樗樯。

莹雪凉衣乍浴 裁冰素扇新书。绣香熏被梅烟润 枕簟碧纱厨。

又

鸾镜愁添眉黛 罗裙瘦减腰肢。一回见了一回病 弹指误佳期。

醉里瞢腾泪洗 梦中著摸魂飞。一春多少闲风雨 亭院落花时。

又 送春

绣阁和烟飞絮 粉墙映日吹红。花花柳柳成阴处 休恨五更风。

絮点铺排绿水 红香收拾黄蜂。留春尽道

能留得 ,长在酒杯中。

朝中措 闻莺

飘飘仙袂缕黄金。相对弄清音。几度教人误听 ,当窗绿暗红深。

一声梦破 ,槐阴转午 ,别院深沈。试问绿杨南陌 ,何如紫榭西林。

又 赠赵牧仲歌姬

绿杨庭院觉深沈。曾听一莺吟。今夜却成容易 ,双莲步步摇金。

歌声暂驻 ,颦眉又去 ,无计重寻。应恨玉郎殢酒 ,教人守到更深。

又 赠别

凌波庭院藕香残。银烛夜生寒。两点眉尖新恨 ,别来谁画遥山。

南楼皓月 ,一般瘦影 ,两处凭阑。莫似桃花溪畔 ,乱随流水人间。

一剪梅 忆别

红映阑干绿映阶。闲闷闲愁 ,独自徘徊。天涯消息几时归 ,别后无书有梦来。

后院棠梨昨夜开。雨急风忙次第催。罗衣消瘦却春寒 ,莫管红英 ,一任苍苔。

又

百濯香残恨未消。万绪千丝 ,莲藕芭蕉。临歧犹自说前时 ,轻剪乌云解翠翘。

全宋词 李石

雨意重来风已飘。南陌行人折柳条。此
间无计可留连，枕上今宵。马上明朝。

醉落魄 春云

天低日暮。清商一曲行人住。著人意态
如飞絮。才泊春衫，却被风吹去。

朝期暮约浑无据。同心结尽千千缕。今
宵魂梦知何处。翠竹芭蕉，又下黄昏雨。

临江仙 佳人

烟柳疏疏人悄悄，画楼风外吹笙。倚阑闻
唤小红声。熏香临欲睡，玉漏已三更。

坐待不来来又去，一方明月中庭。粉墙东
畔小桥横。起来花影下，扇子扑飞萤。

又 醉饮

八曲阑干垂手处，烛光花影疏疏。一尊共
饮记当初。彩毫浓点，双带要人书。

日暮不来朱户隔，碧云高挂蟾蜍。琴心密
约总成虚。醉中言语，醒后忆人无。

又

有宅一区家四壁，年年花柳深村。父兄随
处宴鸡豚。折腰归去，何苦傍侯门。

拟射九乌留白日，假饶立到黄昏。卧龙老
矣及三分。不如把手，堂上宴芳尊。

又

老母太恭人三月二十一日生，是日仍遇己卯本

全宋词 李石

命,作千岁会祝寿,子孙三十八人

九九之年逢降庆,生年生日同时。金花紫
诰鬓银丝。乞身香火地,日戏老莱衣。

浑舍集成千岁会,子孙三世庭闱。共将春
酒祝金卮。蟠桃三月暮,莫怪看花迟。

满庭芳 送别

江草抽心,江云弄碧,江波依旧东流。别
筵初散,行客上兰舟。休唱阳关旧曲,青青柳、
无限轻柔。应争记,三年乐事,珠翠拥鳌头。

离愁。知几许,花梢著雨,红泪难收。看
烟火吴天,万里悠悠。一望珠宫绛阙,蓬莱路、
应在皇州。仍回首,蜀山万点,明月满南楼。

木兰花

辘轳轳轳门前井。不道隔窗人睡醒。柔
弦无力玉琴寒,残麝彻心金鸭冷。

一莺啼破帘栊静。红日渐高槐转影。起
来情绪寄游丝,飞绊翠翘风不定。

又

一春闲却花时候。小阁幽窗长独守。晴
云南浦梦还空,初月西楼眉也皱。

马嘶何日门前柳。脉脉盈盈相见后。心
头有事不难知,面上看谁真个瘦。

南乡子 十月海棠

十月小春天。红叶红花半雨烟。点滴红

全宋词 李石

酥真耐冷,争先。夺取梅魂斗雪妍。

坐待晓莺迁。织女机头蜀锦川。枝上绿
毛幺凤子,飞仙。乞与双双作被眠。

又 醉饮

裹帽捻吟须。我是蓬莱旧酒徒。除了茅
君谁是伴,麻姑。洞里仙浆不用沽。

弱水渺江湖。醉里笙歌醉里扶。纵饮菊
潭餐菊蕊,茱萸。医得人间瘦也无。

西江月 渔父

一脉分溪浅绿,数枝约岸敲红。小船横系
碧芦丛。似我江湖春梦。

晒网渔归别浦,举头雁度晴空。短蓑独宿
月明中。醉笛一声风弄。

八声甘州 怀归

向吴天万里、一叶归舟。岁月尽悠悠。有
清歌一曲,醉中自笑,酒醒还愁。几度春(莺)
(鸢)啼午,塞雁横秋。渔笛蓑衣底,依旧勾收。

多谢飞来双鹤,□水边林下,伴我遨游。
笑老莱晨昏,色笑为亲留。有向来、素琴三尺,
枕一编、周易在床头。君知否,家山梦寐,浑胜
瀛洲。

雨中花慢 次宇文吏部赠黄如圭韵

潋滟云霞,空蒙雾雨,长堤柳色如茵。问

西湖何似 ,粉面初匀。尽道软红香土 ,东华风月俱新。旧游如梦 ,尘缘未断 ,几度逢春。

蓬莱阁上 ,风流二老 ,相携把酒论文。最好是、四娘桃李 ,约近东邻。别后使君须鬓 ,十分白了三分。是人笑道 ,醉中文字 ,更要红裙。

醉蓬莱

望长江东去 ,逐客西来 ,几逢秋杪。江草江花 ,约鬢丝俱老。朝士红萸 ,佳人雪藕 ,别后忍孤欢笑。楚水楼台 ,巫山宫殿 ,五湖烟渺。

又是征帆 ,万里行去 ,旧恨鲈鱼 ,昔盟鸥鸟。九日江南 ,上蓬莱仙岛。三度刘郎 ,黄花醉里 ,问我几时来到。寄语西风 ,饶他老子 ,莫欺乌帽。

渔家傲 赠鼎湖官妓

西去征鸿东去水。几重别恨千山外。梦绕绿窗书半纸。何处是。桃花溪畔人千里。

瘦玉倚香愁黛翠。劝人须要人先醉。问道明朝行也未。犹自记。灯前背立偷弹泪。

卜算子

密叶蜡蜂房 ,花下频来往。不知辛苦为谁甜 ,山月梅花上。

玉质紫金衣 ,香雪随风荡。人间唤作返魂梅 ,仍是蜂儿样。

捣练子

心自小 ,玉钗头。月娥飞下白苹洲。水中
仙 ,月下游。

江汉佩 ,洞庭舟。香名薄幸寄青楼。问何
如 ,打泊浮。

又

红粉里 ,绛金裳。一卮仙酒艳晨妆。醉温
柔 ,别有乡。

清暑殿 ,藕风凉。鸡头擘破误君王。泣梨
花 ,春梦长。

谢池春

烟雨池塘 ,绿野乍添春涨。凤楼高、珠帘
卷上。金柔玉困 ,舞腰肢相向。似玉人、瘦时
模样。

离亭别后 ,试问阳关谁唱。对青春、翻成
怅望。重门静院 ,度香风屏障。吐飞花、伴人
来往。

出塞 夜梦一女子引扇求字 ,为书小阙

花树树。吹碎胭脂红雨。将谓郎来推绣
户。暖风摇竹坞。

睡起栏干凝伫。漠漠红楼飞絮。划踏袜
儿垂手处。隔溪莺对话。

李石才

一箩金

武陵春色浓如酒。游冶才郎 , 初试花间
手。绛蜡烛残人静后。眉峰便作伤春皱。
一霎风狂和雨骤。柳嫩花柔 , 浑不禁偻
傴。明日余香知在否。粉罗犹有残红透。

李氏

浣溪沙

无力蔷薇带雨低。多情蝴蝶趁花飞。流水飘香乳燕啼。

南浦魂销春不管，东阳衣减镜先知。小楼今夜月依依。

李氏

极相思 赠张浩

日红疏翠密晴暄。初夏困人天。风流滋味，
伤怀尽在，花下风前。

后约已知君定，这心绪、尽日悬悬。鸳
鸯两处，清宵最苦，月甚先圆。

李 霜 涯

晴偏好

原无调名，此据花草粹编卷一，疑出杜撰
平湖百顷生芳草。芙蓉不照红颠倒。东
坡道。波光潋滟晴偏好。

李太古

永遇乐

玉砌标鲜 ,雪园风致 ,似曾相识。蝉锦霞香 ,乌丝云湿 ,吹渴蟾蜍滴。青青白白 ,关关滑滑 ,寒损铢衣狂客。尽声声、不如归去 ,归也怎生归得。

含桃红小 ,香芹翠软 ,惆怅宜城山色。百摺浮岚 ,几湾流水 ,那一些儿直。落花情味 ,露花魂梦 ,蒲花消息。抚纤眉 ,织乌西下 ,为君凝碧。

恋绣衾

橘花风信满院香。摘青梅、犹自怕尝。向绿密、红疏处 ,喜相逢、飞下一双。

堪怜堪惜还堪爱 ,唤青衣、推上绣窗。暗记得、凭肩语 ,对菱花、啼损晚妆。

南歌子

月下秦淮海 ,花前晏小山。二仙仙去几时还。留得月魂花魄、在人间。

全宋词 李太古

河汉流旌节，天风裊佩环。满空香雾湿云鬢。何处一声横笛、杏花寒。

虞美人

西风海色秋无际。双泪如铅水。白羊成队梦初平。挂杖敲云、云外晓鸿惊。

小琼闲抱银筝笑。问有芳卿否。玉书分付莫开封。明日人间临水、拾流红。

卜算子 梦中作

尽道是伤春，不似悲秋怨。门外分明见远山，人不见，空肠断。

朝来一霎晴，薄暮西风远。却忆黄花小雨声，误落下、三四点。

李坦然

风流子

东君虽不语，年华事、今岁恰如期。向
寒雨望中，晓霜清处，领些春意，开两三枝。
又不是、山桃红锦烂，溪柳绿摇丝。别是一
般，孤高风韵，绛裁纤萼，冰剪芳蕤。

清香还有意，轻飘度勾引，几句新诗。
须是放怀追赏，莫恁轻离。更嫦娥为爱，寒
光满地，故移疏影，来伴南枝。谁道寿阳妆
浅，偏入时宜。

李天骥

摸鱼儿 灯花

又何须、向明还灭，寒花点缀孤影。玉龙度海吹鱼浪，烟淡宝钗横鬓。斜又整。是虫滴骊珠、两两相交颈。夜长人静。恁玉果低抛，金钱暗卜，此意有谁领。

欢娱事，料想凭伊先应。帕绡新泪犹凝。银篦未忍轻挑下，只恐暗风吹烬。重记省。怕莫是、明朝有个青鸾信。怎知无定。算只解窥人，人孤影只，成瘦又成病。

李廷忠

瑞鹧鸪

洛浦风光烂漫时。千金开宴醉为期。花
方著雨犹含笑，蝶不禁寒总是痴。

香腮擎吐浓华艳，不随桃李竞春菲。东
君自有回天力，看把花枝带月归。

生查子

玉女翠帷熏，香粉开妆面。不是占春迟，
羞被群花见。

纤手折柔条，绛雪飞千片。流入紫金卮，
未许停歌扇。

水龙吟 寿宁国太守王大卿正月二日

风流最数宣城，奇山秀水神仙府。琴高
台畔，花姑坛上，鸾翔凤舞。春度玉墀，月
升金掌，荣分铜虎。想少陵，知有异人间出，
三百载、留佳句。

岁岁椒盘栢斝，到明朝、又还重举。阳
和散作，千岩瑞雪，两溪甘雨。汲取恩波，

酿成禄酒，庆公初度。有东风传报，都人已为，筑沙堤路。

沁园春 刘总干会饮同寮，出示新词，席上用韵

幕府增辉，前度刘郎，又还到来。看芙蓉池畔，神凝秋水，绮罗丛里，欢动春雷。彩笔新题，金钗半醉，当日英雄安在哉。开筵处，是真仙福地，不著纤埃。

堪怜倦客情怀。听吹竹弹丝金奏谐。有黄花插鬓，何妨敲帽，绿橙醒酒，莫惜空罍。坐上疏狂，帘间姝丽，应想横波一笑回。停杯久，待娇歌缓劝，归骑休催。

水调歌头 武昌南楼落成，次王漕韵

抚景几今古，遗恨此江山。百年形胜，但见幽草杂枯菅。多少名流登览，赖有神扶坏栋，诗墨尚斑斑。风月要磨洗，顾我已衰颜。

擎天手，携玉斧，到江干。一新奇观，领客觞咏有馀闲。烟草半川开霁，城郭两州相望，都在画屏间。便拟骑黄鹄，直上扣云关。

满江红 上夔帅乐秘阁生日

玉帐西来，道前是、绣衣使者。游览处、秋风鼓吹，自天而下。湘水得霜清可鉴，巫

峰过雨森如画。有神仙、佳致在胸襟，真潇洒。

荆州宝，元无价。夔门政，长多暇。听谈兵樽俎，百川倾泻。此目寿觞容我劝，他年枢柄还公把。趁桂花、时节去朝天，香随马。

鹧鸪天 九日南楼和范总干韵

槛外长江浪拍空。萧萧红蓼白苹风。三秋告稔三农庆，九日追欢九客同。

烟渚北，月岩东。莫嫌光景太匆匆。登龙戏马英雄事，都在南楼一啸中。

踏落行 赵宽夫十二月十二日生，赋此为寿

星野涵辉，云峰环翠。南园迎腊开梅蕊。瑶台仙子笑相逢，金钗行里拚沈醉。

照乘骊珠，出闲天骥。相随寿母多年纪。春风侍宴宝花楼，五枝七叶都荣贵。

贺新凉 寿制帅董侍郎

濯锦江头路。望祥云、密拥旌幢，初开天府。冰露壶中秋玉莹，不著人间烦暑。现物表、神仙风度。回首太清宫阙杳，是鸣珂簪笔遨游处。舟万斛，却西诉。

筹边堂上兵无数。笑当年、蜀山谅将，夜分旗鼓。听取今朝宣阍令，洗尽蛮烟塞雾。

全宋词 李廷忠

便催唤、袞衣归去。运应河清逢岳诞，办中兴事业须申甫。看岁岁，寿觞举。

霜天晓角 庆高尉

洞天仙伯。总是梅标格。来索东风一笑，香浮动、潜溪月。

寿尊谁共酌。少年花县客。试问日边春信，梁园上，正飞雪。

感皇恩 寿王节使

昨夜一星明，太微西畔。应得良朝诞名将。豹韬龙节，谈笑坐清江汉。年年梅雪里、开华宴。

铁券高勋，金钟洪算。要同宗社流芳远。玺书褒异，自得君王深眷。看看登剑履、明光殿。

临江仙 寿刘子野

人物风流真罕见，何须尘外求仙。绿龟千岁稳巢莲。醉倾金凿落，笑拥玉婵娟。

须信日边消息好，寒花也作春妍。笙歌乐地酒中天。功名无限事，都在寿觞前。

又 寿帅幕

秋到三山呈瑞气，斑斑绣虎文章。早分桂殿一枝香。婉谋参幕府，华署等朝行。

驾月姮娥来献寿，胜如昨夜辉光。十分
满劝紫霞觞。年年花萼宴，相约侍君王。

庆清朝 上楼大参 十一月十五

天启重光，地钟上瑞，有人起自东山。
当年谢傅，几曾鹤发貂冠。不似文章隳老，
重来鸣步斗枢间。洪钧转，五原草绿，太白
兵闲。

运庆今朝初度，正日添纹线，月挂冰盘。
恩重御壶宣劝，喜溢天颜。听取沙堤好语，
金科红篆押千官。春长在，调元鼎里，不假
还丹。

卜算子 萧计议席上

草际雪痕消，梅上春心动。碧幕红裙簇
画筵，横玉声三弄。

雅兴杂鱼龙，妙舞回鸾凤。莫道司空眼
惯□，还入清宵梦。

李团湖

沁园春

六桂传家 ,三槐植庭 ,箕裘大儒。甚二郎
意气 ,拟同稷契 ,一时庆会 ,致主唐虞。百揆登
庸 ,双亲未老 ,此乐人间还有无。那堪更、有棣
华鞞鞞 ,听履亨衢。

朝来天上传呼。便写作、衣冠盛事图。有
声容备乐 ,传宣锡劝 ,充庭牲饩 ,簇拥欢娱。整
顿乾坤 ,巩安宗社 ,亦有臣功如此乎。中书考 ,
愿年年此日 ,春满蓬壶。

李 新

临江仙

杨柳梢头春色重，紫骝嘶入残花。香风满面日西斜。只知闲信马，不觉误随车。

已许洞天归路晚，空劳眼惜眉怜。几回偷为掷花钿。今生应已过，重结后来缘。

浣溪沙 秋怀

千古人生乐事稀。露浓烟重薄寒时。菊花须插两三枝。

未老功名辜两鬓，悲秋情绪入双眉。茂陵多病有谁知。

前 调

书所见

雨霁笼山碧破赊。小园围屋粉墙斜。朱门闲掩那人家。

素腕拨香临宝砌，层波窥客擘轻纱。隔

窗隐隐见簪花。

摊破浣溪沙

几度珠帘卷上钩。折花走马向扬州。老去不堪寻往事，上心头。

陶令无聊惟喜醉，茂陵多病不胜愁。脉脉春情长不断，水东流。

李秀兰

减字木兰花

自从君去。晓夜萦牵肠断处。绿遍香阶。
过夏经秋雁又来。

想伊那里。应也情怀愁不止。渺渺书沈。
直至如今没信音。

李 演

摸鱼儿 太湖

又西风、四桥疏柳，惊蝉相对秋语。琼荷万笠花云重，袅袅红衣如舞。鸿北去。渺岸芷汀芳，几点斜阳字。吴亭旧树。又系我扁舟，渔乡钓里，秋色淡归鹭。

长干路。草莽疏烟断墅。商歌如写羁旅。丹溪翠岫登临事，苔屐尚黏苍土。鸥且住。怕月冷吟魂，婉冉空江暮。明灯暗浦。更短笛衔风，长云弄晚，天际画秋句。

声声慢

轻鞚绣谷。柔屐烟堤，六年遗赏新续。小舫重来，惟有寒沙鸥熟。徘徊旧情易冷，但溶溶、翠波如縠。愁望远，甚云销月老，暮山自绿。

嗔笑人生悲乐，且听我尊前，渔歌樵曲。旧阁尘封，长得树阴如屋。凄凉五桥归路，载寒秀、一枝疏玉。翠袖薄，晚无言、空倚修竹。

醉桃源 题小扇

双鸳初放步云轻。香帘蒸未晴。杏熔暗
泪结红冰。留春蝴蝶情。

寒薄薄，日阴阴。锦鸠花底鸣。春怀一
似草无凭。东风吹又生。

南乡子 夜宴燕子楼

芳水戏桃英。小滴燕支浸绿云。待觅琼
觚藏彩信，流春。不似题红易得沈。

天上许飞琼。吹下蓉笙染玉尘。可惜素
鸾留不得，更深。误剪灯花断了心。

八六子 次笈房韵

乍鸥边、一番腴绿，流红又怨苹花。看
晚吹、约晴归路，夕阳分落渔家。轻云半遮。

萦情芳草无涯。还报舞香一曲，玉瓢几
许春华。正细柳青烟，旧时芳陌，小桃朱户，
去年人面，谁知此日重来系马，东风淡墨敲
鸦。黯窗纱。人归绿阴自斜。

祝英台近 次笈房韵

采芳苹，萦去橹。归步翠微雨。柳色如
波，萦恨满烟浦。东君若是多情，未应花老，
心已在、绿成阴处。

困无语。柔被褰损梨云，间修牡丹谱。
妒粉争香，双燕为谁舞。年年红紫如尘，五
桥流水，知送了、几番愁去。

贺新凉 多景楼落成

笛叫东风起。弄尊前、杨花小扇，燕毛
初紫。万点淮峰孤角外，惊下斜阳似绮。又
婉娩、一番春意。歌舞相缪愁自猛，卷长波、
一洗空人世。闲热我，醉时耳。

绿芜冷叶瓜州市。最怜予、洞箫声尽，
阑干独倚。落落东南墙一角，谁护山河万里。
问人在、玉关归未。老矣青山灯火客，抚佳
期、漫洒新亭泪。歌哽咽，事如水。

李 亿

念奴娇

镜鸾分影，望天涯肠断，悄无红叶。几度秋风吹翠被，一缕幽香难灭。燕卜新梁，花移别槛，回首春如客。欢情何在，绿杨空锁愁色。

可是今古风流，小乔姝丽，只许周郎得。金谷珠帘空百尺，不碍梦魂飞入。钗股盟深，旧缘未断，月有重圆日。蓝桥路近，乘云先问消息。

菩萨蛮

画楼酒醒春心悄。残月悠悠芳梦晓。娇汗浸低鬟。屏山云雨阑。

香车河汉路。又是匆匆去。鸾扇护明妆。含情看绿杨。

徵 招 梅

翠壶浸雪明遥夜，初疑玉虬飞动。莫弄紫箫吹，堕寒琼惊梦。把红炉对拥。怕清魄、

不禁霜重。受护殷勤，待长留作，道人香供。

尘暗古南州，风流远、谁寻故枝么凤。
漫举目销凝，对愁云矇眊。向霞扉月洞。且
嚼蕊、细开春瓮。这奇绝，好唤苍髯，与竹
君来共。

李 义 山

祝英台近 寿张路钤 四月初一

夏初临，春正满，花事在红药。一阵光风，香雾喷珠箔。画堂旧日张家，梦中玉燕，早拂晓、飞来帘幕。

酒深酌。曾记走马长安，功名戏樊郭。螺浦如杯，豪气怎生著。直须用了圯编，封侯万户，却归共、赤松翁约。

李寅仲

齐天乐 寿韩郡王

摩挲阅古堂前柳，尽是世臣乔木。故国风流，中兴事业，都写南山修竹。商颜自绿。甚当日君王，浩歌鸿鹄。谁识宫中，有人先定大横卜。

簪貂更鸣佩玉。退朝归较晚，留传黄屋。雨露无边，风云在手，宜享长生福。神京未复。看先取鸿沟，次封函谷。岁岁初寒，小桃花下跨青鹿。

李 婴

满江红

荆楚风烟，寂寞近、中秋时候。露下冷、兰英将谢，苇花初秀。归燕殷勤辞巷陌，鸣蛩凄楚来窗牖。又谁念、江边有神仙，飘零久。

横琴膝，携筇手。旷望眼，闲吟口。任纷纷万事，到头何有。君不见、凌烟冠剑客，何人气貌长依旧。归去来、一曲为君吟，为君寿。

李泳

水调歌头

危楼云雨上,其下水扶天。群山四合,飞
动寒翠落檐前。尽是秋清栏槛,一笑波翻涛
怒,雪阵卷苍烟。炎暑去无迹,清驶久翩翩。

夜将阑,人欲静,月初圆。素娥弄影,光射
空际绿婵娟。不用濯缨垂钓,唤取龙宫仙驾,
耕此万琼田。横笛望中起,吾意已超然。

贺新郎

门掩长安道。卷重帘、垂杨散暑,嫩凉生
早。午梦惊回庭阴翠,蝶舞莺吟未了。政露
冷、芙蓉池沼。金雁尘昏么弦断,理余音、尚想
腰支袅。欢渐远,思还绕。

临皋望极沧江渺。晚潮平、湘烟万顷,断
虹残照。彩舫凌波分飞后,别浦菱花自老。问
锦鲤、何时重到。楼迥层城看不见,对潇潇、暮
雨怜芳草。幽恨阔、楚天杳。

定风波 感旧

点点行人趁落晖。摇摇烟艇出渔扉。一

全宋词 李泳

路水香流不断。零乱。春潮绿浸野蔷薇。

南去北来愁几许，登临怀古欲沾衣。试问
越王歌舞地。佳丽。只今惟有鹧鸪啼。

李玉

贺新郎 春情

篆缕销金鼎。醉沈沈、庭阴转午，画堂人静。芳草王孙知何处，惟有杨花糝径。渐玉枕、腾腾春醒。帘外残红春已透，镇无聊、殢酒厌厌病。云鬓乱，未忺整。

江南旧事休重省。遍天涯、寻消问息，断鸿难倩。月满西楼凭阑久，依旧归期未定。又只恐、瓶沈金井。嘶骑不来银烛暗，枉教人、立尽梧桐影。谁伴我，对鸾镜。

李 珣

击梧桐 别西湖社友

枫叶浓於染。秋正老、江上征衫寒浅。
又是秦鸿过，霁烟外，写出离愁几点。年来
岁去，朝生暮落，人似吴潮展转。怕听阳关
曲，奈短笛唤起，天涯情远。

双屐行春，扁舟啸晚。忆昔鸥湖莺苑。
鹤帐梅花屋，霜月后、记把山扉牢掩。惆怅
明朝何处，故人相望，但碧云半敛。定苏堤、
重来时候，芳草如翦。

木兰花慢 寄豫章故人

故人知健否，又过了、一番秋。记十载
心期，苍苔茅屋，杜若芳洲。天遥梦飞不到，
但滔滔、岁月水东流。南浦春波旧别，西山
暮雨新愁。

吴钩。光透黑貂裘。客思晚悠悠。更何
处相逢，残更听雁，落日呼鸥。沧江白云无
数，约他年、携手上扁舟。鸦阵不知人意，
黄昏飞向城头。

李裕翁

摸鱼儿 春光

计江南、许多风景，繁华只在晴昼。些儿淡沓冲融意，到处粘花著柳。疏雨后。更艳艳绵绵，泼眼浓如酒。飞浮宇宙。但借日浮香，随烟著物，巧笔画难就。

惆怅处，曾记苏堤携手。十年惊觉回首。苍埃霁景成阴晦，湖水湖烟依旧。凝望久。问燕燕莺莺，识此年华否。长门别有。脉脉断肠人，柔情荡漾，长是为伊瘦。

李元卓

菩萨蛮

一枝绛蜡香梅软。宜春小胜玲珑剪。拂
晓上瑶钗。春从鬓底来。

菱花频自照。粉面惊春早。淡拂晓山眉。
为谁今日宜。

李元膺

茶瓶儿

去年相逢深院宇。海棠下、曾歌金缕。
歌罢花如雨。翠罗衫上，点点红无数。
今岁重寻携手处。空物是、人非春暮。
回首青门路。乱红飞絮，相逐东风去。

洞仙歌

廉纤细雨，殢东风如困。萦断千丝为谁恨。
向楚宫一梦，千古悲凉，无处问。愁到而今未尽。

分明都是泪，泣柳沾花，常与骚人伴孤闷。
记当年、得意处，酒力方融，怯轻寒、玉炉香润。
又岂识、情怀苦难禁，对点滴檐声，夜寒灯晕。

又

一年春物，惟梅柳间意味最深。至莺花烂熳时，
则春已衰迟，使人无复新意。予作洞仙歌，使探春者歌之，
无后时之悔。

雪云散尽，放晓晴池院。杨柳于人便青眼。
更风流多处，一点梅心，相映远。约略

颯轻笑浅。

一年春好处，不在浓芳，小艳疏香最娇软。到清明时候，百紫千红花正乱。已失春风一半。蚤占取韶光、共追游，但莫管春寒，醉红自暖。

暮山溪 送蔡元长

溪堂欢燕。惯捧玻璃盏。今日祖西城，更忍把、一杯重劝。别离情味，自古不堪秋，催泪雨，湿西风，肠共危弦断。

夕阳去路，五马旌旗乱。便是古都春，应醉恋、曲江池馆。须知别后，叠翠倚阑情，青嶂晚，碧云深，日近长安远。

鹧鸪天

寂寞秋千两绣旗。日长花影转阶迟。燕惊午梦周遮语，蝶困春游落拓飞。

思往事，入颦眉。柳梢阴重又当时。薄情风絮难拘束，飞过东墙不肯归。

菩萨蛮

彩旗画柱清明后。花前姊妹争携手。先紧绣罗裙。轻衫束领巾。

琐绳金钏响。渐出花梢上。笑里问高低。盘云弹玉螭。

一落索

天上粉云如扫。放小楼清晓。古今何处想风流，最潇洒、龙山帽。

人似年华易老。且芳樽频倒。西风于我更多情，露金靥、篱边笑。

浣溪沙 咏掠发

乞与安仁掠鬓霜。不须红线小机窗。剪刀疏下蜀罗长。

纤手捻残针缕细，金钗翻过齿痕香。同心小绾寄思量。

又

饮散兰堂月未中。骅骝娇簇绛纱笼。玳簪促坐客从容。

已醉人间千日酒，赐来天上密云龙。蓬仙清兴欲乘风。

李 芸 子

木兰花慢 秋意

占西风早处，一番雨，一番秋。记故国斜阳，去年今日，落叶林幽。悲歌几回激烈，寄疏狂、酒令与诗筹。遗恨清商易改，多情紫燕难留。

嗟休。触绪茧丝抽。旧事续何由。奈予怀渺渺，羁愁郁郁，归梦悠悠。生平不如老杜，便如它、飘泊也风流。寄语庭柯径竹，甚时得棹孤舟。

李 曾 伯

水龙吟 甲申潼川玩月

西风吹上牛头，天涯慰此人情耳。斜阳任晚，青山全似，故人知己。迤邐归来，须臾懒去，桂华犹未。待冰轮推上。梧桐树了。更儿是、点儿几。

满眼碧天如洗。便分明、水晶宫里。区区玩事，一觴一咏，一灯而已。欲待无眠。争如且恁，有无穷意。怕嫦娥，隔窗偷看，须下却、帐儿睡。

又 甲午寿尤制使

几年野渡孤舟，萧然袖此经纶手。归来廊庙，从容进退，祖风犹有。小队环花，轻艘漕玉，暂临金斗。把诗书帷幄，期年坐啸，尘不动。依依柳。

好是公堂称寿。正元戎、阃垣开后。旌旗才举，胡雏马上，闻风西走。一点阳春，无边德泽，淮山长久。待官军，定了长安，貂蝉侍、未央酒。

又 己亥寿史督相

明堂一柱擎天，眼看黄阁空诸老。平生

方寸，班班四字，诚心公道。玉帐云旗，金城露布，尚勤征讨。向淮头蜀口，一时做就，安石传、孔明表。

谈笑妖氛如扫。看整齐、乾坤都了。衮衣赤舄，归来廊庙，雍容师保。三相一门，双亲千岁，人间蓬岛。举黄封，细唱调羹，官梅上、正春早。

又 庚子寿史丞相

东南一气当春，便从黄钺登台斗。紫皇举此，亨屯济泰，属之公手。淮浦烽销，未央觴献，捷传清昼。庆太平朝野，骎骎重见，昔淳化、今嘉祐。

史观年编新就。看勋庸、光前垂后。三槐鼎盛，双椿盘固，古今希有。宴侍龙颜，欢承鹤发，相期长久。问前朝，相业谁同，八九十、迈文富。

又 寿游参政

岷峨寿佛东来，手移斗柄春寰宇。经纶事业，诗书流出，时为膏雨。载采三阶，炳丹一念，雍容枢辅。望岩廊风范，扬休山立，真汉相、殆天与。

国步时当如许。赖明堂、倚空一柱。苍生引领，整齐中夏，奠安西土。多士相期，直须无愧，范韩文富。且梅边一笑，春风祝公，寿介东鲁。

又 丁未约诸叔父玩月，期而不至，时适台论

举杯长揖常娥，高情怜我霜髯白。婆娑树底，老蟾何物，千秋一色。一镜高悬，肺

肝洞烛，了无尘隔。任亿千万里，同然玉界，都不管、天南北。

老子萍蓬踪迹。对西风、几番行役。平生玩事，从头细数，山川历历。明月明年，知它何处，能如今夕。惜无人共我，登楼酌古，一笑横笛。

又 和韵

少年管领良宵，直须醉待东方白。而今老去，何忧何乐，不空不色。桐影横斜，桂香摇落，仙凡奚隔。怅银桥梦断，玉箫声杳，人如在、楚天北。

冷眼乾坤陈迹。笑英雄、等为形役。庾楼袁舫，浩歌长啸，壮游曾历。万里瑶台，乘风归去，不知何夕。对冰轮孤负，欠千钟酒，与三弄笛。

又 和韵

归来袖手江湖，不妨左右持螯白。凉宵幸对，一轮端正，娟娟秋色。万宇冰清，千林霜缟，更无云隔。对金茎露冷，铜壶漏静，梧阴转、画桥北。

堪叹平生辙迹。算纷纷、为谁驱役。兔蟾应笑，蝇蜗累我，中年虚历，抖擞吟情，徘徊舞影，可怜佳夕。怅力微心在，梦中一曲，似黄楼笛。

又 戊申寿八窗叔

归来三见梅花，年年借此花为寿。八窗轩槛，月边竹畔，数枝开又。姑射肌肤，广平风度，对人依旧。把离骚读遍，椒兰荃蕙，

奚敢及、众芳首。

幸与岁寒为友。任天公、雪倬倬霜慙。香名一点，西湖东阁，逊逋曾有。金鼎家毡，玉堂椽笔，恍来斯受。且巡檐、管领先春，林外事、付卮酒。

又 己酉寿广西丰宪

几番南极星边，樽前常借南枝寿。今年好处，冰清汉节，与梅为友。老桧苍榕，婆娑环拱，影横香瘦。把草庭生意，蛮烟尽洗，都付与、风霜手。

岭首小春时候。看明宵、桂轮圆又。此人此地，此花此月，宜诗宜酒。把绣归来，调羹金鼎，西湖春后。愿玉奴，岁与素娥不老，共人长久。

又 和丰宪题林路铃梅轴韵

小窗香雾笼葱，砚寒金井频呵冻。老坡仙去，新声犹寄，绿毛么凤。瘦脸盈盈，不禁倬慙，雪浓霜重。赖墨池佳致，草成玄白，聊以此、当清供。

长记月明曾共。捻虬髯、几番孤耸。春风一点，著公翠袖，撩人清梦。逋尔何如，西湖惯见，影斜芎动。要岁寒得友，岂容无竹，倩谁添种。

又 辛亥和吴制参赋雪韵

元英燕罢瑶台，玉妃满地花钿委。山川幻出，剡溪梁苑，齐宫郢里。半点瑕无，一团和就，珠圆琼碎，任谢家儿女，庭前争诧，盐空撒、絮风起。

夜入蔡州城里。问官军、果谁堪比。饮羔烹凤，众宾一笑，直聊尔耳。寒耸玉楼，冻呵金井，属公诗史。更须待大白，浩歌黄竹，为丰年喜。

又 乘雪登仲宣楼，和前韵

玉龙飞下残鳞，千岩万壑皆填委。乾坤一色，不知身隔，蓬莱几里。疑是瑶英，盛开元圃，被风敲碎。倚危楼极目，长江渺处，浑错认、沙鸥起。

依约青帘遥指。记山家、酒香无比。访梅江路，何时归唤，小苍长耳。孙案袁门，不妨高卧，足娱书史。且摩挲霜鬓，嘲吟冰箸，共荆人喜。

又 席间诸公有赋，再和

琅琅环佩三千，一楼玉立中端委。瑶琨碾就，襄王故国，屈平遗里。多少铅华，飞琼涂抹，一时掇碎。记少年驰逐，银杯缟带，几翻被、鸡呼起。

冷入重貂如水。鬓丝丝、叹非前比。羔儿满泛，狮儿低唱，飘风过耳。冰释边忧，春生民乐，欢形佐史。倩何人蜚奏，五云天
上，助吾君喜。

醉蓬莱

丁酉春题江州琵琶亭，时自兵间还幕，有焚舟之惊

倚栏干一笑，旧日琵琶，何处寻觅。独立东风，吹未醒狂客。沙外青归，柳边黄浅，

依旧自春色。极目长淮，晴烟一抹，不堪重忆。

老子平生，萍流蓬转，昔去今来，鸥鹭都识。拍拍轻舟，烟浪暗天北。自有乾坤，江山如此，多少等陈迹。世事从来，付之杯酒，青衫休湿。

又 戊子为亲庭寿，时方出蜀

是人生好处，仕宦归来，享清闲福。屈指吾翁，恰八年荆蜀。星火丛中，风涛局上，转青天乌粟。轺传欣还，里闾相庆，双鬓犹绿。

为报中朝，如今老子，肯把貂蝉，换取松菊。西舍东邻，正新篘初熟。屋仅一椽，田姑二顷，剩种花莳竹。缓引金钗，细斟琼斝，唱长生曲。

又 乙酉寿蜀帅

把东南温厚，天遣西来，试薰风手。一佛人间，与峨眉长久。玉帐旌旗，金城鼓吹，笑乌奴歌酒。狐兔烟清，貔貅月淡，凯音新奏。

元祐明时，中朝司马，记得边人，岁问安否。勋业如今，□□□□□。公衮沙堤，归来无恙，有西湖花柳。更借当年，一龟一鹤，伴千秋寿。

又 丁亥寿蜀帅

有擎天一柱，殿角西头，手扶宗祐。万里鱼凫，倚金城山立。亭障惊沙，毡裘卷地，倏度黄龙碛。玉帐从容，招摇才指，顿清边

色。

见说中天，翠华南渡，一捷金平，胆寒西贼。帝锡公侯，更高逾前绩。箕尾辉腾，昴街芒斂，看清平天日。周袞归来，凤池麟阁，双鬓犹黑。

又 代寿昌州守叔祖

记石湖佳句，为海棠花，合来西蜀。不道东州，更香霏情淑。汉竹光中，召棠阴里，想清欢未足。少驻旌麾，姑留樽俎，待春风曲。

见说吾家，丹溪老子，万籍名堂，孙枝犹馥。南极星边，正魁星明烛。五马归来，一龟无恙，访旧松新菊。从今长伴，西山一佛，镇岷江绿。

又 寿别制垣

问江东父老，十数年来，谁为安石。万里鲸波，一柱独山立。汉橐班高，郢斤名重，喜动旌旗色。虎踞龙盘，有人于此，千载犹昔。

好是元戎，护寒旧手，到处人传，争道公别。办取风樯，指顾定南北。只恐为霖，玉麟堂小，留不住台席。一片仁心，寿身寿国，与同箕翼。

又 丙午寿八窗叔

自陇头垂谱，调鼎传家，典刑犹有。岁岁芳期，报小春时候。仙骨非凡，生香不断，标格惠兰右。江路孤山，水边雪际，为渠诗瘦。

白玉堂前，青毡席上，孰谓无人，有如此酒。得意春风，且占万花首。会看常娥，移栽月殿，肯向桂华后。应笑家林，枯松厌蹇，岁寒堪友。

又 庚戌寿章仓

正阳生一脉，绣日添长，台云书瑞。劲节昂霄，仁意雪霜里。粟庾红陈，草靡绿茂。襦裤蔼千里。马熟车轻，铃斋曾到，从容游戏。

好是邦人，能言世美，犹爱其棠，而况其子。洞里桃花，岁月任渠记。一点梅梢，为传消息，有东皇知己。倚看明年，相逢贡祿，曳星辰履。

六州歌头 和陈次贾韵饯其行

桂香深处，倾盖岭之西。云南外，曾指点，是鞞。酌玻璃。簪带江山里，挥银笔，摘绮句，湖海气，羞蓬弱，吐虹蜺。回首烟尘碌碌，公家事、自笑痴儿。盍田园归去，耕钓侣黔黎。月夕花时。恣吟题。

怅荆州路，同北望，剡溪兴，又东驰。雄边上，夸前躅，壮新基。灿宸奎。客问西陲事，公莫惜，语教知。秋城梦，笳却骑，舞闻鸡。休作中年离恨，聊拚取、一醉如泥。梅边佳致，逸兴与逋齐。人在苏堤。

摸鱼儿 和陈次贾仲宣楼韵

对楼头、欠招欢伯，和风吹老芳讯。凭

阑面面蒲萄绿，依约碧岑才寸。无尽兴。纵
燃竹烹泉，亦自清肠吻。凭谁与问。旧城郭
何如，英雄安在，何说解孤愤。

铜鞮路，极目长安甚近。当时宾主相信。
翩翩公子登高赋，局面还思著紧。乘暇整。
谩课柳评花，援镜搔蓬鬓。江平浪稳。怅我
有兰舟，何人共楫，毋作孔明恨。

八声甘州 庚戌重九约诸友登龙山，阻雨

拟龙山、把酒酌西风，西风苦无情。似
秋容不受，骚人登眺，特地悭晴。依稀两三
过雁，何处是方城。目断危楼外，山远烟轻。

且对黄花一笑，叹浮生易老，乐事难并。
唤遏云低唱，檐溜任霏铃。问何如、乌纱折
角，把芳名、盖取晋参军。东篱下，阴晴不
管，输与渊明。

又 庚戌寿郑丞相

有厖眉、扶杖岷山来，举觞寿南山。道
天怜赤子，相逢钧播，久望毡还。幸际君王
神武，上宰是甘盘。少运风霆手，整顿何难。

好个霜天时候，听雁门新雁，眺远凭阑。
想经纶心上，一点炳如丹。抚舆图、真儒事
了，把勋庸、留在鼎彝看。八千岁，四明洞
府，一佛人间。

沁园春 丁酉春陪制垣齐安郡圃曲水之集

形胜风流，乐事良辰，一时四并。正榆

更新火。觴浮曲水，那堪上巳，又是清明。赤壁功名，东坡文字，俯仰人间无古今。诗书帅，对烽烟静昼，俎豆添春。

水边天气催人。便须认杨花雪样生。慨英风满席，思旌绵上，清谈束阁，肯记兰亭。安得长绳，高悬碧落，系住画檐红日阴。柔桑外，听鸣鸠唤雨，全胜流莺。

又 庚寅为亲庭寿

鸿禧主人，一闲半年，未尝厌闲。谓有溪可钓，有田可秫，有兰堪佩，有菊堪餐。羽檄秋风，胡笳夜月，多少勋名留汉关。如今且，效樽罍北海，歌舞东山。

门前。咫尺长安。但只恐纶音催禁班。把鹭鬓数茎，更因民白，鸥心一片，犹为君丹。蓝绶儿痴，彩衣家庆，倦羽伶俜江汉还。春光小，看庭闱岁岁，一笑梅间。

又 代为亲庭寿

轩冕傥来，功名杯水，行藏倚楼。把方略评梅，工夫课柳，精神伴鹤，谈笑盟鸥。草檄寻樵，移文问钓，任江上东南风未休。君知否，问如今绿野，胜似青油。

从伊万户封留。算得似团栾歌笑不。怕魏阙兴思，高车驷马，江湖难著，缓带轻裘。雪意何如，新醪熟未，乐事良辰聊献酬。从今去，更八千椿算，才一春秋。

又 代寿直院陈文昌

今代清流，北斗以南，文昌一星。对露门进读，銮坡演翰，琐闼批敕，宝牒成文。

笔下权衡，胸中律度，礼乐人才俱讨论。驾行里，羨才高片玉，辉映条冰。

几年简在吾君。便须把诗书开太平。笑诸公炙手，昔成何事，一贤冷眼，今独修名。花底退朝，槐边听制，一武商岩霖雨新。金罍举，对春风九十，岁岁平分。

又 乙未代寿尤制帅

天下中庸，千载一灯，传之自公。有涵洪雅量，陂澄千顷，坚凝定力，壁立孤峰。佐鼎调梅，参帷借箸，略试斯文经济功。听淮鹤，暂素丝揽辔，玉帐分弓。

朝来鼓角声雄。庆元帅新除初度逢。任西风局面，人皆颯洞，福星堂上，我独从容。草檄传燕，开门释蔡，了却中原公衮东。归廊庙，把格天勋业，与宋无穷。

又 壬寅饯余宣谕入蜀

画舸呼风，长剑倚天，壮哉此行。指洞庭彭蠡，遍观吴楚，瞿塘滟预，直上峨岷。帝语春温，军声秋肃，手济时屯开泰平。天应是，念蚕丛父老，公为更生。

眼看四海无人。今天下英雄惟使君。想驰情忠武，将兴王业，抚膺司马，忍咎吾民。净洗甲兵，归来鼎辅，定使八荒同一云。经营事，比京河形势，更近函秦。

又 庚子登凤凰台，和壁间韵

漫浪江头，三听秋砧，一登故台。望烟芜莽苍，令人目断，风樯掀舞，何日眉开。把酒新亭，围棋别墅，老气当时何壮哉。江

东事，百年无恙，全是时才。

纷然竞付轻埃。还水绕赏心东向淮。叹阿奴侪辈，因人碌碌，乃翁材略，余地恢恢。凤阙天高，鹭洲潮落，约取白鸥归去来。阑干外，英雄陈迹，一酹琼杯。

又 再和

绮阁香销，玉砌梦残，凄凉旧台。对御沟红叶，一番木落，宫墙黄菊，几度花开。水溯岷源，山联吴会，目送征鸿安往哉。都休问，六朝人物，谁拙谁才。

平生袞袞烟埃。记匹马当年荆蜀淮。叹凋零殆尽，词源已竭，消磨未去，酒量犹恢。八跪蟹肥，四腮鲈美，客有可人招不来。油幢暇，凭栏一笑，相与传杯。

又 和广文叔有季秋既望之约不及赴

目断长空，手拍危栏，高兴酒浓。拟招呼短艇，追陪飞盖，一餐湘菊，共赋芙蓉。雁字沈秋，鸦林噪晚，几阵萧萧雨更风。空凝伫，不如一鹤，随意西东。

堪嗟乐事难逢。愧元伯、巨卿千里从。望文星聚彩，交辉吴分，天飏吹翅，独隔昆蓬。野墅荒烟，败荷衰草，人在可怜憔悴中。还相念，愿持觥薄罚，别许从容。

又 自和即事

雨抹晴妆，修眉镜清，寸碧翠浓。对蕙葭尽处，丛丛烟树，池塘侧畔，面面芙蓉。千百栖鸟，两三过雁，时有婆娑一笛风。斜阳里，更青帘半卷，在小桥东。

佳人何日重逢。问还肯扁舟载酒从。笑平生劲概，寸心如铁，中年老态，两鬓成蓬。荷锄栽蔬，腰镰刈稻，且寄西郊图画中。空回首，望五湖鸥鹭，心事容容。

又 再和

秋岂悲人，人不悲秋，比春更浓。有蕙兰丰度，尚存芳菊，牡丹文献，犹在芙蓉。举蟹持醪，得鲈作鲙，晋宋间人有此风。休轻笑，彼柴桑傲吏，龌龊篱东。

携壶与客还逢。愿时许先生杖履从。叹尘踪如寄，鸥凫江海，性真聊适，蝟鹬蒿蓬。刮眼青天，惊心黄叶，立尽梧桐月正中。凄然久，看物情终竟，不似春容。

又 甲辰饯尤木石赴九江帅

大江之西，康庐之阴，壮哉此州。有舳舻千里，旌旗百万，襟喉上国，屏翰中流。弹压鲸波，指麾虎渡，著此商川万斛舟。青毡旧，看崇诗说礼，缓带轻裘。

十年泉石优游。久高卧元龙百尺楼。正九重侧席，相期岩弼，一贤砥柱，聊试边筹。了却分弓，归来调鼎，得见茂洪何复忧。谈兵暇，问琵琶歌曲，无恙还不。

又 甲辰寿王总侍

北固台端，南渡后来，无此伟人。自从容佐鼎，光华揽辔，几年中外，属目经纶。万灶炊烟，千艘漕雪，手整江淮如掌平。诗书效，看马腾士饱，酒好兵精。

平生。余事功名。岂管葛诸人能拟伦。

暂牙筹游戏，小淹惟月，金瓯注想，便合为霖。沆漑一襟，风流八咏，秋入诗坛如许清。为公寿，有黄花不老，长伴香名。

又 钱邓季谦赴班

揽秀岷峨，著鞭江淮，诸公所奇。对塞垣烟淡，相随弓剑，城楼月落，几共灯棋。驿柳摇黄，溪桃涨绿，稳趁春风度玉墀。亨衢去，看紫微红药，太乙青藜。

孤山若放梅时。莫忘却扬州曾有诗。怅英游难驻，堪怜只影，中年易感，只付双眉。珍重交情，勉旃时用，回首岫云从此归。能相忆，有好音遗我，在水之湄。

又 钱税巽甫

唐人以处士辟幕府如石温辈甚多。税君巽甫以命士来淮幕三年矣，略不能挽之以寸。巽甫虽安之，如某歉何。临别，赋沁园春以饯。

水北洛南，未尝无人，不同者时。赖交情兰臭，绸缪相好，宦情云薄，得失何知。夜观论兵，春原吊古，慷慨事功千载期。萧如也，料行囊如水，只有新诗。

归兮。归去来兮。我亦办征帆非晚归。正姑苏台畔，米廉酒好，吴松江上，药嫩鱼肥。我住孤村，相连一水，载月不妨时过之。长亭路，又何须回首，折柳依依。

又 丙午登多景楼和吴履斋韵

天下奇观，江浮两山，地雄一州。对晴烟抹翠，怒涛翻雪，离离塞草，拍拍风舟。春去春来，潮生潮落，几度斜阳人倚楼。堪怜处，怅英雄白发，空敝貂裘。

淮头。虏尚虔刘。谁为把中原一战收。
问只今人物，岂无安石，且容老子，还访浮丘。
鸥鹭眠沙，渔樵唱晚，不管人间半点愁。
危栏外，渺沧波无极，去去归休。

又

丙午和淮安朱赞府韵，以同在丙寅安陆围中，
朱八十余矣

紫金山前，铁骑围中，惟公尚知。怅当时
卯角，鱼犹同队，如今缟鬓，鸥已忘机。
故垒荒榛，群贤拱木，畴记官军夜战时。
不图见，独岁寒不改，老气犹奇。

嗟哉月驶舟移。四十载光阴昨梦非。叹
荷薪弗克，只惭弓冶，扃柴却扫，绝望簪圭。
菌短椿长，鸚微鹏巨，天分当然何足疑。闻
公里，有磻溪堪钓，盍亦云归。

又 丙午寿常丞叔

大疏归来，小阮适闲，喜同此时。问垂
弧历载，几番遥祝，举觞华旦，相会良希。
颂以松椿，酌之椒柏，预卜明年百事宜。春
犹浅，趁雪晴梅放，且和新诗。

公虽厌直兰闱。如正色朝端当宁知。看
大廷诸老，争推前席，吾家五祖，自有传衣。
暖律初回，要津立上，卿相时来皆可为。祈
公寿，与东君不老，南极齐辉。

又 庚戌初度自赋

弧矢四方，江汉一萍，少年壮游。叹而
今老矣，只宜野服，欲何为者，还著轻裘。
匹马萧萧，孤鸾杳杳，城郭重来空白头。西

风里，对一番新月，又荻花秋。

依然千古荆州。问刘表诸人还在不。向亭前举酒，不堪北顾，船头击楫，忍负中流。远水长天，淡烟衰草，还是当时王粲楼。何如且，倩吴歌楚舞，一洗新愁。

又 月夜自和

嗟矍铄翁，对婵娟月，怀汗漫游。怅江湖幸有，季鹰鲈鲙，田园忍负，晏子狐裘。丹桂开时，青萍渺处，家在三吴天尽头。庭皋静，又一番叶落，天下皆秋。

少年弓剑边州。惊转首黄梁还梦不。叹悠悠千载，关山无恙，滔滔一水，岁月俱流。镜老菱花，笳悲芦叶，新雁数行人倚楼。君知否，把眉峰蹙破，岂为身愁。

又 中秋约僚佐观击圆，登怀远，用前韵

唤曲生来，与常娥约，从太守游。把玉箫声寄，萧关短笛，霓裳曲换，清塞重裘。桂影飘摇，桐阴立尽，多少征人霜满头。油幢暇，不掀髯一笑，辜负中秋。

斗杓矗处中州。还有解闻鸡起舞不。看鸣弦中鹄，穿杨电激，飞球戏马，策蹇星流。绣帽归军，玳簪环客，薄晚同登庾亮楼。浮生事，是几番玩月，何苦多愁。

又 以雨不克登楼，用前韵

曲生来言，素娥寄声，偶阆苑游。问去年今夕，逢余桂岭，前年今夕，见子菟裘。何事尘劳，启人厌倦，痴兔老蟾因缩头。宜珍重，要相期后会，直待来秋。

休休。莫舞凉州。岂巫女风姨相妒不。
枉停歌准拟，冰轮东上，持杯顾恋，银汉西流。
一笑天慳，四并时少，应负珠帘十二楼。
呼蕉叶，且与生酹古，排遣年愁。

又 钱总干陈公储

百尺楼头，奇哉此翁，元龙后身。当壮
年襟度，百川鲸吸，平生出处，一片鸥轻。
冷淡逋梅，淋漓旭草，但见风雷笔下生。荆
州幕，觉坐间小异，乃有斯人。

牙樯喜色津津。正江影涵秋无点尘。对
白蘋黄苇，且供诗卷，紫薇红药，却演丝纶。
举酒延蟾，倚栏闻雁，应念征人归尚春。君
王问，尽不妨细说，万里戎情。

水调歌头

甲申春利州漕廨玩月闻琴和周榘仲韵

一段太清境，谁幻出阶坳。不知身住何
处，爽气逼霜袍。但见人间一样，似夜又还
非夜，栖鸟不安巢。认得在尘世，禁鼓二更
敲。

最快看，来竹底，上梅梢。几家朱户，
不如儿女醉蓬茅。谁把琴声三弄，不管骚人
幽趣，似向曲中嘲。长啸赋赤壁，有酒更无
肴。

又 再和

夜永厌银烛，移步下堂坳。秋风昨梦少
年，高兴鹄成袍。世上痴儿睡去，历历江山
细数，孤鹞啸危巢。地静未容去，门掩不妨

敲。

转巍阑，低画〔桷〕（桶），落寒梢。南楼老子争似，短笛一椽茅。无色界间长啸，不夜城中高卧，随意弄诗嘲。洗斝要更酌，为我问佳肴。

又 丙戌寿蜀阃

千一载英杰，百二国山河。提封几半宇宙，万里仗天戈。十乘晋军旗鼓，三岁秦关扃锁，地利属人和。位次功第一，未数酈侯何。

建青油，持紫荷，听黄麻。乾坤整顿都了，玉殿侍羲娥。且醉东湖花柳，却泛西湖舟楫，留不住岷峨。谁为语儒馆，浓墨被诗歌。

又 代寿昌州守叔祖

三蜀最佳处，昌是海棠州。清香燕寝闲暇，人与地风流。十万人家寿域，六七十翁儿状，眉寿祝公侯。谁为语廊庙，且许寇恂留。

过书云，才几日，纪千秋。祖孙卮酒相贺，庆事袭箕裘。自有诗书万卷，安用田园千顷，松菊足优游。持以寿公者，梅萼伴清修。

又 丁亥重阳登益昌二郎庙楼

老子世北客，家本住吴头。登临聊复尔耳，佳节懒为酬。刚被西风断送，又为黄花牵帅，草创作斯游。目力眇无际，更上一层楼。

对长江，流不尽，古今愁。凭栏正拟一笑，襟抱怯于秋。高处令人心悸，放旷舒怀何暇，好趁醒时休。留取江湖量，归去酬中州。

又 丁亥送方子南出蜀

行客送行客，况又值新秋。莼乡此去万里，先我上扁舟。三载乌奴聚首，异县乡情对语，乘月几登楼。去去远蜀口，日日望吴头。

丹青手，描不就，此离愁。半生萍梗江汉，别恨最绸缪。远水长空一色，风顺波平如掌，雁序际天游。故旧有相问，犹滞剑南州。

又 丁未沿檄过颖寿

骤雨送行色，把剑渡长淮。西风咄咄怪事，吹不散烟霾。才是橙黄时候，早似梅边天气，寒意已相催。老子尚顽耐，仆马苦虺聩。

叹平生，身客路，半天涯。飞鸢跼跼曾见，底事又重来。回首白云何处，目送孤鸿千里，去影为徘徊。篱菊渐秋色，杜瓮有新醅。

又 和吴鹤林舍人送杨帅韵

万里长淮北，青是汉时山。几年壁垒相望，高枕度春闲。不道草庐豪杰，手袖伊吾长剑，驰志在楼兰。钟鼓令秋肃，毡罽胆冰寒。

诗书帅，金横带，玉为鞍。天生如结数

辈，虏岂易江南。京索成皋此际，东郭韩卢俱困，故老正争看。琳檄未能草，冯铗直空弹。

又 庚子寿制阃别尚书

岷山羊叔子，江左管夷吾。勋名掀揭宇宙，金匱侈丹书。两载风寒卧护，一柱狂澜屹立，形势壮陪都。功业笑儿辈，别有大规模。

看东归，游凤沼，转鸿枢。不应廊庙人物，犹佩玉麟符。好是茅峰仙客，更与钟山佛子，同日庆垂弧。一饮共千岁，永永辅皇图。

又 庚子送周昞仲赴江东幕

簪履盛元幕，领袖属英游。登车揽辔余事，何止客诸侯。看尽巫云岷雪，却访庐峰湓浦，砥柱赞中流。百叠青山路，一片白萍洲。

今日事，风涛上，一虚舟。长江万顷寒碧，犹谓马能浮。况是眼前局面，心腹忧如边角，胜著赖帷筹。谈笑济时了，勋业遇前修。

又 辛丑送胡子安赴远安

风卷江湖浪，举足是羊肠。峡山知在何处，榛莽更凄凉。不为渊明五斗，直为班超万里，雅志未能忘。耿耿富襟抱，行计有诗囊。

溯吴头，逾楚尾，界瞿塘。从它昵昵燕语，留不住征樯。芳草天涯弥望，着我飞凫

来去，在在可徜徉。持此见刘表，抵掌与谈王。

又 甲辰中秋和傅山父韵

幻出广寒境，罗袜净无尘。素娥风格分明，玉骨水为神。手揽清光盈掬，眼看山河一色，阅尽古今人。对影且长啸，一酌瓮头春。

千万顷，琉璃色，楚天清。庾楼袁舫何事，汨汨主和宾。但见老蟾无恙，不管镜圆钩阙，寒暑任相更。此夕幸无雨，何惜放颜醺。

又 幕府有和，再用韵

碾就一轮玉，扫尽四边尘。白乎不涅不磷，千古此丰神。领略常娥体态，寂寞谪仙材调，四海岂无人。安得金丹诀，长驻玉颜春。

镜圆明，冰样洁，水来清。良宵难值如许，何惜且留宾。拟唤桓伊三弄，影转画檐西畔，钟鼓趣残更。肺腑尽霜雪，曲蘖不能醺。

又 再和

久欲乘槎去，间阔几仙尘。乾坤炯炯不夜，造化抑何神。谁道二分无赖，到处一轮都满，天未始私人。今夕果何夕，非夏亦非春。

风露下，明作哲，圣之清。纷纷浮世代谢，燕客与鸿宾。欢恨离愁尽扫，谢赋鲍诗高束，一枕听严更。尔自屋梁落，吾已醉醺

醺。

又 送制参向君玉归里

薄酒长亭别，饱饭故园归。两年婉婉席上，甘苦每同之。驍骥群中独步，麋鹿兴前不瞬，孰可与争驰。力挽不能寸，健翮遽斜飞。

经营事，艰难状，老天知。区区塞马得失，一笑付观棋。用则风云万里，不用烟霞一壑，两鬓未应丝。回首乌檣外，鸥鸟自忘机。

又 乙巳九月寿城获捷，和傅山父凯歌韵

壁垒壮西塞，形势古州来。九重庙算经远，边隙肯轻开。整顿金城千仞，遮护风寒数处，蛇豕敢当哉。惆怅倚长剑，扫未尽烟埃。

骑连营，桥列栅，木成排。老酋鱼釜视我，孰与障吾淮。横槊冲围四出，北府牢之何勇，新进喜多才。老子可归矣，击壤乐春台。

又 幕府有和，再用韵

枣颊上秋色，朔漠寇南来。斧螳锋猬焚集，腥雾扫难开。细看眼前局面，惊落人间匕箸，砥柱者谁哉。熊虎贾余勇，狐兔等轻埃。

炮雷轰，戈日耀，阵云排。不图风定波息，谈笑静长淮。休诧穿杨妙手，乘早闹篮抽脚，谁拙又谁才。束起楼兰剑，归钓子陵台。

又 戊申和八窗叔为寿韵

壮志小鹏背，万里欲乘风。马瘖裘敝，老来无复旧游重。楚尾吴头蜀口，三十载间陈迹，袞袞水之东。休说射雕手，且学钓鱼翁。

奚为者，聊尔耳，此山中。壶觞自引，不妨换羽与移宫。蓬矢桑弧何事，朝菌大椿皆分，识破色俱空。掬润弄明月，长啸倚青松。

又 再和

鸿雁未应到，可怪此番风。木犀天气，何事爽逼夹衣重。长记呼韩塞下，每向飞廉声里，占见马蹄东。今且闭门睡，都不管山翁。

李北平，班定远，魏云中。纷纷成败，任取勋业纪南宫。幸得明朝无雨，定是中宵有月，莫放酒尊空。起舞弄庭叶，清影伴岩松。

又 招八窗叔托疾再和

一番蓼花雨，几阵桂枝风。杖藜多暇，准拟同醉小山重。底事阮郎清致，苦托休文瘦损，咫尺阻西东。秋色浩如许，岂可欠诗翁。

门前事，都莫问，付杯中。纷纷蛮触等耳，富贵大槐宫。何惜振衣而起，相与凭栏一笑，抵掌共谈空。佳客傥不至，推枕卧云松。

又 戊申送历守赴濡须漕

缔好恨不早，觐面雅相知。璇星楼上，一见天产此英奇。功在淮梁砥柱，政蔼汉扶襦袴，仅借寇恂期。懊恼剑花冷，手欲鲙鲸鲵。

濡须坞，咽喉地，腹心谁。公其揽辔凭轼，勋业笑谈为。贯索旄头息焰，斗极泰阶动色，归佐太平基。客有问仆者，只说在渔矶。

又 己酉宿樟原驿得雨

之子问行役，火伞正当天。酷哉几可炙手，流汗满襟沾。仆仆长亭古道，人在竹舆何似，甌釜受蒸煎。帝悯苍生热，敕下九龙渊。

命丰隆，驱屏翳，起蜚廉。神工一炊黍顷，爽气遍垓埏。洗涤山河尘土，转作清凉境界，物类举醒然。稽首谢天赐，伸脚快宵眠。

又 题临江驿和徐意一韵

君莫厌行役，易尔此非难。人情无已、久阴忧潦霁忧乾。借得庭轩一榻，忘却征涂炎暑，小驻瀹龙团。世路任渠险，襟抱五湖宽。

叹平生，环辙迹，已苍颜。梅花雪片万里、奚又紩南冠。应是江山好处，犹待推排老眼，天未许体官。莫忆故园竹，日日报平安。

又 庚戌寿静斋叔

乔木老盘谷，仙李盛峨岷。参横井转，月边犹赖有长庚。传得丹溪正派，更是平庵宅相，夷路早蜚英。十载星沙幕，一片玉壶冰。

题舆了，千万里，尽云津。渚宫小驻，不妨谈笑对秋城。西去凭熊驾驷，东下握兰持橐，袞袞看峥嵘。愿借鹖峰桂，岁以寿金觥。

又 辛亥中秋和陈次贾，用坡仙韵

万里净无翳，一镜独当天。老蟾痴兔顽甚，阅世几何年。任尔炎凉千变，不改山河一色，爽气逼人寒。何必乘槎去，直到斗牛间。

叹常娥，元不嫁，只孤眠。古今遗恨，不能长似此宵圆。我有竹溪茅舍，办取金风玉露，一笑四并全。细和坡仙句，低唱教婵娟。

满江红 丁丑登均州武当山

镇日山行，人倦也、马还无力。游历处，总堪图画，足供吟笔。涧水绿中声漱玉，岭云白外光浮碧。信野花、啼鸟一般春，今方识。

真可羨，林泉客。真可叹，尘埃役。想希夷冷笑，我曹踪迹。七十二峰神物境，几千万壑仙人室。待身名、办了却归来，相寻觅。

又 甲申春侍亲来利州道间

袞袞青春，都只恁、堂堂过了。才解得，一分春思，一分春恼。儿态尚眠庭院柳，梦魂已入池塘草。问不知、春意到花梢，深多少。

花正似，人人小。人应似，年年好。奈吴帆望断，秦关声杳。不恨碧云遮雁绝，只愁红雨催莺老。最苦是、茅店月明时，鸡声晓。

又 甲申寿蜀阍

天顾坤维，烦紫气、来从南斗。鞭才定，匆匆塞上，咏薇吟柳。少借日边霖雨望，教知天下风云手。听吾民、争说近年无，前朝有。

平安夜，舒长昼。笳鼓静，笙歌奏。记西湖五月，藕花时候。待把雁门冠带了，归来麟阁丹青旧。放蜀山、万点入樽罍，为君寿。

又 甲午宜兴赋僧舍墨梅

姑射山人，仙去后、唯存标格。犹赖有、墨池老手，草玄能白。留得岁寒风骨在，岂烦造化栽培力。有世间、肉眼莫教看，非渠识。

元不夜，枝何月。元未腊，花何雪。最孤高不受，多情轻折。只有暗香天靳予，黄金作指难为术。更若将、解语付真真，空成色。

又 丁未初度自赋

老去生涯，都付与、一丘一壑。功名事，
惭非好手，几逢危著。走马斗鸡年少趣，椎
牛酹酒军中乐。到而今、浑似梦中看，休休
莫。

江湖路，西风恶。霄汉志，秋云薄。更
那堪州铁，铸成重错。当贵买臣毋足羨，知
非伯玉真能觉。问心期、应有海翁鸥，山人
鹤。

又 八窗叔和，再用韵

竹马同游，平生志、相期霄壑。今老矣，
儒冠宁误，戎装徒著。卷起鲸鲵江海事，放
教禽鸟山林乐。问尚堪、舞剑渡河无，公应
莫。

粟可饭，衣从恶。秫可酒，茶胜薄。但
此身长健，老天不错。竹院昼闲参内景，蒲
团夜坐披圆觉。愿此生、无愧北山猿，西湖
鹤。

又 再和

小小池亭，仿佛似、洛川岩壑。天付与、
老身游戏，余生吃著。剩喜酒能消世虑，翻
疑书解妨人乐。听两翁、白雪寄新词，愁言
莫。

毋自叹，蒿莱恶。甘自味，薺盐薄。对
乱花丛竹，翠红交错。元亮悦闻亲友话，羲
之常恐儿曹觉。望碧云、休忆女乘鸾，人骑
鹤。

又 再和

既作闲人，便应付、此身沟壑。不应更，将愁半点，寸心中著。责子渊明徒自苦，忧君范老何时乐。纵一嘲、一咏欲奚为，何如莫。

不自鄙，葵蔬恶。还肯荐，茅柴薄。任侯门海陆，杂陈珍错。有暇盍联车骑过，相忘勿遣诗情觉。怕家僮、无处买莼鲈，烹琴鹤。

贺新郎 甲申代亲庭送崔菊坡出蜀

万里归朝去。倚江亭、绿波碧色，一川晴絮。赢得威名留草木，玉垒雪山高处。未应减、平淮裴度。见说金瓯书字久，待公来、便作商岩雨。休忘却，蜀都赋。

旌旗回首春城暮。听樯头、飞燕似把，人情低诉。两两三三鸥鹭里，拍拍船儿一羽。算惟有、清芬载取。百万人家儿样恋，恨柳风、不为留连住。离梦绕，沙堤路。

又 己丑为亲庭寿

满酌荆州酒。望莱庭、斑衣拜祝，俾吾亲寿。玉水雪楼游宦地，近访甘棠依旧。逢父老、颂声盈口。争道蜀边劳数载，也真宜、略伴云横岫。小儿辈，任成否。

东皋十月梅开后。想亲朋、团栾一笑，从容觞豆。塞上弓刀成底事，不过腰金如斗。算不直、渊明株柳。只恐鲸鲵无计取，更须烦、绿野持竿手。看勋业，国长久。

又 庚戌和薛制参赋雪韵

将谓霏微雨。恍朝来、虚檐生白，寒侵冒絮。拟和盐花凌谢韞，巧思翻成金注。谁寄我、雪车冰柱。酿熟羊羔炉拥兽，羨画楼、金帐调宫羽。人应共，回风舞。

围场校猎淮云暮。记当时、银杯缟带，网禽置兔。老去不禁鞍马力，独对愁吟似甫。问一棹、剡溪何处。愿与铁衣春解戍，把梁园、旧话供儿语。孤梅外，梦魂度。

又 再和

才过黄花雨。问长堤、依依万柳，未春何絮。一目河山银幻出，惊诧夜光流注。巍观矗、玉为云柱。风卷寒芦迷过雁，渺沧波、莫认沙鸥羽。千万蝶，空中舞。

霸桥寂寞前溪暮。耸诗肩、霜裘拥貉，月毫挥兔。记得梅奴曾索笑，解佩如逢交甫。今孤垒、寒烟深处。休说鹅池平蔡事，庆新年、一稔欢相语。持大白，勿虚度。

又 辛亥初度自赋

幸得闲中趣。问何为、倏逾桂岭，重来荆渚。唤醒门前弧矢梦，钩月相辉初度。谩羞听、军中鼙鼓。马上弓刀成底事，仅平明、旆入襄州去。能不愧，古羊杜。

此生何以酬明主。怅新来、鬓毛添白，衰容如许。三万貔貅齐贾勇，好为一清狐兔。看柳色、大堤如故。世事付之杯酒外，那棋边、得失都休语。来共看，雁儿舞。

念奴娇 壬午徽州道间

黄梅过雨，望隔林、一缕长烟浮碧。亟拥征鞍寻午梦，卧看青山排闥、扫户风清，拂檐云淡，爽气生萧发。黄梁惊觉，子规枝上啼彻。

堪羨麦熟蚕成，酒香鸡嫩，风味农家别。幸有住山供活计，何苦江湖南北。菊老陶园，瓜荒邵圃，空负于时策。洛阳三顷，胜如金印六国。

又 见郑文昌于上柏

平生宦海，是几番风雨，几番霜雪。绿野来归身强健，镜里微添华发。剑束床头，书寻架上，富贵轻于叶。南坡石竹，年来尤更清绝。

好是梅坞松关，对湘溪一曲，翠屏千叠。柱杖篮舆诗卷里，尚小东山勋业。只恐鸥盟，难忘鹤怨，未是闲时节。片云收却，照人依旧明月。

又 丙午和朱希真老来可喜韵

云胡不喜。得抽脚篮中，安身局外。世路风涛都历遍，几度眉攒心碎。八尺藤床，二升粟饭，方寸恢余地。翻云覆雨，从伊造物儿戏。

不见刻木牵丝，鸡皮鹤发，弄罢寂无事。随分风光堪领略，聊放疏狂些子。刘项雌雄，跼颜修短，无彼亦无此。茅檐高卧，不知春到花底。

又 己酉振鹭驿和黄茶坡韵

浮生如寄，叹征尘驱我，担簦西去。烟嶂云屏相迎送，几幅鹅溪缣素。挥汗流金，饮冰漱玉，桃叶呼前渡。若将有意，道傍一鹭延伫。

细读壁上龙蛇，太丘笔在，更著茶坡句。樽酒十年今白发，不改江流东注。胜概难逢，旅怀易动，信美非吾土。恨无六翮，长风万里高举。

满庭芳 丙午登多景楼和王总侍韵

浪拍金鳌，春浮铁瓮，气清天朗如秋。江皋无事，飞盖强追游。万顷蒲萄光里，风樯共、塔影悠悠。人间事，年华似掷，一水与俱流。

绸缪。千古恨，纷纷离合，晋宋曹刘。望长安何处，落照西头。往事苍苔陈迹，夷吾在、吾属何愁。清樽畔，谁能为我，一曲舞梁州。

又 丙午宜兴山间

山接平芜，烟横远墅，修眉淡抹晴妆。菊梅交际，天未十分霜。几许无穷秋思，空凝伫、衰柳斜阳。溪头路，黄芦一片，凫雁两三行。

平章。风景似，画图一幅，著我徜徉。山中无事，聊尔适吾狂。不用登临感慨，青帘外、新酒堪尝。何为者，东家宋玉，千古叹凄凉。

瑞鹤仙 戊申初度自韵

百年过半也。怅壮心零落，鬓星星也。风儿渐凉也。近中秋月儿，又初生也。田园暇也。矍铄哉、是翁也。记当时，弧矢垂门，孤负四方志也。

休也。牙签插架，玉帐持麾，总成非也。浮生梦也。皇皇欲、奚为也。趁身闲、随分粗衣淡饭，一笑又何妨也。问神仙，底处蓬莱，醉乡是也。

喜迁莺 乙未中秋同诸北客玩月于颍州之南楼

轻云暮卷，望澄空如水，千里一碧。菱镜冰悬，桂轮玉碾，喜见中原秋色。老蟾炯炯无翳，阅尽尘寰今昔。堪恨处，度霓裳曾到，长生宫阙。

坐客。休叹息。看此清光，天岂限南北。便好乘风，为持玉斧，修取山河如一。西湖旧时花草，会遣孀娥重识。从今去，举太平玩事，长如今夕。

声声慢 赋红梅

红绡剪就，绛蜡熔成，天然一种仙姿。竹外家风，凄凉俭薄为宜。东君苦怜消瘦，强教伊、傅粉匀脂。较量尽，胜夭桃轻俗，繁杏粗肥。

好是新妆雅态，对疏蟾淡淡，薄雾霏霏。
迥出红尘，轻盈玉骨冰肌。犹嫌污人颜色，
谁云似、虢国娥眉。香韵别，怕满园、蜂蝶
未知。

又 和韵赋江梅

修洁孤高，凌霜傲雪，潇然尘外丰姿。
一白无瑕，玉堂茅舍俱宜。飘飘羽衣缟袂，
都不染、富贵膏脂。调羹事，看水边清瘦，
雨后红肥。

偏爱春工尚浅，向南枝信透，东阁香霏。
翠袖犹寒，不禁弱质柔肌。浑如故人邂逅，
聊相与、一笑开眉。归去晚，任帘栊、深闭
未知。

青玉案 癸未道间

栖鸦啼破烟林暝。把旅梦、俄惊醒。猛
拍征鞍登小岭。峰回路转，月明人静，幻出
清凉境。

马蹄踏碎琼瑶影。任露压巾纱未忺整。
贪看前山云隐隐。翠微深处，有人家否，试
击柴扃问。

又 丁未寿八窗叔

去年曾借梅为寿。转眼垂弧小春又。一
笑巡檐清影瘦。雪边聊且，收香藏白，少俟
融和透。

新来东阁高吟就。金鼎家声自依旧。唤
取玉妃重举酒。百花头上，一枝芳信，终属
东君手。

好事近 甲申春益昌作

春在粉墙西，墙里不知春色。惟有桃花一树，似故园曾识。

晚来携客上南楼，山外又山隔。准拟清明何处，问东风知得。

柳梢青 丙戌送陈仁父赴班

万里青天，西来后我，先我东归。夜月鞭筹，春风幕府，鹗荐争推。

杯行到手休辞。道秋菊、春兰有时。若到松江，莫惊鸥鹭，记取坡词。

虞美人 己亥春

韶华只隔窗儿外。病起昏于醉。花开花落总相忘。惟有梦随胡蝶、趁春忙。

故园芳草应如旧。只恨人消瘦。拟凭飞燕语归期。拼却牡丹开了、有酴醾。

减字木兰花 丙午和朱希真韵

无可不可。还你天公还我我。味触声香。尽付庄周蝶满床。

谩天不过。留取心机休用破。净几明窗。乐取闲中日月长。

又 再和

如何则可。我亦不知其谓我。隐几焚香。
对酒一壶书一床。

知仁观过。浑沌翻怜谁凿破。寄傲南窗。
堪羨渊明滋味长。

西江月 宜兴山间即事

不暖不寒天气，无思无虑山人。竹窗时
听野禽鸣。更有松风成韵。

竟日蒲团打坐，有时藜杖闲行。呼童开
酒荐杯羹。欲睡携书就枕。

又 再和

排遣新寒有酒，追寻旧隐无人。四山朔
吹又冬鸣。吹送午钟余韵。

过眼霜高木落，寄心月驶云行。归欤闭
户饱藜羹。世事华胥一枕。

糖多令 庚戌六月赴荆阩，宿江亭

枫荻响飕飕。长江六月秋。二十年、重
到沙头。城郭人民那似旧，曾识面、两三鸥。

落日且登楼。英雄休涕流。望黄旗、王
气东浮。借问烟芜苍莽处，还莫是、古襄州。

点绛唇 辛亥钱陈次贾归

懒上巍楼，楚江一望天无际。漫游萍寄。

莫挽东流水。

一片秋光，直到山阴里。人还记。戍边归未。更忆鲈鱼美。

摸鱼儿 送竇制干赴漕趁班

趁西风、且登黄鹤，挥毫先奏秋赋。燕山桂种清芬在，人物翩翩如许。堪羨处。长安近、蟾宫相继金闺步。佳哉盛举。看精淬龙泉，厚培鹏背，自此要津去。

荆州事，多幸乡情相予。几番灯柝棋墅。转头江阔轻帆速，梦入吴松鸥鹭。君记取。旧王粲、曾言信美非吾土。故人相语。为细数艰难，满头雪白，无奈戍边苦。

又 壬子初度

对垂弧、引觞一笑，凄凉薄分天赋。丁年驰骛弓刀后，报国孤忠自许。堪叹处。今老矣，强颜犹踵邯郸步。安能远举。谩目送征鸿，梦劳胡蝶，无计便归去。

清闲禄，旧说天公靳予。何时松菊村墅。生非燕颔鸢肩相，岂是觚棱鹳鹭。收拾取。休直似、文渊定远空怀土。阿戎可语。待乞得身还，屏伊世累，甘受作诗苦。

朝中措 送管顺甫赴漕

少年随分赋鹦洲。得意桂花秋。今日送君行色，梦和月到南楼。

材名仲父，辞华季子，香满南州。勉力

中流击楫，直须连钓鳌头。

齐天乐 壬子和陈次贾为寿韵

少年塞上秋来早，昴街尚余芒曜。举目关河，惊心弧矢，顾我岂堪戎纛。几番凤诰。愧保障何功，恩隆旒藻。笑指呼鹰，露花烟草忆刘表。

头颅如许相与，岁寒犹赖有，白发公道。对月怀人，临风访古，往事凄凉难考。何时是了。莫驰志伊吾，贪名清庙。松菊归来，稽山招此老。

八声甘州 壬子钱帅机沈好问

正莼鲈佳梦绕吴乡，牙樯忍轻离。向仲宣楼上，凭高举酒，几共灯棋。曾记少陵留咏，出幕合持麾。飞盖长安去，华贯平跻。

好是倚门迎笑，恰野堂云壑，菊后梅时。庆凤雏新长，携手奉莱衣。抚孤松、绝胜细柳，念征人、徒老玉关西。归来也，幅巾藜杖，办取追随。

又 壬子九日约诸幕客游龙山

领青油车骑出郊垆，来游晋龙山。喜水天澄霁，稻畦镰净，榆塞戈闲。登高谩酬佳节，一笑破苍颜。剩泛茱萸菊，杯莫留残。

休说参军往事，意当时凝眺，不到长安。赖座间小异，豪气眇尘寰。到如今、只成佳话，记封姨、曾荐众宾欢。吾曹事，有如此

酒，要共弹冠。

又 自和

帐浮生、俯仰迹成空，依然此江山。对秋容如画，天长雁度，水阔鸥闲。追游未甘老态，凭酒借红颜。归骑斜阳外，柳老荷残。

幸对黄花时节，喜宾朋晤语，烽火平安。仅风巾一笑，名尚满人寰。要流芳、相期千载，肯区区、徒恋片时欢。姑聊尔，招呼楚调，慰藉南冠。

满庭芳 壬子谢吕马帅送蟹

八足横戈，一身衷甲，将军致尔来前。呼僮解缚，亟荐泽虞鲜。族类横行草地，今骈首、鼎镬连连。荆江上，不图霜后，风味似吴天。

晴川。千里外，分甘遗远，多谢勤拳。对香枨新酒，一洗腥膻。慰我吟情归思，都忘却、张孟鲈鳊。持螯了，老饕作赋，佳话楚乡传。

哨遍 和陈次贾为寿韵

大块赋形，皇览揆予，俾尔昌而寿。嗟壮游。岁月老征裘。向秋来、顿如蒲柳。桂开又。鲈莼蟹橙正美，故人应忆传杯手。想薜荔岩峦，梧桐庭院，当时风景依旧。对斜阳、极目倚危楼。问一舸、何时过吴头。乘下泽车，戴华阳巾，锦衣游昼。

犹。客有名流。交情金石襟期厚。双湖烟艇里，剑锋紫气冲斗。剩妙墨淋漓，清歌发越，未应独步诗千首。待挂了衣冠，来寻杖履，陪君此乐须有。到如今、不愿酒泉侯。愿生入、玉门早归休。任远人、从问安否。梁园宾客虽富。谁出相如右。相逢身健，时平无事，是处溪山明秀。与君举斝若为酬。有年年、人月长久。

水龙吟 癸丑二月襄阳得捷，和刘制参韵

黄旗吉语飞来，胡儿已落将军手。吾皇神武，一新城郭，断谟天授。铁骑才临，雕戈竞逐，击蛇先首。快风驱雨洗，江空谷静，淮淝上、似之否。

此事老臣何有。想捷传、延英方昼。玉颜应笑，金瓯堪保，贺声交口。吾责免夫，吾归可矣，萧然一叟。把功名，分付诸公，聊自赏酒盈斗。

又 和韵

荆州咫尺神州，几番得失孙刘手。山河天险，东南牖户，钺何轻授。泪落碑存，鹤归城是，不堪回首。喜大堤草色，镇长春在，羊与陆、孰能否。

风景依然吾有。柳营深、铁衣闲昼。摩云胜气，追戎马足，走蜚狐口。往事纷纷，付之蛮触，相忘庄叟。有人焉，中夜闻鸡，剑光正烛牛斗。

又 和幕府贺策应

吾皇神武中兴，直须整顿舆图旧。岂惟天顾，岷峨一角，但西其首。遮护咽喉，扶持气脉，宁无医手。有庙谟先定，傍观何待，留侯蹠、魏侯肘。

天眷我家仁厚。盛英才、载量车斗。中流孤艇，千钧一发，老夫何有。休对秋风，移宫换羽，吟无绝口。看福星，太乙临梁，此虏自不能久。

又 送馆人管顺甫父子赴省

梅边连辔偕来，柳边先我观光去。一门椿桂，尊君孙盛，小儿文举。黄鹤联登，横翔雕鹗，健凌鹦鹉。趁霜晴春小，南宫问讯，又同奏、明光赋。

从此青云阔步。看龙门、锦标双取。荆州时事，不妨大对，细陈当宁。久要论交，中年语别，不堪离绪。约杏园，得意归时，吾已在浙江浒。

满江红 得襄阳捷

千古襄阳，天岂肯、付之荆棘。宸算定、图回三载，一新坚壁。狼吻不甘春哨衄，马蹄又踏寒滩入。向下洲、一鼓扫群胡，三军力。

连帅是，并州绩。宾佐有，雍丘逖。赖因人成事，同心却敌。见说陈尸三十里，投鞍委甲如山积。待老臣、为作岷樊铭，劓诸石。

又 和刘仓咏雪

推枕闻鸡，正怪得、乾坤都白。元是有、福星临照，至和薰出。缘饰夜城疑不夜，弥漫色界成无色。更摘词、巧欲夺天葩，尤殊特。

貂帽拥，寒何力。羔酿举，情何极。欠开樽细挹，梅花标格。十万铁衣冰到骨，祈天只愿王师息。想家童、日办剡中舟，溪头立。

又 用前韵送刘仓

荡节将行，原隰尽、花毡铺白。人羨道、青丝辔整，红蕖幕出。宇宙中间无点翳，水天上下俱同包。向个中、著此玉为人，真英特。

元自得，融和力。浑不管，凝寒极。看福星临照，政敷民格。且访桃源仙世界，伫传梅驿春消息。定明年、拜表贺端闱，螭坳立。

八声甘州 送□制参分司□□，兼摄守漕

自当年、种柳向西门，古今号名州。对风声策策，浪涛袞袞，又是新秋。暂为江山弹压，谁得似贤侯。夜观灯〔棋〕〔祺〕里，几共边筹。

休效季鹰高兴，为莼羹鲈脍，遽念吴头。且安排维楫，相与济中流。看邦人、尽歌襦袴，愿紫皇、乞与福星留。令人忆，数行过雁，月在南楼。

又 用前韵答和史制参

续仲宣、一赋小呼鹰，声名满荆州。向
宾筵游戏，毫端月露，皮里阳秋。遍历文书
刁斗，何患不封侯。横槊风烟表，独占诗筹。

见说眉攒心事，在岷峨乡国，落日西头。
怅英豪遗恨，都付大江流。伟平生、经纶雅
志，把重弓、聊为汉关留。中秋近，何加载
酒，一笑登楼。

又 和刘仓贺蜀捷

自六朝、用武诧荆州，襟喉重疆陲。更
西风似箭，峡江如线，事势夔夔。须仗中流
砥柱，天付治平谁。甚矣吾衰矣，将老东篱。

休说纷纷往梦，任阴平邓艾，骆谷姜维。
向棋边聊且，官事了痴儿。雨未阴，毋忘户
牖，挂长绳、系不住铜仪。空遐想，桃源春
媚，安得追随。

又 癸丑生朝

对西风、先自念莼鲈，又还月生西。叹
平生霜露，而今都在，两鬓丝丝。当年门垂
蓬矢，壮岁竟奚为。磊落中心事，只有天知。

多谢君恩深厚，费丁宁温诏，犹置驱驰。
看弓刀何事，终是愧毛锥。愿今年、四郊无
警，向酒边、多作数篇诗。山林下，相将见
一，舍我其谁。

又 和韵

问秋光、乞得一宵闲，满引玉东西。喜
亲朋咸集，宴酣真乐，非竹非丝。坎止流行
付分，岂尽是人为。试向君平卜，还可前知。

自笑头颅如此，奈乌轮难系，驹隙如驰。
慨壮图已矣，指地不须锥。任从渠、翻云覆
雨，愿老于耕钓乐于诗。三军事，天家自有，
大将为谁。

又 借八窗叔韵寿之

仿离骚、览揆度新讴，空云霭乌丝。把
长庚才调，小施筹笔，犹处囊锥。鸾枳鹓滩
发轫，指日问朝衣。雪片梅花外，已露南枝。

休羨汉疏晋阮，记当年楚产，同是家儿。
怅岁华如许，同官复同时。引宫商、细赓郢
唱，向樽前、谁为一歌之。蓬壶侣，长春不
老，有美人兮。

又 寿刘舍人

记当年、虏压顺昌城，直欲付靴尖。赖
君家乃祖，笑麾白羽，净洗腥膻。荆州甘棠
蔼蔼，浓墨字犹鲜。少出拿云手，整顿青毡。

好个嫩凉天气，想闻鸡听雁，意气犹忺。
看相将喜事，眉色已黄占。祝君龄、有如此
酒，举金罍、须放十分添。还知否，封侯事
业，正在华颠。

又 中秋小集无月

问嫦娥、倬傺厌看人，唯复厌人看。正
凉宵准拟，招延素魄，慰藉苍颜。廉纤梧桐
细雨，吹彻玉箫寒。仿佛山河影，只在云端。

又似去年今夕，枉教人惆怅，立尽阑干。
想菱花尘匣，憔悴女乘鸾。恨无从、一登天
柱，约宾朋、随分荐清欢。持杯祝，老蟾无
恙，留待明年。

朝中措 用八窗叔韵送教忠制机省亲之行

灯棋三载客边头。江汉等萍浮。一片白云关念，对床夜雨难留。

堂堂事会，相期烝楫，共济泾舟。今岁雁来应早，着鞭莫待深秋。

又 就酌菖酒饯教忠，再用韵

南风吹棹过吴头。聚散付云浮。且共一杯怀楚，须期万户封留。

藕花时候，五湖烟雨，西子扁舟。转首梦回残角，征人塞上新秋。

又 癸丑寿安观使

夜来南极十分明。申月应生申。小范龙图老子，大苏玉局仙人。

擎天健手，家传方略，功在峨岷。看取芝封夜下，归来尽展经纶。

贺新凉 巧夕雨，不饮，啜茶而散

可恨经年别。正安排、剖瓜植竹，拟酬佳节。应为犁锄机杼懒，天遣阿香磨折。翻一饷、廉纤凄切。寂寞金针红线女，枉玉箫、吹断秦楼月。清漏静，楚天阔。

东皋且愿三农悦。任从渠、鹊桥蛛网，一番虚设。挽取天河聊为我，尽洗西风残热。休懊恼、云生巫峡。底用乞灵求太巧，看世人、弄巧多成拙。姑止酒，命茶啜。

又 甲寅春闻襄寇退

晓听平安报。信荆州、古今形胜，金汤天造。落日岷山陈迹在，依旧大堤芳草。叹紫塞、黄尘未扫。水合水生来又去，赖胡雏、犹畏熊当道。薇柳戍，甚时了。

乞身屡上笏天表。感恩深、丁宁帝语，许同方召。自愧黔驴无伎俩，桑土绸缪盍早。空手袖、剑锋懊恼。要鲙鲸鲵封京观，愿汉廷用壮臣年老。毋更取，仲华笑。

又 自和酬书院诸丈

梦觉闻鸡报。问岷边、晋家城郭，旧邦新造。谁遣平明旌旆入，人说当年草草。犹幸把、腥埃俱扫。对越老苍方寸在，任酋渠、远度龙堆道。还又过，一春了。

少年意气轻三表。到如今、名惭小范，功卑前召。赖有把茅归去是，乘此抽身须早。何苦受、天来烦恼。报国丹忠虽未泯，奈长卿已病文渊老。聊把酒，仰天笑。

醉蓬莱 癸丑寿吕马帅

问金城方略，数十年来，谁堪称许。万福威名，草木识淮浦。西顾天长，中流地重，著此巨鳌柱。见说棋边，风声鹤唳，胆落胡虏。

老子家声，六韬亲授，渭水归来，非熊非虎。江汉滔滔，建大将旗鼓。弧矢开祥，节旄迎渥，勋业纪盟府。好对芳天，莺花未老，金樽频举。

又 书院延桂有集，不及与

白鹭峰曾见，金粟如来，犹有英烈。碧玉琅玕，点缀碎琼屑。不御纷华，独餐沆漑，比众芳殊别。好向凉宵，无风无雨，宜露宜月。

身在山中，名香天下，全似幽人，一种修洁。解使多愁，对此亦纾悦。绿绮窗前，乌云鬓侧，休为玉人折。剩赋新词，满倾佳醕，为成三绝。

又 灯前想像胜集，和韵

问前身应在，香醉山中，今存风烈。佳夕招延，清论度飞屑。玉笋盈盈，金英点点，标格侬家别。好个凉天，更无滴雨，只欠些月。

菊客兰兄，纷纷侪辈，纵尔芬芳，输我高洁。鼻观先知，羞取俗颜悦。解后成欢，从容挹爽，何羨广寒折。我有高吟，为君纪此，一段奇绝。

又 和韵

大不逾粟许，飘散人间，直恁清烈。管领芳樽，底事不渠屑。中夜庭前，小山丛畔，韵度从来别。那更今年，留连秋色，将傍菊月。

堪羨纱窗，胆瓶斜浸，浅酌低讴，人花双洁。恼杀多情，一见一回悦。生怕朝来，梧桐过雨，把花神摧折。倩取骚人，黄香作传，笔未宜绝。

又 寿八窗叔

指梅花雪片，问讯八窗，南枝开未。一点春风，消息岭头寄。太白精神，广平韵度，是岂众芳拟。东阁吟边，水清月淡，不妨游戏。

犹记双湖，几番初度，持酒相期，以花为比。鼎味家传，须向玉堂里。吏隐南昌，未应高兴，香在岁寒际。倩取瑶姬，花前一唱，寿吾仙李。

沁园春 饯余蜀帅

天顾坤维，持橐秉旄，屈公此行。正地雷观象，一阳将复，天星验数，五福初临。汉指才宣，蜀民相贺，百万耄倪犹更生。先声布，便胆寒西贼，关塞无尘。

休嗟往事营营。要清猷、乖崖相拟伦。看作新精采，叶符气运，转旋机括，元在人心。奖率三军，扫清万里，从此西南开太平。功成后，却归来廊庙，细展经纶。

又 和邓季谦通判为寿韵

老子家山，近古苏州，有监本呆。叹长途荷担，斯宜已矣，急湍鼓枻，岂不危哉。我爱陶潜，休官彭泽，为三径荒芜归去来。君恩重，奈边戈未偃，阃轂犹推。

东南休运将回。幸天日清明公道开。把孤忠自许，我心匪石，一真难灭，人口如碑。青眼旧交，黑头新贵。快九万里风鹏背培。诗筒寄，正多情未已，聊解君颐。

又 赋静斋叔溪堂

我爱临川，簪绂丛林，有宅一区。记谢墩名字，百年犹在，平泉孙子，三世重居。皂盖新营，青毡旧识，此复古春秋宜大书。奇哉事，信当时种子，下到工夫。

笑渠。驷马门闾。是几往过之凡几墟。喜尚存遗爱，甘棠在在，无穷生意，茂草如如。载酒寻盟，论诗结社，想田可秫兮园可蔬。应须念，古邨亭乔木，无恙还无。

兰陵王

甚天色。苦问桃红李白。伊祈氏，沙际才归，依约春回晓烟湿。老寒犹煞忒。景物。中年惯识。天应遣，雨洗风梳，柳睡花眠尚无力。

名园谩他适。任黄四栽培，殷七奇特。一年好处须寒食。待花畔携酒，酒边索句，春余太半未须急。记旧隐幽寂。

我亦。几时得。归检点苔封，评品梅格。教看林下休官一。与莺花分界，渔樵争席。抚松长啸，芳菲事，尽渠惜。

江神子

白妃卷絮逐风颠。透朱帘。向空漫。剪出冰花，偏爱腊前看。能费化工多少力，千万里，尽同天。

歌楼清赏记当年。玉人占。绣衾寒。老

去孤高，世虑肯咨煎。争似小窗梅影下，聊一笑，付无言。

浪淘沙

昨夜雨兼风。断送残红。老寒犹自著帘栊。为问香篝人语道，翠被还重。
何处有疏钟。惊起匆匆。惜春休放酒杯空。芳草天涯寒食又，归兴尤浓。

哨遍

天限长江，云扰中原，一局持棋势。汉将谁。盍为扫清之。彼伎犹、黔驴而止。客亦知。何材不生斯世。丁宁屡费君王旨。向马首论诗，灯前观剑，岂无差强人意。幸崆峒麦熟且休师。又焉用陈琳檄书飞。一笛楼头，万柳营间，从容麾帜。

噫。代有戎夷。时贤患乏经纶志。紫岩公一出，敌当惊见花字。谩被发忧邻，汗颜笑斫，客邪终岂婴元气。待拜表笺天，移文问隐，老夫行且归矣。怕胡雏穴隙尚相窥。有淝水儿曹举兵麾。看中兴、隼烈堪继。随世样多能底。卿自为卿计。不妨老子，婆娑矍铄，从渠履盈户外。何须岷万勒丰碑。有天知、方寸余地。

兰陵王 甲寅初度和次贾韵

问梁益。天设金城铁壁。西风外，依约

雁来，还报关山旧秋色。三秦听汉檄。远恨绵绵脉脉。频年事，虚掷桑阴，祗允诸人竟何策。

彤弓误殊锡。怅活国难医，救世须佛。平生本藉毛锥力。对弧矢初度，满头白发，何堪兵卫叠画戟。咄青史陈迹。

酒石。羨王绩。任击缶呼天，此乐何极。奚须太息惊前席。望天阍休待，梦如陶翼。柳边春后，放定远，出西域。

八声甘州 送吴峡州

问西陵、治比汉河南，若为遽东归。正峡江衮衮，中流我共，一楫杭之。倏听攀辕告语，公去綉襦谁。赖有甘棠在，人口如碑。

百尺楼头徙倚，记绸缪桑土，几对灯棋。指鹭洲何处，心事想鸥知。向江湖、毋忘魏阙，正吾皇、当馈急贤时。经纶事，更须玩易，勿但言诗。

水调歌头 甲寅寿刘舍人

序正象占琥，吉叶梦维熊。身随金粟出世，香满小山丛。铁券丹书家世，朱阁青毡步武，名字在尧聪。雕鹗健云翮，聊尔待西风。

功名事，书剑里，笑谈中。江涛衮衮如此，天岂老英雄。先我甲庚三日，伴子春秋千岁，何幸举樽同。歌以寿南涧，愿学稼轩翁。

临江仙 甲寅中秋和刘舍人赏月

同此三秋端正月，地高先得光辉。分明身世玉琉璃。不妨人未老，长与月相期。

我有芳尊供玩事，从渠魏鹊无枝。直须饮到五更时。大家眠玉界，莫羨宴瑶池。

水龙吟 甲寅中秋

楚乡三载中秋，倚楼辄值萧萧雨。澄空向午，廉纤数点，又疑虚度。卷起云鬟，掣开妆鉴，喜瞻眉宇。问嫦娥丰貌，间何阔矣，元不老、只如故。

见了悄然无语。但令人、不堪怀古。老蟾应记，旧时人物，孙刘陶庾。俯仰皆空，阴晴何恨，芳樽频举。问他年，忆取今宵，人如许、月如许。

水调歌头 再赋

可爱十分月，都无一点云。清光是处皆有，浑不许人分。独是大江深处，一片水晶世界，仿佛有微痕。坐到夜深际，万籁寂无闻。

与诸君，同一笑，举芳樽。素娥自有佳约，何必命红裙。顷刻参横斗转，归去华胥一觉，玩事任纷纷。我袖有玉斧，当为整乾坤。

眼儿媚 和八窗叔韵送之

公归东里我西州。枫荻楚天秋。乌樯转首，暮云江树，落日沙头。

瞿唐此去风涛恶，宁愿贾胡留。明年春晚，松江笠泽，归约追游。

大酺 和陈次贾赠行韵

对剑花凝，笳叶卷，天宇尘清声肃。楼船催解处，正日戈夕照，风旗西矗。虎战龙争，人非地是，形势昔雄三国。景升今何在，怅婆娑老子，奚堪荆牧。岂自古常言，力宁斗智，智宁如福。

西征非太速。奈臣职、难负君王嘱。嗟往事、祁山抗表，剑阁刊铭，只成堕甑并空轴。喜听平安信，岂止为、区区一竹。蚊蚊类、笑谈逐。玉关归老，不愿封侯食肉。愿还太平旧蜀。

浪淘沙 舟泊李家步

斜日挂汀洲。帆影悠悠。碧云合处是吴头。几片寒芦三两雁，人立清秋。

柳外莫停舟。休问闲愁。人生江海一萍浮。世路相期如此水，万里安流。

八声甘州 登经济楼

上巍楼、指顾剑东西，依然旧江山。怅谁为荆棘，委渠天险，薄我风寒。金瓯经营几载，鸿雁尚漂残。一片迷棋局，著手良难。

犹幸红旗破贼，有竹边新报，喜听平安。问纷纷遗事，一笑付凭栏。愿天驱、五丁壮士，挽岷峨、生意与春还。斜阳外，梦回芳草，人老萧关。

满江红 乙卯咏海棠

才过新正，能几日、海棠开了。将谓是、睡犹未足，嫣然何笑。一片殷红新锦样，天机知费春多少。更芳期、不待燕黄昏，莺清晓。

花旧说，南昌好。花宜占，东风早。想香霏地近，融和偏巧。佳句流传千古在，石湖不见坡翁老。倩何人、寄驿报家山，教知道。

又 自和

自入春来，花信费、几番风了。先付与、红妆万点，苍颜一笑。旧说沈香亭北似，今虽濯锦江头少。最可人、枝上月笼春，烟含晓。

亭会称，花王好。嘉聘惜，梅兄早。对芳容细玩，天然新巧。羯鼓不须催太甚，霓裳易散梨园老。任杜鹃、犹自殿韶华，呼殷

道。

谒金门

风又雨。芳事匆匆如旅。借问甚时才百五。东君浑弗顾。

红紫园林几许。横笛数声何处。桃涨连天归未去。客和春且驻。

又

春且驻。休惜残红无主。柳色青青还未絮。牡丹犹待雨。

金鸭沈烟一缕。人在纱窗觅句。仿佛家山三月暮。隔帘闻燕语。

水调歌头 暑中得雨

今岁渝州热，过似岭南州。火流石铄如熬，尤更炽于秋。竟日襟常沾汗，中夕箠无停手，几至欲焦头。世岂乏凉境，老向此山囚。

赖苍灵，怜赤子，起龙湫。刹那顷耳，天瓢倾下足西畴。荡涤两间炎酷，苏醒一番枯槁，民瘼庶其瘳。清入诗脾里，一笑解吾忧。

又 蒲制帅以喜雨韵为寿，和以谢之

两岁是六帙，万里客他州。一眉新月西挂，又报桂花秋。想见吴中稚子，已办秣田数顷，更种橘千头。堪笑新亭酒，空效楚人

囚。

饭甘粗，衣任恶，屋从湫。世缘道眼看破，闻早问先畴。这服清凉散子，多在病坊弗悟，美疢甚时瘳。膏秣归盘去，无乐亦无忧。

沁园春 乙卯初度和程都大韵

雪山有缘，白首重来，信不偶然。怅怆凄未洗，平戎何策，英灵不绝，赖蜀多贤。耆旧二三，甲兵百万，力障狂澜回巨川。秋声静，共巍楼把酒，自足筹边。

何人为我笺天。焉用此客星留井躔。正柴桑栗里，稻肥蟹健，松江笠泽，莼美鲈鲜。百计求闲，一归未得，便得归闲能几年。持公赋，待后堂新唱，夸语彭宣。

一剪梅 乙卯中秋

人生能有几中秋。人自多愁。月又何愁。老娥今夜为谁羞。云意悠悠。雨意悠悠。

自怜踪迹等萍浮。去岁荆州。今岁渝州。可人谁与其斯楼。归去休休。睡去休休。

沁园春 乙卯咏桂

晚出千林，中立三秋，清哉此花。自鹫峰移下，碎成玉屑，蟾宫分到，缀作金葩。粟许来微，薰天声价，较楚蕙庾梅还韵些。

真奇处，但餐沆瀣，不染繁华。

酒边一笑婆娑。疑香醉山中尊者家。怅尘埃俗状，强颜羞对，风骚墨客，乐事堪夸。月照才清，露浓尤馥，饮待夜深应更佳。姑容我，胆瓶斜插，卧看窗纱。

又 自和

一种孤菱，四出清芬，半秋始花。只些儿肌骨，才逾一芥，许多韵度，迥压群葩。得雨相催，随风所到，较七里山樊尤远些。纷纷辈，笑渠侬桃李，徒竞春华。

试容老子婆娑。恍身在广寒仙子家。任殷勤唤酒，恁从君赏，徘徊待月，剩向人夸。我有家林，旧栽岩壑，得归去相延方是佳。姑先约，拚共横船玉，教堕巾纱。

水龙吟 送吴季申赴省

江头雨过黄花，片帆催向春闱去。两年共我，风舟问峡，霜砧闻楚。定远从军，慈恩策第，岂堪同语。谩咨嗟人事，分明天意，广寒阙、待平步。

健笔凌云如许。看新年、榜登龙虎。转头却笑，弓刀塞上，粗官何取。海阔鹏〔抟〕（搏），途穷马老，不胜离绪。过旧游、人问征夫，烦为说、戍边苦。

又 再和

天涯舍我先归，还知我以何时去。浮生萍梗，南辕北旆，之吴之楚。岂偶然哉，只堪一笑，无庸多语。向临歧赋别，丁宁祝望，

竿百尺、进一步。

其奈头颅如许。更藩篱、穴犹据虎。良机一失，付之谁手，探囊堪取。君对天庭，上咨西事，历陈条绪。问相如、汉指来宣，果何益、亦何苦。

沁园春 送乔宾王

二十年前，黄州竹楼，共酬好春。记淮堧江表，群贤华集，清明上巳，二美相并。一枕黄梁，满头白发，屈指旧游能几人。堪嗟处，怅光阴易老，犹困西尘。

今朝又值良辰。空想像、长安天气新。问兰亭癸丑，雪堂壬戌，倏成畴昔，将似来今。觞泛流泉，茗烹新火，领略韶华聊啸吟。鸚洲去，有故人相问，为语归音。

又 乔宾王有和，再用韵

咄咄衰翁，向羽书中，又过一春。正老怀梦想，扁舟访剡，壮图惭负，万里城并。溟翼上之，冀群空矣，自此阳关无故人。岷江路，忆一番风浪，三月烟尘。

美哉乐事良辰。正好趁东门官柳新。且舒晴慷慨，何须感旧，转头解后，未必犹今。问讯南楼，劳还西戍，君为楚歌侬越吟。眉黄近，怕洛涯催出，便有佳音。

又 丙辰归里和八窗叔韵

万里戍边，八载去家，始遂一归。怅中年早历，虎头兵幕，平生屡建，豹尾神旗。乞得闲身，毋庸多议，感荷九重渊听知。当

时事，似狂澜欲倒，孰障东之。

天教狂虏灰飞。更莫问儿郎存血衣。把雪裘霜帽，绝交楚徼，雨蓑风笠，投老吴矶。径与松荒，人同鹤在，交友晓天星样稀。从今去，共曲生相约，愿乐清时。

又 送章漕赴诏

极目江涛，不有人焉，其能国乎。伟故家风烈，激扬手段，平生践履，精密工夫。冰漕功成，月卿召入，小却犹当登从涂。斯行也，非纪纲省闕，定尹京都。

猗欤。愿疾其驱。弹指顷暑收秋又初。向玉阶方寸，亲承温问，金城十二，细述嘉谟。茗醪船边，藕花香里，念人在洞庭青草湖。它年事，约携东老酒，附洛英图。

又 送洪漕使宪闽

天目山房，洪崖老仙，亲授一灯。自檄草参筹，宾筵领袖，鼎梅助味，省闕权衡。华国文章，立朝风力，犹有老成人典刑。如公样，盍夜趋宣室，昼对延英。

乘轺惠我湘民。作翼轸中间一福星。正千艘漕玉，张颐西峽，单车把绣，将指南闽。过阙留中，历阶而上，方值汉朝更化新。南中事，若君王问及，老弗能胜。

满江红 丙辰生初自赋

明日生初，还知否、明年六十。嗟老矣、满头都缟，寸心犹赤。三十载间尘土债，几千里外风涛役。赖君天、许放故山归，恩无

极。

出而作，入而息。美可茹，鲜可食。任浩书空咄，禹笑人寂。断国谋王非我事，抱孙弄子聊吾适。且从今、时复一中之，杯中物。

又 赋腊前三白

今岁潇湘，真个见、嘉平三白。阆阆里、无非和气，不知寒色。宇宙幻成清净境，了无一点红尘入。问太空、此瑞自何来，君王德。

歌笑是，兔园客。辛苦是，鹅池役。任谢家儿女，赋嘲纷出。洗尽腥膻空万里，屏除螟螣深千尺。向此时、何以对梅花，呼欢伯。

又 洪云岩、刘朔斋用韵

蝶梦惊残，仿佛似、东方才白。人报道、城疑不夜，界几无色。敲瓦微听冰线响，开窗倏放风花入。拥重貂、曾不觉寒侵，将何德。

呼剡棹，行为客。平蔡垒，何能役。算争如、穷檐高卧，闭门毋出。安得松江江上去，一蓑独钓丝千尺。要不持、寸铁和前修，文章伯。

又 再和

立雪寒窗，照肝胆、了然明白。浑似得、齐宫气象，郢楼颜色。天籁无声随物应，阳春有脚从中入。与邦人、稽首谢天工，元冥德。

人正作，潇湘客。谁谓有，蓝关役。对江天暮景，鹅溪描出。银浪卷飞鸥一片，玉枝擎重龙千尺。羨联镳、曾作岳峰游，前方伯。

又 用韵饯朔斋

把绣成吟，真压倒、古之元白。佳句有、雪车冰柱，曾无矜色。一点不留烟火气，诗脾时有清风入。更岭边、多少活人恩，于公德。

公自是，朝天客。应笑我，为人役。看时犹多事，公须一出。琅腹细披忠抱寸，龙颜密侍天威尺。借笔端、从此润皇猷，翰林伯。

又

京递至，亲旧皆无书，再用韵简云岩、朔斋

听彻惊乌，起览镜、顿添头白。曾不见、江南人寄，一枝春色。风卷龙鳞残甲下，山无虎迹新蹄入。罄冰天、桂海使同风，修文德。

三十载，江湖客。千万里，关山役。且付之杯酒，何愁西出。天女花边浑似剪，志公杖上平如尺。把富贫、都作一般看，何什伯。

又 立春招云岩，再和以谢之

草草春盘，那敢赋、丝青玉白。湘波动、雁怀归思，柳催行色。冻逐寒梢残雪解，暖随野烧轻烟入。举人间、无物不光辉，东皇德。

莺燕报，朱门客。乌兔老，红尘役。羨翠轺多暇，彩花新出。捧日东城行应制，去天只隔城南尺。趁五更、桦烛向端闈，班常伯。

又 和立春韵简云岩

春自何来，深雪里、南枝先白。伊祁氏、一番陶冶，千林香色。弱柳眼回青尚浅，小桃腮晕红将入。笑渠侬、剪彩与裁花，夸闺德。

九十日，春还客。数千里，官为役。看时来、雁随云去，鱼从冰出。一脉流通天造化，三杯扶植身关尺。对东皇、太乙续离骚，需词伯。

又 招云岩、朔斋于雷园，二公用前雪韵赋梅

万紫千红，都不似、玉奴一白。三数萼、有冰霜操，无脂粉色。长共竹君松友伴，岂容蝶使蜂媒入。似惠和、伊任与夷清，兼三德。

能洁己，能娱客。成子后，调羹役。更岁寒风味，时然后出。春浅吹回羌管寸，夜阑吟费花笺尺。炯使星、两两月黄昏，真诗伯。

贺新郎 送静斋堂召，和朔斋韵

岭蜀天涯路。忆前年、担簦西上，旌麾南去。谁谓潇湘还解后，重对灯前笑语。挺乔木、森森犹故。梅外柳边官事了，记牢之、曾著元戎府。聊访问，旧游处。

酒边不用伤南浦。为儂亭、百年门户，正烦宗主。见说君王方旰食，借箸哺应为吐。这官职、二郎须做。若见时贤询小阮，愿早携、襖襖耕春雨。嗟鬢铄，恐迟暮。

又 再用韵助静斋之入告

日近长安路。喜骖鸾、带簪游戏，弓旌招去。闻道汉朝帷幄里，要问嫩隅蛮语。嗟时事、尚兹多故。办取忠谋宜入告，见石洪、曾在乌公府。须细访，风寒处。

左荆右岭中湘浦。愿扶持、东南温厚，老天张主。翹馆钦贤人共说，一饭每勤三吐。公此去，好官须做。从舆涇舟同共济，更绸缪、桑土先阴雨。灭此虏，直朝暮。

又 丁巳初度自赋

老作星沙守。问今年、平头六十，翁还知否。暑葛霜砧都历遍，还著回旋舞袖。奚所用、皤然一叟。欲觅金丹驻颜色，纵铁鞋、踏破终无有。空自诧，不龟手。

西风又近中秋候。记相将、桂华开未，月儿圆又。弧矢四方男子事，争奈灰心也久。何以报、国恩深厚。了却官痴归去好，有竹窗、蓬户生涯旧。姑一笑，付杯酒。

又 自和前韵

问讯南州守。怅吾生、今非昔比，后犹今否。涉尽风涛凭个甚，一瓣心香在袖。人竟说、顽哉此叟。识破荣途皆幻境，只形骸、已累它何有。姑勉尔，应之手。

休烦太卜勤占候。怕漂零、江湖易老，

光阴难又。兔魄初生人初度，期共婵娟长久。
赖此月、于人犹厚。燕颌封侯非我事，早携书、
归卧吾庐旧。渝此约，有如酒。

水调歌头 送印德远经略入广

宵旰軫先虑，岭海屈真儒。金城素有奇略，不待至才图。
春满洲鹦楼鹤，天付簪山带水，驷马驾轻车。六月正炎热，吾肯缓吾驱。

越蓬婆，逾邛歛，彼穹庐。其能涉我烟瘴，载籍以来无。
联络五溪百粤，托柱南方半壁，中外保无虞。了此经营事，归去位钧枢。

又 长沙中秋约客赏月

洞庭千古月，湘水一天秋。凉宵将傍三五，玩事若为酬。
人立梧桐影下，身在桂花香里，疑是玉为州。宇宙大圆镜，沆漭际空浮。

傍谯城，瞻岳麓，有巍楼。不妨举酒，相与一笑作遨头。
人已星星华发，月只团团素魄，几对老蟾羞。回首海天阔，心与水东流。

又 自和

佳月四时有，举世重中秋。金明水秀竞爽，亘古景难酬。
爝火繁星退歛，桂海冰天洞照，清影遍神州。万象自妍丑，一鉴碧虚浮。

昔苏张，夸玉界，赋琼楼。素娥阅人多

矣，不怕雪添头。只恐参横斗转，还又酒阑歌散，醉态醒堪羞。安得真仙术，兔魄驻西流。

又 幕府诸公有和，再用韵谢之

敢问辽天月，历几亿春秋。老娥盍相刮目，无一语相酬。似讶经年间阔，类笑衰翁潦倒，岁岁客他州。清照五湖阔，倦影一萍浮。

任渠侬，琴当户，酒当楼。人生适意，封君何似橘千头。月正圆时固好，人欲闲时须早，毋作陇西羞。多谢锦囊句，椽笔富清流。

又 戊午初度自寿

问讯中秋月，瞥见一眉弯。婆娑桂影、今年又向桂林看。蓬矢桑弧初度，罗带玉簪旧识，俯仰十年间。记得老坡语，颓景薄西山。

碧虚人，应笑我，已苍颜。岁寒耿耿，不改惟有寸心丹。目断风涛万里，梦绕烟霞一壑，老矣甚时闲。不愿酒泉郡，愿入玉门关。

木兰花慢 送朱子木叔归池阳

渐吾乡秋近，正莼美、更鲈肥。顾安得相从，征帆衔尾，飞盖追随。南中眼前事势，正相持、边腹一枰棋。将谓灯明月暗，笑谈共和韩诗。

谁知。催上王畿。无计可，挽留之。想

全宋词 李曾伯

翠微深处，倚楼日望，天际人归。中流江涛
袞袞，藉烝徒、共楫属之谁。回首西风过雁，
料君为我兴思。

沁园春 己未初度

六十衰翁，更加二龄，此何等时。不退
寻岩壑，相安耕钓，重来岭峤，犹事驱驰。
绝类文渊，当年矍铄，上马据鞍奚所为。偏
怜处，是难堪潦雾，水际鸢飞。

云台铜柱空题。奈床下伊人心素疑。自
古来如此，只须付酒，风光纵好，勿复言诗。
莼菜美时，桂花香里，所愿少须与乐之。西
风外，喜羽书夜静，即是归期。

满江红 庚申初度

今岁垂弧，欲自寿、一辞莫措。何可拟、
翁头如雪，香山白傅。首夏一番罹重病，去
秋数月撻狂虏。赖天公、肯为保余生，逢初
度。

今幸释，千钧负。尤可喜，归田去。但
蹒跚勃窣，龙钟如许。薇柳诸关成底事，菊
松三径犹堪主。办篮舆、尚可檄渔樵，盟鸥
鹭。

水龙吟 兴安道间

西风涤尽炎歊，连朝更值天无雨。笋舆

轧轧，经行三日，碧簪无数。胜绝江山，余行天下，无如此处。任今来昔往，迎新送旧，风景在、只如许。

谁谓阴山骄虏。去年冬、敢侵吾土。哀哀鸿雁，一番荡析，幸逢多黍。拜表出师，安南定北，岂无忠武。嗟病夫、老矣无能，促归棹，舣江渚。

水调歌头 庚申十六夜月简陈次贾

昨夜虽三五，宝鉴未纯全。今宵既望，兔魄才是十分圆。又得平滩系缆，冷浸玻璃千顷，表里一壶天。扶惫蓬窗下，拚却夜深眠。

想嫦娥，应笑我，鬓苍然。平生修玩，犹记历历旧山川。安得乘槎访斗，问讯广寒宫殿，怅未了尘缘。愿赐长生药，换我骨为仙。

八声甘州 辛酉自寿

数年来、揆度在南州，今年在家山。叹平生踪迹，荆淮岭蜀，多少间关。幸对园林花竹，一笑且团栾。莫忆西风梦，驰志楼兰。

赢得维摩多病，奈鬓毛剥落，步步蹒跚。神仙何处，遗我以金丹。愿明时、清平无事，放老翁、长伴白鸥闲。聊相与，桂花香里，满酌开颜。

水龙吟

长沙后圃荷开之久，无人领略，赋此词，具一杯招管顺甫诸公

此花迥绝他花，湘中不减吴中盛。疑从太华，分来岳麓，根萼玉并。炬列千红，盖擎万绿，织成云锦。向壶天清暑，风梳露洗，尘不染、香成阵。

好是一番雨过，似轻鬟、晚临妆镜。阿环浴罢，珠横翠乱，芳肌犹润。载月同游，隔花共语，酒边清兴。问六郎、凝伫多时，公不饮、俗几甚。

李漳

鹊桥仙 七夕

迢迢郎意 ,盈盈妾恨 ,今夕鹊桥欲度。世间儿女一何痴 ,斗乞巧、纷纷无数。遥知此际 ,有人孤坐 ,心切天街云路。好因缘是恶因缘 ,梦魂远、阳台雨暮。

桃源忆故人 闺情

小楼帘卷栏干外。花下朱门半启。中有倾城佳丽。一笑西风里。
盈盈临水情难致。尽日相看如醉。乾鹊不知人意。只管声声喜。

满江红 周监务生日 妻善鼓琴

雨歇前林 ,薰风度、琴声清淑。绮窗迥、张眉初扫 ,弄弦鸣玉。三叠瑶池仙侣宴 ,九江鹤唳清江曲。政伯鸾、此日梦维熊 ,祥烟馥。

金徽外 ,音时续。雕筵上 ,听难足。且相将一醉 ,满倾醽醑。共祝遐龄何所似 ,水流不尽高山矗。算未应、归去抱琴书 ,云间宿。

鹧鸪天 寿友人母

淑德由来孟母名。方瞳鹤发莹精神。天教遐算灵椿比，亲见贤郎擢桂荣。逢诞日，庆孙曾。金花纶诰又重新。愿君学得司空母，管取年高寿太平。

生查子 寿陈宰妻

家承阀阅高，人擅闺房秀。嫁得伯鸾夫，直是齐眉偶。

榴花著子时，萱草宜男候。一笑捧觥船，共祝人长寿。

南歌子 寿子

小子何时见，高秋此日生。阶兰岩桂正欣荣。家比杜陵犹有、彩衣轻。

应诏须三载，传家有一经。齐禽刷羽早蜚鸣。莫效老夫头白、好归耕。

李震

贺新郎 题高克恭夜山图

楼据湖山背。倚高寒、尘飞不到，越山相对。老月腾辉群动息。独坐清分沆瀣。更满听、潮声澎湃。醉里诗成神鬼泣、景苍凉、又在新诗外。浑忘却、功名债。

凭谁妙笔能图绘。羨中郎、前身摩诘，宛然心会。拈出清宵无限意，半幅溪藤光怪。方信有、人间仙界。云淡天低奇绝处，笑僧殊、未识丹青在。留此轴，夸千载。

李 振 祖

浪淘沙

春在画桥西。画舫轻移。粉香何处度涟漪。
认得一船杨柳外，帘影垂垂。
谁倚碧阑低。酒晕双眉。鸳鸯并浴燕交飞。
一片闲情春水隔，斜日人归。

全宋词 李之问

李 之 问

失调名

愿得年年，长共我儿解粽。

李之仪

水龙吟 中秋

晚来轻拂，游云尽卷，霁色寒相射。银潢半掩，秋毫欲数，分明不夜。玉琯传声，羽衣催舞，此欢难借。凜清辉，但觉圆光罩影，冰壶莹、真无价。

闻道水精宫殿，蕙炉薰、珠帘高挂。琼枝半倚，瑶觞更劝，莺娇燕姹。目断魂飞，翠萦红绕，空吟小砑。想归来醉里，鸾篦凤朵，倩何人卸。

蓦山溪 次韵徐明叔

神仙院宇，记得春归后。蜂蝶不胜闲，惹残香、萦纤深透。玉徽指稳，别是一般情，方永昼。因谁瘦。都为天然秀。

桐阴未减，独自携芳酎。再弄想前欢，拊金樽、何时似旧。凭谁说与，潘鬓转添霜，飞陇首。云将皱。应念相思久。

又 北观避暑次明叔韵

金柔火老，欲避几无地。谁借一檐风，

锁幽香、悒悒清邃。瑶阶珠砌，如膜遇金篦，流水外，落花前，岂是人能致。

擘麟泛玉，笑语皆真类。惆怅月边人，驾云辔、何方适意。么弦咽处，空感旧时声，兰易歇，恨偏长，魂断成何事。

又 采石值雪

蛾眉亭上，今日交冬至。已报一阳生，更佳雪、因时呈瑞。匀飞密舞，都是散天花，山不见，水如山，浑在冰壶里。

平生选胜，到此非容易。弄月与燃犀，漫劳神、徒能惊世。争如此际，天意巧相符，须痛饮，庆难逢，莫诉厌厌醉。

又

晚来寒甚，密雪穿庭户。如在广寒宫，惊满目、瑶林琼树。佳人乘兴，应是得欢多，泛新声，催金盏，别有留心处。

争知这里，没个人言语。拨尽火边灰，搅愁肠、飞花舞絮。凭谁子细，说与此时情，欢暂歇，酒微醺，还解相思否。

满庭芳

八月十六夜，景修咏东坡旧词，因韵成此

一到江南，三逢此夜，举头羞见婵娟。黯然怀抱，特地遣谁宽。分外清光泼眼，迷滉漾、无计拘拦。天如洗，星河尽掩，全胜异时看。

佳人，还忆否，年时此际，相见方难。谩红绡偷寄，孤被添寒。何事佳期再睹，翻

怅望、重叠关山。归来呵，休教独自，肠断对团圆。

又

有碾龙团为供求诗者，作长短句报之

花陌千条，珠帘十里，梦中还是扬州。月斜河汉，曾记醉歌楼。谁赋红绡小研，因飞絮、天与风流。春常在，仙源路隔，空自泛渔舟。

新秋。初雨过，龙团细碾，雪乳浮瓯。问殷勤何处，特地相留。应念长门赋罢，消渴甚、无物堪酬。情无尽，金扉玉榜，何日许重游。

玉蝴蝶

九月十日，将登黄山，遽为雨阻，遂饮弊止。陈君俞独不至，已而以三阕见寄，辄次其韵。

坐久灯花开尽，暗惊风叶，初报霜寒。冉冉年华催暮，颜色非丹。搅回肠、蛩吟似织，留恨意、月彩如摊。惨无欢。篆烟萦素，空转雕盘。

何难。别来几日，信沈鱼鸟，情满关山。耳边依约，常记巧语绵蛮。聚愁窠、蜂房未密，倾泪眼、海水犹慳。奄更阑。渐移银汉，低泛帘颜。

早梅芳

雪初销，斗觉寒将变。已报梅梢暖。日

边霜外，迤迤枝条自柔软。嫩苞匀点缀，绿萼轻裁剪。隐深心，未许清香散。

渐融和，开欲遍。密处疑无间。天然标韵，不与群花斗深浅。夕阳波似动，曲水风犹懒。最销魂，弄影无人见。

谢池春

残寒销尽，疏雨过、清明后。花径敛余红，风沼萦新皱。乳燕穿庭户，飞絮沾襟袖。正佳时，仍晚昼。著人滋味，真个浓如酒。

频移带眼，空只恁、厌厌瘦。不见又思量，见了还依旧。为问频相见，何似长相守。天不老，人未偶。且将此恨，分付庭前柳。

怨三三

登姑熟堂寄旧游，用贺方回韵

清溪一派泻揉蓝。岸草毵毵。记得黄鹂语画檐。唤狂里、醉重三。

春风不动垂帘。似三五、初圆素蟾。镇泪眼廉纤。何时歌舞，再和池南。

春光好

霜压晓，月收阴。斗寒深。看尽烛花金鸭冷，卷残衾。

卯酒从谁细酌，余香无计重寻。空把夜来相见梦，写文琴。

千秋岁

咏畴昔胜会和人韵，后篇喜其归

深帘静昼。绰约闺房秀。鲜衣楚制非文绣。凝脂肤理膩，削玉腰围瘦。闲舞袖。回身昵语凭肩久。

眉压横波皱。歌断青青柳。钗遽擘，壶频叩。鬢凄清镜雪，泪涨芳樽酒。难再偶。沈沈梦峡云归后。

又

柔肠寸折。解袂留清血。蓝桥动是经年别。掩门春絮乱，敲枕秋蛩咽。檀篆灭。鸳衾半拥空床月。

妆镜分来缺。尘污菱花洁。嘶骑远，鸣机歇。密封书锦字，巧绾香囊结。芳信绝。东风半落梅梢雪。

又 再和前意

万红暄昼。占尽人间秀。怎生图画如何绣。宜推萧史伴，消得东阳瘦。垂窄袖。花前镇忆相携久。

泪衰回纹皱。好在章台柳。洞户隔，凭谁叩。寄声虽有雁，会面难同酒。无计偶。萧萧暮雨黄昏后。

又

休嗟磨折。看取罗巾血。殷勤且话经年别。庭花番怅望，檐雨同呜咽。明半灭。灯光夜夜多如月。

无复伤离缺。共保冰霜洁。不断梦，从今歇。收回书上絮，解尽眉头结。犹未绝。金徽泛处应能雪。

又 和人

中秋才过，又是重阳到。露乍冷，寒将报。绿香摧渚芰，黄密攒庭草。人未老。蓝桥谩促霜砧捣。

照影兰缸晕，破户银蟾小。樽在眼，从谁倒。强铺同处被，愁卸欢时帽。须信道。狂心未歇情难老。

又 用秦少游韵

深秋庭院，残暑全消退。天幕迥，云容碎。地偏人罕到，风惨寒微带。初睡起，翩翩戏蝶飞成对。

叹息谁能会。犹记逢倾盖。情暂遣，心常在。沈沈音信断，冉冉光阴改。红日晚，仙山路隔空云海。

临江仙

知有阆风花解语，从来只许传闻。光明休咏汉宫新。拥身疑有月，衬步恨无云。

莫把金樽容易劝，坐来几度销魂。不知仙骨在何人。好将千岁日，占断四时春。

又

九十日春都过了，寻常偶到江皋。水容山态两相饶。草平天一色，风暖燕双高。

酒病厌厌何计那，飞红更送无聊。莺声

犹似耳边娇。难回巫峡梦，空恨武陵桃。

江神子

恼人天气雪消时。落梅飞。日初迟。小阁幽窗，时节听黄鹂。新洗头来娇困甚，才试著，夹罗衣。

木梨花拂淡燕脂。翠云敲。敛双眉。月浅星深，无淡玉绳低。不道有人肠断也，浑不语，醉如痴。

又

今宵莫惜醉颜红。十分中。且从容。须信欢情，回首似旋风。流落天涯头白也，难得是，再相逢。

十年南北感征鸿。恨应同。苦重重。休把愁怀，容易便书空。只有琴樽堪寄老，除此外，尽蒿蓬。

又

阑干掐遍等新红。酒频中。恨匆匆。投得花开，还报夜来风。惆怅春光留不住，又何似，莫相逢。

月窗何处想归鸿。与谁同。意千重。婉思柔情，一旦总成空。仿佛么弦犹在耳，应为我，首如蓬。

清平乐 橘

西江霜后，万点暄晴昼。璀璨寄来光欲

溜。正值文君病酒。

画屏斜倚窗纱。睡痕犹带朝霞。为问清香绝韵，何如解语梅花。

又

萧萧风叶。似与更声接。欲寄明珰非为怯。梦断兰舟桂楫。

学书只写鸳鸯。却应无奈愁肠。安得一双飞去，春风芳草池塘。

又 听杨姝琴

殷勤仙友。劝我千年酒。一曲履霜谁与奏。邂逅麻姑妙手。

坐来休叹尘劳。相逢难似今朝。不待亲移玉指，自然痒处都消。

又 再和

当时命友。曾借邻家酒。旧曲不知何处奏。梦断空思纤手。

却应去路非遥。今朝还有明朝。谩道人能化石，须知石被人消。

又

仙家庭院。红日看看晚。一条梅花挨枕畔。玉指几回拈看。

拥衾不比寻常。天涯无限思量。看了又还重嗅，分明不为清香。

浪淘沙 琴

霞卷与云舒。月淡星疏。摩徽转轸不曾

虚。弹到当时留意处，谁是相如。
魂断酒家垆。路隔云衢。舞鸾镜里早妆初。
拟学画眉张内史，略借工夫。

卜算子

我住长江头，君住长江尾。日日思君不见君，共饮长江水。
此水几时休，此恨何时已。只愿君心似我心，定不负相思意。

忆秦娥 用太白韵

清溪咽。霜风洗出山头月。山头月。迎得云归，还送云别。
不知今是何时节。凌歊望断音尘绝。音尘绝。帆来帆去，天际双阙。

蝶恋花

天淡云闲晴昼永。庭户深沈，满地梧桐影。
骨冷魂清如梦醒。梦回犹是前时景。
取次杯盘催酩酊。醉帽频敲，又被风吹正。
踏月归来人已静。恍疑身在蓬莱顶。

又

玉骨冰肌天所赋。似与神仙，来作烟霞侣。
枕畔拈来亲手付。书窗终日常相顾。
几度离披留不住。依旧清香，只欠能言语。
再送神仙须爱护。他时却待亲来取。

又

万事都归一梦了。曾向邯郸，枕上教知道。百岁年光谁得到。其间忧患知多少。

无事且频开口笑。纵酒狂歌，销遣闲烦恼。金谷繁华春正好。玉山一任樽前倒。

又

为爱梅花如粉面。天与工夫，不似人间见。几度拈来亲比看。工夫却是花枝浅。

觅得归来临几砚。尽日相看，默默情无限。更不嗅时须百遍。分明销得人肠断。

浣溪沙 梅

剪水开头碧玉条。能令江汉客魂销。只应香信是春潮。

戴了又羞缘我老，折来同嗅许谁招。凭将此意问妖娆。

又 为杨姝作

玉室金堂不动尘。林梢绿遍已无春。清和佳思一番新。

道骨仙风云外侣，烟鬟雾鬓月边人。何妨沈醉到黄昏。

又 再和

依旧琅玕不染尘。霜风吹断笑时春。一簪华发为谁新。

白雪幽兰犹有韵，鹊桥星渚可无人。金莲移处任尘昏。

又

昨日霜风入绛帷。曲房深院绣帘垂。屏
风几曲画生枝。

酒韵渐浓欢渐密，罗衣初试漏初迟。已
凉天气未寒时。

西江月 橘

昨夜十分霜重，晓来千里书传。吴山秀
处洞庭边。不夜星垂初遍。

好事寄来禅侣，多情将送琴仙。为怜佳
果称婵娟。一笑聊回媚眼。

又

醉透香浓斗帐，灯深月浅回廊。当时背
面两恹恹。何况临风怀想。

舞柳经春只瘦，游丝到地能长。鸳鸯半
调已无肠。忍把么弦再上。

又

念念欲归未得，迢迢此去何求。都缘一
点在心头。忘了霜朝雪后。

要见有时有梦，相思无处无愁。小窗若
得再绸缪。应记如今时候。

鹊桥仙

风清月莹，天然标韵，自是闺房之秀。
情多无那不能禁，常是为、而今时候。

绿云低拢，红潮微上，画幕梅寒初透。

一般偏更恼人深，时更把、眉儿轻皱。

又

宿云收尽，纤尘不警，万里银河低挂。
清冥风露不胜寒，无计学、双鸾并驾。

玉徽声断，宝钗香远，空赋红绡小研。
庾郎知有几多愁，怎奈向、月明今夜。

踏莎行

绿遍东山，寒归西渡。分明认得春来处。
风轻雨细更愁人，高唐何在空朝暮。

离恨相寻，酒狂无素。柳条又折年时数。
一番情味有谁知，断魂还送征帆去。

又

还是归来，依前问渡。好风引到经行处。
几声啼鸟又催耕，草长柳暗春将暮。

潦倒无成，疏慵有素。且陪野老酬天数。
多情惟有面前山，不随潮水来还去。

鹧鸪天

节是重阳却斗寒。可堪风雨累寻欢。虽
辜早菊同高柳，聊楫残蕉共小栏。

浮蚁嫩，炷烟盘。恨无莺唱舞催鸾。空
惊绝韵天边落，不许韶颜梦里看。

又

浓丽妖妍不是妆。十分风艳夺韶光。牡
丹开就应难比，繁富犹疑过海棠。

须仔细，更端相。烂霞梳晕带朝阳。千金未足酬真赏，一度相看一断肠。

又

避暑佳人不著妆。水晶冠子薄罗裳。摩绵扑粉飞琼屑，滤密调冰结绛霜。

随定我，小兰堂。金盆盛水绕牙床。时时浸手心头熨，受尽无人知处凉。

又

收尽微风不见江。分明天水共澄光。由来好处输闲地，堪叹人生有底忙。

心既远，味偏长。须知粗布胜无裳。从今认得归田乐，何必桃源是故乡。

朝中措

腊穷天际傍危栏。密雪舞初残。表里江山如画，分明不似人间。

功名何在，文章漫与，空叹流年。独恨归来已晚，半生孤负渔竿。

又

暮山环翠绕层栏。时节岁将残。远雁不传家信，空能嘹唳云间。

客程无尽，归心易感，谁与忘年。早晚临流凝望，饥帆催卸风竿。

又

翰林豪放绝勾栏。风月感雕残。一旦荆溪仙子，笔头唤聚时间。

全宋词 李之仪

锦袍如在，云山顿改，宛似当年。应笑
溧阳衰尉，鲇鱼依旧悬竿。

阮郎归

朱唇玉羽下蓬莱。佳时近早梅。惜花情
味久安排。枝头开未开。

魂欲断，恨难裁。香心休见猜。果知何
逊是他才。何妨入梦来。

采桑子 席上送少游之金陵

相逢未几还相别，此恨难同。细雨蒙蒙。
一片离愁醉眼中。

明朝去路云霄外，欲见无从。满袂仙风。
空托双凫作信鸿。

如梦令

回首芜城旧苑。还是翠深红浅。春意已
无多，斜日满帘飞燕。不见。不见。门掩落
花庭院。

临江仙 登凌歊台感怀

偶向凌歊台上望，春光已过三分。江山
重叠倍销魂。风花飞有态，烟絮坠无痕。

已是年来伤感甚，那堪旧恨仍存。清愁
满眼并谁论。却应台下草，不解忆王孙。

又 景修席上再赋

难得今朝风日好，春光佳思平分。虽然公子暗招魂。其如抬眼看，都是旧时痕。

酒到强寻欢日路，坐来谁为温存。落花流水不堪论。何时弦上意，重为拂桐孙。

丑奴儿 谢人寄蜡梅

春风似有灯前约，先报佳期。点缀相宜。天气犹寒蝶未知。

嫩黄染就蜂须巧，香压团枝。淡注仙衣。方士临门未起时。

青玉案 用贺方回韵，有所禱而作

小篷又泛曾行路。这身世、如何去。去了还来知几度。多情山色，有情江水，笑我归无处。

夕阳杳杳还催暮。练净空吟谢郎句。试禱波神应见许。帆开风转，事谐心遂，直到明年雨。

更漏子 借陈君俞韵

暑方烦，人似愠。怅望林泉幽峻。情会处，景偏长。心清闻妙香。

宝幢低，金锁碎。竹影桐阴窗外。新事旧，旧愁新。空嗟不见人。

渔家傲

洗尽秋容天似莹。星稀月淡人初静。策杖萦纡寻远径。披昏暝。堤边犊母闲相并。

遥想去舟魂欲凝。一番佳思从谁咏。惟粹归来如独醒。知何境。沈沈但觉烟村迥。

南乡子

春后雨余天。娅姺黄鹂胜品弦。榴叶千灯初报暑，阶前。只有茶瓯味最便。

身世几踟蹰。自觉年来更可怜。欲问此情何所似，缘延。看取窗间坠柳绵。

又 夏日作

绿水满池塘。点水蜻蜓避燕忙。杏子压枝黄半熟，邻墙。风送荷花几阵香。

角簟衬牙床。汗透鲛绡昼影长。点滴芭蕉疏雨过，微凉。画角悠悠送夕阳。

又

睡起绕回塘。不见衔泥燕子忙。前日花梢都绿遍，西墙。犹有轻风递暗香。

步懒恰寻床。卧看游丝到地长。自恨无聊常病酒，凄凉。岂有才情似沈阳。

又 端午

小雨湿黄昏。重午佳辰独掩门。巢燕引雏浑去尽，销魂。空向梁间觅宿痕。

客舍宛如村。好事无人载一樽。唯有莺

声知此恨，殷勤。恰似当时枕上闻。

又

泪眼转天昏。去路迢迢隔九门。角黍满盘无意举，凝魂。不为当时泽畔痕。

肠断武陵村。骨冷难同月下樽。强泛菖蒲酬令节，空勤。风叶萧萧不忍闻。

蓦山溪 少孙咏鲁直长沙旧词，因次韵

青楼薄幸，已分终难偶。寻遍绮罗间，悄无个、眼中翘秀。江南春晓，花发乱莺飞，情渐透。休辞瘦。果有人相候。

醉乡路稳，常是身偏后。谁谓正欢时，把相思、番成红豆。千言万语，毕竟总成虚，章台柳。青青否。魂梦空搔首。

减字木兰花

乱魂无据。黯黯只寻来处路。灯尽花残。不觉长更又向阑。

几回枕上。那件不曾留梦想。变尽星星。一滴秋霖是一茎。

又

堤长春晚。冉冉浑如云外见。欲语无门。略许莺声隔岸闻。

锦屏绣幌。犹待归来留一饷。何事迟迟。直恐游丝惹住伊。

又

次陈莹中题韦深道独乐堂

莹中词云：世间拘碍。人不堪时渠不改。古有斯人。千载谁能继后尘。春风入手。乐事自应随处有。与众熙怡。何似幽居独乐时。

触涂是碍。一任浮沈何必改。有个人人。自说居尘不染尘。

谩夸千手。千物执持都是有。气候融怡。还取青天白日时。

又

次韵陈莹中题韦深道寄傲轩

莹中词云：结庐人境。万事醉来都不醒。鸟倦云飞。两得无心总是归。古人逝矣。旧日南窗何处是。莫负青春。即是升平寄傲人。

莫非魔境。强向中间谈独醒。一叶才飞。便觉年华太半归。

醉云可矣。认著依前还不是。虚过今春。有愧斜川得意人。

又 得金陵报，喜甚，从赵景修借酒

揉花催柳。一夜阴风几破牖。平晓无云。依旧光明一片春。

掀衣起走。欲助喜欢须是酒。惆怅空樽。拟就王孙借十分。

天门谣

次韵贺方回登采石蛾眉亭

方回词云：牛渚天门险。限南北、七雄豪占。清雾敛。与闲人登览。

待月上潮平、波滟滟。塞管轻吹断阿滥。风满
槛。历历数、西州更点。

天堑休论险。尽远目、与天俱占。山水
敛。称霜晴披览。

正风静云闲、平潏潏。想见高吟名不滥。
频扣槛。杳杳落、沙鸥数点。

好事近

与黄鲁直于当涂花园石洞听杨姝弹履霜操，鲁
直有词，因次韵鲁直词云：一弄醒心弦，情在两山
斜叠。弹到古人愁处，有真珠承睫。

使君来去本无心，休泪界红颊。自恨老来憎酒，
负十分蕉叶。

相见两无言，愁恨又还千叠。别有恼人
深处，在懵腾双睫。

七弦虽妙不须弹，惟愿醉香颊。只恐近
来情绪，似风前秋叶。

又

春到雨初晴，正是小楼时节。柳眼向人
微笑，傍阑干堪折。

暮山浓淡锁烟霏，梅杏半明灭。玉斝莫
辞沈醉，待归时斜月。

又 再和

上尽玉梯云，还见一番佳节。惆怅旧时
行处，把青青轻折。

倚阑人醉欲黄昏，飞鸟望中灭。天面碧
琉璃上，印弯弯新月。

浣溪沙 和人喜雨

龟坼沟塍草压堤。三农终日望云霓。一番甘雨报佳时。

闻道醉乡新占断，更开诗社互排峨。此时空恨隔云泥。

又

雨暗轩窗昼易昏。强敲纤手浴金盆。却因凉思谢飞蚊。

酒量羨君如鹄举，寒乡怜我似鸱蹲。由来同是一乾坤。

又

声名自昔犹时鸟，日月何尝避覆盆。是非都付鬓边蚊。

邂逅风雷终有用，低回囊槛要深蹲。酒中聊复比乾坤。

菩萨蛮

五云深处蓬山杳。寒轻雾重银蟾小。枕上挹余香。春风归路长。

雁来书不到。人静重门悄。一阵落花风。云山千万重。

又

青梅又是花时节。粉墙闲把青梅折。玉鞦偶逢君。春情如乱云。

藕丝牵不断。谁信朱颜换。莫厌十分斟。

酒深情更深。

雨中花令

休把身心拈就。著便醉人如酒。富贵功名虽有味，毕竟因谁守。

看取刀头切藕。厚薄都随他手。趁取日中归去好，□非待、黄昏后。

又 王德循东斋瑞香花

点缀叶间如绣。开傍小春时候。莫把幽兰容易比，都占尽、人间秀。

信是眼前稀有。消得千钟美酒。只有些儿堪恨处，管不似、人长久。

留春令

梦断难寻，酒醒犹困，那堪春暮。香阁深沈，红窗翠暗，莫羨颠狂絮。

绿满当时携手路，懒见同欢处。何时却得，低帏昵枕，尽诉情千缕。

踏莎行

紫燕衔泥，黄莺唤友。可人春色暄晴昼。王孙一去杳无音，断肠最是黄昏后。

宝髻慵梳，玉钗斜溜。凭阑目断空回首。薄情何事不归来，谩教折尽庭前柳。

又

一别芳容，五经寒暑。回文欲寄无鳞羽。

多情犹自梦中来，向人粉泪流如雨。

梦破南窗，愁肠万缕。那听角动城头鼓。
人生弹指事成空，断魂惆怅无寻处。

南乡子

夜雨滴空阶。想见尊前赋咏才。更觉鸣蛙如鼓吹，安排。惆怅流光去不回。

万事已成灰。只这些儿尚满怀，刚被北风吹晓角，相催。不许时间入梦来。

万年欢

暖律才中，正莺喉竞巧，燕语新成。万绿阴浓，全无一点芳尘。门巷朝来报喜，庆佳期、此日光荣。开华宴、交酌琼酥，共祝鹤算椿龄。

须知最难得处，双双凤翼，一对和鸣。造化无私，谁教特地多情。惟愿疏封大国，彩笺上、频易佳名。从此去、贤子才孙，岁岁长捧瑶觥。

朝中措

望新开湖有怀少游，用樊良道中韵

新开湖水浸遥天。风叶响珊珊。记得昔游情味，浩歌不怕朝寒。

故人一去，高名万古，长对孱颜。惟有落霞孤鹭，晚年依旧争还。

又 樊良道中

败荷枯苇夕阳天。时节渐阑珊。独泛扁舟归去，老来不耐霜寒。

平生志气，消磨尽也，留得苍颜。寄语山中麋鹿，断云相次东还。

临江仙

江东人得早梅，见约探题，且访梅所在，因携笺管，就赋花下

初破晓寒无限思，融融腊意全迷。春工从此被人知。不随蜂蝶，长伴玉蟾低。

缥缈云间应好在，盈盈泪湿征衣。背人偷拗向东枝。清香满袖，犹记画堂西。

又 病中存之以长短句见调，因次其韵

病里不知春早晚，惊心绿暗红稀。起来初试薄罗衣。多情海燕，还傍旧梁飞。

瘦损休文谁记得，空将锁臂频围。眼前都是去年时。不堪追想，魂断画楼西。

蝶恋花 席上代人送客，因载其语

帘外飞花湖上语。不恨花飞，只恨人难住。多谢雨来留得住。看看却恐晴催去。

寸寸离肠须会取。今日宁宁，明日从谁诉。怎得此身如去路。迢迢长在君行处。

临江仙 咏藏春玉

青润奇峰名韞玉，温其质并琼瑶。中分瀑布写云涛。双峦呈翠色，气象两相高。

珍重幽人诚好事，绿窗聊助风骚。寄言俗客莫相嘲。物轻人意重。千里赠鹅毛。

点绛唇

匀收了。背人微笑。风入玲珑罩。

李致远

碧牡丹

破镜重圆，分钗合钿，重寻绣户珠箔。
说与从前，不是我情薄。都缘利役名牵，飘蓬无定，翻成轻负。别后情怀，有万千牢落。

经时最苦分携，都为伊、甘心寂寞。纵
满眼、闲花媚柳，终是强欢不乐。待凭鳞羽，
说与相思，水远天长又难托。而今幸已再逢，
把轻离断却。

李重元

忆王孙 春词

萋萋芳草忆王孙。柳外楼高空断魂。杜宇声声不忍闻。欲黄昏。雨打梨花深闭门。

又 夏词

风蒲猎猎小池塘。过雨荷花满院香。沈李浮瓜冰雪凉。竹方床。针线慵拈午梦长。

又 秋词

飕飕风冷荻花秋。明月斜侵独倚楼。十二珠帘不上钩。黯凝眸。一点渔灯古渡头。

又 冬词

彤云风扫雪初晴。天外孤鸿三两声。独拥寒衾不忍听。月笼明。窗外梅花瘦影横。

李仲光

鹊桥仙 寿赵帅

诗书元帅，风流人物，看取方瞳如漆。
铜驼陌上若相逢，当一笑、摩挲金狄。
相门事业，中书考第，未数汾阳功绩。
若将六十寿行年，才数得、百分之一。

百字令 寿冯宪。是日，宴于古羊寺桃花下

小红开也，问韶华、今年何事春早。尽道福星临照久，勾引东风仙岛。一点恩光，列城生意，万物列枯槁。圜扉深处，也应满地芳草。

却怪有脚阳春，如何移向崆峒了。父老牵衣留不住，只有攀援遮道。翠柏杯中，蟠桃花下，君看朱颜好。路人遥指，他年黄阁元老。

鹊桥仙 自寿

焚香清坐，呼童瀹茗，聊当一杯春酒。
不须歌舞倩红裙，为祝百千长寿。

全宋词 李仲光

诗书万卷，绮琴三弄，更有新词千首。
从今日日与遨游，便是天长地久。

李仲虺

如梦令 石门岩

门外数峰围绕。帖石路儿弯小。花老不禁风，委地乱红多少。人悄。人悄。隔叶数声啼鸟。

李子申

多丽

好人人。去来欲见无因。记当时、窃香倚暖，岂期蝶散鹳分。到而今、漫劳梦想，嗟后会、惨啼痕。绣阁银屏，知他何处，一重山尽一重云。暮天杳、梗踪萍迹，还是寄孤村。寂寥月，今宵为谁，虚照黄昏。

细追思、深诚密意，黯然一饷消魂。仗游鱼、漫传尺素，望塞雁、空噎回纹。帐衾寒、香消尘满，博山沈水更谁薰。断肠也、无聊情味，惟有殢芳尊。沈吟久，移灯向壁，掩上重门。

李子西

玉楼春

纱窗春睡朦胧著。相见尚怀相别恶。梦
随城上角声残，泪逐楼前花片落。

东风不解吹愁却。明月几番乖后约。当
时惟恐不多情，今日情多无处著。

李子正

减兰十梅 并序

窃以花虽多品，梅最先春。始因暖律之潜催，正直冰澌之初泮。前村雪里，已见一枝；山上驿边，乱飘千片。寄江南之春信，与陇上之故人。玉脸娉婷，如寿阳之傅粉；冰肌莹彻，逞姑射之仙姿，不同桃李之繁枝，自有雪霜之素质。香欺青女，冷耐霜娥。月浅溪明，动诗人之清兴；日斜烟暝，感行客之幽怀。偏宜浅蕊轻枝，最好暗香疏影。况是非常之标格，别有一种之风情。姮娥好景难拚，那更彩云易散。凭栏赏处，已遍南枝兼北枝；秉烛看时，休问今日与昨日。且辍龙吟之三弄，更停画角之数声。庾岭将军，久思止渴；傅岩元老，专待和羹。岂如凡卉之娇春，长赖化工而结实。又况风姿雨质，晓色暮云。日边月下之妖娆，雪里霜中之艳冶。初开微绽，欲落惊飞。取次芬芳，无非奇绝。锦囊佳句，但能仿佛芳姿；皓齿清歌，未尽形容雅态。追惜花之余恨，舒乐事之余情。试缀芜词，编成短阕。曲尽一时之景，聊资四座之欢。女伴近前，鼓子祇候。

总题

梅萼香嫩。雪里开时春粉润。雨蕊风枝。暗与黄昏取次宜。

日边月下。休问初开兼欲谢。却最妖娆。不似

群花春正娇。

风

东风吹暖。轻动枝头娇艳颤。成片惊飞。不是城南画角吹。

香英飘处。定向寿阳妆阁去。莫损柔柯。今日清香远更多。

雨

潇潇细雨。雨歇芳菲犹淡伫。密洒轻笼。湿遍柔枝香更浓。

琼腮微膩。疑是凝酥初点缀。冷艳相宜。不似梨花带雨时。

雪

六花飞素。飘入枝头无觅处。密缀轻堆。只似香苞次第开。

栏边欲坠。姑射山头人半醉。墙外低垂。窥送佳人粉再吹。

月

寒蟾初满。正是枝头开烂熳。素质笼明。多少风姿无限情。

暗香疏影。冰麝萧萧山驿静。浅蕊轻枝。酒醒更阑梦断时。

日

腾腾初照。半拆琼苞还似笑。莫近柔条。只恐凝酥暖欲消。

三竿已上。点缀胭脂红荡漾。刚道宜寒。不似前村雪里看。

晓

急催银漏。渐渐纱窗明欲透。点检花枝。晓笛映时几片飞。

全宋词 李子正

淡烟初破。仿佛夜来飞几朵。浅粉余香。晨起
佳人带晓妆。

晚

天寒欲暮。别有一般姿媚处。半载斜阳。宝鉴
微开试晚妆。

淡烟轻处。渐近黄昏香暗度。休怕春寒。秉烛
重来仔细看。

早

阳和初布。入萼春红才半露。暖律潜催。与占
百花头上开。

香英微吐。折赠一枝人已去。杨柳贪眠。不道
春风已暗传。

残

香苞渐少。满地残英寒不扫。传语东君。分付
南枝桃李春。

东风吹暖。南北枝头开烂熳。一任飘吹。已占
东风第一枝。

李遵勖

望汉月

黄菊一丛临砌。颗颗露珠装缀。独教冷落向秋天，恨东君不曾留意。

雕阑新雨霁。绿藓上，乱铺金蕊。此花开后更无花，愿爱惜、莫同桃李。

滴滴金

帝城五夜宴游歇。残灯外、看残月。都人犹在醉乡中，听更漏初彻。

行乐已成闲话说。如春梦、觉时节。大家同约探春行，问甚花先发。

李 廌

菩萨蛮 双松庵月下赏梅

城阴犹有松间雪。松间暗淡城头月。月下几枝梅。为谁今夜开。

尊前簪素发。自拥繁枝折。疑是在瑶台。宝灯携手来。

虞美人令

玉栏干外清江浦。渺渺天涯雨。好风如扇雨如帘。时见岸花汀草、涨痕添。

青林枕上关山路。卧想乘鸾处。碧芜千里信悠悠。惟有霎时凉梦、到南州。

品 令

唱歌须是，玉人檀口，皓齿冰肤。意传心事，语娇声颤，字如贯珠。

老翁虽是解歌，无奈雪鬓霜须。大家且道，是伊模样，怎如念奴。

清平乐

落梅呜咽。暗淡城头月。吹满江天惊梦蝶。唤起画楼伤别。

帘风轻触银钩。梧桐玉露新秋。底事琐窗深夜，素娥常伴人愁。

李洙

满庭芳 送张守汉卿赴召

麦秀连云 , 桑枝重绿 , 史君佳政流传。凤
衔丹诏 , 来自九重天。千里欢腾祖帐 , 棠阴外、
多少攀辕。津亭路 纔如五鼓 , 难驻邓侯船。

光华 , 家世事 , 门中列戟 , 圯上遗编。况建
炎勋业 , 图画凌烟。此去朝端济美 , 看平步、两
两台躔。须知道 , 中兴盛治 , 主圣赖臣贤。

西江月 蜡梅

可是江梅开晚 , 从教蜡雪来迟。此花清绝
胜南枝。搀过春风第一。

蘸蜡女工斗巧 , 涂黄汉额偏宜。□腮相倚
并开时。认取东君深意。

李昉

踏莎行 送新城交代李达善

红药香残 ,绿筠粉嫩。春归何处寻春信。
绣鞍初上马蹄轻 ,举头便觉长安近。别酒无
情 ,啼妆有恨。山城向晚斜阳褪。清江极目带
寒烟 ,锦鳞去后凭谁问。

满庭芳 乡老众宾劝制置开府酒

油幕新开 ,骖旄前导 ,暂归梓里春容。致
身槐府 ,功在鼎彝中。慨想东山故侣 ,烟霞外 ,
久阔仙踪。今何幸 ,相逢吐握 ,谈笑一尊同。

德星 ,占瑞处 ,旌麾五马 ,袞绣三公。对渭
川遗老 ,绛县仙翁。厚意杯传绀玉 ,那堪更 ,篚
实囊红。拚沈醉 ,今宵盛事 ,复见古人风。

千秋岁 四明赵制置、史开府劝乡老众宾酒

鄮峰凝瑞 ,鄞水浮佳气。晴景转 ,花光媚。
碧幢森大纛 ,红旆纷千骑。相遇处 ,满城鹤发
群仙萃。

绮席张高会。鼙鼓笙箫沸。金兽袅 ,檀烟

全宋词 李昉

翠。玉山环回座，休惜今朝醉。觞再举，清歌
共引千秋岁。

李 璿

水龙吟

腰刀首帕从军。戍楼独倚闲凝眺。中原气象，狐居兔穴，暮烟残照。投笔书怀，枕戈待旦，陇西年少。叹光阴掣电，易生髀肉，不如易腔改调。

世变沧海成田，奈群生、几番惊扰。干戈烂漫，无时休息，凭谁驱扫。眼底山河，胸中事业，一声长啸。太平时、相将近也，稳稳百年燕赵。

醴陵士人

一剪梅

宰相巍巍坐庙堂。说着经量。便要经量。
那个臣僚上一章。头说经量。尾说经量。
轻狂太守在吾邦。闻说经量。星夜经量。
山东河北久抛荒。好去经量。胡不经量。

全宋词 厉元范

厉元范

失调名 梦中得

叶叶柳眉齐抹翠，稍稍花脸争匀白。

利 登

绿头鸭

晚春天。柳丝初透晴烟。黯离怀、绿房深处，艳游曾记当年。衬龙绡、亭亭玉树，步鸳褥、窄窄金莲。烧蜜调蜂，翦花挑蝶，香云微湿绿弯鬟。嬉游困，倚郎私语，还爱抚郎肩。共携手，海棠院左，翡翠帘边。

恨无情、锦笼鹦鹉，等闲轻语花前。昔相怜、关山咫尺，今相望、咫尺关山。是妾心阑，是郎意懒，是郎无分妾无缘。都休问、金枝云里，何日跨金鸾。深盟在，香囊暗解，终值双鸳。

菩萨蛮

玉阑干外重帘晚。流云欲度长天远。花草不知名。春来各自春。

绿鞍游冶客。何处垂杨陌。不信不归来。海棠花又开。

玉楼春

夹帘不卷重堂暮。白骑少年何处去。云

根稚藕已胜花，烟外子松今作树。

金梯月涩知无与。宝瑟风惊犹自语。斜河一道界相思，横隔天心寒似雾。

水调歌头

日月换飞涧，风雨老孤松。千岩万壑秋重，白气接长空。一笑掀髯徐起，苍佩腰间相照，犹自涌晴虹。桑海几番覆，人尚醉春风。

横白石，结绿绮，送飞鸿。十年梦事消歇，长剑吼青龙。却笑人间多事，一壳蜗涎光景，颠倒死英雄。云日空蒙里，玉鹤任西东。

洞仙歌

弄香吹粉，记前回酒困。绿露沈沈转花影。翠帘深，隐隐红雾依人，荷月静，新样双鸾交映。

如今谁念省。短雨长云，曾托琵琶再三问。最苦绿屏孤，夜久星寒，无处顿、风流心性。又莫是偷香寄韩郎，到漏泄春风，一枝花信。

过秦楼

眉黛山分，靛朱星合，郁郁夜堂初见。芙蓉寄隐，豆蔻传香，便许翠鬟偷剪。迎夜

全宋词 利 登

易羞，欲晨先怯，风流楚楚未惯。正流苏帐掩，绿玉屏深，红香自暖。

谁信道、媚月难留，惊云易散，从此三桥路远。巢燕春归，剪花词在，难寄红题一片。料想伊家，如今羞傍琴窗，慵题花院。但碧桃影下，应对流红自叹。

齐天乐

淡云荒草秋汀暮，归心又寒烟水。论槛移花，量船载酒，寂寞当年情味。孤蓬夜闭。听四壁松声，欲高还细。似近如遥，露鸿声乱楚天外。

蓝桥人断岁久，旧家曾共赏，九华花事。艳雪初融，生香自暖，消得金莲贴地。相思破睡。谩一点琴心，暗关千里。愁怯潮生，晓帆风又起。

鹧鸪天

凤尾鬟香再叠梳。藕丝衫嫩蹙双鱼。闲收未利熏藤枕，自插芙蓉绕翠厨。

新浴后，浅妆初。卫夫人帖学行书。西窗一霎黄昏雨，笑问新凉饮酒无。

风流子

梨园花柳地，扶残醉、曾记问妖娆。叹惹住轻烟，柔丝未改，霏零疏雨，腻粉先飘。

全宋词 利 登

更低道，花无三日艳，柳有一年娇。卷翠未迟，醉红易失，共偎香影，同赏良宵。

如今知何处，三山远，云水一望迢迢。傍砌青鸾好在，谁送归飙。但花下红云，尚通夕照，柳边白月，自落寒潮。最是无端，子规啼破寒梢。

风入松

断芜幽树际烟平。山外又山青。天南海北知何极，年年是、匹马孤征。看尽好花成子，暗惊新笋抽林。

岁华情事苦相寻。弱雪鬓毛侵。十千斗酒悠悠醉，斜河界、白日云心。孤鹤尽边天阔，清猿咽处山深。

水调歌头

相聚不知好，相别始知愁。笋舆伊轧，穿尽斜照古平州。今夜荒风脱木，明夜山长水远，后夜已他州。转觉家山远，何计去来休。

酒堪沽，花可买，月能留。相思酒醒，花落五更头。长记疏梅影底，一笛紫云飞动，相对大江流。此别无一月，一月一千秋。

失调名

花外潮回，剑边虹去，抚寒江千里。

虞美人

当时养士知何许。总把降幡去。汉家王
气塞乾坤。一树盈盈、不为汉家春。

立斋

沁园春 寿白侍从八十

表表耆英，松柏贞刚，冰霜洁清。正持囊紫禁，急流勇退，步角巾绿野，闲处安身。里社鸡豚，家山猿鹤，物我相忘法从荣。东溪畔，似非熊尚父，在渭之滨。

闲来袖手梅亭。似桃李纷纷谷自春。算高风难进，缙绅楷式，颓波屹立，乡曲仪刑。厚德清名，疏星碧落，屈指如公今几人。无他祝，但似山难老，镇压嚣尘。

连静女

失调名

朦胧月影 ,黯淡花阴 ,独立等多时。只恐冤家误约 ,又怕他、侧近人知。千回作念 ,万般思忆 ,心下暗猜疑。蓦地偷来厮见 ,抱著郎、语颤声低。

轻移莲步 ,暗褪罗裳 ,携手过廊西。已是更阑人静 ,粉郎恣意怜伊。霎时云雨 ,半晌欢娱 ,依旧两分飞。去也回眸告道 ,待等奴、兜上鞋儿。

武陵春

人道有情须有梦 ,无梦岂无情。夜夜相思直到明。有梦怎生成。

伊若忽然来梦里 ,邻笛又还惊。笛里声声不忍听。浑是断肠声。

连久道

清平乐 渔父

阵鸿惊处。一网沈江渚。落叶乱风和细雨。拨棹不如归去。

芦花轻泛微澜。篷窗独自清闲。一觉游仙好梦，任它竹冷松寒。

连 妙 淑

望江南

寒料峭，独立望长城。木落萧萧天远大，
□声羌管遏云行。归客若为情。
樽酒尽，勒马问归程。渐近芦沟桥畔路，
野墙荒驿夕阳明。长短几邮亭。

连仲宣

念奴娇

暗黄著柳，渐寒威收敛，日和风细。
□□端门初锡宴，郁郁匆匆佳气。太一行春，
青藜照夜，夜色明如水。鳌山彩结，恍然移
在平地。

曲盖初展湘罗，玉皇香案，近雕阑十二。
夹道红帘齐卷上，两行绝新珠翠。清跸声乾，
传柑宴罢，闪闪星球坠。下楼归去，觚棱月
衔龙尾。

梁安世

西江月

淳熙庚子重九，梁次张拉韩廷玉、但能之、陈颖叔同游临桂栖霞洞，赋西江月词

南国秋光过二，宾鸿未带初寒。洞中驼褐已嫌单。洞口犹须挥扇。

夕照千峰互见，晴空万象都还。羡他渔艇系澄湾。敲枕玻璃一片。

梁大年

满江红 寿太守 四月三十

九十炎光 ,又过了、三分之一。记当年光
际 ,诞生良弼。崧岳降神钟秀气 ,孕成间世真
英杰。妙文章、拾芥立功名 ,谁能敌。

周孔业 ,邹軻质。伊尹志 ,渊明节。袖经
纶妙手 ,屡投班笔。富贵一朝知己逼。封侯谈
笑真堪觅。信功名、管取出长年 ,看箕翼。

水调歌头 寿隐者 十一月初七

南极寿星现 ,佳气蔼庭除。谁为绛人甲
子 ,为我一轩渠。恰喜亥成二首 ,还庆阳来七
日 ,和气渐舒徐。敬为图南祝 ,一瓣问兴居。

傲松筠 ,抚龟鹤 ,乐蓬壶。斑衣戏舞 ,春满
兰玉正森如。却忆杜陵老子 ,因羨碧山学士 ,
茅屋换银鱼。何似温柔地 ,丝竹伴琴书。

梁栋

念奴娇 春梦

一场春梦 ,待从头、说与傍人听著。罨画溪山红锦障 ,舞燕歌莺台阁。碧海倾春 ,黄金买夜 ,犹道看承薄。雕香剪玉。今生今世盟约。

须信欢乐过情 ,闲嗔冷妒 ,一阵东风恶。韵白娇红消瘦尽 ,江北江南零落。骨朽心存 ,恩深缘浅 ,忍把罗衣著。蓬莱何处 ,云涛天际冥漠。

摸鱼儿 登凤凰台

枕寒流、碧萦农带 ,高台平与云倚。燕来莺去谁为主 ,磨灭谪仙吟墨。愁思里。待说与山灵 ,还又羞拈起。箫韶已矣。甚竹实风摧 ,桐阴雨瘦 ,景物变新丽。

江山在 ,认得刘郎阿寄。年来声誉休废。英雄不博胭脂井 ,谁念故人衰悴。时有几。便凤去台空。莫厌频游此。兴亡过耳。任北雪迷空 ,东风换绿 ,都付梦和醉。

一萼红 芙蓉和友人韵

怨东风。把韶华付去，秣李小桃红。黄落山空，香销水冷，此际才与君逢。敛秋思、愁肠九结，拥翠袖、应费剪裁工。晕脸迎霜，幽姿泣露，寂寞谁同。

休笑梳妆淡薄，看浮花浪蕊，眼底俱空。夜〔帐〕〔帐〕云闲，寒城月浸，有人吟遍深丛。自前度、王郎去后，旧游处、烟草接吴宫。惟有芳卿寄言，蹙损眉峰。

梁明夫

贺新郎 寿吕道山四十九岁

万里朝天去。见浔阳江上，风引仙舟淮浦。到得玉阶方寸地，历历苍生辛苦。要尽活、江南一路。昼绣归来沾御渥，听邦人、箫鼓迎初度。龟与鹤，亦掀舞。前身定是〔磻〕溪吕。笑当时、八十始卜，非〔熊〕非虎。试数行年逢革卦，革命正逢汤武。真千载、风云会遇。拟向庐山招五老，诣道山、同献蓬莱赋。仍剪菊，荐秋露。

宋人话本小说中人物词

梁意娘

秦楼月

春宵短。香闺寂寞愁无限。愁无限。一声窗外，晓莺新啭。

起来无语成娇懒。柔肠易断人难见。人难见。这些心绪，如何消遣。

茶瓶儿

满地落花铺绣。春色著人如酒。晓莺窗外啼杨柳。愁不奈、两眉频皱。关山杳。音尘悄。那堪是、昔年时候。盟言辜负知多少。对好景、顿成消瘦。

了元

满庭芳

鳞甲何多，羽毛无数，悟来佛性皆同。
世人何事，刚爱口头浓

痛把群生割剖，刀头转、鲜血飞红。
[□□□]，零炮碎炙，不忍见渠侬。

喉咙。才咽罢，龙肝凤髓，毕竟无踪。
谩赢得、生前夭寿多凶。奉劝世人省悟，休
恣意、激恼阎翁。轮回转，本来面目，改换
片时中。

西江月

[空]地重重帘幕，临风小小庭轩。绿窗
朱户映蝉娟。忽听歌讴宛转。

既是耳根有分，因何眼界无缘。分明咫
尺遇神仙。隔个绣帘不见。

品字令

觑著脚。想腰肢如削。歌罢遏云声，怎
得向、掌中托。

醉眼不如归去，强罢身心虚霍。几回欲去待掀帘，犹恐主人恶。

蝶恋花

执板娇娘留客住。初整金钗，十指纤纤露。歌断一声天外去。清音已遏行云住。
耳有姻缘能听事。眼见姻缘，便得当前觑。眼耳姻缘都已是。姻缘别有知何处。

浪淘沙

昨夜遇神仙。也是姻缘。分明醉里亦如然。睡觉来时浑是梦，却在身边。
此事怎生言。岂敢相怜。不曾抚动一条弦。传与东坡苏学士，触处封全。

如梦令

记得去年时节。春色湖光晴彻。杨柳绿依依，因甚行人 [□] 折。听说。听说。已属他人风月。

廖 刚

望江南二首 送黄冕仲知福唐

无诸好，方面镇全闽。千骑泛云归洞府，
三山明玉外风尘。依约是蓬瀛。

贤刺史，龙虎擅香名。金花已传当日梦，
锦衣聊慰故乡情。和气万家春。

又

无诸好，金地遍重城。乌石亭危千嶂合，
荔枝楼暖百花明。十里暮潮平。

贤刺史，来暮相欢迎。终向凤池朝紫极，
暂依猿洞驻朱轮。风月锦堂春。

满路花

和敏叔中秋词 癸巳，周守约敏叔来作中秋

雨霁烟波阔，雁度陇云愁。西风庭院不
胜秋。桂华光满，偏照最高楼。东山携妓约，
故人千里，夜来为舫仙舟。

明眸皓齿，歌舞总名流。恼人情态物中
尤。阳春一曲，谁把万金酬。便好拚沈醉，
此夕姮娥，共须著意攀留。

望江南二首 贺毛检讨生辰

柯山瑞，云路玉桥横。六月天香琼蕊秀，
千年人瑞昴星明。风露湿麒麟。

廊庙器，冰雪照精神。妙世文章凌贾马，
致君事业富姬衡。松桧倚青青。

又

蓬山晓，龟鹤倚芝庭。云覆宝熏迷舞凤，
玉扶琼液荐文星。棠荫署风清。

人尽道，天遣瑞升平。九万鹏程才振翼，
八千椿寿恰逢春。貂袂瞩公荣。

阮郎归

草堂王生以妄想天降玉牌为实事，使有司求之，
既又托以梦。因戏作云。乙未云间舟中

月桥风槛水边居。画楼三鼓初。草堂收
拾读闲书。起看清夜徂。

闲想像，尽踌躇。玉牌金字铺。梦魂纵
有也成虚。那堪和梦无。

蓦山溪 次韵知点

论长校短，总是非闲誉。光景百年中，
似难留、长江东去。随缘游戏，触□寄高情，
西楼月，北窗风，鸚鹄尊前舞。

故人襟韵，千里心相许。飞骑趁花时，
正名园、揉风洗雨。玻璃潋滟，聊共醉红裙，

全宋词 廖 刚

阳春曲，碧云词，慷慨怀千古。

廖世美

烛影摇红 题安陆浮云楼

霭霭春空，画楼森耸凌云渚。紫薇登览最关情，绝妙夸能赋。惆怅相思迟暮。记当日、朱阑共语。塞鸿难问，岸柳何穷，别愁纷絮。

催促年光，旧来流水知何处。断肠何必更残阳，极目伤平楚。晚霁波声带雨。悄无人、舟横野渡。数峰江上，芳草天涯，参差烟树。

好事近 夕景

落日水熔金，天淡暮烟凝碧。楼上谁家红袖，靠阑干无力。

鸳鸯相对浴红衣，短棹弄长笛。惊起一双飞去，听波声拍拍。

廖行之

洞仙歌 寿老人

虞弦挥按，甫奏薰风曲。两两尧蓂长新绿。揖鳌峰、连雁峤，辚辚圆融，总里许、北郭门围全属。

年年才见夏，喜溢粉榆，龙穴霏烟霭晴谷。向氤氲和气里，岁奉瑶觞，试屈指、几阅梅林初熟。待一品官高见玄孙，算八十彩衣，更饶遐福。

念奴娇 寿四十叔

薰风庭院，报槐阴拥翠，池波凝绿。瑞气葱葱浮燕寝，羽仗霓旌相属。鸞鹭开祥，长庚入梦，诧列仙图篆。林泉高迈，肯应轩冕尘俗。

好是妙舞清歌，浮瓜沈李，荐杯中醽醑。鹊尾炉生香篆细，又作如何祈祝。试问蓬莱，丹崖胜处，几摘蟠桃熟。东方何在，凜然能继高躅。

贺新郎 和狄志父秋日述怀

玉宇□蓬户。渺凉声、箭掺梧井，乱零枫浦。得得西山朝来爽，碧瘦千崖万树。清兴在、烟霞深处。拄笏风流今谁是，但闻鸡、夜半犹狂舞。试举看，渠多许。

青云万里君夷路。肯区区、辘张兔穴，沈迷金坞。流水高山真难料，休把朱弦浪抚。任展转、翻云覆雨。且对佳时随意乐，更从今、莫问惊人句。算万事，总天赋。

又 赋木犀

修月三千户。拥冰轮、同游碧落，问津牛浦。上界真仙多才思，乞与瑶阶玉树。渺万里、人间何处。云叶依依分清荫，忆当时、掩映霓裳舞。算万木，宁如许。

年年萧爽幽岩路。倚西风、吹香金粟，超然云坞，一洗纷纷凡花尽，堪写清商对抚。为豁散、蛮烟瘴雨。脱俗高标谁能领，向骚人、正欠题新句。须大手，与君赋。

水调歌头 寿外舅

林梢挂弦月，江路粲寒梅。一年清绝，好是造物巧安排。今日不知何日。佳气更随喜气，满室已春回。欢事一时足，黄色两眉开。

紫髯公，平日事，亦高哉。都将功业，分付兰玉满庭阶。慈爱浑嗤张傅，信义更高

吴季，别是一襟怀。岁岁长生酒，剩□紫霞杯。

又 寿长兄

天下伟人物，荆楚号名流。幅员千里，英气磅礴岳南州。雁峤高参翼轸，石鼓下盘朱府，袞袞应公侯。常记生申旦，明日是中秋。

挈明月，翳翔凤，驷飞虬。东南一尉，何事三载漫淹留。谈笑洞庭青草，从此阆风阆阖，高处看鳌头。更种阶庭玉，慈母念方稠。

又 寿汪监

祥起玉龙甲，庆衍紫枢垣。奎文得岁，佳气磅礴斗牛间。天意方扶兴运，贤业更看奕世，袞袞照英躔。四海具瞻久，膏泽满湘川。

岁六月，苏大旱，作丰年。喁喁百万生齿，何处不沾恩。此是鸿钧事业，那更青毡步武，早晚即调元。混一车书了，还领赤松仙。

又 寿□守

黄色起犀表，紫绶照金章。两朝耆德，应是南国旧龚黄。曾上方壶蓬岛，万里鲸波不作，炎海赖清凉。缓造鹓鸿地，高卧水云乡。

近新来，春色好，遍潇湘。不知今日何日，佳气拥高堂。竞把芳尊为寿，细祝遐龄难老，福祿未渠央。国栋欠元老，仙桂看诸

郎。

又 寿邓彦麟

凉吹起空阔，疏雨敛轻阴。潇湘江上秋色，佳处不胜清。拄笏西山一望，气与千崖高爽，天意属奇英。威凤下瑶阙，丹桂矗云根。

汉元侯，流德厚，在云孙。金昆玉季，曾共接武上青云。堂上瑶池仙姥，庭下芝兰玉树，好事萃于门。剩讲经纶事，早晚自公卿。

又 寿欧阳景明

苍立箴龙秀，青压雨梅肥。清和天气，无限佳景属斯时。试听虞弦初理，便有薰兮入奏，风物正熙熙。此时定何日，香篆袅金猊。

记当年，萸两荚，应熊罴。男儿壮志，端在伊傅与皋夔。况是从容书史，养就经纶功业，早晚帝王师。但了公家事，方与赤松期。

又 寿武公望

韩国武中令，公望乃云孙。平生壮志，凛凛长剑倚天门。郁积胸中谋虑，慷慨尊前谈笑，袖手看风云。唾手功名事，诗句自朝昏。

况高怀，吾所敬，果难能。千金生产，一笑推尽与诸昆。所至才成辄去，不为区区芥蒂，此意有谁论。且举杯中酒，今日是生辰。

沁园春 和苏宣教韵

直下承当，本来能解，莫遣乾休。算如今蹉过，峥嵘岁月，分阴可惜，一日三秋。闹里偷声，日中逃影，用尽机关无少留。争知道，是沕生即水，水外无沕。

世人等是悠悠。谁著个工夫向里求。但掩耳窃钟，将泥洗块，觅花空里，舐蜜刀头。何以忙中，尻舆浸假，邀取三彭同载游。真如界，向毗卢顶上，荐取无忧。

千秋岁 寿外姑

腊余时候，天意收寒早。梅信动，春先到。晓来湘水上，有底风光好。春有意，惯随仙仗来蓬岛。

一念到人间，依约瑶池道。心好在，慈为宝。蟠桃多岁月，不数如瓜枣。千岁也，朱颜绿鬓人难老。

青玉案 书七里桥店

片帆稳送扁舟去。又还踏、江湖路。回首京城旧游处。断魂南浦，满怀装恨，别后凭谁诉。

长歌击剑论心素。有志功名未应暮。自诵百僚端复许。归来犹记，东坡诗语，但草凌云赋。

又 重九忆罗舜举

家山此去无多路。久没个、音书去。一别而今佳节度。黄花开未，白衣到否，篱落荒凉处。

峥嵘岁月还秋暮。空腹便便无好句。菊意愆期浑未许。那堪惹恨，年来此日，长是潇潇雨。

满庭芳 丁未生朝和韵酬表弟武公望

五甲科名，半生蹭蹬，胸中可谓忘奇。荣华外物，算岂是人为。自有吾身事业，最难得、□养亲时。萱堂好，紫鸾重诰，寿与岳山齐。

世间，欢乐事，争名蜗角，伐性蛾眉。谩须臾变化，苍狗云衣。那似千秋寿母，功名事、分付吾儿。从今去，捧觞戏彩，双绶更相宜。

凤栖梧 寿长嫂

吾母慈祥膺上寿。福庇吾家，近世真希有。丘嫂今年逾六九。康宁可嗣吾慈母。

我愿慈闱多福厚。更祝遐龄，与母齐长久。鸾诰联翩双命妇。华堂千岁长生酒。

又 寿外舅

破腊先春梅有意。管领年华，总在清香蕊。不逐浮花红与紫。岁寒来寿仙翁醉。

全宋词 廖行之

袞袞诸公名又利。谁似高标，摆却人间事。长对南枝添兴致。尊前好在三千岁。

临江仙 元宵作

春意茫茫春色里，又还几度花期。淡晴时候尽融怡。梅腮翻白后，柳眼弄青时。

正是江城天气好，楼台灯火星移。相逢无处不相宜。轻狂行乐处，明月夜深归。

西江月 舟中作

绀滑一篙春水，云横几里江山。一番烟雨洗晴岚。向晓碧天如鉴。

客枕谩劳魂梦，心旌长系乡关。封姨慳与送归帆。愁对绿波肠断。

又 寿友人

试数阶蓂有几，昨朝看到今朝。南薰早动舜琴谣。端为熊罴梦兆。学粹昔人经制，文高古乐箫韶。天风从此上扶摇。回首不劳耕钓。

鹧鸪天 寿四十舅

飞尽林花绿叶丝。十分春色在茶蘼。多情几日风朝雨，留恋东风未许归。

天意好，与君期。如今且醉□蛾眉。明年上国春风里，赏遍名花得意时。

又 寿外舅

腊月今朝恰一旬。梅花开遍陇头春。篆烟起处人称寿，从昔家和福自生。

新喜事，得佳姻。贤郎顺妇正充庭。从今更祝千千岁，要与邦人作典型。

又 寿外姑

细数元正隔两朝。眼看杨柳又新条。岁寒独有江梅耐，曾伴瑶池下绛霄。

香篆袅，烛花烧。团栾喜气沸欢谣。慈祥自是长生乐，不用春醪秘与椒。

又 代人寿欧阳景明

送了春归雨未收。雨肥梅子满枝头。心知办此和羹品，正为和羹国手谋。

莫两荚，岁千秋。崧高神气禀公侯。好将一卷周公礼，起佐皇家定九州。

又 寿叔祖母

曾宴瑶池万玉宫，鸾骖此日自从容。杓携鹑首坤维外，岁在降娄虎坎中。

生指李，寿方瞳。云仍今有鹊巢风。传家自得长年诀，安用人祈鹤与松。

又 寿外舅

兰谷清香入岭梅。多根应尔暖先回。腊前似得真消息，争逐尧蓂十叶开。

春满室，酒盈杯。百花宁许到尊罍。仙姿要是仙家伴，长为遐龄岁一来。

又 寿邓孺人

畴昔君王庆诞辰。欢传金母下瑶城。只应仙子陪仙仗，却向人间作寿星。

萧史伴，更和鸣。殷勤好嗣太夫人。直须同饮长生酒，剩看芝兰照谢庭。

卜算子 元夜观灯

云破露新晴，月上输清气。最是江城有底佳，灯火人烟沸。

行乐尽欢娱，眼界尤妍媚。多少江滨解佩人，邂逅无穷意。

点绛唇 和梁从善

屈指家山，匆匆又数今朝过。客情那可。愁似天来大。

烟雨蒙蒙，细浥轻尘堕。君知么。却成甚个。春暮犹江左。

又 赠别李唐卿

秋兴连天，又还不分秋光老。莼鲈犹好。莫落秋归后。

有底从人，上马皆东首。君知否。阳关三奏。消黯情多少。

又 送人归新城

音信西来，匆匆思作东归计。别怀萦系。为个人留滞。

尊酒团栾，莫惜通宵醉。还来未。满期

君至。只在初三四。

又 贺四十五舅授室四阁

年少清新，襟裾那受红尘污。还他礼数。
莫遣衣冠粗。

拟倩东风，西逐轮蹄去。泠然御。飘飘
仙趣。直到骖鸾处。

又

此去何之，骀鸾车马朝来起。扬鞭西指。
意气眉间是。

闾里儿童，竞矚秦萧史。归时几。快瞻
行李。还看如云喜。

又

玳席华筵，嘉宾环集三千履。兰膏芬芷。
一簇红莲里。

花覆玉郎，苒苒青衫嫩。咸倾企。小登
科第。有底新桃李。

又

玉树芝兰，冰清况有闺房秀。画堂如昼。
相对倾醇酎。

合卺同牢，二姓欢佳耦。凭谁手。鬓丝
同纽。共祝齐眉寿。

丑奴儿 庆邓彦鳞生子

一春底事多佳气，非雾非云。郁郁氤氲。
端为君家诞阿兴。

庆源袞袞由高密，福有多根。百子千孙。

此是元侯嫡耳孙。

如梦令 记梦

雨歇凉生枕簟。不梦大槐宫殿。惟对谪仙人，一笑高情睖睖。离恨。离恨。无奈晓窗鸡啭。

又 咏梅

应是南枝向暖。那更青春未晚。竹外见红腮，芳意与香撩乱。肠断。肠断。无奈东风独占。

鹧鸪天 咏梅菊呈抚州葛守

九日东篱已泛觞。陇头犹待返魂香。那知此日花神约，得得同登君子堂。

迎腊雪，傲晴霜。西湖风韵接柴桑。寿潭更酌长生水，岁岁和羹入帝乡。

减字木兰花 送别

相从归去。行尽江吴到湘楚。欲话离怀。万事须凭酒一杯。

临歧握手。赠子一言君听否。舌在何忧。莫作人间儿女愁。

廖莹中

木兰花慢 寿贾师宪

请诸君著眼，来看我、福华编。记江上秋风，鲸鳌涨雪，雁徼迷烟。一时几多人物，只我公、只手护山川。争睹阶符瑞象，又扶红日中天。

因怀下走奉囊鞬。磨盾夜无眠。知重开宇宙，活人万万，合寿千千。鳧鹭太平世也，要东还、赴上是何年。消得清时钟鼓，不妨平地神仙。

个侬

恨个侬无赖，卖娇眼、春心偷掷。苍苔花落，先印下一双春迹。花不知名，香才闻气，似月下笙篴，蒋山倾国。半解罗襟，蕙薰微度，镇宿粉、栖香双蝶。语态眠情，感多情、轻怜细阅。休问望宋墙高，窥韩路隔。

寻寻觅觅。又暮雨凝碧。花径横烟，红扉映月，尽一刻、千金堪值。卸袜熏笼，藏灯衣桁，任褰臂金斜，搔头玉滑。更恨檀郎，恶怜深惜。尽颤袅、周旋倾侧。软玉香钩，

全宋词 廖莹中

怪无端、凤珠微脱。多少怕晓听钟，琼钗暗
擘。

廖正一

瑶池宴令

飞花成阵。春心困。寸寸。别肠多少愁
闷。无人问。偷啼自搵。残妆粉。

抱瑶琴、寻出新韵。玉纤趁。南风未解
幽愠。低云鬓。眉峰敛晕。娇和恨。

林表民

玉漏迟 和赵立之

并湖游冶路。垂堤万柳，麴尘笼雾。草色将春，离思暗伤南浦。旧日愔愔坊陌，尚想得、画楼窗户。成远阻。凤笺空寄，燕梁何许。

凄凉瘦损文园，记翠筵联吟，玉壶通语。事逐征鸿，几度悲欢休数。莺醉乱花深里，悄难替、愁人分诉。空院宇。东风晚来吹雨。

林 逋

相思令

吴山青。越山青。两岸青山相对迎。争忍有离情。

君泪盈。妾泪盈。罗带同心结未成。江边潮已平。

点绛唇

金谷年年，乱生春色谁为主。馀花落处。满地和烟雨。

又是离歌，一阙长亭暮。王孙去。萋萋无数。南北东西路。

霜天晓角

冰清霜洁。昨夜梅花发。甚处玉龙三弄，声摇动、枝头月。

梦绝。金兽爇。晓寒兰烬灭。要卷珠帘清赏，且莫扫、阶前雪。

瑞鹧鸪

众芳摇落独鲜妍。占尽风情向小园。疏影横斜水清浅，暗香浮动月黄昏。

寒禽欲下先偷眼，粉蝶如知合断魂。幸有微吟可相狎，不须檀板共金尊。

林 淳

水调歌头 温陵东湖次陈休斋体仁韵

潇洒东湖上，夜雨洗清秋。朝来尘霁，凝望千里兴悠悠。山色揉蓝深染，波影青铜新铸，□冷翠光浮。蓑笠真吾事，聊整钓鱼钩。

坐中客，凌王谢，更风流。一觴一咏，豪俊谈笑气吞牛。花月连环长好，到处名园池□，遇景且遨游。试问陶元亮，底事赋归休。

鹧鸪天 西湖

天近祆知雨露浓。湖山无日不春风。闲花野草皆掀舞，曾在君王顾盼中。

时易得，会难逢。朝为逆旅暮三公。蛟龙得雨飞无便，鸡犬腾云夙有功。

柳梢青

富贵园林。清虚清馆，随意登临。物外风光，云明花媚，鸟语烟深。

徐徐缓辔微吟。迤邐度、松间柳阴。览
遍幽奇，小舟归晚，月映波心。

浣溪沙 忆西湖

却忆西湖烂漫游。水涵山影翠光浮。轻
舟短棹不惊鸥。

带露精神花妩媚，依风情态柳温柔。莺
歌燕语巧相留。

水调歌头 次赵帅开西湖韵

湖波涨新绿，环绕越王山。棠斋清昼余
暇，赢得静中观。四面屏围碧玉，十里障开
云锦，冰鉴倒晴澜。目送孤鸿远，心与白鸥
闲。

隘游人，喧鼓吹，杂歌欢。晓天澄霁，
花羞柳妒怯春寒。好在风光满眼，只恐阳春
有脚，催诏下天关。剩写鹅溪幅，归去凤池
看。

又

疏水绕城郭，农利遍三山。使君重本，
雅声初不在游观。化出玉壶境界，挥洒锦囊
词翰，笔下涌波澜。天巧无余蕴，意匠自舒
闲。

拥鳌头，民同乐，颂声欢。养花天气，
云柔烟腻护朝寒。桃李满城阴合，杨柳绕堤
绿暗，幽鸟语间关。似诉风光好，留与后人
看。

又

螺水亘千古，鳌顶冠三山。年丰帅阃尘静，栏槛纵遐观。四望潮登浦溆，万顷绿浮原野，堤岸溢波澜。吠浣皆沾足，日永桔槔闲。

肆华筵，鱼鸟乐，众宾欢。良辰好景，年年莫放此盟寒。且念新湖遗爱，莫作故园遐想，到处是乡关。勋业知非晚，聊把镜频看。

菩萨蛮

鹅溪净称烟笼月。澄心白称光浮雪。净白两俱宜。天然浓淡枝。

花光神意远。吮墨含毫浅。依约有香来。春风随手开。

减字木兰花 郑尚书席上借前韵

嫣然笑粲。醉靥融滋春意烂。侍宴终宵。欢动帘帟酒易消。

尊前狂客。惊见蕊仙新谪籍。珠阁深关。丹就同归海上山。

又

烛花呈灿。瑞气满筵春欲烂。月色中宵。疑是阶前雪未消。

骚人词客。魂断蜡梅香已籍。谁更情关。一点新愁入远山。

浣溪沙 郑尚书席上再作

冒雪休寻访戴船。红炉胜爇宝香然。阁
儿煨暖两三椽。

更有玉杯传素手，梅花相对两争妍。停
杯听唱月娟娟。

林 革

满江红

淳祐己酉良月，自淦入桂，舫舟溪浒，有感而作

十载扁舟，几来往、三吾溪上。天宝事，一回看著，一回惆怅。笔画模糊犹雅健，文章褒贬添悲壮。枉教人、字字费沈吟，评轻重。

西北望，情无量。东南气，真长王。想忠臣应读，宋中兴颂。主圣自然皆乐土，时平正合储良将。笑此身、老大尚奔驰，知何用。

林横舟

大江词 寿仙尉 十一月初一

一萼呈秀 ,近迎长佳节 ,拟书云物。隐隐虹桥天际下 ,光照梅仙丹壁。鹏路横飞 ,蟾宫直上 ,早脱麻衣雪。一时篇翰 ,并游俱是魁杰。

长记怀燕良辰 ,华堂称庆 ,皓齿清歌发。自暖杯中须缓举 ,莫放金炉香灭。事业伊周 ,功名韩白 ,未到星星发。九天有诏 ,蓝田□□风月。

林 洪

恋绣衾

冰肌生怕雪未禁。翠屏前、短瓶满簪。
真个是、疏枝瘦，认花儿、不要浪吟。

等闲蜂蝶都休惹，暗香来、时借水沈。
既得个、厮偎伴，任风霜、尽自放心。

林季仲

倾杯乐 宠庆主人寿 , 代作

璧月初圆 , 彩云轻护 , 散雪叠冰凉馆。张
眉竞巧 , 赵瑟新成 , 整顿戏衫歌扇。寿酒殷勤 ,
娇语温柔 , 只愁杯浅。正连山玉枕 , 回波瑶席 ,
漏长更款。

良会久、细拥香肩 , 瑶庭闲步 , 共指渡河星
点。今朝此日 , 同祝卿卿 , 福寿禄星齐转。但
愿与君 , 歌舞常新 , 欢娱无算。看河桥鹊架 , 重
会双星燕婉。

林实之

八声甘州

客星堂下水，碧浮空、烟树几重重。想故人当日，论情蓬藿，际会云龙。底事泥涂轩冕，不肯作三公。千仞钓江浒，此意谁同。

应笑赤松黄石，效痴儿成事，犹自言功。怎知他箕颍，袖手独春容。幸风月、有人料理，自家山叟与溪翁。鸣榔晚，一声长啸，相送冥鸿。

林 式 之

酹江月

桐皋东去，又依然、烟际云边柔橹。赖有双台知己耳，牢落孤怀欲吐。小倚云根，细商心事，提起千年语。九天飞梦，别来长记幽渚。

试说北海归文，西山何事，犹不甘臣武。广大尧天箕颖小，绵上可能如许。举世真痴，先生长啸，尘海谁堪与。啸声吹送，刺天鸾鹤冲举。

林 外

洞仙歌

飞梁压水，虹影澄清晓。橘里渔村半烟草。今来古往，物是人非，天地里，唯有江山不老。

雨巾风帽。四海谁知我。一剑横空几番过。按玉龙、嘶未断，月冷波寒，归去也、林屋洞天无锁。认云屏烟障是吾庐，任满地苍苔，年年不扫。

林仰

少年游 早行

霁霞散晓月犹明。疏木挂残星。山径人稀，翠萝深处，啼鸟两三声。

霜华重迫驼裘冷，心共马蹄轻。十里青山，一溪流水，都做许多情。

林正大

括酹江月

诸公台省，问先生何事，冷官如许。甲第纷纷梁肉厌，应怪先生无此。道出羲皇，才过屈宋，空有名垂古。得钱沽酒，忘形欲到尔汝。

好是清夜沈沈，共开春酌，细听檐花雨。茅屋石田荒已久，总待先生归去。司马子云，孔丘盗跖，到了俱尘土。不须闻此，生前杯酒相遇。

水调歌 送敬则赴袁州教官

人笑杜陵客，短褐鬓如丝。得钱沽酒，时赴郑老同襟期。清夜沈沈春酌，歌语灯前细雨，相觅不相疑。忘形到尔汝，痛饮真吾师。

问先生，今去也，早归来。先生去后，石田茅屋恐苍苔。休怪相如涤器，莫学子云投阁，儒术亦佳哉。谁道官独冷，袞袞上兰台。

满江红

袞袞诸公，嗟独冷、先生宦薄。夸甲第、纷纷梁肉，谩甘寥寞。道出羲皇知有用，才过屈宋人谁若。剩得钱、沽酒两忘形，更酬酢。

清夜永，开春酌。听细雨，檐花落。但高歌不管，饿填沟壑。司马逸才亲涤器，子云识字终投阁。且生前、相遇共相欢，衔杯乐。

杜工部饮中八仙歌：知章骑马似乘船，眼花落井水底眠。汝阳三斗始朝天，道逢曲车口流涎，恨不移封向酒泉。左相日兴费万钱，饮如长鲸吸百川，衔杯乐圣称世贤。宗之潇洒美少年，举觞白眼望青天，皎如玉树临风前。苏晋长斋绣佛前，醉中往往爱逃禅。李白一斗诗百篇，长安市上酒家眠。天子呼来不上船，自称臣是酒中仙。张旭三杯草圣传，脱帽露顶王公前，挥毫落纸如云烟。焦遂五斗方卓然，高谈雄辩惊四筵。

括一丛花

知章骑马似乘船。落井眼花圆。汝阳三斗朝天去，左丞相、鲸吸长川。潇洒宗之，皎如玉树，举盏望青天。

长斋苏晋爱逃禅、李白富诗篇。三杯草圣传张旭，更焦遂、五斗惊筵。一笑相逢，衔杯乐圣，同是饮中仙。

王逸少兰亭记：永和九年，岁在癸丑，暮春之初，会于会稽山阴之兰亭，修禊事也。群贤毕至，

少长咸集。此地有崇山峻岭，茂林修竹，又有清流激湍，映带左右，引以为流觴曲水，列坐其次。虽无丝竹管弦之盛，一觴一咏，亦足以畅叙幽情。是日也，天朗气清，惠风和畅，仰观宇宙之大，俯察品类之盛。所以游目骋怀，足以极视听之娱，信可乐也。夫人之相与，俯仰一世。或取诸怀抱，晤言一室之内，或因寄所托，放浪形骸之外。虽取舍万殊，静躁不同，当其欣于所遇，暂得于己，快然自足，不知老之将至。及其所之既倦，情随事迁，感慨系之矣。向之所欣，俯仰之间，已为陈迹，犹不能不以之兴怀。况修短随化，终期于尽。古人云：死生亦大矣。岂不痛哉！每览昔人兴感之由，若合一契，未尝不临文嗟悼，不能喻之于怀。固知一死生为虚诞，齐彭觴为妄作。后之视今，亦犹今之视昔，悲夫！故列叙时人，录其所述，虽世殊事异，所以兴怀，其致一也。后之览者，亦将有感于斯文。

括贺新凉

兰亭当日事。有崇山、茂林修竹，群贤毕至。湍急清流相映带，旁引流觴曲水。但畅叙、幽情而已。一咏一觴真足乐，厌管弦丝竹纷尘耳。春正暮，共修禊。

惠风和畅新天气。骋高怀、仰观宇宙，俯察品类。俯仰之间因所寄，放浪形骸之外。曾不知、老之将至。感慨旧游成陈迹，念人生、行乐都能几。后视今，犹昔尔。

陶渊明归去来：归去来兮，田园将芜胡不归。既自以心为形役，奚惆怅而独悲。悟已往之不谏，知来者之可追。识迷途其未远，觉今是而昨非。舟遥遥以轻扬，风飘飘而吹衣。问征夫以前途，恨晨光之熹微。乃瞻衡宇，载欣载奔。僮仆欢迎，稚子

候门。三径就荒，松菊犹存。携幼入室，有酒盈尊。引壶觞以自酌，盼庭柯以怡颜。倚南窗以寄傲，审容膝之易安。园日涉以成趣，门虽设而常关。策扶老以游憩，时矫首而遐观。云无心以出岫，鸟倦飞而知还。景翳翳以将入，抚孤松而盘桓。归去来兮，请息交以绝游。世与我而相遗，复驾言兮焉求。悦亲戚之情话，乐琴书以消忧。农人告予以春及，将有事于西畴。或命巾车，或棹孤舟。既窈窕以寻壑，亦崎岖而经邱。木欣欣以向荣，泉涓涓而始流。喜万物之得时，感吾生之行休。已矣哉！寓形宇内复几时，曷不委心任去留，胡为乎遑遑欲何之！富贵非吾愿，帝乡不可期。怀良辰以孤往，或执杖而耘耔。登东皋以舒啸，临清流而赋诗。聊乘化以归尽，乐夫天命复奚疑！

括酹江月

问陶彭泽，有田园活计，归来何晚，昨梦皆非今觉是，实迷途其未远。松菊犹存，壶觞自酌，寄傲南窗畔。闲云出岫，更看飞鸟投倦。

归去请息交游，驾言焉往，独把琴书玩。孤棹巾车邱壑趣，物与吾生何恨。宇内寓形，帝乡安所，富贵非吾愿。乐夫天命，聊乘化以归尽。

刘伯伦酒德颂：有大人先生，以天地为一朝，万期为须臾。日月为扃牖，八荒为庭衢。行无辙迹，居无室庐。幕天席地，纵意所如。止则操卮执觚，动则挈榼提壶。维酒是务，焉知其馀。有贵介公子，搢绅处士。闻吾风声，议其所以。乃奋袂攘衿，怒目切齿。陈说礼法，是非锋起。先生于是方捧甕承槽，衔杯漱醪。奋髯箕踞，枕曲藉糟。无思无虑，

其乐陶陶。兀然而醉，恍然而醒。静听不闻雷霆之声，熟视不睹泰山之形。不觉寒暑之切肌，嗜欲之感情。俯观万物，扰扰焉如江汉之浮萍。二豪侍侧焉，如螺赢之与螟蛉。

括沁园春

大人先生，高怀逸兴，酒肉寓名。纵幕天席地，居无庐室，以八荒为域，日月为扃。贵介时豪，搢绅处士，未解先生酒适情。徒劳尔，谩是非锋起，有耳谁听。

先生。挈榼提甕。更箕踞衔杯枕曲生。但无思无虑，陶陶自得，任兀然而醉，恍然而醒。静听无闻，熟视无睹，以醉为乡乐性真。谁知我，彼二豪犹是，螺赢螟蛉。

韩文公送李愿归盘谷序：太行之阳有盘谷。盘谷之间，泉甘而土肥，草木丛茂，居民鲜少。或曰：谓其环两山之间，故曰盘。或曰：是谷也，宅幽而势阻，隐者之所盘旋。友人李愿居之。愿之言曰：人之称大丈夫者，我知之矣。利泽施于人，名声昭于时。坐于庙堂，进退百官，而佐天子出令；其在外，则树旗旌，罗弓矢，武夫前呵，从者塞途；供给之人，各执其物，夹道而疾驰。喜有赏，怒有刑，才俊满前，道古今而誉盛德，入耳而不烦；曲眉丰颊，清声而便体，秀外而慧中，飘轻裾，翳长袖，粉白黛绿者，列屋而闲居，妒宠而负势，争妍而取怜；大丈夫之遇知于天子，用力于当世者之所为也。吾非恶此而逃之，是有命焉，不可幸而致也。穷居而野处，升高而望远，坐茂树以终日，濯清泉以自洁。采于山、美可茹，钓于水、鲜可食，起居无时、惟适之安。与其有誉于前，孰若无毁于其后！与其有乐于身，孰若无忧于其心！车服不维，刀锯不加，

理乱不知，黜陟不闻，大丈夫不遇于时者之所为也，我则行之。伺候于公卿之门，奔走于形势之途，足将进而趑趄，口将言而嗫嚅，处污秽而不羞，触刑辟而诛戮，侥幸于万一，老死而后止者，其为人贤不肖何如也。昌黎韩愈闻其言而壮之，与之酒而为之歌曰：“盘之中，维子之宫。盘之土，维子之稼。盘之泉，可濯可沿。盘之阻，谁争子所。窃而深，廓其有容。缭而曲，如往而复。嗟盘之乐兮，乐且无央。虎豹远迹兮，蛟龙遁藏。鬼神守护兮，呵禁不祥。饮且食兮寿而康。无不足兮奚所望。膏吾车兮秣吾马，从子于盘兮，终吾生以徜徉。”

括水调歌

太行有盘谷，隐者所翱翔，丈夫行世，磊磊落落信行藏。遇则声名利泽，不遇采山钓水，何似两俱忘。谁解盘中趣，与酒为歌章。

问何如，盘之乐，乐无央。远驱虎豹，蛟龙于此亦潜藏。盘土可耕可稼，盘水可沿可濯，饮食寿而康。膏车秣吾马，从子以徜徉。

王绩醉乡记：醉之乡，其去中国，不知其几千里也。其土旷然无涯，无邱陵阪险；其气和平一揆，无晦明寒暑；其俗大同，无邑居聚落；其人甚精，无憎爱喜怒，吸风饮露，不食五谷，其寝于于，其行徐徐，与鸟兽鱼鳖杂处，不知有舟车器械之用。昔者黄帝氏尝获游其都，归而杳然丧其天下，以为结绳之政已薄矣。降及尧舜，作为千钟百壶之献，因姑射神人以假道，盖至其边鄙，终身太平。禹、汤立法、礼烦乐杂，数十代与醉乡隔。其臣羲和，弃甲子而逃，冀臻其乡，失路而道夭，故天下遂不

宁。至乎末孙桀纣，怒而升其糟邱，阶级千仞，南向而望，卒不见醉乡。武王得志于世，乃命公旦立酒人氏之职，典司五齐，拓土七千里，仅与醉乡达焉，三十年刑措不用。下逮幽厉，迄于秦汉，中国丧乱，遂与醉乡绝。而臣下之爱道者，往往窃至。阮嗣宗、陶渊明等十数人，并游于醉乡，没身不返，死葬其壤，中国以为酒仙云。嗟乎，醉乡氏之俗，岂古华胥氏之国乎，何其淳寂也如是。余将游焉，故为之记。

括摸鱼儿

醉之乡、其去中国，不知其几千里。其土平旷无涯际。其气和平一揆。无寒暑，无聚落居城，无怒而无喜。昔黄帝氏。仅获造其都，归而遂悟，结绳已非矣。

及尧舜，盖亦至其边鄙。终身太平而治。武王得志于周世。命立酒人之氏。从此后，独阮籍渊明，往往逃而至。何其淳寂。岂古华胥，将游是境，余故为之记。

杜工部丽人行：三月三日天气新，长安水边多丽人。态浓意远淑且真，肌理细腻骨肉匀。绣罗衣裳照暮春。蹙金孔雀银麒麟。头上何所有？翠微匍叶垂鬓唇，背后何所见？珠压腰极稳称身。就中云幕椒房亲，赐名大国虢与秦。紫驼之峰出翠釜，水精之盘行素鳞。犀筋厌饫久未下，銚刀缕切空纷纶。黄门飞鞚不动尘，御厨丝络送八珍。箫鼓哀吟感鬼神，宾从杂遝实要津。后来鞍马何逡巡。当轩下马入锦茵。杨花落雪覆白苹，青鸟飞去衔红巾。炙手可热势绝伦，慎莫近前丞相嗔。

括声声慢

暮春天气，争看长安，水边多丽人人。
意远态浓，肌理骨肉轻匀。绣罗衣裳照映，
尽蹙金、孔雀麒麟。夸荣贵，是椒房云幕，
恩宠无伦。

簇簇紫驼翠釜，间水精盘里，缕鲙纷纶。
御送珍羞，夹道箫鼓横陈。后来宾从杂遝，
认青鸾、飞舞红巾。扶下马，似杨花、翻入
锦茵。

欧阳公醉翁亭记：环滁皆山也。其西南诸峰，
林壑尤美，望之蔚然而深秀者，琅邪也。山行六七
里，渐闻水声，潺潺而泻出于两峰之间者，酿泉也。
峰回路转，有亭翼然，临于泉上者，醉公亭也。作
亭者谁，山之僧智仙也。名之者谁，太守自谓也。
太守与客来饮于此，饮少辄醉，而年又最高，故自
号曰醉翁也。醉翁之意在不酒，在乎山水之间也。
山水之乐，得之心而寓之酒也。若夫日出而林霏开，
云归而岩穴暝，晦明变化者，山间之朝暮也。野芳
发而幽香，佳木秀而繁阴，风霜高洁，水洄而石出
者，山间之四时也。朝而往，暮而归，四时之景不
同，而乐亦无穷也。至于负者歌于涂，行者休于树，
前者呼，后者应，伛偻提携，往来而不绝者，滁人
之游也。临溪而渔，溪深而鱼肥，酿泉为酒，泉香
而酒冽，山肴野蔌，杂然而前陈者，太守宴也。宴
酣而乐，非丝非竹，射者中，弈者胜，觥筹交错，
起坐而喧哗者，众宾欢也。苍颜白发，颓然乎其间
者，太守醉也。已而夕阳在山，人影散乱，太守归
而宾客从也。树林阴翳，鸟声上下，游人去而禽鸟
乐也。然而禽鸟知山林之乐，而不知人之乐；人知
从太守游而乐，不知太守之乐其乐也。醉能同其乐，

醒能述以文者，太守也。太守谓谁，庐陵欧阳修也。

括贺新凉

环滁皆山也，望西南、蔚然深秀，者琅邪也。泉水潺潺峰路转，上有醉翁亭也。亭、太守自名之也。试问醉翁何所乐，乐在乎、山水之间也。得之心、寓酒也。

四时之景无穷也。看林霏、日出云归，自朝暮也。交错觥筹酣宴处，肴蔌杂然陈也。知太守、游而乐也。太守醉归宾客从，拥苍颜白发颓然也。太守谁，醉翁也。

欧阳公庐山高：庐山高哉，几千仞兮，盘根几百里，凄然屹立乎长江。长江西来走其下，是为杨澜左里兮，洪涛巨浪，日夕相舂撞。云消风止水镜净，泊舟登岸而远望兮，上摩青苍以掩霭，下压后土之鸿庞。试往造乎其间兮，攀缘石磴窥空窅。千岸万壑响松桧，悬崖巨石飞流淙。水声聒聒乱人耳，六月飞雪洒石缸。仙翁释子，亦往往而逢兮，吾尝恶其学幻而言咙。但见丹霞翠壁，远近映楼阁；晨钟暮鼓，杳霭罗幡幢。幽花野草，不知其名兮，风吹露湿香涧谷，时有白鹤飞来双。幽寻远去不可极，便欲绝世遗纷纭。羨君买田筑室老其下，插秧盈畴兮、酿酒盈缸。欲令浮岚暖翠千万状，坐卧常对乎轩窗。君怀磊砢有至宝，世俗不辨珉与玆。策名为吏二十载，青衫白首困一邦。宠荣声利，不可以苟屈兮，自非青云白石有深趣，其气兀碑何由降。丈夫壮节似君少，嗟我欲说，安得巨笔如长杠。

括水调歌

庐山几千仞，屹立并长江。杨澜左里，

洪涛巨浪日舂撞。风止雪消冰净，相与泊舟登岸，攀磴望空窅。岩壑响松桧，巨石激流淙。

事幽寻，遗世俗，绝纷纍。幽花野草香满，时有鹤飞双。羨子买田筑室，欲使浮岚暖翠，坐卧对轩窗。我欲为君说，安得笔如杠。

东坡前赤壁赋：壬戌之秋，七月既望，苏子与客，泛舟游于赤壁之下。清风徐来，水波不兴。举酒属客，诵明月之诗，歌窈窕之章。少焉，月出于东山之上，徘徊于斗牛之间。白露横江，水光接天。纵一苇之所如，凌万顷之茫然。浩浩乎如凭虚御风，而不知其所止；飘飘乎如遗世独立，羽化而登仙。于是饮酒乐甚，扣舷而歌之。歌曰：“桂棹兮兰桨。击空明兮溯流光。渺渺兮余怀，望美人兮天一方。”客有吹洞箫者，倚歌而和之，其声呜呜然，如怨如慕，如泣如诉，余音袅袅，不绝如缕。舞幽壑之潜蛟，泣孤舟之嫠妇。苏子愀然，正襟危坐，而问客曰：何为其然也？客曰：月朗星稀。乌鹊南飞。此非曹孟德之诗乎！西望夏口，东望武昌，山川相缪，郁乎苍苍，此非孟德之困于周郎者乎！方其破荆州，下江陵，顺流而东也，舳舻千里，旌旗蔽空，酹酒临江，横槊赋诗，固一世之雄也，而今安在哉！况我与子，渔樵于江渚之上，侣鱼虾而友麋鹿。驾一叶之扁舟，举匏樽以相属。寄蜉蝣于天地，渺沧海之一粟，哀我生之须臾，羨长江之无穷。挟飞仙以遨游，抱明月而长终。知不可乎骤得，托遗响于悲风。苏子曰：客亦知夫水与月乎？逝者如斯，而未尝往也；盈虚者如彼，而卒莫消长也。盖将自其变者而观之，则天地曾不能以一瞬；自其不变者而观之，则物与我皆无尽也，而又何羨乎。且夫天地之间，物各有主。苟非吾之所有，虽一毫而莫取。惟江上之清风，与山间之明月，耳得之而为声，目遇

之而成色，取之无尽，用之不竭。是造物者之无尽藏也，而吾与子之所共适。客喜而笑，洗盏更酌。肴核既尽，杯盘狼藉。相与枕藉乎舟中，不知东方之既白。

括酹江月

泛舟赤壁，正风徐波静，举尊属客。渺渺予怀天一望，万顷凭虚独立。桂桨空明，洞箫声彻，怨慕还凄恻。星稀月淡，江山依旧陈迹。

因念酹酒临江，赋诗横槊，好在今安适。谩寄蜉蝣天地尔，瞬目盈虚消息。江上清风，山间明月，与子欢无极。翻然一笑，不知东方既白。

东坡后赤壁赋：是岁十月之望，步自雪堂，将归于临皋。二客从予过黄泥之坂。霜露既降，草木尽脱。人影在地，仰见明月，顾而乐之，行歌相答。已而叹曰：有客无酒，有酒无肴，月白风清，如此良夜何！客曰：今者薄暮，举网得鱼，巨口细鳞，状似松江之鲈。顾安所得酒乎？归而谋诸妇。妇曰：我有斗酒，藏之久矣，以待子不时之须。于是携酒与鱼，复游于赤壁之下。江流有声，断岸千尺，山高月小，水落石出。曾日月之几何，而江山不可复识矣！予乃摄衣而上，履峻岩，披蒙茸。踞虎豹，登虬龙，攀栖鹘之危巢，俯冯夷之幽宫。盖二客不能从焉。划然长啸，草木震动。山鸣谷应，风起水涌。予亦悄然而悲，肃然而恐，凜乎其不可留也。返而登舟，放乎中流，听其所止而休焉。时夜将半，四顾寂寥。适有孤鹤，横江东来，翅如车轮，玄裳缟衣，戛然长鸣，掠予舟而西也，须臾客去，予亦就睡。梦一道士，羽衣翩跹，过临皋之下，揖予而

言曰：赤壁之游乐乎？问其姓名，俛而不答。呜呼噫嘻，我知之矣！畴昔之夜，飞鸣而过我者，非子也耶！道士顾笑，予亦惊寤，开户视之，不见其处。

又

雪堂闲步，过临皋、霜净晚林木落。月白风清如此夜，与客行歌相答。网举松鲈，手携斗酒，赤壁重寻约。悲歌长啸，划然声动寥廓。

试问日月几何，江流山色，今日应如昨。履遍嶮岩风露冷，水面怒涛惊跃。一叶中流，听其所止，适有孤飞鹤。横江东下，问予赤壁游乐。

欧阳公昼锦堂记：仕宦而至将相，富贵而归故乡，此人情之所荣，而今昔之所同也。盖士方穷时，困厄闾里，庸人孺子，皆得易而侮之，若季子不礼于其嫂，买臣见弃于其妻。一旦高车驷马，旗旄导前而骑卒拥后，夹道之人，相与骈肩累迹，瞻望咨嗟，而所谓庸夫愚妇，奔走骇汗，羞愧俯伏，以自悔罪于车尘马足之间，而莫敢仰视。此一介之士得志于当时，而意气之盛，昔人比之衣锦之荣者也。惟大丞相魏国公则不然。公，相人也，世有令德，为时名卿。公自少时，擢高科，登显仕，海内之士，闻下风而望余光者，盖亦有年矣。所谓将相而富贵，皆公所宜素有，非如穷厄之人，侥幸得志于一时，出于庸夫庸妇之不意，以惊骇而夸耀之也。然而高牙大纛不足为公荣，桓圭衮冕不足为公贵，惟德被生民，功施社稷，勒之金石，播之声诗，以耀后世，而垂无穷，此公之志，而士亦以此望于公也，岂止夸一时而荣一乡哉！公在至和中，尝以武康之节来治于相，乃作昼锦之堂于后圃。既又刻诗于石，以遗相人。其言以快恩仇、矜名誉为可薄，盖不以昔人之所夸者为荣，而以为戒，于此见公之视富贵为

如何，而其志岂易量哉！故能出入将相，勤劳王家，而夷险一节。至于临大节、决大议，垂绅正笏、不动声色，而措天下于泰山之安，可谓社稷之臣矣。其丰功盛烈，所以铭彝鼎而被弦歌者，乃邦家之光，非闾里之荣也。余虽不获登公之堂，幸尝窃诵公之诗，乐公之志有成，而喜为天下道也，于是乎书。

括水调歌

仕宦至卿相，富贵好归乡。高车驷马，都人夹道共瞻望。意气当年尤盛，荣比昔人衣锦，昼锦以名堂。海内知名士，久矣望余光。

大丈夫，荣与贵，视寻常。丰功令德，要将尧舜致君王。事业光施社稷，勋烈遍铭彝鼎，此志孰能量。妙语勒金石，千古一欧阳。

山谷送王郎：酌君以蒲城桑落之酒，泛君以湘累秋菊之英，赠君以黟川点漆之墨，送君以阳关堕泪之声，酒浇胸次之磊隗，菊制短世之颓龄，墨以传万古文章之印，歌以写平时兄弟之情。江山千里头俱白，骨肉十年眼终青。连床夜语鸡戒晓，书囊无底谈未了。有功翰墨乃如此，何恨远别音书少。炊沙作糜终不饱。镂冰文章费工巧。要须心地收汗马，孔孟行世日杲杲。有弟有弟力持家。妇能养姑供珍鲑。儿大诗书女丝麻。公但读书煮春茶。

括贺新凉

酌以蒲城酒。撷湘累、秋英满泛，介君眉寿。赠君点漆黟川墨，与印文章大手。问

此别、相逢难又。三叠阳关声堕泪，写平时、兄弟情长久。离别事，古来有。

十年骨肉情何厚。对江山千里，共期白首。夜雨连床追旧事，惟恨音书渐少。便只恐、炊沙不饱。翰墨新功收汗马，话书囊、无底何时了。欢未足，听鸡晓。

范文正听真上人琴歌：银河耿耿霜棱棱，西窗月色寒如冰。江上一扣朱丝绳，万籁不起秋光凝。伏羲归天忽千古，我闻遗音泪如雨。嗟嗟不及郑卫儿，北里南邻竟歌舞。竟歌舞，何时休。师襄堂上心悠悠。击浮金，戛鸣玉，老龙秋啼沧海底，幼猿暮啸寒山曲。陇头瑟瑟咽流泉，洞庭萧萧落寒木。此声感物何大灵，十二衔珠下仙鹄。为予再奏南风诗，神人和畅瞬无为。为予试弹广陵散，鬼物方哀晋方乱。乃知圣人情虑深，将治四海先治琴。兴亡哀乐不我道，坐中可见天下心。感公遗我正始音。

括水调歌

耿耿银潢净，窗月莹如冰。朱丝一扣，万籁不起冷光凝。千古遗音犹在，一洗淫哇郑卫，北里与南陵。孰识兴亡事，哀乐不同情。

咽流泉，戛鸣玉，击浮金。老龙啼晓，幼猿忽复暮山吟。为我临风再奏，仙鹄翩翩十二，感物一何灵。此曲谁当听，四海有知音。

山谷听宋宗儒摘阮歌：翰林尚书宋公子，文采风流今尚尔。自疑者域是前身，囊中控丸起人死。貌如千载孤松枝，落魄酒中无定止。得钱百万送酒家，一笑不问今余几。手挥琵琶送飞鸿，促弦聒醉

惊客起。寒虫促织月笼秋，独雁叫群天拍水。楚国
羁臣放十年，汉宫佳人嫁千里。深闺洞房语恩怨，
紫燕黄鹂韵桃李。楚狂行歌惊世人，渔父拿舟在葭
苇，问君枯木著朱绳，可能道人意中事。君言此物
传数姓，玄璧庚庚有横理。闭门三月传国工。身今
亲见阮仲容。我有江南一丘壑，安得与君醉其中，
曲肱听君写松风。

括满江红

落魄高人，拚百万、青铜一醉。挥素手、
朱绳一抹，四筵惊起，催织寒虫秋弄月，叫
群独雁天浮水。更黄鹂、紫燕对春风，争繁
脆。

悲楚国，羁臣意。怜汉女，逾千里。似
深闺恩怨，共相汝尔。我有江南丘壑趣，此
弦能道心中事。要曲肱、时听写松风，云窗
里。

山谷水仙花：凌波仙子生尘袜，水上轻盈步微
月。是谁招此断肠魂？种作寒花寄愁绝。含香体素
欲倾城，山矾是弟梅是兄。坐对真成被花恼，出门
一笑大江横。

括朝中措

凌波仙子袜生尘。水上步轻盈。种作寒
花愁绝，断肠谁与招魂。

天教付与，含香体素，倾国倾城。寂寞
岁寒为伴，藉他矾弟梅兄。

韩子苍题伯时画太一真人：太一真人莲叶舟，
脱巾露发寒飕飕。轻风为帆浪为楫，卧看玉宇浮中

流。中流荡漾翠绡舞，稳如龙骧万斛举。不是峰头十丈花，世间那得叶如许。龙眠画手老入神，尺素幻出真天人。恍然坐我水仙府，苍烟万顷波袞粼。玉堂学士今刘向，禁直岩峩九天上。不须对此融心神，会植青藜夜相访。

括满江红

太一真人，莲叶向、中流荡漾。凌万顷、风为帆席，浪为轻桨。乱舞翠绡云雾薄，卧看玉宇琉璃晃。似飘然、万斛举龙骧，随波荡。

太华顶，花十丈。飘一叶，借清赏。倩龙眠老手，为渠摹仿。鳌禁岩峩谁寓直，玉堂学士今刘向。要清宵、特地杖青藜，来相访。

东坡书林和靖诗后：吴侬生长湖山曲，呼吸湖光饮山渌。不论世外隐君子，慵奴贩妇皆冰玉。先生可是绝俗人，神清骨冷无由俗。我不识君曾梦见，瞳子了然光可烛。遗篇妙字处处有，步绕西湖看不足。诗如东野不言寒，书似西台差少肉。平生高节已难继，将死微言犹可录。自言不作封禅书，更有悲吟白头曲。我笑吴人不好事，好作祠堂傍修竹。不然配食水仙王，一盏寒泉荐秋菊。

括贺新凉

生长湖山曲。羨吴儿、呼吸湖光，饱餐山渌。世外不须论隐逸，谁似先生冰玉。自骨冷、神清无俗。我不识君曾梦见，炯双瞳、碧色光相烛。遗妙语，看不足。

生平高节难为续。到如今、凛凛风生，言犹可录。不作相如封禅藁，身后谁荣谁辱。争肯效、白头吟曲。好与水仙为伴侣，傍西湖、湖畔修修竹。时一酌，荐秋菊。

范文正岳阳楼记：庆历四年春，滕子京谪守巴陵。越明年，政通人和，百废具兴。乃重修岳阳楼，增其旧制，刻唐贤今人诗赋于其上，属余作文记之。予观夫巴陵胜状，在洞庭一湖。衔远山，吞长江，浩浩荡荡，横无际涯，朝晖夕阴，气象万千，此则岳阳楼之大观也，前人之述备矣。然则北通巫峡，南极潇湘，迁客骚人，多会于此，览物之情。得无异乎！若夫霪雨霏霏，连日不开，阴风怒号，浊浪排空，日星隐耀，山岳潜形，商旅不行，樯倾楫摧，薄暮冥冥，虎啸猿啼。登斯楼也，则有去国怀乡，忧谗畏讥，满目萧然，感极而悲者矣。至若春和景明，波澜不惊，上下天光，一碧万顷，沙鸥翔集，锦鳞游泳，岸芷汀兰，郁郁青青；而或长烟一空，皓月千里，浮光耀金，静影沈璧，渔歌互答，此乐何极。登斯楼也，则有心旷神怡，宠辱皆忘，把酒临风，其喜洋洋者矣。嗟夫！予尝求古仁人之心，或异二者之为。何哉？不以物喜，不以己悲。居庙堂之高，则忧其民；处江湖之远，则忧其君。是进亦忧，退亦忧。然则何时而乐耶？其必曰：先天下之忧而忧，后天下之乐而乐欤！噫，微斯人，吾谁与归！时六年九月二十五日记。

括水调歌

欲状巴陵胜，千古岳之阳。洞庭在目，远衔山色俯长江。浩浩横无际际，爽气北通巫峡，南望极潇湘。骚人与迁客，览物兴尤长。

锦鳞游，汀兰郁，水鸥翔。波澜万顷，碧色上下一天光。皓月浮金千里，把酒登楼对景，喜极自洋洋。忧乐有谁会，宠辱两俱忘。

李白将进酒：君不见黄河之水天上来，奔流到海不复回。又不见高堂明镜悲白发，朝如青丝暮如雪。人生得意须尽欢，莫把金尊空对月。天生我材必有用，千金散尽还复来。烹羔宰牛且为乐，会须一饮三百杯。岑夫子、丹丘生。与君歌一曲，请君为我听。钟鼎玉帛不足贵，但愿长醉不愿醒。古来贤达皆寂寞，惟有饮者留其名。陈王昔时宴平乐，斗酒十千恣欢谑。主人何为言少钱，且须沽酒对君酌。五花马，千金裘。呼儿将出换美酒，与尔同消万古愁。

括木兰花慢

黄河天上派，到东海、去难收。况镜里堪悲，星星白发，早上人头。人生尽欢得意，把金尊、对月莫空休。天赋君材有用，千金散聚何忧。

请君听我一清讴。钟鼎复奚求。但烂醉春风，古来惟有，饮者名留。陈王昔时宴乐，拚十千、斗酒恣欢游。莫惜貂裘将换，与消千古闲愁。

王禹偁黄州竹楼记：黄冈之地多竹，大者如椽，竹工破之，削去其节，用代陶瓦，比屋皆然，以其价廉而工省也。子城西北隅，雉堞圯毁，蓁莽芜秽，因作小楼二间，与月波楼通。远吞山光，平挹江濼，幽阒寥夔，不可具状。夏宜急雨，有瀑布声；冬宜密雪，有碎玉声；宜鼓琴，琴调和畅；宜咏诗，诗韵清绝；宜围棋，子声丁丁然；宜投壶，矢声铮铮

然。皆竹楼之助也。公退之暇，披鹤氅衣，戴华阳巾，手执周易一卷，焚香嘿坐，消遣世虑。江山之外，但见风帆、沙鸟、烟云、竹树而已，待其酒力醒，茶烟歇，送夕阳，迎素月，亦谪居之胜概也。彼齐云、落星、高则高矣；井干、丽谯，华则华矣，止于贮妓女，藏歌舞，非骚人之事，吾所不取。吾闻竹工云：竹之为瓦，仅支十稔；若重覆之，得二十稔。忆吾以至道乙未岁，自翰林出滁上。丙申，移广陵。丁酉，入西掖。戊戌岁除日，有齐安之命。己亥闰三月，到郡。四年之间，奔走不暇，未知明年又在何处，岂惧竹楼之易朽乎！幸后人与我同志，嗣而葺之，庶斯楼之不朽也。咸平四年月日记。

括水调歌

听说竹楼好，佳地占黄冈。月波相接，俯临江濑挹山光。急雨檐喧瀑布，密雪瓴敲碎玉，幽阒兴尤长。琴调更虚畅，诗韵转清扬。

公退暇，披鹤氅，戴华阳。手披周易，消磨世虑坐焚香。缥缈烟云竹树，迎送夕阳素月，胜概总难量。欲辨骚人事，淪茗漱清觞。

李白采莲曲：若耶溪旁采莲女，笑隔荷花共人语。日照新妆水底明，风摇香袖空中举。岸上谁家游冶郎，三三五五映垂杨。紫骝嘶入落花去，见此踟躇空断肠。

括清平乐

若耶溪女。笑隔荷花语。日照新妆明楚

楚，香袖风飏轻举。

谁家白面游郎。两三遥映垂杨。醉踏落花归去，踌躇空断柔肠。

玉川子有所思：当时我醉美人家，美人颜色娇如花。今日美人弃我去，青楼珠箔天之涯。娟娟姮娥月，三五盈又缺。翠眉蝉鬓生别离，一望不见心断绝。心断绝，几千里。梦中醉卧巫山云，觉来泪滴湘江水。湘江两岸花木深，美人不见愁人心。含愁更奏绿绮琴，调歌弦绝无知音。美人兮美人，不知为暮雨兮为朝云。相思一夜梅花发，忽到窗前疑是君。

括满江红

为忆当时，沈醉里、青楼弄月。闲想像、绣帟珠箔，魂飞心折。羞向姮娥谈旧事，几经三五盈还缺。望翠眉、蝉鬓一天涯，伤离别。

寻作梦，巫云结。流别泪，湘江咽。对花深两岸，忽添悲切。试与含愁弹绿绮，知音不遇弦空绝。忽窗前、一夜寄相思，梅花发。

东坡海棠（寓居定惠院之东，杂花满山，有海棠一株，土人不知其贵也。）：江城地瘴蕃草木，只有梅花苦幽独。嫣然一笑竹篱间，桃李漫山总粗俗。也知造物有深意，故遣佳人在空谷。自当富贵出天姿，不待金盘荐华屋。朱唇得酒晕生脸，翠袖卷纱红映肉。林深雾暗晓光迟，日暖风轻春睡足。雨中有泪亦凄惨，月下无人更清淑。先生食饱无一事，散步逍遥自扪腹。不问人家与僧舍，拄杖敲门看修竹。忽然绝艳照衰朽，叹息无言揩病目。陋邦何处得此花，无乃好事移西蜀。寸根千里不易到，衔子

飞来定鸿鹄。天涯流落俱可念，为饮一尊歌此曲。
明朝酒醒还独来，雪落纷纷那忍触。

又

寂寞江城，拚只共、梅花幽独。揩病眼、
佳人何许，嫣然空谷。幻出天姿真富贵，朱唇滞酒红生肉。笑漫山、繁李与夭桃，俱粗俗。

迟日丽，春睡足，明月照，尤清淑。算
移根千里，远从西蜀。流落天涯应可念，为
渠剧饮仍歌曲。怕明朝、酒醒落纷纷，那忍触。

李白襄阳歌：落日欲没岷山西，倒著接籬花下迷。襄阳小儿齐拍手，拦街争唱白铜鞮。傍人借问笑何事，笑杀山翁醉似泥。鸛鹄杓、鸚鵡杯，百# 1661年三万六千日，一日须倾三百杯。遥看汉水鸭头绿，恰似蒲萄初发醅。此江若变作春酒，垒曲便筑糟邱台。金鞍骏马换少妾，笑坐金鞍歌落梅。车傍侧挂一壶酒，风笙龙堯行相催。咸阳市上叹黄犬，何如月下倾金罍。君不见、晋朝羊公一片石，龟龙剥落生莓苔。泪亦不能为之堕，心亦不能为之哀。清风明月不用一钱买，玉山自倒非人推。舒州杓、力士铛，李白与尔同死生。襄王云雨今安在，江水东流猿夜声。

括水调歌

落日岷山下，倒著接籬回。傍人笑问山翁，日日醉归来。三万六千长日，一日杯倾三百，罍曲筑糟台。汉水鸭头绿，变酒入金罍。

白铜鞮，鸛鹄杓，鸚鵡杯。轻车快马，

凤笙龙箎更相催。自有清风明月，刚道不须钱买，对此玉山颓。水自东流去，猿自夜声哀。

欧阳公明妃曲：胡人以鞍马为家，射猎为俗。泉甘草美无常处，鸟惊兽骇争驰逐。谁将汉女嫁胡儿，风沙无情貌如玉。身行不见中国人，马上自作思归曲。推手为琵却手琶。胡人共听亦咨嗟。玉颜流落死天涯，琵琶却传来汉家。汉宫争按新声谱，遗恨已深声更苦。纤纤女手生洞房，学得琵琶不下堂。不识黄云出塞路，岂知此声能断肠。

括江神子

狂胡鞍马自为家。遣宫娃。嫁胡沙。万里风烟，行不见京华。马上思归哀怨极，推却手，奏琵琶。

胡儿共听亦咨嗟。貌如花。落天涯。谁按新声，争向汉宫夸。纤手不知离别苦，肠欲断，恨如麻。

李白蜀道难：噫嘘戏、危乎高哉，蜀道之难难于上青天！蚕丛及鱼凫，开国何茫然。尔来四万八千岁，不与秦塞通人烟。西当太白有鸟道，可以横绝峨眉巅。地崩山摧壮士死，然后天梯石栈相句连。上有横河断海之浮云，下有冲波逆折之回川。黄鹤之飞尚不能过，猿猱欲度愁攀缘。青泥何盘盘，百步九折萦岩峦，扞参历井仰胁息，以手拊膺坐长叹。问君西游何当还，畏涂崦岩不可攀。但见悲鸟号古木，雄飞呼雌达林间。又闻子规啼夜月，愁空山。蜀道之难难于上青天。使人听此凋朱颜。连峰去天不盈尺，枯松倒挂倚绝壁。飞湍瀑流争喧豗，砢崖转石万壑雷。其险也若此，嗟尔远道之人，胡为乎来哉！剑阁峥嵘而崔嵬，一夫当关，万夫莫开。所

守或匪亲，化为狼与豺。朝避猛虎，夕避长蛇。磨牙吮血，杀人如麻。锦城虽云乐，不如早还家。蜀道之难难于上青天，侧身西望长咨嗟！

括意难忘

蜀道登天。望峨眉横绝，石栈相连。西来当鸟道，逆浪俯回川。猿与鹤，莫攀缘。九折耸岩峦。算咫尺、扪参历井，回首长叹。

西游何日当还。听子规啼月，愁减朱颜。连峰天一握，飞瀑壑争喧。排剑阁，越天关，豺虎乱朝昏。问锦城，虽云乐土，何似家山。

白乐天庐山草堂记：匡庐奇秀，甲天下大山。山北峰曰香炉，峰北寺曰遗爱寺。介峰寺间，其境胜绝，又甲庐山。元和十一年秋，太原人白乐天见而爱之，若远行客过故乡，恋恋不能去，因面峰腋寺，作为草堂。明年春，草堂成。三间两柱，二室四牖，广袤丰杀，一称心力。洞北户，来阴风，防徂暑也；敞南甍，纳阳日，虞祁寒也。木斫而已，不加丹；墙圻而已，不加白。碱阶用石，罽窗用纸，竹帘经纬，率称是焉。堂中设木榻四，素屏二，漆琴一张、儒道佛书各三两卷。乐天既来为主，仰观山、俯听泉，旁睨竹树云石，自辰至酉，应接不暇。俄而物诱气随，外适内合，一宿体宁，再宿心恬，三宿后颓然嗒然，不知其然而然。自问其故。答曰：是居也，前有平地，轮广十丈；中有平台，半乎地；台南有方池，倍乎台。环池多山竹野卉，池中生白莲白鱼。又南抵石涧，夹涧有古松老杉，大仅十人围，高不知几百尺，修柯戛云，低枝拂潭，如幢竖、如盖张、如龙蛇走。松下多灌丛，萝茑叶蔓骈织，承翳日月，光不到地，盛夏风气，如八九月时，下铺白石，为出入道。堂北五步，据层崖积石，嵌空

埤垧，杂木异草，盖覆其上，绿阴蒙蒙，朱实离离，不识其名，四时一色。又有飞泉植茗，就以烹爇，好事者见，可以永日。堂东有瀑布，水悬三尺，泻阶隅、落石渠，昏晓如练色，夜中如环佩、琴、筑声。堂西倚北崖右址，以剖竹架空，引崖上泉，脉分线悬，自檐注砌，累累如贯珠，霏微如雨露，滴沥飘洒，随风远去。其四旁耳目杖屦可及者，春有锦绣谷花，夏有石门涧云，秋有虎溪月，冬有炉峰雪，阴晴显晦，昏旦含吐，千变万状，不可殚纪。覩缕而言，故云甲庐山者。噫！凡人丰一屋，华一箒，而起居其间，尚不免有骄稳之态。今我为是物主，物至致知，各以类至，又安得不外适内和。体宁心恬哉！昔永、远、宗、雷辈十八人，同入此山，老死不返，去我千载，我知其心以是哉！矧余自思，从幼迨老，若白屋、若朱门，凡所止，虽一日二日，聊覆箒土为台，聚拳石为山，环斗水为池，其喜山水病癖如此。一旦蹇剥，来佐江郡，郡守以优容抚我，庐山以灵胜待我，是天与我时，地与我所，卒获所好，又何求焉！尚以冗员所羁，余累未尽，或往或来，未遑宁处。待余异日，弟妹婚嫁毕。司马岁秩满，出处行止，得以自遂，则必左手引妻子，右手抱琴书，终老于斯，以成就我平生之志。清泉白石，实闻此言。时三月二十七日，始居新堂。四月九日，与河南元集虚、范阳张允中、南阳张深之、东西二林长老凑公、朗、满、晦、坚等凡二十有二人，具斋施茶果以乐之，因为草堂记。

括沁园春

庐阜诸峰，炉峰绝胜，草堂介焉。敞明窗净室，素屏虚榻，要仰观山色。俯听流泉。中有池台，旁多竹卉，夹涧杉松高刺天。堂

之北，据层崖积石，绿荫浓鲜。

堂东瀑布飞悬。似雨露霏微珠贯穿。有春花秋月，夏云冬雪，阴晴显晦，雾吐烟吞，右抱琴书，左携妻子，杖屦从容尽暮年。平生志，赖清泉白石，实听余言。

叶清臣松江秋泛赋：泽国秋晴，天高水平。遥山晚碧，别浦寒清。循游具区之野，纵泛吴松之濡。东瞰沧海，西瞻洞庭。槁叶微下，斜阳半明。樵风归兮自朝暮，汐溜满兮谁送迎。浩霜空兮一色，横霁景兮千名。于是积潦未收，长江无际。澄澜万顷，扁舟独诣。社橘初黄，汀葭余翠。惊鹭朋飞，别鹄孤唳。听渔榔之递响，闻牧笛之长吹。既览物以放怀，亦思人而结歎。若夫寇敌初平，霸图方盛。均忧待济，同安则病。鱼贪饵而登钩，鹿走险而忘命。一旦辞禄，扬舲高泳。功崇不居，名存斯令。达识先明，孤风孰竞。又若金耀不融，浴尘其蒙。宗城寡扞，王国争雄。拂衣洛右，振耀江东。拖翠纶兮波上，脰蝉翼兮舫中，傥即时之有适，遑我后之为恫。至于著书笠泽，端居甫里。两桨汀洲，片帆烟水。夕醉酒垆，朝盘鱼市。浮游尘外之物，啸傲人间之世。富词客之多才，剧骚人之清思。缅三子之芳徽，谅随时之有宜。非才高见弃于荣路，乃道大不吝于祸机。申屠临河而蹈壅，伯夷登山而食薇。皆有谓而然尔，岂得已而用之。别有执简仙瀛，持荷帝柱。晨稻史氏之笔，暮握使臣之斧。登览有澄清之心，临遣动光华之赋。荷从欲之流兹，尉远游之以惧。肇提封之所履，属方割之此忧。将浚疏于汇川，其拯济乎珍畴。转白鹤之新渚，据青龙之上游。濯埃垢于缁袂，刮病膜乎昏眸。左引任公之钓，右援仲由之桴（音浮）。思勤官而裕民，乃善利之远猷。彼全身以远害，盖孔臧于自谋。鲜鳞在俎，真茶满瓿。少回俗士之驾，亦未可为兹江之羞。

括摸鱼儿

泛松江、水遥山碧，清寒微动秋浦。霜
云雾色横无际，别鹄惊鸿无数。朝又暮。听
牧笛长吹，隐隐渔榔度。骚人才子。既览物
兴怀，浮游尘外，啸傲剧清思。

人间世。扰扰荣途要路。瀛洲琼馆安所。
轩裳何似渔蓑兴，萧散龙游鹤渚。须归去。
办双桨孤帆，云月和烟雨。江湖伴侣。趁社
橘初黄，汀葭馀翠，成我莼鲈趣。

山谷煎茶赋：汹汹乎如涧松之发清吹，皓皓乎如春空之行白云。宾主欲眠而同味，水茗相投而不浑。苦口利病，解胶涤昏。未尝一日不放箸而策茗碗之勋者也。余尝为嗣直瀹茗，因录其涤烦破睡之功，为文甲乙。建溪如割。双井如廬。日铸如绝。其余苦则辛螫，甘则底滞。呕酸寒胃，令人失眠。亦未足与议。或曰：无甚高论，敢问其次？涪翁曰：味江之罗山，严道之蒙顶。黔阳之都濡、高株，泸川之纳溪、梅岭。夷陵之压砖，邛之火井。不得已而去于三，则六者亦可酌兔褐之瓯，瀹鱼眼之鼎者也。或者又曰：寒中瘠气，莫甚于茶。或济之盐，句贼破家。滑窍走水，又况鸡苏之与胡麻！涪翁于是酌岐雷之醪醴，参伊圣之汤液。斫附子如博投，以熬葛仙之歪。去藜而用盐，去橘而用姜。不夺茗味，而佐以草石之良。所以固太仓而坚作强。于是有胡桃、松实、庵摩、鸭脚、勃贺、糜芜、水苏、甘菊。既加臭味，亦厚宾客。前四后四，各用其一。少则美，多则恶。发挥其精神，又益于咀嚼。盖大匠无可弃之材，太平非一士之略。厥初贪味隳永，速化汤饼。乃至中夜，不眠耿耿。既作温齐，殊可屡歆。如以六经济三尺法。虽有除治，与人安乐。

宾至则煎，去则就榻。不游轩后之华胥，则化庄周之蝴蝶。

括意难忘

汹汹松风。更浮云皓皓，轻度春空。精神新发越，宾主少从容。犀箸厌，滌昏懵。茗碗策奇功。待试与，平章甲乙，为问涪翁。

建溪日铸争雄。笑罗山梅岭，不数严邛。胡桃添味永，甘菊助香浓。投美剂，与和同。雪满兔瓯溶。便一枕，庄周蝶梦，安乐窝中。

李白送张承祖之东都序：吁咄哉！仆书室坐愁，亦已久矣。每思欲遐登蓬莱，极目四海，手弄白日，顶摩青穹，挥斥幽愤，不可得也。而金骨未变，玉颜已缙，何尝不扞松伤心，抚鹤叹息。误学书剑，薄游人间，紫禁九重，碧山万里，有才无命，甘于后时。刘表不用于祢衡，暂来江夏；贺循喜逢于张翰，且乐船中。遇达人张侯，大雅君子。统泛舟之役，在清川之湄。谈玄赋诗、连兴数月。醉尽花柳，赏穷江夏。王命有程，告以于迈。烟景晚色，惨为愁容。系飞帆于半天，泛绿水于遥海。欲去不去，更开芳尊。乐虽寰中，趣逸天外。平生酣畅，未若此时。至于清谈浩歌，雄笔丽藻，笑饮醪酒，醉挥素琴，余实不愧于古人也。扬袂远别，何时归来。想洛阳之秋风，鲙鲈鱼以相待。诗可赠远，无乃阙乎！

括酹江月

坐愁书室，谩临风、遐想蓬莱高致。抚鹤扞松长叹息，失足误来人世。紫禁九重，

碧山万里，无路鸣珂佩。江山胜处，且寻花柳倾醉。

不堪送客清川，系帆渌水，烟景供憔悴。更举芳尊浇别恨，逸趣浮游天外。雄笔横挥，素琴轻拍，一笑成扬袂。洛阳秋早，归时同赏鲈鲙。

东坡月夜与客饮杏花下：杏花飞帘散余春，明月八户寻幽人。褰衣步月踏花影，炯如流水涵青苹。花间置酒清香发，争挽长条落香雪。山城薄酒不堪饮，劝君且吸杯中月。洞箫声断月明中，惟忧月落酒杯空。明朝卷地春风恶，但见绿叶栖残红。

又

杏花春晚，散余芳、著处萦帘穿箔。唤起幽人明月夜，步月褰衣行乐。置酒花前，清香争发。雪挽长条落。山城薄酒，共君一笑同酌。

且须眼底柔英，尊中清影，放待杯行数。莫遣洞箫声断处，月落杯空牢寞。只恐明朝，残红栖绿，卷地东风恶。更须来岁，花时携酒寻约。

李贺高轩过：华裾织翠青如葱，金环压辔摇玲珑。马蹄隐耳声隆隆，入门下马气如虹。云是东京才子、文章钜公。二十八宿罗心胸，元精耿耿贯当中。殿前作赋声摩空，笔补造化天无功。庞眉书客感秋蓬，谁知死草生华风！我今垂翅附冥鸿，他日不羞蛇作龙。

括水调歌

华裾织翡翠，金辔闹珑璁。宝蹄轻稳，

香尘满地骤隆隆。云是东京才子，名擅文章
钜伯，一世独推雄。高盖拥宾从，下马气如
虹。

运无精，钟神秀，贯当中。磊磊落落，
二十八宿列心胸。前殿当年奏赋，笔补天工
造化，声价欲摩空。却笑庞眉客，垂翅附冥
鸿。

刘禹锡武昌老人说笛歌：武昌老人七十余，手
把庾令相闻书。自言年少学吹笛，早事曹王曾赏激。
往年征镇戍蕲州，楚山萧萧笛竹秋。当时买林恣搜
索，典却身上乌貂裘。古苔苍苍封老节，石上孤生
饱风雪。商声五音随指发，水中龙应行云绝。曾将
黄鹤楼上吹，一声占尽秋江月。如今老去兴独迟，
音韵高低耳不知。气力已无心尚在，时时一曲梦中
吹。

括虞美人

武昌七十庞眉叟。学笛从年少。萧萧笛
竹楚山秋。当日买林、曾典黑貂裘。

一声占尽秋江月。天外行云绝。如今老
去兴犹迟。尚想时时、一曲梦中吹。

山谷题杜子美浣花醉归图：拾遗流落锦宫城，
故人作尹眼为青。碧鸡坊西结茅屋，百花潭水濯冠
纓。故衣未补新衣绽，空蟠胸中书万卷。探道欲度
羲皇前，论诗未觉国风远。干戈峥嵘暗宇县，杜陵
韦曲无鸡犬。老妻稚子且眼前，弟妹漂零不相见。
此公乐易真可人，园翁溪友肯卜邻。邻家有酒邀皆
去，得意鱼鸟来相亲。浣花酒船散车骑，野墙无主
看桃李。宗文守家宗武扶，落日蹇驴驮醉起。愿闻
解兵脱兜鍪，老儒不用千户侯。中原未得平安报，
醉里眉攒万国愁。生绡铺墙粉墨落，平生忠义命寂

寔。儿呼不苏驴失脚。犹恐醒来有新作。常使诗人拜画图，煎胶续弦千古无。

括江神子

拾遗流落锦官城。故人情。眼为青。时向百花，潭水濯冠缨。韦曲杜陵行乐地，尘土暗，叹漂零。

园翁溪友总比邻。酒盈尊。肯相亲。落日蹇驴，扶醉两眉颦。磊落平生忠义胆，诗与酒，醉还醒。

范文正严先生祠堂记：先生，汉光武之故人也，相尚以道。及帝握赤符，乘六龙，得圣人之时，臣妾亿兆，天下孰加焉，惟先生以节高之。既而动星象，归江湖，得圣人之清，泥涂轩冕，天下孰加焉，惟光武以礼下之。在蛊之上九，众方有为，而独不事王侯，高尚其志，先生以之。在屯之初九。阳德方亨，而能以贵下贱，大得民也，光武以之。盖先生之心，出乎日月之上；光武之器，包乎天地之外。微先生，不能成光武之大；微光武，岂能遂先生之高哉！而使贪夫廉、懦夫立，是有大功于名教也。某来守是邦，始构堂而奠焉。乃复其为后者四家，以奉祠事。又从而歌曰：“云山苍苍。江水泱泱。先生之风，山高水长。”

括沁园春

子陵先生，故人光武，以道相忘。幸炎符在握，六龙在御，臣来亿兆，阳德方刚。自是先生，独全高节，归去江湖乐未央。动星象，被羊裘傲睨，一世轩裳。

高哉不事侯王。爱此地山高水更长。盖先生心地，超乎日月，又谁如光武，器量包荒。立懦廉顽，有功名教，万世清风更激扬。无古今，想云山郁郁，江水泱泱。

李白春夜宴诸从弟桃李园序：夫天地者，万物之逆旅；光阴者，百代之过客。而浮生若梦，为欢几何？古人秉烛夜游，良有以也。况阳春召我以烟景，大块假我以文章。会桃李之芳园，序天伦之乐事。群季俊秀，皆为惠连；吾人咏歌，独惭康乐。幽赏未已，高谈转清。开琼筵以坐花，飞羽觞而醉月。不有佳作，何伸雅怀。如诗不成，罚依金谷酒数。

括临江仙

须信乾坤如逆旅，都来一梦浮生。夜游秉烛尽欢情。阳春烟景媚，乐事史来并。

座上群公皆俊秀，高谈幽赏俱清。飞觞醉月莫辞频。休论金谷罚，七步看诗成。

李白清平调辞：开元中，禁中初重木芍药，即今牡丹也。得四本：红、紫、浅红通白者，上移植于沉香亭前。花方繁开，上乘照夜车，太真妃以步辇从。诏选梨园弟子，得乐一十六色。李龟年以歌擅一时，手持檀板，将欲歌。上曰：赏名花，对妃子，焉用旧乐？命以金花笺宣赐翰林供奉李白白承诏旨，宿醒犹未解，援笔赋之。

云想衣裳花想容。春风拂槛露花浓。若非群玉山头见，会向瑶台下逢。

一枝红艳露凝香。云雨巫山枉断肠。借问汉宫谁得似，可怜飞燕舞红妆。

名花倾国两相欢。长得君王带笑看。解释春风无限恨，沉香亭北倚阑干。

全宋词 林正大

辞进，促龟年歌之。太真妃持觥黎七宝杯，酌西凉州葡萄酒，笑领歌辞，意甚厚。饮罢，敛绣巾重拜。上自是顾李白尤异于诸学士云。

括酹江月

开元盛日，爱名花绝品，浅红深紫。云想衣裳□□映，曲槛软风微度。群玉山头，瑶台月下，一□香凝露。嫣然倾国，巫山肠断云雨。

借问标格风流，汉宫谁似，飞燕红妆舞。解释春风无限恨，博得君王笑语。七宝林深，葡萄酒满，胜赏今何许。沉香亭北，倚阑终日凝伫。

林 自 然

西江月

二十余年访道，经游万水千山。明师未遇肯安闲。几度拈香一瓣。

幸遇至人说破，虚无妙用循环。工夫只在片时间。遍体神光灿烂。

酹江月 金丹合潮候图

凿开混沌，见钱塘南控、长江凝碧。今古词人图此景，谁解推原端的。岁去年来，日庚月甲，因甚无差忒。如今说破，要知天地来历。

道散有一强名，五行颠倒。互列乾坤历。坎水逆流朝丙户，随月盈亏消息。气到中秋，金能生水，倍涌千重雪，神仙妙用，与潮没个差别。

留晚香

最高楼 寿梅屋儒学谭提举 九月十九

西江水 ,分润到全闽。芹藻亦生春。秀钟东壁双躔瑞 ,祥开南极一星明。把紫阳、年月算 ,恰同庚。

前十日、重阳秋正好。后十日 ,小阳春未透。梅与菊 ,此交承。酌公菊水来称寿 ,期公梅实去和羹。要教人 ,看久远 ,是功名。

留 元 崇

菩萨蛮

江头日落孤帆起。归心拍拍东流水。山
远不知名。为谁迢递青。

危桥来处路。尚带潇湘雨。楚尾与吴头。
一生离别愁。

留元刚

满江红 泛舟武夷，午炊仙游馆，次吕居仁韵

风送清篙，沿流溯、武夷九曲。回首处，虹桥无复，幔亭遗屋。翠壁云屏临钓石，银河雪瀑飞寒玉。想当年、铁笛倚林吹，秋空绿。

褰苐带，搯筇竹。披荷芰，餐椒菊。问丹崖碧岭，底堪重辱。青笈不妨娱老眼，乌靴未许污吾足。恰仙游、一枕梦醒来，胡麻熟。

刘 褒

水龙吟 桂林元夕呈帅座

东风初毅池波，轻阴未放游丝堕。新春歌管，丰年笑语，六街灯火。绣鞞雕鞍，飞尘卷雾，水流云过。恍扬州十里，三生梦觉，卷珠箔、映青琐。

金猊戏掣星桥锁。博山香、烟浓百和。使君行乐，绛纱万炬，雪梅千朵。羯鼓轰空，鹍弦沸晓，樱梢微破。想明年更好，传柑侍宴，醉扶狨座。

雨中花慢 春日旅况

缥蒂绡枝，玉叶翡英，百梢争赴春忙。正雨后、蜂黏落絮，燕扑晴香。遗策谁家荡子，唾花何处新妆。想流红有恨，拾翠无心，往事凄凉。

春愁如海，客思翻空，带围只看东阳。更那堪、玉笙度曲，翠羽传觞。红泪不胜闺怨，白云应老他乡。梦回羈枕，风惊庭树，月在西厢。

全宋词 刘 褒

满庭芳 留别

柳袅金丝，梨铺香雪，一年春事方中。
烛前一见，花艳觉羞红。枕臂香痕未落，舟
横岸、作计匆匆。明朝去，暮天平水，双桨
碧云东。

隔离歌一阕，琵琶声断，燕子楼空。叹
阳台梦杳，行雨无踪。后会芙渠未老，从今
去、日望归鸿。愁如织，断肠啼鸪，饶舌诉
东风。

六州 歌头 上广西张帅

凭深负阻，蜂午肆奔腾。龙江上，妖氛
涨，鲸海外，白波惊。羽檄交飞急，玉帐静，
金韬閤，恢远驭，振长缨。密分兵。细草黄
沙渺渺，西关路、风袅高旌。听飞霜令肃，
坚壁夜无声。鼓角何神。地中鸣。

看追风骑，攒云槊，雷野鞞，激天钲。
飞箭集，旄头坠，长围掩，郭东倾。振旅观
旋凯，笳鼓竞，绣旗明。刀换犊，戈藏革，
士休营。黄色赤云交映，论功何止蔡州平。
想环城苍玉，深刻入青冥。永诏来今。

水调歌头 中秋

天淡四垂幕，云细不成衣。西风扫尽纤
翳，凉我鬓边丝。破匣菱花飞动，跨海清光

无际，草露滴明玕。杯到莫停手，何用问来期。

坐虚堂，揩病眼，溯流辉。云山应有幽恨，瑶瑟掩金徽。河汉无声自转，玉兔有情亦老，世事巧相违。一写谪仙怨，双泪满君颐。

刘才邵

夜度娘

菱花炯炯垂鸾结，懒学宫妆匀膩雪。风吹
凉鬢影萧萧，一抹疏云对斜月。

刘 敞

清平乐

小山丛桂。最有留人意。拂叶攀花无限思。雨湿浓香满袂。

别来过了秋光。翠帘昨夜新霜。多少月宫闲地，姮娥与借微芳。

踏莎行

蜡炬高高，龙烟细细。玉楼十二门初闭。疏帘不卷水晶寒，小屏半掩琉璃翠。

桃叶新声。榴花美味。南山宾客东山妓。利名不肯放人闲，忙中偷取工夫醉。

刘 辰 翁

望江南 晚晴

朝朝暮，云雨定何如。花日穿窗梅小小，
雪风洒雨柳疏疏。人唱晚晴初。

又 元宵

春悄悄，春雨不须晴。天上未知灯有禁，
人间转似月无情。村市学箫声。

又 秋日即景

梧桐子，看到月西楼。醋醑橙黄分蟹壳，
麝香荷叶剥鸡头。人在御街游。

又

梧桐子，人在御街游。凤宿云绡金缕带，
龙池翠帐玉香球。宫女后庭秋。

双调望江南 赋所见

长欲语，欲语又蹉跎。已是厌听夷甫颂，
不堪重省越人歌。孤负水云多。

羞拂拂，懊恼自摩挲。残烛不教人径去，
断云时有泪相和。恨恨欲如何。

又 寿谢寿朋

前之夕，织女渡河边。天上一朝元五日，
人间小住亦千年。相合降神仙。

当富贵，掩鼻正高眠。欲语会稽仍小待，
不知文举更堪怜。蔗境在顽坚。

又 寿赵松庐

添一岁，减一岁愁眉。若待一生昏嫁了，
更须采药十年迟。昏嫁已随时。

东家者，俎豆伴儿嬉。幸自少年场屋了，
谁能掬浙数还炊。千岁是灵龟。

又 胡盘居生日

盘之所，春蝶舞晴暄。溪傍野梅根种玉，
墙围修竹笋生鞭。深院待回仙。

嘉熙好，四十二年前。犹记五星丁卯聚，
更迟几岁甲申连。快活共千年。

又 寿王秋水

齐眉举，彩侍紫霞卮。天上九朝帛冉冉，
尊前一笑玉差差。人唱自家词。

篱下菊，醉把一枝枝。花水乞君三十斛，
秋风记我一联诗。留看晚香时。

又 寿张粹翁

七日后，重会是星前。二月之间浑似此，
余年何止万三千。日拟醉华筵。

歌白雪，除是雪儿传。看取长生瓢屡倒，
眼前橘粟术何玄。自唱鹊桥仙。

南乡子 乙酉九日

宽处略从容。华水华山自不同。旧日诸贤携手恨，匆匆。只说明年甚处重。

几岁避辽东。茅竹秋风一并空。欲望辽东何处是，濛濛。也似秦楼一梦中。

又

木犀花下，因忆永阳宣溪与故乡族子门径之盛，而其人皆适在此，感叹复赋

香雪碎团团。便合枝头带露餐。笑倒那人和玉屑，金丹。不在仙人掌上盘。

千树碧阑干。山崦朱门梦里残。花下主人都在此，谁看。天上人间一样寒。

又 即席纪游

去似赏花移。处处开尊亦不辞。梨栗又空醅又尽，方知。旧日骊驹劝客归。

归路月相随。儿子门生个个迟。坐久不知无可待，堪疑。向道儿痴直是痴。

浪淘沙 秋夜感怀

无叶著秋声。凉鬓堪惊。满城明月半窗横。惟有老人心似醉，未晓偏醒。

起舞故无成。此恨难平。正襟危坐二三更。除却故人曹孟德，更与谁争。

又 大风作

卷海海翻杯。倾动蓬莱。似嫌到处马头

埃。雨洗御街流到我，吹向潮回。

寒似雪天梅。安石榴开。绣衾重暖笑炉灰。料想东风还忆我，昨夜归来。

又 有感

无谓两眉攒。风雨春寒。池塘小小水漫漫。只为柳花无一点，忘了临安。

何许牡丹残。客倚屏看。小楼面面是春山。日暮不知春去路，一带阑干。

如梦令 题四美人画

比似寻芳娇困。不是弓弯拍袞。无物倚春慵，三寸袜痕新紧。羞褪。羞褪。忽忽心情未稳。

又

寂历柳风斜倚。错莫梦云难记。花影为谁重，一握鲛人丝泪。何事。何事。历历脸潮羞起。

又

睡眼青阴欲午。当户小风轻暑。倦近碧阑干，斜影却扶人去。无绪。无绪。落落一襟轻举。

又

落叶西风满地。独宿琼楼丹桂。孤影抱蟾寒，寄与月明千里。休寄。休寄。粟粟蕊珠心碎。

江城子 西湖感怀

涌金门外上船场。湖山堂。众贤堂。到几凄凉，城角夜吹霜。谁识两峰相对语，天惨惨，水茫茫。

月移疏影傍人墙。怕昏黄。又昏黄。旧日朱门，四圣暗飘香。驿使不来春又老，南共北，断人肠。

又 春兴

一年春事几何空。杏花红。海棠红。看取枝头，无语怨天公。幸自一晴晴太暖，三日雨，五更风。

山中长自忆城中。到城中。望水东。说尽闲情，无日不匆匆。昨日也同花下饮，终有恨，不曾浓。

又 和默轩初度韵

书题拂拂洞庭香。孕云黄。粲珠光。唤谪仙人，除是贺知章。未老得闲闲到老，无一事，和诗忙。

是中曾著老人双。送千觞。乐谁妨。世上输赢，不似烂柯长。晚入耆英年最少，空结客，少年场。

又 海棠花下烧烛词

红敲醉袖殢阑干。夜将阑。去难拚。烧蜜调峰，重照锦团栾。春到洞房深处暖，方知道，月宫寒。

枝枝红泪不曾干。背人弹。语羞檀。欲

睡心情，一似梦惊残。正自朦胧花下好，银
烛里，几人看。

点绛唇 瓶梅

小阁横窗，倩谁画得梅梢远。那回半面。
曾向屏间见。

风雪空山，怀抱无荀倩。春堪恋。自羞
片片。更逐东风转。

又 和访梅

一雪蹉跎，蹇驴不载吟鞭去。夜听春雨。
踏雪差无苦。

待得花晴，总是游人处。梅应许。小桥
延伫。蜂蝶先成路。

又 寄情

醉里瞢腾，昨宵不记归时候。自疑中酒。
耿耿还依旧。

恨不能言，只是天相负。天知否。卷中
人瘦。一似章台柳。

又 和邓中甫晚春

燕子池塘，乱红过尽秋千晚。絮飞欲倦。
正是帘初卷。

睡起无情，犹道天涯远。羞匀面。乍惊
红浅。梦自无人见。

又 题画

搆指春寒，陇禽一片飞来雪。无言可说。
暗啄相思结。

只影年深，也作关山别。翻成拙。落花时节。倩子规声绝。

又

虹玉横箫，纤纤指按新声作。参差重约。昨夜梁伊错。

几许闲愁，品字都忘却。沈吟觉。一声哀角。满院残花落。

浣溪沙 三月三日

高卧何须说打乖。小篱过雨翠长街。绀桃定有踏青鞋。

晴日又思花处所，东风绝似柳情怀。人间安得酒如淮。

又 壬午九日

身是去年人尚健。心知十日事如常。眼前杯酒是重阳。

破帽簪萸携素手，长歌藉草慰寒香。儿童怪我老来狂。

又 虎溪春日

春日春风掠鬓须。乱山相对拥寒炉。彩鞭金胜一时无。

自缕青丝成细柳，更堆残雪当凝酥。儿童且莫唱皇都。

又 寿陈敬之推官

身是高人欲寝冰。引年可待进豨苓。无忧无患也身轻。

雪里放囚天亦喜，平安骑鹤到家庭。今年春早为长生。

又

十日千机可复谐。郭郎感运岂仙才。人间自是少行媒。

直上扶摇须九万，满前星斗共昭回。又传贾客向曾来。

又

暮暮相望夕甫谐。针楼巧巧似身材。下头无数老人媒。

昨夜竹林那得见，朝来乾鹊是空回。人间五日后能来。

摊破浣溪沙 潭上夜归

醉里微寒著面醒。天风不展帽敲倾。行过溪深松雪下，夜三更。

白白野田铺似月，玢玢沙路踏如冰。不见剡溪三百曲，一舟横。

又

澹澹胭脂浅著梅。温柔不上避风台。若比杏桃真未识。夺银胎。

汗面拭来慵傅粉，酒香浓后暗潮腮。娇嫩不应醒似醉，倩谁猜。

霜天晓角 初春即事

柳梢欲雪。十里烟明灭。曲曲阑干转影，

教人忆、夜来月。

家人相对说。灯花还又结。冻雨村村□
鼓，终不似、上元节。

又 中秋对月

乌云汗漫。浊浪翻河汉。过尽千重魔障，
堂堂地、一轮满。

秋光还又半。檐声初漏断。不管满身花
露，已办著、二更看。

又 和中斋九日

骑台千骑。有菊知何世。想见登高无处，
淮以北、是平地。

老来无复味。老来无复泪。多谢白衣迢
递，吾病矣、不能醉。

又

楼下梅一株，经冬无一花。春半忽开，一萼梢
头，出万红中，因赋之

经年寂寞。已负花前约。忽向红梅侧畔，
开点雪、有人觉。

不开何似莫。百梢才一萼。却问寿阳宫
额，两三蕊、怎能著。

又 寿吴蒙庵

矍然如竹。自是天仙福。小小画堂锦样，
听人唱、鹤飞曲。

橙橘黄又绿。蟹到新萸熟。便做月三十
斜，饮不尽、菊潭菊。

又 寿陈敬之

朝来微雪。又近长生节。造就一枝清绝，

梅与雪、怎分别。

两年心似月。除是天知得。手种春风千
树，一颗颗、待儿摘。

又 寿张古岩

明年七十。歌彩桥仙夕。见说严君平道，
年年是、月初一。

同时同里密。后今今又昔。便做伏生年
纪，也未到、蹇吃吃。

又 寿贾教

良宵七七。又近中元日。桥上老人有约，
后五日、重来觅。

婵娟银海出。木犀新雨湿。惟有延平剑
气，箕斗外、广寒逼。

又 寿萧静安，时归永新

归来把菊。春瓮今朝熟。苦苦留君不得，
携孺子、到汾曲。

庐山真面目。冰清还映玉。长笑欧公老
懒，君且住、饮螺绿。其子昏燕氏。

又 寿康臞山

问春来未。也似辛壬癸。如此男儿五十，
又过却、孔融二。

画堂孙子子。新桃如故垒。不管明朝后
日，春满眼、是千岁。

又

□□□□。□□□□□。□□□□□□，
□□□、□□□。

治中心似佛。治中心似日。人祝治中千

岁，似翁福、似翁德。

卜算子 元宵

不是重看灯，重见河边女。长是蛾儿作
队行，路转风吹去。

十载废元宵，满耳番腔鼓。欲识尊前太
守谁，起向尊前舞。

又 寿郡守

早已是三年，父老依依借。愿与天公借
几年，保我鸡豚社。

□□□□□，□□□□□。□□□□□
□□，□□□□□。

菩萨蛮 秋兴

芭蕉叶上三更雨。人生只合随他去。便
不到天涯。天涯也是家。

屏山三五叠。处处飞胡蝶。正是菊堪看。
东篱独自寒。

又 湖南道中

黄鸡喔喔催人起。困不成眠窗似水。清
露不曾寒。朝来起自难。

家人当睡美。又忆归程几。不管湿阑干。
芙蓉花自看。

又 春晓

画梁语透帘栊晓。坼桐风送杨花老。细
雨绿阴寒。罗襟只似单。

青门三里道。个个游芳草。比似嫁来看，踏青难更难。

又 春日山行

江波何似西湖曲。村烟相对峰南北。何处不青青。青青是汉茔。

长亭芳草路。寒食谁家墓。旧日厌残红。人行九里松。

又 丁丑送春

殷勤欲送春归去。白首题将断肠句。春去自依依。欲归无处归。

天涯同是寓。握手留春住。小住碧桃枝。桃根不属谁。

又 题醉道人图

八仙名姓当时少。污尊牛饮同倾倒。惟有我公荣。旁人笑独醒。

多年村落走。泥饮无升斗。入了玉门关。人生一醉难。

好事近

中斋惠念，赐词俾寿，不胜岁寒兄弟之意

□后百年闲，元度自伤来暮。打破虚空无碍，共乘龙飞去。

更参末后句如何，此事未能付。前遇小桥风雪，是君诗成处。

谒金门 风乍起，约巽吾同赋海棠

娇点点。困倚春光欲软。滴尽守宫难可

染。浓欺红烛艳。

寂寂露珠啼脸。翠袖不禁风飏。芳径相逢惊笑靥。日长初睡转。

又 和巽吾重赋海棠

花露湿。红泪裛成珠粒。比似昭阳恩未得。睡来添醉色。

一笑娇波滴滴。再顾羞潮拂拂。恨血千年明的的。千年人共忆。

又 和巽吾海棠韵

游赏竞。看取落红阵阵。花睡不成娇似病。春寒空受尽。

旧日不知繁盛。欲饮如今无兴。恨满东风无绿鬓。东风还自恨。

长相思 喜晴

上元晴。上元晴。待得晴时坐触屏。山禽三两声。

欲归城。未归城。见说城中处处灯。明年处处行。

忆秦娥

中斋上元客散感旧，赋忆秦娥见属，一读凄然，随韵寄情，不觉悲甚

烧灯节。朝京道上风和雪。风和雪。江山如旧，朝京人绝。

百年短短兴亡别。与君犹对当时月。当时月。照人烛泪，照人梅发。

又

昨和次，又作收灯节，未遣，早见古岩四叠，
又得中斋别梅，遂并写寄

惊雷节。梅花冉冉销成雪。销成雪。一
年一度，为君肠绝。

古人长恨中年别。余年又过新正月。新
正月。不堪临镜，不堪垂发。

又

梅花节。白头卧起餐毡雪。餐毡雪。上
林雁断，上林书绝。

伤心最是河梁别。无人共拜天边月。天
边月。一尊对影，一编残发。

又

收灯节。霖铃又似鳌山雪。鳌山雪。今
宵清绝，今宵愁绝。

老人似少终然别。痴痴更望春三月。春
三月。花如人面，自羞余发。

又 为曹氏胭脂阁叹

春如昨。晓风吹透胭脂阁。胭脂阁。满
园茅草，冷烟城郭。

青衫泪尽楼头角。佳人梦断花间约。花
间约。黄昏细雨，一枝零落。

西江月 新秋写兴

天上低昂似旧，人间儿女成狂。夜来处
处试新妆。却是人间天上。

不觉新凉似水，相思两鬓如霜。梦从海

底跨枯桑。阅尽银河风浪。

又 忆仙

曾与回翁把手，自宜老子如龙。怀胎不敢问春冬。等待鞭鸾笞凤。

昨夜又迟黄石，今朝重叩鸿濛。碧桃花下醉相逢。说尽鹏游蝶梦。

又

石奇仪尝授吾奇门式局，以为兵法至要，日持扇图自卫

玉帐传心如镜，青龙绕指成轮。尘中多少白头人。乾里寻壬难认。

世事说来都了，鬼神见也须瞋。迷槎问我是何津。向道先生昼困。

清平乐 石榴

深红半面。一似墙头见。草树池塘青一片。独倚阑干几遍。

更谁绛袖朱唇。火云相对英英。笑杀牡丹正午，离披不任看承。

又 寿某翁

君词为寿。绝妙孙辛妇。但恨杯无露添酒。空等待梅花久。

喜君白首还玄。人间合信天缘。如此相从至老，我亦何倦余年。

归国遥 暮春遣兴

初雨歇。照水绿腰裙带热。杨花不做人

情雪。风流欲过前村蝶。羞成别。回头却恨春三月。

昭君怨 玩月

月出东山之上。长忆御街人唱。恨我不能琴。有琴心。

徙倚秋波平莹。渐久玉肌清冷。待更下阑干。起来看。

浣溪沙 春日即事

远远游蜂不记家。数行新柳自啼鸦。寻思旧事即天涯。

睡起有情和画卷，燕归无语傍人斜。晚风吹落小瓶花。

又 感别

点点疏林欲雪天。竹篱斜闭自清妍。为伊憔悴得人怜。

欲与那人携素手，粉香和泪落君前。相逢恨恨总无言。

减字木兰花 玩月答蒙庵和词

何须剪纸。依旧一团圆照水。莫倚空寒。柳下池边也只般。

君何忽忽。宇宙人生都是客。月在云端。人自愁人不解看。

又 甲午九日午山作

旧游山路。落在秋阴最深处。风雨重阳。
无蝶无花更断肠。

天知老矣。莫累门生与儿子。不用登高。
高处风吹帽不牢。

又 有感

东风似客。醉里落花南又北。客似东风。
携手斜阳一笑中。

佳人怨我。不寄江南春一朵。我怨佳人。
憔悴江南不似春。

又

腊望初晴，月佳甚，有上元花柳意，不能忘情
腊销三五。月向雪山云外吐。烟水黄昏。
梅柳依稀笛断魂。

今宵豫赏。便作香尘随步想。莫待元宵。
灯火零星雨寂寥。

又 乙亥上元

无灯可看。雨水从教正月半。探茧推盘。
探得千秋字字看。

铜驼故老。说著宣和似天宝。五百年前。
曾向杭州看上元。

又 庚辰送春

送春待晓。春是五更先去了。我醉方知。
春正怜伊怕别伊。

留君不可。归到海边方忆我。做尽花归。
欲赠君时少一枝。

又

尚学林已丑寿旦，适归庐陵。其先世相州人，居永和，今家临川

相州锦好。待到相州人已老，颍水归田。白鹭惊猜已十年。

太师尚父。晚遇明时方用武。大笑相逢。把酒家乡是客中。

又 自述

不能管得。欲雨能教天地黑。待得开晴。不用吾言也自行。

一杯亦醉。万事无能吾欲睡。旧亦能诗。说旧时诗问是谁。

又 再用韵戏古岩出妾

清欢昨日。十事不如人六七。试数从前。素素相从得几年。

子兮子兮。再拣一枝何处起。翠釜峰驼。客好其如良夜何。

又 寿词

脾神喜乐。寿酒一杯胜服药。过却明朝。顶上新霜也合销。

小春三日。便觉春暄梅影出。醉把梅看。比似茱萸更耐寒。

山花子 春暮

东风解手即天涯。曲曲青山不可遮。如此苍茫君莫怪，是归家。

阊阖相迎悲最苦，英雄知道鬓先华。更

全宋词 刘辰翁

欲徘徊春尚肯，已无花。

又

此处情怀欲问天。相期相就复何年。行
过章江三十里，泪依然。

早宿半程芳草路，犹寒欲雨暮春天。小
小桃花三两处，得人怜。

柳梢青 春感

铁马蒙毡，银花洒泪，春入愁城。笛里
番腔，街头戏鼓，不是歌声。

那堪独坐青灯。想故国、高台月明。辇
下风光，山中岁月，海上心情。

南歌子

搔困麻仙爪，含暄忍客衣。夜长窗月露
成帏。不说明朝风雨、自当归。

又

筠熟双投美，香飘一缕丝。霜前雁到蟹
螯持。自试小窗醉墨、作新诗。

朝中措 劝酒

炼花为露玉为瓶。佳客为频倾。耐得风
霜满鬓，此身合是金茎。

墙头竹外，洞房初就，画阁新成。嚼得
梅花透骨，何愁不会长生。

太常引 和香岩上元韵

便晴也是不曾晴。不怕金吾禁行。风雨动乡情。梦灯火、扬州化城。

少年跌宕，谁家娇小，绕带到天明。昨夜月还生。但惊破、霓裳数声。

又 寿李同知

此公去暑似新秋。吏毒一旬旬。行县胜监州。觉甘雨、随车应求。

鹭清为酒，螺清为寿，起舞祝君侯。急召也须留。廿四考、中书到头。

玉楼春

侯仲泽约饮螺山灵泉寺，余与邓中甫候久，欲暮，归，归而侯至寺，相失

霜风不动晴明好。探梅有约城东道。桥边失却老仙期，城门落日人归早。

野田一望迷芳草。除是腾空君后到。立马三周黛佛头，参差中路令人老。

又 乙酉九日

龙山歌舞无人道。只说先生狂落帽。秋风亦是可怜人，要令天意知人老。

菊花不为重阳早。自爱古人诗句恼。与君郑重说□□，残年惟有重阳好。

乌夜啼 初夏

犹疑薰透帘栊。是东风。不分榴花更胜、
一春红。

新雨过，绿连空。蝶飞慵。闲过绿阴深
院、小花浓。

又 中秋

素娥醉语曾留。又中秋。待得重圆谁妒、
两悠悠。

向愁旱，今愁水，没中洲。看取明朝晴
去、不须愁。

又

何年似永和年。记湖船。如此晴天无处、
望新烟。

江南女，裙四尺，合秋千。昨日老人曾
见、久潜然。

行香子 和北客问梅，白氏，长安人

雪履无痕。溪影传神。著坡诗、请自清
温。朝朝不去，夕夕空勤。似梦中云，云外
雪，雪中春。

四野昏昏。匹马巡巡。拣一枝、寄与芳
尊。更谁兴到，于我情真。是白家宾，江南
路，陇头人。

又 次草窗忆古心公韵

玉立风尘。光动黄银。便谈文、也到夜

分。无人烛下，壁上传神。记老婆心，寒士语，道人身。

极意形容，下语难亲。更万分、无一分真。醉翁去后，往往愁人。愿滴山泉，衔丘冢，化龙云。

又 叠韵

海水成尘。河水无银。恨幽明、我与公分。青山独往，回首伤神。叹魏阙心，礧石魄，汨罗身。

除却相思，四海无亲。识风流、还贺季真。而今天上，笑谪仙人。但病伤春，愁厌雨，泪看云

又 探梅

月露吾痕。雪得吾神。更荒寒、不傍人温。山人去后，车马来勤。但梦朝云，愁暮雨，怨阳春。

说著东昏。记著南巡。泪盈盈、檀板金尊。怜君素素，念我真真。叹古来言，新样客，旧时人。

品令 闻莺

满庭芳草。更昨日、落红如扫。绿阴正似人怀抱。一声睍睍，春色何曾老。

幸自不须人起早。寂寞如相恼。旧时闻处青门道。禁烟时候，柳下人家好。

鹊桥仙 题陈敬之扇

乘鸾著色，痴蝇误拂。不及羲之醉墨。

偶然入手送东阳，便看取、薰时清适。

清风去暑，闲题当日。宰相纱笼谁识。
封丘门外定何人，这一点、瞒他不得。

又 寿臞山母

看人掷果，看人罢织。难得团栾七夕。
蟠桃只在屋东头，庆西母、年开八帙。

去年今日，今年今日。添个曾孙抱膝。
人间乐事有多般，算此乐、人间第一。

又 自寿二首

轻风澹月，年年去路。谁识小年初度。
桥边曾弄碧莲花，悄不记、人间今古。

吹箫江上，沾衣微露。依约凌波曾步。
寒机何意待人归，但寂历、小窗斜雨。

又

天香吹下，烟霏成路。飒飒神光暗度。
桥边犹记泛槎人，看赤岸、苔痕如古。

长空皓月，小风斜露。寂寞江头独步。
人间何处得飘然，归梦入、梨花春雨。

一翦梅 和人催雪

万事如花不可期。花不堪持。酒不堪持。
江天雪意使人迷。翦一枝枝。歌一枝枝。

歌者不来今几时。姜影无词。张影无词。
不歌不醉不成诗。歌也迟迟。雪也迟迟。

又 和敖秋崖为小孙三载寿谢

人生总受业风吹。三赠儿儿。八十几儿。

全宋词 刘辰翁

深闺空谷把还持。啼看人知。啼怕人知。

客中自种绿猗猗。月下横枝。雪下横枝。
尊前百岁且开眉。今岁今时。前岁今时。

夜飞鹊 七夕

何曾见飞渡，年又年痴。今古相望犹疑。
朱颜一去似流水，断桥魂梦参差。何堪更嗟
迟暮，听旁人说与，此夕佳期。深深代籍，
盼悠悠、北地胭脂。

谁寄扬州破镜，遍海角天涯，空待人归。
自小秦楼望巧，吴机回锦，歌舞为谁。星萍
耿耿，算欢娱、未省流离。但秋衾梦浅，云
闲曲远，薄命同时。

疏影 催雪

香篝素被。听花犯低低，瑶花开未。长
记那时，炽炭围炉，瘦妻换酒行试。党家人
在销金帐，约莫是、打围归际。又谁知、别
忆烹茶，冷落故家愁思。

闻道滕骄巽懒，今朝待檄与，翻云须易。
白白不成，又不教晴，做尽黄昏情味。银河
本是冰冰底。怎忍向、东风成水。待满城、
玉宇琼楼，却报卧庐人起。

摘红英 赋花朝月晴

花朝月。朦胧别。朦胧也胜檐声咽。亲

曾说。令人悦。落花情绪，上坟时节。

花阴雪。花阴灭。柳风一似秋千掣。晴未决。晴还缺。一番寒食，满村啼鸪。

千秋岁 和尚学林寿筵即席

新篘熟也，借问谁家早。梅影里，蜂儿绕。三更残月上，一夜霜天晓。溪桥小，春风有意年年到。

当年青鸟去，落叶无人扫。铜柱仄，瑶池老。残钟长乐树，坠马咸阳道。空回首，御街人卖南京枣。

促拍丑奴儿 辛巳除夕

送岁可无诗。得团栾、忍不开眉。不记去年今夕梦，江东怀抱，江西信息，舍北妻儿。

五十虞廖炊。待五十、富贵成痴。百年苦乐乘除看，今年一半，明年一半，更似儿时。

又 有感

世事莫寻思。待说来、天也应悲。百年已是中年后，西州垂泪，东山携手，几个斜晖。

也莫苦吟诗。苦吟诗、待有谁知。多□不是无才气，文时不遇，武时不遇，更说今时。

最高楼 寿秋水

银河水，洗得世间清。山色雨余青。老子纶巾棋别墅，人家鼾睡柝秋城。定谁劳，定谁福，定谁能。

常恨著、景升儿不似。又恨著、景升牛小耳。空相望，愧平生。我欲临风扶玉树，自攀承露酌金茎。看昆明，鳞石长，海桑晴。

又 壬辰寿王城山八十

朱顶字，八十正平头。添作八千秋。无能也自收郿坞，到今恨不贬潮州。看几人，炎又冷，老还羞。

也不学、太公忙把火。也不学、申公轮转磨。休莫莫，莫休休。小迟授业何曾吃，更迟食乳不须愁。且从容，某水钓，某丘游。

又 和咏雪

非是雪，只是玉楼成。屑不尽云英。东边老树颓然折，西头稚柳爆然声。试平安，松丈丈，竹兄兄。

有谁向、金船呼小玉。又谁怜、纸帐梦飞琼。怪疏影，坠娉婷。唤起老张寒蔌蔌，好歌白雪与君听。但党家，人笑道，太粗生。

又 再和

花上雪。信手捻来成。屑不就琼英。昨朝已见诗成卷，今朝又试曲成声。更催催，莫不做，水仙兄。

终须待、晴时携斗酒。更须待、老夫吟

数首。休更叠，□娉婷。已无翠鸟传花信，
又无羯鼓与花听。更催催，迟数日，是春生。

桂枝香

寄扬州马观复。时新旧侯交恶，甚思去年中秋
泛月，感恨杂言

吹箫人去。但桂影徘徊，荒杯承露。东
望芙蓉缥缈，寒光如注。去年夜半横江梦，
倚危檣、参差曾赋。茫茫角动，回舟尽兴。
未惊鸥鹭。

情知道、明年何处。漫待客黄楼，尘波
前度。二十四桥，颇有杜书记否。二三子者
今如此。看使君、角巾东路。人间俯仰，悲
欢何限，团圆如故。

临江仙 代贺丞相两国夫人生日并序

甲子之秋，九月吉日，大丞相国公寿母两国太
夫人初度，谨上小词，用献为王母三千年之曲。

丞相袞衣朝戏彩，年年庆事如新。尊前
一笑共儿孙。人间传寿酒，天上送麒麟。

缥缈祥烟连北阙，天颜有喜生春。蓬莱
清浅海光平。今年初甲子，重试碧桃根。

又 寿刘教

闻道城东鹤会，欣然一笑乘风。不知一
鹤在墙东。仙人不识，未始出吾宗。

弟子有年于此，先生之道如龙。碧桃花
子落壶中。化为三五粒，元是北边松。

又 壬午七夕

天际何分南与北，五更纵又成横。夜来拾得断河星。化为一片石，持去问君平。

老大看天一笑，儿童问我须臾。向来牛女本无名。要知天上事，亦似谤先生。

又 将孙生日赋

二十年前此日，女兄庆我生儿。簪萱弄彩听孙啼。典衣沽美酒，数待冠昏时。

乱后飘零独在，紫荆墓棘风吹。尊前万事莫寻思。儿童看有子，白发故应衰。

又 贺默轩

旧日诗肠论斗酒，风流怀抱如倾。几年不听渭城声。尊前无贺老，卷里少弥明。

闻说语言都好，便应步履全轻。长生第一是风僧。额前书八十，能说又能行。

又 访梅

西曲胷衣迷去路，雪销断岸无痕。寻花不拟到前村。暖风初转袖，小径忽开门。

却忆临塘桥下马，暗香不是黄昏。人生南北与谁论。岭梅花树下，闲听蜜蜂喧。

又 谢友人

老去尚呼张丈，醉中自惜熊儿。越王台上鹧鸪啼。三朝臣不遇，无复好文时。

情绪幽幽似结，鬢丝索索禁吹。病来魂不到相思。散人腰已散，倚杖叹吾衰

又 晓晴

海日轻红通似脸，小窗明丽新晴。满怀

著甚是真情。不知春睡美，为爱晓寒轻。

说似吴山楼万叠，雪销未尽宫城。湖边柳色渐啼莺。才听朝马动，一巷卖花声。

又 有感

过雁天边信息，两宫池上心情。沈思海角愤难平。山风欺客梦，耿耿到天明。

幸自不争名利，闲愁夜夜如惊。明朝鬓白两三茎。世人都不念，似汝复何成。

又

睡过花阴一丈，愁深酒力千钟。梦魂不得似游蜂。瓶花无密约，到处自神通。

天上西湖似锦，人间骄马如龙。今年不与去年同。飘零终不恨，难与故人逢。

又 端午

幸自不须端帖子，闲中一句如无。爱他午日午时书。惟应三五字，便是辟兵符。

久雨石鲸未没，小风纨扇相疏。邀朋一笑共菖蒲。去年初禁酒，今日漫提壶

又 坐悟

我去就他甚易，他来认我良难。悟时到处是壶天。古诗寻一句，危坐看香烟。

金玉满堂不守，菁华岁月空迁。从今饱饭更安眠。丹经都不看，闲坐一千年。

又 辛巳端午和陈简斋韵

旧日采莲羞半面，至今回首匆匆。梦穿斜日水云红。痴心犹独自，等待郑公风。

海上颓云潮不返，侧身空堕辽东。人间

天上几时同。宫衣元不遇，无语醉醒中。

又 闲居感旧

昔走都门终夜雨，明朝泥淖堪惊。疏疏
点点忽鸡鸣。数峰青似染，快活早来晴。

十五年间春梦断，乱山寒食清明。无人
挑菜踏青行。青鸠啼雨外，闲听寺中声。

鹧鸪天 九日

白白江南一信霜。过都字不到衡阳。老
嘉破帽并吹却，未省西风似此狂。

攀北斗，酌天浆。月香满似菊花黄。神
仙暗度龙山劫，鸡犬人间百战场。

又 寿康教

白发平津起褻然。燕飞定远望生还。世
间最有团栾乐，又是平平过一年。

银信近，玉鞭先。东来西去爵衔鱣。人
生有命迟迟好。且喜称觞寿母前。

又 寿赵松庐

占得春风五日先。至今住处是开元。写
真若遇丹元子，只著当时宫锦船。

松戴雪，自苍然。八公花下少如前。看
来天上多辛苦，且住人间五百年。

又 和谢胡盘居祝橘为寿

自入孤山分外香。南枝不改旧时妆。为
曾盘里承青眼，一见溪头道胜常。

商山乐，又相羊。上方不复记传觞。橘

中个个盘深窈，依倚东风局意长。

又 迎春

去年太岁田间土，明日香烟壁下尘。马上新人红又紫，眼前歌妓送还迎。

钗头燕，胜金纣。燕歌赵舞动南人。遗民植杖唐巾起，闲伴儿童看立春。

又 立春后即事

旧日桃符管送迎。灯球爆竹斗先赢。鹿门乱走团栾久，才到城门有鼓声。

梅弄雪，柳窥晴。残年犹自冷如冰。欲知春色招人醉，须是元宵与踏青。

又 赠妓

暖逼酥枝渐渐融。双飞谁识蝶雌雄。歌声已逐行云去，花片偏来酒盏中。

眉月冷，画楼空。酒阑犹未见情钟。直须把烛穿花帐，方见佳人玉面红。

青玉案

微晴渡观桃，非复前日弥望之盛，独可十数树耳。盖以此间人摘实之苦，自伐去也。归途悄然念之，作此以示同行

稠塘旧是花千树。曾泛入、溪深误。前度刘郎重唤渡。漫山寂寂，年时花下，往往无寻处。

一年一度相思苦。恨不抛人过江去。及至来时春未暮。兔葵燕麦，冷风斜雨，长恨稠塘路。

又 用辛稼轩元夕韵

雪销未尽残梅树。又风送、黄昏雨。长记小红楼畔路。杵歌串串，鼓声叠叠，预赏元宵舞。

天涯客鬓愁成缕。海上传柑梦中去。今晚上元何处度。乱山茅屋，寒炉败壁，渔火青荧处。

又

寿老登八十六岁，戊午六月十七日

里中上大人谁大。人上大、仁难作。八十六翁闲处坐。小生懒惰。近来高卧。忘却今朝贺。

甲申还是连珠麽。剩有老人星一个。白发朱颜堪婆娑。灵光殿火。昆明劫过。角绮园黄我。

又 暮春旅怀

无肠可断听花雨。沈沈已是三更许。如此残红那得住。一春情绪。半生羁旅。寂寞空山语。

霖铃不是相思阻。四十平分犹过五。渐远不知何杜宇。不如归去。不如归去。人在江南路。

踏莎行 雨中观海棠

命薄佳人，情钟我辈。海棠开后心如碎。斜风细雨不曾晴，倚阑滴尽胭脂泪。

恨不能开，开时又背。春寒只了房栊闭。

待他晴后得君来，无言掩帐羞憔悴。

又 上元月明，无灯，明日霰雨屡作

璧彩笼尘，金吾掠路。海风吹断楼台雾。
无人知是上元时，一夜月明无著处。

早是禁烟，朝来冻雨。东风自放银花树。
雪晴须有踏青时。不成也待明年去。

又

北望蝶山，西迷凤苑。匆匆醉里题诗满。
黄花只似去年黄，去年人去黄花远。

雨压城荒，丘园路断。却晴又恨公来晚。
依稀自唱古人诗，明年此会知谁健。

又

松偃成阴，荷香去暑。过溪似是东林路。
不知宿昔有谁来，寺门同听催诗雨。

北马依风，凉蝉咽暮。城门半带东陵圃。
江南不是米元晖，无人更得沧洲趣。

又 樱桃词

珠压相于，胭脂同傅。樊家更共谁家语。
梢头结取一番愁，玉箫不会双双侣。

风送流莺，前歌后舞。并桃欲吐含来住。
双飞燕子自相衔，会教唇舌调鹦鹉。

烛影摇红 嘲王槐城独赏无月

老子婆娑，那回也上南楼去。素娥有恨
隐云屏，元是娇痴故。鸾扇徘徊未许。耿多
情、为谁堪诉。使君愁绝，独倚阑干，后期

无据。

有酒如船，片云扫尽霓裳露。他时与客更携鱼，犹记临皋路。因念南羁北旅。醉乌乌、凭君楚舞。问君不见，璧月词成，楼西沈处。

又 丙子中秋泛月

明月如冰，乱云飞下斜河去。旋呼艇子载箫声，风景还如故。袅袅余怀何许。听尊前、呜呜似诉。近年潮信，万里阴晴，和天无据。

有客秋风，去时留下金盘露。少年终夜奏胡笳。谁料归无路。同是江南倦旅。对婵娟、君歌我舞。醉中休问，明月明年，人在何处。

又 立春日雪，和秋崖韵

春日江郊，素娥吹下银幡舞。东风点点乱茶烟，留到明朝否。掩袖凝寒不语。漫黏酥、枝枝缕缕。断肠何似，飞絮多时，落梅深处。

仙掌擎来，翠眉敛半看成露。惊沙马上面帘轻，谁贵毡庐主。多少高阳伴侣。到如今、沈冥几许。乘槎相问，万里银河，欲归无路。

念奴娇

槐城赋以自寿，又和韵见寿，三和谢之

先生自寿，拥衾寒、重赋凌云游意。我有大儿孔文举，弱冠駸駸暮齿。桃已三偷，

树犹如此，前度花开几。蓬莱可塞，还童却老无计。

为此援笔翩翩，大江东去，好似歌头起。寄与两家孙又子，长看以文为戏。某所某公，同年同月，谁翦招魂纸。前三例好，不须举后三例。

又

枯寒生晚，复何似、张绪少年时意。薄命不逢何至此，满眼啼妆龋齿。城是城非，年来年去，万八千能几。半痴半了，更痴儿计孙计。

回首仕已半生，仕何如已，已矣羞拈起。幸有橘丸丸日大，且复从公围戏。若论弹文，更书谤篋，吾历无余纸。多年致仕，大都有甚恩例。

又

吾年如此，更梦里、犹作狼居胥意。千首新诗千斛酒，管甚侯何侯齿。员峤波翻，瀛洲尘败，吾履能销几。经丘寻壑，是他早计迟计。

犹记辰巳嗟嗟，故人贺我，且勉呼君起。五十不来来过二，方悟人言都戏。以我情怀，借公篇韵，恨不天为纸。余生一笑，不须邴曼容例。

又 和臞山用槐城韵见寿

沧洲一叶，待借君、回我炉亭春意。突兀灵光无立壁，八面江风寒齿。响屐廊深，笼门槛赤，数月今才几。千年未论，岂无数

十年计。

我本高卧墙东，何知人事，推枕为君起。憔悴庚寅何足记，不觉联翩宾戏。白雪阳春，黄鸡唱日，绝少澄心纸。我歌草草，和章有例还例。

又 酬王城山

两丸日月，细看来、也是樊笼中物。点点山河经过了，拔帜几番残壁。白是沙堤，苍然吴楚，一片成毡雪。此时把酒，旧词还是坡杰。

歌罢公瑾当年，天长地久，柳与梅都发。几许闲愁斜照里，掌上沕生沕灭。沧海桑枯，东陵瓜远，总不关渠发。簪花起舞，可怜今夕无月。

乳燕飞

王朋益金事夜坐文江之上，屡称赤壁之游乐，酒余索赋，因取坐间语参差述之

赤壁之游乐。但古今、风清月白，更无坡作。矫首中洲公何许，共我横江孤鹤。把手笑、孙刘寂寞。颇有使君如今否，看青山、似我多前却。几见我、伴清酌。

江心旧岂非城郭。抚千年、桑田海水，神游非昨。对影三人成六客，更倚归舟夜泊。尚听得、江城愁角。渺渺美人兮南浦，耿余怀、感泪伤离索。天正北，绕飞鹤。

又 寿周耐轩

曾授茅山记。共当年、二百七十，又三

甲子。昨上云台占云物，占得景风南至。又恰是、封侯千岁。行遍神州河洛外，早归来、庭下槐阴翠。春万户，共生意。

溪翁图是参同契。想金丹、圆成功行，活人相似。顾我尊前歌赤壁，生子当如此耳。笑华发、东坡年几。弟不如人今老矣，看龙头、霄汉雌龙尾。呼白石，为公起。

又

饮海棠花下，说放翁记剑南宣华园日报开及几分，闻五分亟往。因美放翁记此，足为后人开游赏之趣。盖花开三日色变，五日则后半开者盛，先半开者落矣。歌述此意，使观者有省

过雨城西路。看轻云、弄日花间，微寒如雾。谁是宣华门守者，报我十分开五。便痛饮、能销几度。寄语后来看花客，待看花、莫待开成树。成树也，半为土。

衮巢蜀锦今何许。记西湖、聚景村庄，王亭谢墅。冷落柯丘二三子，更问何园韩圃。悄一笑、回车竹所，点点守宫包红泪，纵倾城、一顾倾城顾。家国事，正何与。

瑞鹤仙 寿翁丹山

正丹翁初度。对花满江城，晓莺欲语。崆峒在何处。渐雨过农郊，劝耕问路。州人争觑。问坡老、重来是否。把看灯、传说风流，八境尽图新句。

如许。老子文章，挥毫立马，脱靴嫌污。太平易作。听父老，歌襦袴。愿使君小住，五风十雨。重见一糴三黍。又天边、飞诏殷

勤，说相将去。

高阳台 和巽吾韵

雨枕莺啼，露班烛散，御街人卖花窠。过眼无情，而今魂梦年多。百钱曳杖桥边去，问几时、重到明河。便人间，无了东风，此恨难磨。

落红点点入颓波。任归春到海，海又成涡。江上儿童，抱茅笑我重过。蓬莱不涨枯鱼泪，但荒村、败壁悬梭。对残阳，往往无成，似我蹉跎。

声声慢

九日泛湖游寿乐园赏菊，时海棠花开，即席命赋

西风坠绿。唤起春娇，嫣然困倚修竹。落帽人来，花艳乍惊郎目。相思尚带旧子，甚凄凉、未忺妆束。吟鬓底，伴寒香一朵，并簪黄菊。

却待金盘华屋。园林静、多情怎禁幽独。蛺蝶应愁，明日落红难触，那堪雁霜渐重，怕黄昏、欲睡未足。翠袖冷，且莫辞。花下秉烛。

汉宫春 壬午开炉日戏作

雨入轻寒，但新篘未试，荒了东篱。朝来暗惊翠袖，重倚屏帟。明窗丽阁，为何人、

冷落多时。催重顿，妆台侧畔，画堂未怕春迟。

漫省茸香粉晕，记去年醉里，题字倾敲。红炉未深乍暖，儿女成围。茶香疏处，画残灰、自说心期。容膝好，团栾分芋，前村夜雪初归。

又 岁尽得巽吾寄溪南梅相忆韵

疏影横斜，似故人安道，只在前溪。年年望雪待月，漫倚吟矶。千红万紫，到春来、也是寻思。君不见，永阳江上，残梅冷雨丝丝。

有几情人似我，漫骑牛卧笛，乱插繁枝。市门索笑憔悴，便作新知。城楼画角，又无花、只落空悲。但传说，寿阳一片，何曾迎面看飞。

洞仙歌 寿中甫

也曾海上，啖如瓜大枣。海上归来相公老。画堂深、满引明月清风，家山好、一笑尘生蓬岛。

六年春易过，赢得清阴，到处持杯藉芳草。看明年此日，人在黄金台上，早整顿、乾坤事了。但细数齐年几人存，更宰相高年，几人能到。

又

器之高谊，取前月青山洞仙歌华余重寿，走笔谢之

有客从余，不计余无酒。袖有蟠桃为君

寿。叹此桃再熟，也须年后。甚办得，转盼个偷桃手。

菊潭三十斛，月又月添，天赋先生日更久。但黄杨长寸，闰年倒寸，似恁得到梧宫甚时候。客又道奇特是阳生，后七日相看，醉春风柳。

齐天乐 端午和韵

枝头雨是青梅泪。翻作一江春水。鱼腹魂销，龙舟叫彻，不了湖亭张戏。满庭芳芷。正艾日高高，葛风细细。试比陈人，人间除我更谁似。

浮沈君共我里。记薰廊待对，闻鸡蹴起。昨日蟾蜍，明朝蝇虎，身与渠衰更悴。老夫病已。任采绿采苓，为师为帝。但有昌阳，倩酤扶路醉。

又

节庵和示中斋端午齐天乐词，有怀其弟海山之梦。昨亦尝和中斋此韵，感节庵此意，复不能自己，僦见中斋及之

海枯泣尽天吴泪。又涨经天河水。万古鱼龙，雷收电卷，宇宙刹那间戏。沈兰坠芷。想重整荷衣，顿惊腰细。尚有干将，冲牛射斗定何似。

成都桥动万里。叹何时重见，鹃啼人起。孤竹双清，紫荆半落，到此吟枯神瘁。对床永已。但梦绕青神，尘昏白帝。重反离骚，众醒吾独醉。

又 戊寅登高，即席和秋崖韵

蒋陵故是簪花路。风烟奈何秋暑。候馆凋梧，宫墙断柳，谁识当年倦旅。余怀何许。想上马人扶，翠眉愁聚。旧日方回，而今能赋断肠语。

登高能赋最苦。叹高高难问，欲望迷处。蝶绕东篱，鸿翻上苑，那更画梁辞主。来今往古。漫湛辈同来，远公回去。我醉安归，黄花扶路舞。

江城梅花引 辛巳洪都上元

几年城中无看灯。夜三更。月空明。野庙残梅，村鼓自春声。长笑儿童忙踏舞，何曾见，宣德棚，不夜城。

去年今年又伤心。去年晴。去年曾。不似今年，闲坐处、却不曾行。忆去年人、弹烛泪纵横。想见西窗窗下月，窗下月，是无情，是有情。

又

相思无处著春寒。傍阑干。湿阑干。似我情怀，处处忆临安。想见夜深村鼓静，灯晕碧，为傍人，说上元。

是花是雪无意看。雨摧残。雨摧残。探春未还。到春还、似不如闲。感恨千般、憔悴做花难。不惜与君同一醉，君不见，铜雀台，望老瞠。

兰陵王 丁丑感怀和彭明叔韵

雁归北。渺渺茫茫似客。春湖里，曾见去帆，谁遣江头絮风息。千年记当日。难得。宽闲抱膝。兴亡事，马上飞花，看取残阳照亭驿。

哀拍。愿归骨。怅毡帐何匹。湏酪何食。相思青冢头应白。想荒坟酹酒，过车回首，香魂携手抱相泣。但青草无色。

语绝。更愁极。漫一番青青，一番陈迹。瑶池黄竹哀离席。约八骏犹到，露桃重摘。金铜知道，忍去国，忍去国。

又 丙子送春

送春去。春去人间无路。秋千外、芳草连天，谁遣风沙暗南浦。依依甚意绪。漫忆海门飞絮。乱鸦过，斗转城荒，不见来时试灯处。

春去。最谁苦。但箭雁沈边，梁燕无主。杜鹃声里长门暮。想玉树凋土，泪盘如露。咸阳送客屡回顾。斜日未能度。

春去。尚来否。正江令恨别，庾信愁赋。苏堤尽日风和雨。叹神游故国，花记前度。人生流落，顾孺子，共夜语。

琐窗寒 和巽吾闻莺

嫩绿如新，娇莺似旧，今吾非故。空山过雨，睨睨留春春去。似尊前曲曲阳关，行

人回首江南处。漫停云低黯，征衫憔悴，酒痕犹污。

欲语。浑未住。记匹马经行，风林烟树。家山何在，想见绿窗啼雾。又何堪满目凄凉，故园梦里能归否。但数声、惊觉行云，重省佳期误。

归朝歌

最是一人称好处。昨日小春留得住。梅花信信望东风，须待公归香满路。年时今已度。长是巴山深夜雨。宣又召，凯还簇簇，要见寿觞举。

扫尽窝蜂闲绣斧。叠鼓春声欢岁暮。燕台剑履趣锋车，银信低低传好语。紫貂裘脱与。肘印累累映三组。但重省，西来斗水，忘却爱卿取。

大圣乐 伤春，有序

余尝爱古词云：“休眉锁，问朱颜去也，还更来么。”音韵低黯，辞情跌宕，庶几哀而不怨，有益于幽忧憔悴者。然二语外率鄙俚，因依声仿佛反之和之。此曲少有作者，流为善歌，则或数十叠，其声皆不可考。今特以意高下，未必尽合本调，聊以纾思志感云尔。

芳草如云，飞红似雨，卖花声过。况回首、洗马塍荒，更寒食、宫人斜闭，烟雨铜驼。提壶卢何所得酒，泥滑滑、行不得也哥哥。伤心处，斜阳巷陌，人唱西河。

天下事，不如意十常八九，无奈何。论兵忍事，对客称好，面皱如靴。广武噫嘻，东陵反覆，欢乐少兮哀怨多。休眉锁。问朱颜去也，还更来么。

宝鼎现 春月

红妆春骑。踏月影、竿旗穿市。望不尽、楼台歌舞，习习香尘莲步底。箫声断、约彩鸾归去，未怕金吾呵醉。甚辇路、喧阗且止。听得念奴歌起。

父老犹记宣和事。抱铜仙、清泪如水。还转盼、沙河多丽。滉漾明光连邸第。帘影冻、散红光成绮。月浸葡萄十里。看往来、神仙才子。肯把菱花扑碎。

肠断竹马儿童，空见说、三千乐指。等多时春不归来，到春时欲睡。又说向、灯前拥髻。暗滴鲛珠坠。便当日、亲见霓裳，天上人间梦里。

祝英台近 水后

昨朝晴，今朝雨。渺莽遽如许。厌听儿童，总是涨江语。是谁力挽天河，误他仙客，并失却、乘槎来路。

断肠苦。翦烛深夜巴山，酒醒听如故。勃窣荷衣，堕泪少干土。从初错铸鸱夷，不如归去，到今此、欲归何处。

又 席间咏绣球

看师师、成蝶蝶。蹙尽不成叠。欲试搔

头，花重怎堪捻。是谁抛过东墙，今无赤凤，
梦得似、那人身捷。

年时腊。曾笑梅梢和豆，去月忽如荚。
便向龙门，无复钏金接。待教开到琼林，阆
仙重见，又谁念、昆明前劫。

忆旧游 和巽吾相忆寄韵

渺山城故苑，烟横绿野，林胜青油。甚
相思只在，华清泉侧，凝碧池头。故人念我
何处，堕泪水西流。念寒食如君，江南似我，
花絮悠悠。

不知身南北，对断烟禁火，蹇六年留。
恨听莺不见，到而今又恨，睥睨成愁。去年
相携流落，回首隔芳洲。但行去行来，春风
春水无过舟。

唐多令

丙子中秋前，闻歌此词者，即席借芦叶满汀洲
韵

明月满沧洲。长江一意流。更何人、横
笛危楼。天地不知兴废事，三十万、八千秋。

落叶女墙头。铜驼无恙不。看青山、白
骨堆愁。除却月宫花树下，尘块莽、欲何游。

又

风露小瀛洲。斜河倒海流。人间尘、不
到琼楼。错向五陵陵上望，几回月、几回秋。

落日太湖头。垂虹今是不。醉尊前、往

往成愁。便有扁舟西子在，无汗漫、与君游。

又

寒雁下荒洲。寒声带影流。便寄书、不到红楼。如此月明如此酒，无一事、但悲秋。

万弩落潮头。灵胥还怒不。满湖山、犹是春愁。欲向涌金门外去，烟共草、不堪游。

又

日落紫霞洲。兰舟稳放流。玉虹仙、如在黄楼。何必锦袍吹玉笛，听欸乃、数声秋。

赤壁舞涛头。周郎还到不。倚西风、裊裊余愁。唤起横江飞道士，来伴我、月中游。

又

龙洲曲已八九和，复为中斋勉强夜和，中有数语，醉枕忘之

零露下长洲。云翻海倒流。素娥深、不到西楼。忽觉断潮归去也，饮不尽、一轮秋。

城外土馒头。人能饮恨不。古人不见使吾愁。莫有横江孤鹤过，来伴我、醉中游。

又 丙申中秋

明月满河洲。星河带月流。料素娥、独倚琼楼。竟是何年何药误，魂梦冷、不禁秋。

少日梦龙头。知君犹梦不。算虚名、不了闲愁。便有鹄袍三万辈，应不是、旧京游。

又

残日下瓜洲。平安火又流。月高高、挂古城楼。回首少年真可笑，无一事、又悲秋。

天在海边头。天风有意不。结桂枝、裊

裛余愁。不是银河无去路，先不去、后难游。

又 癸未上元午晴

春雨满江城。汀洲春水生。更悲久雨似春醒。犹有一般天富贵，夜来雨、早来晴。

年少总看灯。老来犹故情。便无灯、也自盈盈。说著春情谁不爱，今夜月、有人行。

虞美人 咏牡丹

空明一朵扬州白。红紫无□色。是谁唤作水晶球。惹起高烧银烛、上元愁。

去年一捧飞来雪。不似渠千叶。狂风一蹴过秋千。憔悴玉人和泪、望婵娟。

又

天香国色辞脂粉。肯爱红衫嫩。悠然自取玉为衣。似是银河水皱、织成机。

寒欺薄薄春无力。月浸霓裳湿。一窠香雪世间稀。可惜不教留到、布衣时。

又

寿安楼子重重蕊。少见如鱼尾。向来染得渭脂红。又自细摇花浪、动春风。

赭鳞似是人谁信。但向残红认。若教随水去悠然。为报沙头玉鹭、莫贪鲜。

又

花心定有何人捻。晕晕如娇靥。一痕明月老春宵。正似酥胸潮脸、不曾销。

当年掌上开元宝。半是杨妃爪。若教此

搯到痴人。任是高墙无路、蝶翻身。

又 咏海棠

无花敢与姚黄比。对对鸳鸯起。谶他金带万钉垂。谁向麒麟榭里、卸猴绯。

潜溪以上难为说。自是君恩别。后来西子避无盐。又道君王捉鼻、又何嫌。

又

魏家品是君王后。岂比昭容袖。风吹满院绣囊香。谁赐大师师号、退昭阳。

飞霞一落无根蒂。空堕重华泪。离披正午盛时休。闲为思王重赋、洛神愁。

又

犹疑绿萼花微甚。难与青莲并。青莲朵朵是天人。又向天人想见、洛阳春。

多情素质尘生步。况被潘妃污。此花仍是□微赭。却似娇波波外、两眉青。

又 客中送春

楼台烟雨朱门悄。乔木芳云杪。半窗天晓又闻莺。比似当年春尽、最关情。

客中自被啼鹃恼。况落春归道。满怀憔悴有谁知。犹记涌金门外、送人时。

又 城山堂试灯

黄柑擘破传春雾。新酒如清露。城中也是几分灯。自爱城山堂上、两三星。

枝头未便风和雨。寂寞无歌舞。天公肯放上元晴。自是六街三市、少人行。

又 扬州卖镜，上元事也，用前韵

徐家破镜昏如雾。半面人间露。等闲相约是看灯。谁料人间天上、似流星。

朱门帘影深深雨。憔悴新人舞。天涯海角赏新晴。惟有桥边卖镜、是闲行。

又

黄帘绿幕窗垂雾。表立如承露。夕郎偷看御街灯。归奔河边残点、乱如星。开园蒋李游春雨。蛺蝶穿人舞。如今烟草锁春晴。并与苏堤葛岭、不堪行。

又 大红桃花

鞞红乾色无光雾。须是鲜鲜翠。恹然一点系裙腰。不著人间金屋、恐难销。

英英肯似焉支贵。漫脱红霞帔。落时且勿浣尘泥。留向天台洞口、泛吾诗。

又 壬午中秋雨后不见月

湿云待向三更吐。更是沈沈雨。眼前儿女意堪怜。不说明朝后日、说明年。

当年知道晴三鼓。便似佳期误。笑他拜月不曾圆。只是今朝北望、也凄然。

又 用李后主韵二首

梅梢腊尽春归了。毕竟春寒少。乱山残烛雪和风。犹胜阴山海上、窖群中。

年光老去才情在。惟有华风改。醉中幸自不曾愁。谁唱春花秋叶、泪偷流。

又

情知是梦无凭了。好梦依然少。单于吹

尽五更风。谁见梅花如泪、不言中。

儿童问我今何在。烟雨楼台改。江山画出古今愁。人与落花何处、水空流。

又 春晓

轻衫倚望春晴稳。雨压青梅损。皱绡池影泛红蕖。看取断云来去、似炉烟。

愁春来暮仍愁暮。受却寒无数。年来无地买花栽。向道明年花信、莫须来。

又 花品

娟娟二八清明了。犹说淮阳早。钱欧陆谱遍花光。红到寿阳、也不说淮阳。

此花地望元非薄。回首伤流落。洛阳闲岁断春风。怎不当时道是、洛阳红。

又 中秋对月

秋阴团扇如人老。渐近中秋好。新凉还忆小楼边。自在一窗明月、傍人眠。

多情谁到星河晓。只道圆时少。他年几处与君看。长是成愁成恨、不成欢。

恋绣衾 宫中吹箫

胭脂不涴紫玉箫。认宫中、银字未销。但凤去、台空古，比落花、无第二朝。

天涯流落哀声在，听乌乌、不似内娇。漫身似、商人妇，泣孤舟、长夜寂寥。

又 或送肉色牡丹同赋

困如宿酒犹未销。满华堂、羞见目招。

忽折向、西邻去，教旁人、看上马娇。

肉色似花难得，但花如、肉色妖娆。
谁说汉宫飞燕，到而今、犹带脸潮。

又

己卯灯夕，留城中独坐，忆当涂买灯，姑苏夜舞，再集赋此

当年三五舞太平。醉归来、花影满庭。
办永夜、重开宴，笑姑苏、万眼未明。而今
绕市歌儿马，客黄昏、细雨满城。十年事、
去如水，想家人、村庙看灯。

花 犯 旧催雪词，苦不甚佳，因复作此

海山昏，寒云欲下，低低压吹帽。平沙浩浩。想关塞无烟，时动衰草。苏郎卧处愁难扫。江南春不到。但怅望、雪花夜白，人间憔悴好。

谁知广寒梦无繆，丁宁白玉炼，不关怀抱。看清浅、桑田外，尘生热恼。待说与、天公知道。期腊尽春来事宜早。更几日、银河信断，梅花容易老。

又 再和中甫

甚天花、纷纷坠也，偏偏著余帽。乾坤清皓。任海角荒荒，都变瑶草。落梅天上无人扫。角吹吹不到。想特为、东皇开宴，琼林依旧好。

看儿贪耍不知寒，须塑就玉狮，置儿怀抱。奈转眼、今何在，泪痕成恼。白发翁翁向儿道。那曲巷袁安爱晴早。便把似、一年

春看，惜花花自老。

酹江月 北客用坡韵改赋访梅

冰肌玉骨，笑嫣然、总是风尘中物。谁扫一枝，流落到、绝域高台素壁。匹马南来，千山万水，为访林间雪。渊明爱菊，不知谁是花杰。

憔悴梦断吴山，有何人报我，前村夜发。蜡屐霜泥烟步外，转入波光明灭。雪后风前，水边竹外，岁晚华余发。戴花人去，江妃空弄明月。

又 赵氏席间即事，再用坡韵

四无谁语，待推窗、初见江南风物。索笑巡檐无奈处，悄隔东邻一壁。有酒如船，招呼满载，只欠枝头雪。疏花冷眼，坐中都是词杰。

堪恨几日西郊，寻消问息，肯向吟边发。著意相看，又恐是、六出幻成还灭。恼恨儿童，攀翻顶戴，不到先生发。明朝重省，初三知属谁月。

又 和朱约山自寿曲，时寿八十四

五朝寿俊，算生平占得、淳熙四四。三万六千三万了，剩有一千饶底。三百年间，和风丽日，几个能销此。约山山笑，先生不负山矣。

今岁甲子重阳，待重数，五百十三甲子。吟万首诗更自和，岁岁寿诗自喜。若此潞公，如今年纪，犹是平章事。先生抚掌，问他闲

日能几。

又

同舍延平林府教制新词祝我初度，依声依韵，还祝当家

西风处士，例一枝团月，咸平印印。千古诗宗传不绝，至竟被渠道尽。雪返香魂，霜吹晓怨，肯受东君聘。罗浮梦转，兔环知是谁孕。

未说烟雨江南，垂垂青子，须要调金鼎。愁绝西山明秀处，依旧鹤南飞影。我白君元，君词我和，各自为长庆。后来桃李，遥遥别是花信。

又 五日和尹存吾，时北人竞鹭洲渡

棹歌齐发，江云暮、吹得湘愁成雨。小酌千年，知他是、阿那年时沈午。日落长沙，风回极浦，黯不堪延伫。吴头楚尾，非关四面为楚。

几度唤起醒累，淋漓痛饮，不学愁余句。踏鲤从鼇胥涛上，怎不化成龙去。越女吴船，燕歌赵舞，世事悠悠许。明朝寂寂，双双飞下鸣鹭。

又

怪梅一株，为北客载酒移置盆中，伟然

岁寒相命，算人间、除了梅花无物。窥宋三年又不是，草草东邻凿壁。偃蹇风前，沈吟竹外，直待天骄雪。白家人至，一枝横出终杰。

寂寞小小疏篱，探花使断，知复何时发。北驿不来春又远，只向窗前埋灭。好在冰花，

著些风筱，怎不清余发。补之去后，墨梅又有明月。

又 漫兴

遥怜儿女，未解忆长安、十年前月。徙倚桂枝空延伫，无物同心堪结。冷落江湖，萧条门巷，犹著西楼客。恨无铁笛，一声吹裂山石。

休说起舞登楼，那人已先我，渡江横楫。圆缺不销青冢恨，漠漠风沙如雪。西母长生，素娥好在，何皓当时发。山河如此，月中定是何物。

又 中秋，彭明叔别去赴永阳，夜集

团团桂影，怕人道、大地山河里许。旧日影娥池未缺，惊断霓裳歌舞。雪白长城，金明古驿，尽是乘槎路。少年白发，自无八骏能去。

犹记流落荒滨，故人相过，共吹箫前度。无酒无鱼空此客，昨夜留之不住。睡起披衣，行吟坐对，又有重圆处。不知今夕，那人有甚佳句。

又 中秋待月

城中十万，有何人、和我乌乌鸣瑟。对影姮娥成三处，谁料尊中无月。剪纸吹成，长梯摘取，儿戏那堪惜。洞庭夜白，一声聊破空阔。

休说二十四桥，便一分无赖，有谁谁识。一枕秋衾南北梦，好好娟娟成雪。旧日少游，锦袍玉笛，醉卧藤阴石。萧然今夕，无鱼无

酒无客。

满江红 海棠下歌后村调共和

淡淡胭脂，似褪向、景阳鸳石。依然是、春睡未足，捧心犹癖。藉甚不禁君再顾，嫣然却记渠初拆。黯销魂、欲尽更堪怜，终难得。

犹记是、卿卿惜。空复见，谁谁摘。但当时一笑，也成陈迹。我懒花残都已往，诗朋酒伴犹相觅。听连宵、又雨又还晴，鸠鸣寂。

又

古岩以马观复遣舟，约余与中斋和后村海棠韵，后寄述怀

何许相求，且不是、南温北石。也欲学、绝交高论，自陈余癖。万里鱼书长记忆，十年波浪伤离拆。算此舟、不是剡溪舟，空回得。

非出处，何须惜。非瑕，何须摘。看雪销鸿去，有何留迹。安石岂无同乐意，玄真不是朝廷觅。但眼前、真率暂相违，歌声寂。

又

莺语依然，但春去、人间无约。谁念我、吟情憔悴，醉魂落魄。尽日只将行卷续，有时自整残棋著。向黄昏、细雨闷无憀，青梅落。

南又北，相思错。朝异暮，人情薄。漫踌躇在目，奢华如昨。海底月沈天上兔，辽

东人化扬州鹤。记龙云、波浪岂能平，天难托。

又 寿某翁

十岁儿童，看骑竹、花阴满城。与新第、桐乡孙子，高下齐生。倚枕不寻柯下梦，举头自爱橘中名。但有时、米价问如何，公助平。

东西塾，听书声。长短卷，和诗成。总神仙清福，前辈家庭。试问凌烟图相国，何如洛寺写耆英。甚天公、属意富民侯，银信青。

八声甘州

和汪士安海棠下先归，前是观桃水东，至其乡真常观

问海棠花下，又何如、玄都观中游。叹侗巢蜀锦，常时不数，前度何稠。谁见宣华故事，歌舞簇遨头。共是西江水，不解西流。

在处繁华如梦，梦占人年少，生死堪羞。任倾城倾国，风雨一春休。醉逢君、何须有约，醉留君、系不住扁舟。空又失，花前一笑，绿尽芳洲。

又 和邓中甫中秋

看团团、一物大如杯，时复几何秋。俯天涯海角，今来古往，人物如流。想见霓裳歌罢，无物与浇愁。惟有当时树，香满琼楼。

谁念南楼老子，倚西风尘满，心事悠悠。便班姬袖里，明月一时休。叹年年、吹箫有

约，又一番、鹤梦雪堂舟。池上久，满身风露，还索衣裘。

又 贺词

记前朝、鹤会又重来，攀翻第三桃。看云华授策，麻姑擘脯，嬴女吹箫。寻思曲江旧事，宫锦胜龙标。奏罢清华梦，独立春宵。

不数相州锦样，是调羹御手，重解金貂。但今年此日，疏了醉葡萄。闻老仙、衣冠皓伟，又丁宁、天语著儿招。都人望。回班赐第，赤舄飞朝。

又 和萧汝道感秋

但秋风、年又一年深，不禁长年悲。自景阳钟断，馆娃宫闭，冷江心知。千树西湖杨柳，更管别人离。看取茂陵客，一去无归。

都是旧时行乐，漫烟销日出，水绕山围。看人情荏苒，不似鹧鸪飞。听砧声、遥连塞外，问三衢、道上去人稀。销凝久，残阳短笛，似我歔歔。

又 送春韵

看飘飘、万里去东流，道伊去如风。便锦缆危潮，青山御宿，烟雨啼红。愁是明朝酒醒，听著返魂钟。留得春如故，了不关侬。

春亦去人远矣，是别情何薄，归兴何浓。但江南好□，未便到芙蓉。念今夜、初程何处，有何人、垂袖舞行宫。青青柳，留君如此，如此匆匆。

又 春雪奇丽，未能赋也，因古岩韵志喜

甚花间、儿女笑盈盈。人添雪狮成。任

踏青无路，凌波有地，步步光尘。招得梅妃魂也，好似去年春。柳亦何曾絮，都是云英。

休道东皇诞漫，到茶烟歇后，谁浊谁清。赖谢娘好语，端胜解围兵。看昨朝、天公雨粟，定大家、快活社翁平。春晴好，溶溶雨尽，听卖花声。

水龙吟 寓兴和巽吾韵

何须银烛红妆，菜花总是曾留处。流觞事远，绕梁歌断，题红人去。绕蝶东墙，啼莺修竹，疏蝉高树。叹一春风雨，归来抱膝，怀往昔、自凄楚。

遥望东门柳下，梦参差、欲归幽路。断红芳草，连空积水，凭高坠雾。水洗铜驼，天清华表，升平重遇。但相如老去，江淹才尽，有何人赋。

又 寿周耐轩

多年袖瓣心香，重新拈出为公寿。唤起老龙，如今正是，欠伸时候。弱语闻莺，轻阴转柳，弦薰未透。信江南，自有真儒未用，须待见、袞和绣。

闻说锋车在道，更四辈、传宣来骤。蟠胸何限，天门夜对，春宫晨奏。梅子阴浓，菖蒲花老，桔槔闲后。但北关下泽，遗民社在，贺公归昼。

又

看人削树成槎，布帆海上秋风浪。白头坡老，知津水手，倚桡榔杖。九点齐州，半

生髀肉，烟尘苍莽。但北窗梦转，青阴满眼，抚陈迹、玩新涨。

世事艰难已遍，笑而今、不堪重想。龙筋虎骨，根深伏兔，擎空千丈。礼乐文章，终须梦卜，南人为相。问凌烟生面，他时仿佛，似何人像。

又 和清江李侯士弘来寿

闲思十八年前，依稀正是公年纪。铜驼陌上，乌衣巷口，臣清如水。是处风筝，满城昼锦，儿郎俊伟。但幅巾藜杖，低垂白鬓，与绮、问何里。

最忆他年甘旨。也曾经、三仕三已。至今结习。余年未了，业多生绮。安得滕廛，移将近市，长薰晋鄙。望福星炯炯，西江千里，待公来社。

又 和南剑林同舍元甲远寄寿韵

多年绿幕黄帘，瓶花黯黯无谁主。荀陈迹远，燕吴路断，何人星聚。四圣楼台，水仙华表，冷烟和雨。但徘徊梦想，美人不见，空犹记、铁炉步。

过尽凉风天末，堕华笺、行行飞翥。一端翠织，锦鲸茅屋，天吴惊舞。念我何辰，涸阴冰子，生怜金虎。恨儿痴不了，山川悠缅，共君龔宇。

又

巽吾赋溪南海棠，花下有相忆之句，读之不可为怀，和韵并述江东旅行

征衫春雨纵横，何曾湿得飞花透。知君

念我，溪南徙倚，谁家红袖。藉草成眠，簪花倚醉，狂歌扶手。叹故人何处，闻鹃堕泪，春去也、到家否。

说与东风情事，怕东风、似人眉皱。乱山华屋，残邻废里，不堪回首。寒食江村，牛羊丘陇，茅檐酤酒。笑周秦来往，与谁同梦，说开元旧。

又 和中甫九日

孤烟澹澹无情，角声正送层城暮。伤怀绝似，龙山罢后，骑台沈处。珠履三千，金人十二，五陵无树。叹岐王宅里，黄公垆下，空鼎鼎、记前度。

几许英雄文武。酒不到、故人坟土。平生破帽，几番摇落，受西风侮。昨日如今，明年此会，俯然怀古。便东篱甲子，花开花谢，不堪重数。

宴春台 寿周耐轩

五十三年，韶华刚度，今年夏五十三。瑞鹤朝来，待公弥月重探。人生贵寿多男。看斓斑室，添个荷衫。□□□，亭亭八面，醉倚红酣。

承平故事，暇日清谈。云龙风虎，塞北江南。午桥中枕，羲皇白日如愒。手种蟠桃，明年看取，实大如柑。奈何堪。天妒人睡美，趣趁朝参。

扫花游

和秋崖见寿。秋崖时谒选，留词去

春台路古，想店月潭云，鸡鸣关候。巾车尔久。记湘累降日，留词劝酒。不是行边，待与持杯论斗。算吾寿。已待得河清，万古晴昼。

京国事转手。漫宫粉堆黄，髻妆啼旧。瑶池在否。自刘郎去后，宴期重负。解事天公，道是全无又有。浯溪友。笑浯溪、至今聱叟。

忆江南

二月十八日，臞轩约客，因问晏氏海棠开未，即携具至其下，已盛甚

花几许，已报八分催。却问主人何处去，且容老子个中来。花外主人回。

年时客，如今安在哉。正喜锦官城烂漫，忽惊花鸟使摧颓。世事只添杯。

梅花引 寿槐城

酒熟未。梅开未。去年迟待重来醉。笑当筵。舞当筵。惟有今年。八十是开年。

参差野袂成归鹤。石鼎未开容剥啄。岁开尊。岁添孙。孙又开尊。福曜萃高门。

蝶恋花 感兴

过雨新荷生水气。高影参差，无谓思量睡。梦里不知轻别意。醒来竟是谁先起。

去路夕阳芳草际。不论阑干，处处情怀

似。记得分明羞掷蕊。自知不是天仙子。

又 寿李侯

八九十翁嬉入市。把菊簪萸，共说新筵美。何以祝公千百岁。寿潭自酌花间水。

白鹭沈沈飞复起。杜老江头，不恨秋风里。欲种蟠根天上李。三千年看青青子。

霓裳中序第一

石瑶林作霓裳中序第一咏温泉，疑其未尝亲见，语不甚切。余所见庐山一两池，初不可近，渐入颇觉奇赏，因用其声用其韵试为之

银河下若木。暖涨一川春雾绿。白凤徘徊清淑。似沈水无烟，苍汤千斛。柔肌暗粟。想临流、娇喷轻触。空恨恨，何人热恼，却忆冷泉掬。

酥玉。未谙汤沐。深又浅、荡摇心目。云蒸雨渍翻覆。泛影浮红，飘飘相逐。裳衣还未欲。暮自怪、野鸳双浴。华清远，寒猿夜绕，落月可能漉。

瑞龙吟 和王圣与寿韵

老人语。曾见昨日开炉，坠天花否。生年不合荒荒，枯根薄命，婣娟误汝。那知许。女乐如烟点点，江南处处。何时重到湖堧，淋漓载酒，依稀吊古。终待胭脂露掌，弄鸥招鹤，凭君画取。万柳漫堤，一丝一泪垂雨。蒙蒙絮里，又送金铜去。漫肠断、王孙望帝。

呕心囊句。市隐今成趣。袖回地狭，天吴凤舞。莫是青州谱。怎不早，翩翩向青州住。回头蜃海，已沈花雾。

满庭芳 和卿帅自寿

千骑家山，一觴父老，前有韩魏公来。青原上巳，才见寿筵开。欧公云间还见，忆相州、更自迟回。公知否，福星分野，飞骑不须排。

留春亭下草，雪霜过了，依旧春萋。待留春千岁，日醉千杯。却怕催归丹诏，栋明堂、须要雄材。趋朝去，西风便面，只手障浮埃。

又 草窗老仙歌满庭芳寿余，勉次原韵

空谷无花，新篘有酒，去年穷胜今年。蛩吟蛩和，且省费蛮笺。闻说先生去也，江南岸、缚草为船。依然在，山栖寒食，路断却归麈。

老人，三又两，清风作供，晴日生烟。但高高杜宇，不办行缠。几度披衣教我，二升内、煮石烧铅。休重道，玉龙无孔，夜夜叫穿天。

木兰花慢 别云屋席间赋

午桥清夜饮，花露重、烛光寒。约处处行歌，朝朝买酒，典却朝衫。尊前自堪一醉，但落红、枝上不堪安。归去柳阴行月，酒醒

画角声残。

王官。难得似君闲。闲我见君难。记李陌看花，光阴冉冉，风雨番番。相逢故人又别，送君归、斜日万重山。江上愁思满目，离离芳草平阑。

又 和中甫李参政席上韵

自崆峒麦熟，耕犊满、桔槔闲。笑吾党清谈，长衣櫛具，更进贤冠。仓皇庇公宇下，便秋风、江上不惊寒。雪夜入三城易，槐阴护一家难。

东山，零雨几时还。领客竹林间。看满座空尊，轻裘缓带，绿鬓朱颜。风流一笑余事，定碑金、无恙庾家完。又赋南烹初食，明朝餐玉何山

永遇乐

余自乙亥上元诵李易安永遇乐，为之涕下。今三年矣，每闻此词，辄不自堪。遂依其声，又托之易安自喻。虽辞情不及，而悲苦过之

璧月初晴，黛云远澹，春事谁主。禁苑娇寒，湖堤倦暖，前度遽如许。香尘暗陌，华灯明昼，长是懒携手去。谁知道，断烟禁夜，满城似愁风雨。

宣和旧日，临安南渡，芳景犹自如故。缃帙流离，风鬟三五，能赋词最苦。江南无路，鄜州今夜，此苦又谁知否。空相对，残缸无寐，满村社鼓。

又

余方痛海上元夕之习，邓中甫适和易安词至，

遂以其事吊之

灯舫华星，崖山砮口，官军围处。璧月辉圆，银花燄短，春事遽如许。麟洲清浅，鳌山流播，愁似汨罗夜雨。还知道，良辰美景，当时邺下仙侣。

而今无奈，元正元夕，把似月朝十五。小庙看灯，团街转鼓，总似添恻楚。传柑袖冷，吹藜漏尽，又见岁来岁去。空犹记，弓弯一句，似虞兮语。

内家娇 寿王城山

结客少年场。携高李、闻笛赋游梁。看汉水淮山，高楼共卧，融尊郑驿，飞盖相望。春风里，种他红与白，笑我懒中忙。供奉后来，玄都桃改，佳人好在，庾岭梅香。

何处最难忘。会稽归鬢晚，空带吴霜。赢得黄冠野服，笑傲羲皇。看花外小车，出长生洞，橘中二老，斗智琼黄。称寿堂添十字，孙认三房。

六州歌头

乙亥二月，贾平章似道督师至太平州鲁港，未见敌，鸣锣而溃。后半月闻报，赋此

向来人道，真个胜周公。燕然眇。浯溪小。万世功。再建隆。十五年宇宙，宫中麈。堂中伴。翻虎鼠，搏鹳雀，覆蛇龙。鹤发庞眉，憔悴空山久，来上东封。便一朝符瑞，四十万人同。说甚东风。怕西风。甚边尘起，

渔阳惨。霓裳断。广寒宫。青楼杳朱门悄。
镜湖空。里湖通，大纛高牙去，人不见，港
重重。斜阳外，芳草碧，落花红。抛尽黄金
无计，方知道、前此和戎。但千年传说，夜
半一声铜。何面江东。

六丑 春感和彭明叔韵

看东风海底，送落日、飞空如掷。醉游
暮归，怕西州堕策。归路偏失。记上元时节，
千门立马，望金坡残雪。素娥推下团栾辙。
塞草惊尘，河水渡楫。悠悠雨丝风拂。但相
随断雁，时度荒泽。

回头紫陌。梦归归未得。憔悴江南，秋
风旧客。去年说著今日。漫故人相命，玳筵
鸣瑟。愁汗漫、全林杯窄。况飘泊相遇，当
时老叟，梨园歌籍。高歌为我几回阕。似子
规、落月啼乌悄，傍人泪滴。

百字令

李云岩先生远记初度，手写去年赤壁歌，岁晚
寄之，少贱不敢当也。匆匆和韵，寄长须去，傥以
可教则教之

少微星小。抚剑气横空，隐见林杪。夜
来宋都如雨，更长得奇哉恻。佛以四月八生，
见明星悟道曰：奇哉，即左传星陨如雨之夕
也。与汝三龄，览余初度，一语占先兆。暮
年喜见，甲申聚五星照。

堪欢亡国余民，老人孺子，尔汝霜桥晓。

骑马听鸡朝寂寞，梦入南枝三绕。洛社耆英，行窝真率，著我真堪笑。与公试数，开禧嘉定宝绍

又 寿陈静山，少吾一岁

洞房停烛，似新岁，数到上元时节。一盏屠苏千岁酒，添得新人罗列。昨日迎长，今朝献寿，赏团团佳月。永和春好，用之不竭嘉客。

见说海上归来，有如瓜大枣，无人分得。六十二三刘梦得，输与香山乐色。菱谷二绡，杨枝春草，歌舞琵琶笛。只愁元日，玉龙催上金驿。

莺啼序 感怀

匆匆何须惊觉，唤草庐人起。算成败利钝，非臣逆睹，至死后已。又何似、采桑八百，看蚕夜织小窗里。漫二升自苦，教人吊卧龙里。

别有佳人，追桃恨李。拥凝香绣被。争知道、壮士悲歌，萧萧正度寒水。问荆卿、田横古暮，更谁载酒为君酹。过霜桥落月，老人不见遗履。

置之勿道，逝者如斯，甚矣衰久矣。君其为吾归计，为耕计。但问某所泉甘，何乡鱼美。此生不愿多才艺。功名马上兜鍪出，莫书生、误尽了人间事。昔年种柳江潭，攀枝折条，噫嘻树犹如此。

登高一笑，把菊东篱，且复聊尔耳。试

回首、龙山路断，走马台荒，渭水秋风，沙河夜市。休休莫莫，毋多酌我，我狂最喜高歌去，但高歌、不是番腔底。此时对影成三，呼娥起舞，为何人喜。

又

闷如愁红著雨，卷地吹不起。便故人渺渺，相逢前事，欲语还已。凝望久、荒城落日，五湖四海烟浪里。问而今何处，寄声旧时邻里。

闲说那回，海上苏李。雪深夜如被。想携手、汉天不语，叫□不应疑水。待河梁、一尊落月，生非死别君如酹。望故人阁上，依稀长剑方履。

古人已矣，垂名青史，谓当如此矣。又谁料浮沈，自得鱼计。赏心乐事，良辰美景，撞钟舞女，朱门大第。雕鞍骏马番装笠，笑虚名何与身前事。区区相望，饿死西山，悬目东门，人生何乐为此。

古人已矣，天下英雄，使君与操耳。听喔喔、鸡鸣早起，屡舞徘徊，痛饮高楼，狂歌过市。苍苍万古，羲农周孔，文章事业星辰上，到而今、枯见银河底。笑他黄纸除君，红旗报我，为君助喜。

又 赵宜可以余讥其韵，苦心改为之，复和之

愁人更堪秋日，长似岁难度。相携去、畹晚登高，高极正犯愁处。常是恨、古人无计，看今人痴绝如许。但东篱半醉，残灯自修菊谱。

归去来兮，怨调又苦。有寒螿余赋。湖

山外、风笛阑干，胡床夜月谁据。恨当时、
青云跌宕，天路断、险艰如许。便桥边，卖
镜重圆，断肠无数。

是谁玉斧，惊堕团团，失上界楼宇。甚
天误、婵娟余误。悔却初念，不合梦他，霓
裳楚楚。而今安在，枫林关塞，回头忆著神
仙处，漫断魂飞过湖江去。时时说与，地上
群儿，青琐瑶台，阆风悬圃。

琵琶往往，凭鞍劝酒，千载能胡语。叹
自古、宫花薄命，汉月无情，战地难青，故
人成土。江南憔悴，荒村流落，伤心自失梨
园部，渺空江、泪隔芦花雨。相逢司马风流，
湿尽青衫，欲归无路。

沁园春 和槐城自寿

六十一翁，垂银带鱼，插四角轮。把百
个今朝，重排花甲，十年前事，似白鬻辛。
骰选功名，酒中富贵，管取当筵满劝旬。槐
知道，待二郎做甚，父子封申。

便应际会昌辰。怕林下相逢未是真。看
焚芰裂荷，起钟山笑，卖田僦马，堕贡生贫，
后六十年，有无穷事，是宰官身是报身。年
来好，莫做他宰相，便是全人。

又 再和槐城自寿韵

刘子生时，当月下弦，输大半轮。记孤
馆望云，朝饥讽午，寒炉拥雪，岁晚盘辛。
比似先生，两壬相望，岂止参差一二旬。明
年好，算乞浆得酒，酉胜如申。

吾辰。定是雌辰。听穷鬼掷揄数得真。但鹤唳华亭，贵何似贱，珠沈金谷，富不如贫。明月清风，晴春暖日，出入千重云水身。吾老矣，叹臣之少也，已不如人。

又 和槐城见寿

成佛生天，自是两途，任祖生先。看二三大老，依稀吾榜，几多新进，少小齐年。紫陌相逢，青山独往，倚杖鹤鸣听布泉。百年里，但儿时难得，老后依然。

吾牛已不耕田。更雨滑泥深自在鞭。叹十年波浪，悠悠何补，三生石上，种种无缘。白发来呵，朱颜去也，一曲狂歌落酒边。谁似我，似官奴出籍，散圣安禅。

又 闻歌

十八年间，黄公垆下，崔九堂前。叹人生何似，飘花陌上，妾身难托，卖镜桥边。隔幔云深，绕梁声彻，不负杨枝旧日传。主人好，但留髡一石，空恼彭宣。

不因浩叹明年。也不为青衫怆四筵。念故人何在，旧游如梦，清风明月，野草荒田。俯仰无情，高歌有恨，四壁萧条久绝弦。秋江晚，但一声河满，我自潸然。

又 和刘仲简九日韵

九日黄花，渊明之后，谁当汝俦。记龙山昨夜，寒泉九井，帽轻似叶，须戟如虬。庾扇西风，孔林落照，银海横波十二楼。闲笑道，那华亭上蔡，再见何由。

人生似我何求。算惟有高人高处游。笑

如今别驾，前时方外，尘埃半百，岁月如流。
如此连墙，今年不见，一首犹胜万户侯。偷
闲好，便明朝有约，莫莫休休。

又 送春

春汝归欤，风雨蔽江，烟尘暗天。况雁
门阨塞，龙沙渺莽，东连吴会，西至秦川。
芳草迷津，飞花拥道，小为蓬壶借百年。江
南好，问夫君何事，不少留连。

江南正是堪怜。但满眼杨花化白毡。看
兔葵燕麦，华清宫里，蜂黄蝶粉，凝碧池边。
我已无家，君归何里，中路徘徊七宝鞭。风
回处，寄一声珍重，两地潸然。

又

笑贡生狂，日日弹冠，西望王阳。待泥
封屡下，蒲轮不至，卖琅琊产，办舍人装。
厚禄故人，黄金有术，何不分伊肘后方。他
年老，三千里外，八十思乡。

何如吾寿华堂。在丞相东山旧第旁。任
王人亲至，不妨高枕，吾州盛事，更短邻墙。
我学希夷，邀公共坐，游戏壶中日月长。山
僧道，成仙未晚，救火须忙。

法驾导引 寿治中

棠阴日，棠阴日，清美近花朝。共喜治
中持福笔，春当霄汉布宽条。兰蕙雪初销。

和气满，和气满，生意到渔樵。清彻已
倾螺子水，黑头宜著侍中貂。天马拟归朝。

又 寿治中

蟠桃熟，蟠桃熟，一熟一千年。比似相公年正少，朱颜绿鬓锦蝉连。肉色更光鲜。

西江好，西江好，春雨碧黏天。见说内家消息近，佳人拜舞寿觞前。扶醉起金鞭。

又 寿刘侯

儿童喜，儿童喜，献寿摘仙桃。篁峒鸣狐成鬼火，花村买犊卖蛮刀。惟有使君劳。

燕山桂，燕山桂，犹带窦家香。月殿一枝金粟满，囊中玉屑捣成霜。和露入霞觞。

又 寿吴蒙庵

金茎露，金茎露，绝胜九霄觞。掇碎菊花如玉屑，满盘和月咽风香。不老是丹方。

六十七，六十七，七岁见端平。记得是秋除日好，近年大路到南京。楚制起诸生。

又 寿胡潭东

春小小，春小小，梅渐著些些。未必神仙无白发，依然林下有黄花。潭影浸流霞。

冬十十，冬十十，亥字雁斜斜。不用瑶池偷碧实，不须句漏博丹砂。其子新漳浦县尹。

阴德遍人家。

又 寿城山，用寿胡潭东韵

臣尚少，臣尚少，少似此翁些。点半点斑今似雪，飞来飞去自如花。醉眼看红霞。

人间事，人间事，倒仗拄颐斜。冷冷清清冰下水，吞吞忍忍饭中砂。选到老人家。

又

天正子，天正子，亥正较差些。床下玉灵头戴九，手中铜叶锦添花。乞汝作飞霞。辽东鹤，辽东鹤，无语鹤头斜。尘土不知灰变缟，周遭会见顶成砂。城郭待还家。

又 寿胡盘居

盘之水，盘之水，清可濯吾缨。我与盘山疏一月，黄花满意绕荒城。怀抱向谁倾。

十之十，十之十，十十到千龄。我与盘山同一月，不占甲子后先晴。携手看升平。

又 代寿丹山

东风雨，东风雨，河汉洗蓬莱。只见丹山高万丈，不知古驿路傍埃。到海几时回。

二月八，二月八，长见醉桃腮。天上玉堂怀旧草，面前金鼎又无梅。除是老翁来。

又 寿刘仲简

五月五，五月五，细雨绿菖蒲。早是高花开九节，花堪结子节堪扶。持此揆□初。

长命缕，长命缕，儿女漫区区。何似屏星南极里，清如寒露在冰壶。一府号儒。

水调歌头 寿詹天游

鹤会正阳后，又为此公来。向时圯上，不似魁梧出尘埃。少日河东赋手，醉里新丰对草，谈笑上金台。太子少灵气，马客岂仙才。

紫貂裘，骇犀剑，鸚鵡杯。龙涎沈水是浅，薄命有人猜。闻说老仙清健，想见风姿皓伟，天语快行催。鳧鷖闕看双去，槐第似亲栽。

又 寿晏云心

五五复五五，二八且重重。后天先甲如此，满月喜相逢。一日须倾三百，月小又输一日，不满九千钟。但愿客常满，莫问海尊空。

赋长篇，赓短韵，剩谈丛。乱来风日自美，一橘两衰翁。几见东陵瓜好，又看西邻葵烂，半醉半醒中。偶得洞宾象，混混起相从。

又 谢和溪园来寿

夫子惠收我，谓我古心徒。闲居有客无酒，有酒又无鱼。报道犀兵远坠，问讯陈人何似，陈似隔年莩。天壤亦大矣，知有孔融乎。

白雪歌，丹元赞，赫蹄书。洪崖何自过我，便作授经图。教我天根骑月，规我扶摇去意，餐我白芝符。从此须溪里，更著赤松湖

又 寿周溪园有序

天九积阳，月半将望。恭惟某官，嘉定间气，西江耆英。乔木南山，为人父，为众父；光风霁月，有一天，有二天。固宜十万户之民，同致八千秋之祝。某俚歌水调，上赞金丹，辄陈宗工，窃幸微眄。

先生岂我辈，造物乃其徒。荷衣自放林壑，亦未弃银鱼。留得东篱晚节，笑倒龙山秃帽，一醉插茱萸。天下有大老，携手盍归乎。

别头经，三昼梦，一编书。向之麟者止矣，且看老溪图。历遍后天既未，依约明朝三五，乾体适当符。还以奉公寿，不是讲鹅湖。

又

日献洞宾公像于溪园先生，报以阶庭府公耐轩寿容，曰：是类吾子。且三叠前水调以证之，于是某得自号为小耐矣。虽甚无似，不敢当。顾公所览揆如此，谊不虚辱，敢续之好歌，毋忘佳话。

似似不常似，似我一生徒。画工自画龙种，忽近海飞鱼。大笑北宫称弟，遂使西河疑女，同气自椒萸。且谓杜公者，即是老君乎。

日给华，芎藭本，薛羊书。马师真只这是，可是蹙浮图。大小卢同马异，天下使君与操，但欠虎铜符。说甚左眼痣，已过洞庭湖。

又

自龙眠李氏夜过臞仙康氏，走笔和其家灯障水调，迫暮始归

不成三五夜，不放霎时晴。长街灯火三两，到此眼方明。把似每时庭院，传说个般障子，无路与君行。推手复却手，都付断肠声。漏通晓，灯收市，人下棚。中山铁马何似，遗恨杳难平。一落掺挝声愤，再见大晟

舞罢，乐事总伤情。便有尘随马，也任雨霖铃。

又 中秋口占

明月几万里，与子共中秋。古今良夜如此，寂寂几时留。何处胡笳三弄，尚有南楼余兴，风起木飕飕。白石四山立，玉露下平洲。

醉青州，歌赤壁，赋黄楼。人间安得十客，谭笑发中流。看取横江皓彩，犹似沈河白璧，光气彻天浮。举首快哉去，灯火见神州。

又 癸未中秋，吉文共马德昌泛江

群动各已息，在汝梦中游。尘埃大地如水，儿女不堪愁。寂寂古人安在，冉冉吾年如此，何处有高楼。客有洞箫者，泪下不能收。

庾楼坠，秦楼渺，楚楼休。知公所恨何事，不是为封侯。自有此山此月，说甚何年何处，重泛木兰舟。起舞酹英魄，余愤海西流。

又

寂寂复寂寂，此月古时明。银河也变成陆，灰劫断槎横。历落英雄孺子，灭没龙光牛斗，胜败黯然平。玉笛叫空阔，终有故人情。

雁南飞，乌绕树，鹤归城。问君有酒，何不鼓瑟更吹笙。我饮呜呜起舞，我舞傞傞白发，顾影可怜生。旧日中秋客，几处几回

晴。

又

丙申中秋，两道人出示四十年前濯纓楼赏月水调。臞仙和，意已尽，明日又续之

此夕酌江月，犹记濯纓秋。濯纓又去如水，安得主人留。旧日登楼长笑，此日新亭对泣，秃鬓冷飕飕。木落下极浦，渔唱发中洲。

芙蓉阙，鸳鸯阁，凤凰楼。夜深白露纷下，谁见湿萤流。自有此生有客，但恨有鱼无酒，不了一生浮。重省看潮去，今夕是杭州。

又 和马观复中秋

不饮强须饮，不饮奈何明。也曾劬秃当了，依旧滑如冰。一吸金波荡漾，再吸琼楼倾倒，吾杓亦长盈。试入壶中看，只似世间晴。

饮连江，江连月，月连城。十年离合老矣，悲喜得无情。想见凄然北望，欲说明年何处，衣露为君零。同此大圆镜，握手认环瀛。

又 和巽吾观荷

仙拿下驰道，清露滴芙蓉。无繆似酒初醒，身世笑鞦韆中。万朵花灯夜宴，一叶扁舟海岛，寂寂五更风。误赏明妆靛，愁思满青铜。

陂六六，三十六，渺何穷。江南曲曲烟雨，谁是醉施翁。但恨才情都老，无复风流

曾梦，缥缈赋惊鸿。寄语清净社，小饮合相容。

又 甲午九日牛山作

不饮强须饮，今日是重阳。向来健者安在，世事两茫茫。叔子去人远矣，正复何关人事，堕泪忽成行。叔子泪自堕，湮没使人伤。

燕何归，鸿欲断，蝶休忙。渊明自无可奈，冷眼菊花黄。看取龙山落日，又见骑台荒草，谁弱复谁强。酒亦有何好，暂醉得相忘。

又

辛巳前八月九日夜，自黄州步归，萧英甫以舟泛余舫本觉寺门外，夜深未能睡，明日为赋此寄之

山水无宿约，村暗自当还。不知有客乘兴，载我弄沧湾。酒吸明河欲尽，月落三星在下，未放水风闲。影转松起舞，扶步入林间。

恨无人，横野笛，叫关山。知君慷慨何事，惜得米阳关。看取大江东去，把酒凄然北望，说著泪潺湲。我饮自须尽，君唱有何难。

又

余初入建府，触官妓于马上。后于酒边，妓自言，故赋之

雨声深院里，歌扇小楼中。当时飞燕马上，妖艳为谁容。娇颤须扶未稳，腰衰轻笼小驻，玉女最愁峰。掠鬓过车骤，回首意冲冲。

宝钗斜，云鬓乱，几曾逢。谁知去三步远，此痛与君同。玉箸残妆谁见，獭髓轻痕妙补，粉黛不须浓。重见为低诉，余恨更匆匆。

又 和王槐城自寿

未信仙都子，曾识老仙翁。卿卿少年去后，心与道人同。挥麈不须九锡，开阁苦无长物，闲日醉千钟。一笑欠伸起，儿戏大槐中。

友彭聃，招园绮，傲乔松。年来多惯世事，莫莫恼司空。等得三朝好老，恰则而今虚左，梅信已先通。富贵正不免，从此学痴聋。

又

百千孙子子，八十老翁翁。人间天下清福，阅世苦难同。谁叹东门猎倦，谁笑南阳舞罢，万事五更钟。但愿人长久，聊复进杯中。

故侯瓜，丞相柏，大夫松。诸公健者安在，春梦转头空。可笑先生无病，病在枕流漱石，福至自然通。聋者固多笑，一笑更治聋。

又

我有此客否，难作主人翁。小年自不相似，偶与大年同。见说东厢诸少，正拥家君胜会，二八舞歌钟。亦欲得公重，公在画堂中。

笑青蒿，真小草，倚长松。典衣欲作汤

饼，家酿愧瓶空。公有潭州百斛，公有秣田二顷，贺客万钱通。小大不相似，但可似公聋。

又 和马观复石头渡寄韵

明月隔千里，风动帐纹开。故人锦字如梦，梦转雁初来。倚遍西山朝爽，行过石头旧渡，久别忽经怀。不得与之语，日夕独持杯。

调绿水，歌白雪，有心哉。也知尻高啄俯，无计脱尘埃。狗尾貂蝉满座，贝带骏馱弄粉，一舆一臣台。岁晚不如愿，谁更忿灰堆。

又 腊月二十一日可远堂索赋

落日半亭榭，山影没壶中。苍然欲不可极，迢递未归鸿。锦织家人何在，春寄故人不到，寂寞听疏钟。木末见江去，无雪著渔翁。

词春容，歌慷慨，语玲珑。岁云暮矣相见，明日是东风。远想使君台上，携手与人同乐，中夜说元龙。世事无足语，且看烛花红。

又 和彭明叔七夕

不见古时月，何似汉时秋。朱陈村里新样，新妇又骑牛。欲脱参前氏后，又说河边河鼓，此会没来由。何处设瓜果，香动帟沟窰。

郭郎老，谁为理，岂情流。人间□睡五日，五日复何悠。吾腹空虚久矣，子有满堂

锦绣，犊鼻若为酬。玉友此时好，空负葛巾
笏。

又

天地有中气，第一是中元。新秋七七，
月出河汉斗牛间。正是使君初度，如见中州
河岳，绿鬓又朱颜。茎露一杯酒，清彻瑞人
寰。

大暑退，潢潦净，彩云斑。三壬三甲厚
重，屹不动如山。从此五风十雨，自可三年
一日，香寝镇狮蛮。起舞愿公寿，未可愿公
还。

又 陈平章即席赋

夜看二星度，高会列群英。苍颜白发乌
帽，风入古槐清。客有羽衣来者，仍是寻常
百姓，坐觉孟公惊。且勿多酌我，未厌我狂
醒。

金瓯启，银信喜，袞衣新。向来淮浙草
木，隐隐有余声。闻说井阑沙语，感念石壕
村事，倾耳发惊霆。举酒奉公寿，天意厚苍
生。

又 和尹存吾

造物反乎覆，白首困耆英。吟风赏月石
上，一笑再河清。一百八盘道路，二十四桥
歌舞，身世梦堪惊。独酌未能醉，已醉蓦然
醒。

别与老，惊相见，几回新。来时燕栖未
稳，满耳又蝉声。闲忆钱塘江上，两点青山
欲白，血石起鞭霆。此事复安在，相对说平

生。

金缕曲 代贺丞相，有序

恭审天开历甲，旦应生申。钟三光五岳之英，五百年生名世；处前古当今之会，千万世开太平。某踰望门墙，伏深赞颂；积忱依永，奏伎小词，上犯钧严，不胜悚恐庆抃之至。

晓殿龙光起。御香浓、新诗写就，云飞相第。一自骑箕承帝赉，千载君臣鱼水。端不负、当年弧矢。赤壁周郎神游处，料羞看、故垒斜阳里。今共看，更无比。

尊前若说平生事。叹长江、几番风浪，几人胆碎。数载太平丰年瑞。三百年间又几。想皇揆、初心应喜。渐近中秋团团月，算人间天上、俱清美。祝千岁，似甲子。

又 寿缪守

秋老寒香圃。自春来、桔槔闲了，去天尺五。陌上踏歌来何暮，收得黄云如土。但稽首、福星初度。不是使君人间佛，甚今朝、欲雨今朝雨。持寿酒，为公舞。

虎头画手谁堪许。写天人、方瞳红颊，共宾笑语。卫戟连营三千士，簇簇满城箫鼓。早恐是、留公不住。飞去翩翩嫌白鹭，算年来、稀姓多登府。祝千岁，奉明主。

又 奇番总管周耐轩生日

春入番江雨。满湖山、莺啼燕语，前歌后舞。闻道行骢行且止，却听谯楼更鼓。正未卜、阴晴同否。老子胸中高小范，这精神、

堪更开封府。新治足，旧民苦。

扁舟浩荡乘风去。看莱衣、思贤堂上，
寿觞朝举。六十二三前度者，敢望香山老傅。
又过了、午年端午。采采菖蒲三三节，寄我
公、矫矫扶天路。重归袞，到相圃。

又 寿李公谨同知

我误留公住。看人间、犹是重阳，满城
风雨。父老棠阴携孺子，记得元宵歌舞。但
稽首、乌乌无语。我有桓筝千年恨，为谢公、
目送还云抚。公不乐，尚何苦。

吾侬心事凭谁诉。有谁知、闭户穷愁，
欲从之去。闻道明朝生申也，满酌一杯螺浦。
又知复、明年何处。天若有情西江者，便使
君、骢马来当路。香瓣起，胜金缕。

又 和同姓草叔曲本胡端逸见寿韵并谢

忘却来时路。恨苍苍、寒冰弃我，江南
闲处。世事早知今如此，何不老农老圃。更
种个、梅花深住。冻雨前朝浯溪石，对苍苔、
堕泪怜臣甫。山似我，两眉聚。

岁云暮矣如何度。但多情、寂寥相念，
二三君子。越石暮年扶风赋，犹解闻鸡起舞。
恨不减、二三十岁。一曲相思碧云合，醉凭
君、为我歌如缕。君念我，似同祖。

又 寿陈静山

昨醉君家酒。从今十万八千场，未疏老
友。人道水仙标格俊，不许梅花殿后。但赢
得、一年年瘦。迤邐聚星楼上雪，待天风、
浩荡重携手。酌君酒，献君寿。

年前春入燕台柳。看联翩、四辈金鞭，
长楸承受。岂有中朝瓿覆久，更落闽山海口。
端自有、玉堂金斗。我喜明年申又酉，但乞
浆、所得皆醇酎。拚醉里，送行昼。

又 寿朱氏老人七十三岁

七十三年矣。记小人、四百四十五番甲
子。看到蓬莱水清浅，休说树犹如此。但梦
梦、昨非今是。一曲尊前离鸾操，抚铜仙、
清泪如铅水。歌未断，我先醉。

新来画得耆英似。似灞桥、风雪吟肩，
水仙梅弟。里巷依稀灵光在，飞过劫灰如洗。
笑少伴、乌衣余几。老子平生何曾默，暮年
诗、句句皆成史。个亥字，甲申起。

又 和潭东劝饮寿觞

拍瓮春醅动。洞庭霜、压绿堆黄，林苞
堪贡。况有老人潭边菊，摇落赏心入梦。数
百岁、半来许中。儿女牵衣团栾处，绕公公、
愿献生申颂。公性涩，待重风。

人生一笑何时重，奈今朝、有客无鱼，
有鱼留冻。何似尊前斑斓起，低唱浅斟齐奉。
也不待、烹龙炆凤。此会明年知谁健，说边
愁、望断先生宋。醒最苦，醉聊共。

又

绝北寒声动。渺黄昏、叶满长安，云迷
章贡。最苦周公千年后，正与莽新同梦。五
十国、纷纷入中。摇扬都人歌郢坞，问何如、
昨日嵩高颂。牖九锡，竟谁风。

当初共道擎天重。奈天教、垓下风寒，

滹沱兵冻。寂寞放翁南园记，带得园柑进奉。
怅回首、何人修凤。寄语权门趋炎者，这朝廷、
不是邦昌宋。真与赆，可能共。

又

杜叟陈君，风谊动人，岁一介寿我，辞华蔚然。
至谓我黑漆，则久不相见故耳，为此发歌

吾鬓如霜蕊。自江南、西风尘起，倒骑
秃尾。旧日汾阳中书令，何限门生儿子。到
今也、陆沈草昧。醉里不行西州路，但斗间、
看望成龙气。聊寂寞，自相慰。

夫君自是人间瑞。叹生儿、当如异日，
孙仲谋耳。健笔风云蛟龙起，人物山川形势。
犹有封、狼居胥意。伐木嚶嚶出幽谷，问天
之将丧斯文未。吾待子，望如岁。

又 和龚竹卿客中韵

何处从头说。但倾尊、淋漓醉墨，疏疏
密密。看取两轮东西者，也是樊笼中物。这
光景、年来都别。白发道人隆中像，笑相逢、
对拥炉边雪。又过了，上元节。

纸窗旋补寒穿穴。柳黏窗、青青过雨，
劝君休折。睡不成酣酒先醒，花底东风又别。
夜复夜、吟魂飞越。典却西湖东湖住，十三
年不出今朝出。容易得，二三月。

又 贺赵松庐

岁事峥嵘甚。是当年、爆竹驱傩，插金
幡胜。忽晓阑街儿童语，不为上元灯近。但
笑拣、梅簪公鬓。莫恨青青如今白，愿年年、
语取东君信。巾未堕，笑重整。

他年不信东风冷。鼓连天、银烛花光，柳芽催进。漫说沈香亭羯鼓，自著锦袍吟凭。待吹彻、玉箫人醒。不带汝阳天人福，便不教、百又余年剩。歌此曲，休辞饮。

又 壬午五日

叶叶跳珠雨。里湖通、十里红香，画桡齐举。昨梦天风高黄鹄，下俯人间何许。但动地、潮声如鼓。竹阁楼台青青草，问木棉、羁客魂归否。盘泣露，寺钟语。

梦回酷似灵均苦。叹神游、前度都非，明朝重五。满眼离骚无人赋，忘却君愁吊古。任醉里、乌乌缕缕。渺渺茂陵安期叟，共鄱池、夜别还于楚。采涧绿，久延伫。

又 叠韵

襟泪涔涔雨。料骚魂、水解千年，依然轻举。还看吴儿胥涛上，高出浪花几许。绝倒是、东南旗鼓。风雨蛟龙争何事，问彩彩、香糗犹存否。溪女伴，采莲语。

古人不似今人苦。漫追谈、少日风流，三三五五。谁似鄱阳鸱夷者，相望怀沙终古。待唤醒、重听金缕。尚有远游当年恨，恨南公、不见秦为楚。天又暮，黯凝伫。

又 五日韵

锦岸吴船鼓。问沙鸥、当日沈湘，是何端午。长恨青青朱门艾，结束腰身似虎。空泪落、婵媛嫠女。我醉招累清醒否，算平生、清又醒还误。累笑我，醉中语。

黄头舞棹临江处。向人间、独竞南风，

叫云激楚。笑倒两崖人如蚁，不管颓波千履。忽惊抱、汨罗无柱。欸乃渔歌斜阳外，几书生、能办投湘赋。歌此恨，泪如缕。

又

古岩和去年九日约登高韵，再用前韵

破帽吹愁去。绕郊墟、残灰败壁，冷烟斜雨。舞马梦惊城乌起，散作童妖灶语。漫说与、谢仙一句。犹记醉归西州路，问行人、望望骊烽误。几未失，丧公屐。

高高况是兴亡处。望平沙、落日湖光，暗淮沈楚。寂寞西陵歌又舞，疑冢嵯峨新土。黯牛笛、参差归路。试问文君容賒否，待东篱、更就黄花浦。拚酩酊，浣蓝缕。

又 丙戌九日

风雨东篱晚。渺人间、南北东西，平芜烟远。旧日携壶吹帽处，一色沈冥何限。天不遣、魂销肠断。不是苦无看山分，料青山、也自羞人面。秋后瘦，老来倦。

惊回昨梦青山转。恨一林、金粟都空，静无人见。默默黄花明朝有，只待插花寻伴。又谁笑、今朝蝶怨。潦倒玉山休重醉，到簪萸、忍待人频劝。今又惜，几人健。

又 九日即事

与客携壶去。望高高、半山失却，满城风雨。何许白衣人邂逅，小立东篱共语。未怪是、催租断句。寂寞午鸡啼三四，悄老人、桥上前期误。卿且去，整吾屐。

寒空旧是题诗处。莽云烟、缠蛟舞凤，

东吴西楚。千古新亭英雄梦，泪湿神州块土。叹落日、鸿沟无路。一片沙场君不去，空平生、恨恨王夷甫。凭半醉，付金缕。

又 登高华盖岭和同游韵

携手登高赋。望前山、山色如烟，烟光如雨。少日凭阑峰南北，谁料美人迟暮。漫回首、残基冷绪。长恨中原无人问，到而今、总是经行处。书易就，雁难付。

斜阳日日长亭路。倚秋风、洞庭一剑，故人何许。寂寞柴桑寒花外，还有白衣来否。但哨遍、长歌归去。尚有孔明英英者，怅孔明、自是英英误。歌未断，鬓成缕。

又 绝江观桃，座间和韵

问何年种植。独成蹊、秣华烂漫，锦开千步。花下老人犹记我，不似那回赏处。并吹却、道边谢墅。黄四娘家今何在，也飘零、偃向前村住。千万恨，寄红雨。

携壶藉草行歌暮。记前宵、深盟止酒，况堪扶路。破手一杯花浮面，不觉二三四五。更竹里、颠狂崔护。试语看花诸君子，但如今、俯仰成前度。君不见，曲江树。

又 闻杜鹃

少日都门路。听长亭、青山落日，不如归去。十八年间来往断，白首人间今古。又惊绝、五更一句。道是流离蜀天子，甚当初、一似吴儿语。臣再拜，泪如雨。

画堂客馆真无数。记画桥、黄竹歌声，桃花前度。风雨断魂苏季子，春梦家山何处。

谁不愿、封侯万户。寂寞江南轮四角，问长安、道上无人住。啼尽血，向谁诉。

又 古岩取后村和韵示余，如韵答之

一笑披衣起。笑昨宵、东风似梦，韩张卢李。白发红云溪上叟，不记儿孙年齿。但回首、秦亡汉驶。苦苦渔郎留不住，约扁舟、后日重来此。吾已老，尚能俟。

少年未解留人意。恍出山、红尘吹断，落花流水。天上玉堂人间改，漫欸乃声千里。更说似、玄都君子。闻道酿桃堪为酒，待酿桃、千石成千醉。春有尽，瓮无底。

又 乡校张灯，赋者迫和，勉强趋韵

灯共墙檠语。记昨朝、芒鞋蓑笠，冷风斜雨。月入宫槐槐影澹，化作槐花无数。恍不记、鳌头压处。不恨扬州吾不梦，恨梦中、不醉琼花露。空耿耿，吊终古。

千蜂万蝶春为主。怅何人、老忆江南，北朝开府。看取当年风景在，不待花奴催鼓。且未说、春丁分俎。一曲沧浪邀吾和，笑先生、尚是邯郸步。如秉菘，续残炬。

摸鱼儿 和柳山悟和尚与李同年嘉龙韵

渐无多，诗朋酒伴，东林复几人许。旧时船子西湖柳，词与东风尘土。重记否。那月月下旬，且避何人疏。当朝自负。甚堕髻愁眉，滕韝短后，一往似伧父。

当年事，伤心说庾开府。人生无百年虑。虎头燕颌人间肉，不是蜜翁翁做。今又古。

是楚对凡亡，为是凡亡楚。朝朝暮暮。听画角楼头，呜咽未断，重数五更鼓。

又 和谢李同年

记玄都、看花君子，一生恨奈何许。青云紫陌悠悠者，几个玉人成土。今在否。但四海九州，屈指从头疏。吾年空负。看射虎南山，遭逢醉尉，何须饮田父。

神清梦，也是堂堂欧府。此中无破头虑。种槐不隔鞭蛆恶，更祝二郎儿做。苍苍古。漫年又一年，老却南公楚。池塘春暮。笑步步鸣蛙，看成两部，正似未忘鼓。

又

三百年、人间天上，遽如许、遽如许。落花寒食东风雨，漠漠长陵抔土。魂归否。怕些不分明，又堕人笺疏。且无相负。记昔与诸贤，共谈洛下，曾识老人父。

牛衣泪，冷落闻鸡东府。风尘曾独深虑。子规声断长门晓，春梦不堪重做。千万古。但目极心伤，宛转虞兮楚。江东日暮。想野草荒田，而今何处，不待雍门鼓。

又 和韵

道醉乡、无边无岸，一尊到彼殊径。是间转海人知处，尺地不教渠剩。尊亦瘦。问一斗消醒，一石犹难信。临风小等。记我友醒狂，相从有意，中路恨羌永。

梅花晚，早已雪堆余鬓。此花宁复风韵。空寒独倚天为主，天又几时曾定。今为晋。看秦女山中，绿发垂垂顶。百年一瞬。叹高

卧北窗，闲过五十，无说答形影。

又 辛巳冬和中斋梅词

记歌头、辛壬癸甲，乌乌能知谁晓。梅花不待元宵好，雪月交光独照。愁未老。更老似渠□，冷面迎相笑。君词定峭。但减十年前，偎桃傍李，肯独为梅好。

山中好。可但一枝春早。道边无限花草。米嘉荣共何戡在，还忆永新娇小。明年了。又唤起流莺，又自愁鹃叫。东皇太昊。更不是琼花，香无半点，一笑使人倒。

又 和巽吾留别韵

懒能看、海桑世界，风花过眼如传。月明昨夜庭流水，天色朝来都变。尘石烂。铗衣坏，和衣减尽谁能怨。秦亡楚倦。但剪烛西窗，秋声入竹，点点已如霰。

当年事，本是泗亭沛县。却教绵蕪成殿。暮年八阵那曾用，付与江流石转。前楚辩。今哨遍，是乌乌者灯前劝。乾坤较健。叹君已归休，吾方俯仰，种种未曾见。

又 春暮

渺斜阳、村烟酒市，独教王谢如此。渔翁梦入江头絮，寂寂平安西子。东风起。东风起。种桃千树皆流水。桥边万里。甚老子情钟，明朝后日，又洒送春泪。

青过雨，历历远山如洗。暮云堪共谁倚。诸贤洛下风流散，轻薄纷纷余几。聊尔尔。问世事。何如自嗅残花蕊。金铜剑履。但陌上相逢，摩挲一笑，铸此几时矣。

又 甲午送春

又非他、今年晴少，海棠也恁空过。清
羸欲与花同梦，不似蝶深深卧。春怜我。我
又自、怜伊不见侬赧和。已无可奈。但愁满
清漳，君归何处，无泪与君堕。

春去也，尚欲留春可可。问公一醉能颇。
钟情剩有词千首，待写大招招些。休阿那。
阿那看、荒荒得似江南么。老夫婆娑。问篱
下闲花，残红有在，容我更簪朵。

又

今岁海棠迟开半月，然一夕如雪，无饮余者，
赋此寄恨

是他家、绛唇翠袖，可容卿有功否。相
思不到胭脂井，只隔东林烟柳。春去又。漫
一夜东风，吹得花成旧。无人举酒。但照影
堤流，图他红泪，飘洒到襟袖。

人间事，大半归谋诸妇。不如意十八九。
敲门夜半窥园李，赤脚玉川惊走。何处有。
更炙烛风流，看到人归后。休休回首。笑旧
日园林，衿巢蜀锦，处处可携手。

又 酒边留同年徐云屋三首

怎知他、春归何处，相逢且尽尊酒。少
年袅袅天涯恨，长结西湖烟柳。休回首。但
细雨断桥，憔悴人归后。东风似旧。问前度
桃花，刘郎能记，花复认郎否。

君且住，草草留君翦韭。前宵正恁时候。
深杯欲共歌声滑，翻湿春衫半袖。空眉皱。
看白发尊前，已似人人有。临分把手。叹一

笑论文，清狂顾曲，此会几时又。

又

正何须、阳关肠断，吴姬苦劝人酒。中年怀抱萦萦处，看取伴烟和柳。柳摇首。笑飞到家山，已是酴醾后。留连话旧。问溪上儿童，颇曾见我，有此故人否。

相逢地，还忆今宵三韭。青山只了迎候。东风自送归帆去，吹得乱红沾袖。暮云皱。听杜宇高高，啼向无何有。江花垂手。任春色重来，江花更好，难可少年又。

又

待欲□、家山未得，方知名不如酒。丹砂便做金句漏，难遣鬓青似柳。试搔首。记移竹南塘，又是三年后。情怀非旧。叹少日相如，垆边老去，能赋上林否。

种兰处，赢得青青种韭。渊明中路相候。何须更待三三径，也自长拖衫袖。青袍皱。便持当金貂，賒取邻家有。小儿拍手。笑昨醉如泥，盟言止酒，何事醒来又。

又 赋云束楼

更比他、东风前度，依然一榻如许。深深旧是谁家府，落日画梁燕语。帘半雨。记湖海平生，相遇忘宾主。阑珊春暮。看城郭参差，长空澹澹，沙鸟自来去。

江山好，立马白云飞处。秦川终是吾土。登临笑傲西山笏，烟树高高杜宇。君且住。况双井泉甘，汲遍茶堪煮。歌残金缕。恰黄鹤飞来，月明三弄，仍是岳阳吕。

又 守岁

是疑他、春来倏忽，是疑岁别人去。古今守岁无言说，长是酒阑情绪。堪恨处。曾亲见都人，户户银花树。星河未曙。听朝马笼街，火城簇仗，御笔已题露。

人间事，空忆桃符旧句。三茅钟自朝暮。严城夜禁故如鬼，况敢凭陵大噓中。冬冬鼓。但画角声残，已是新人故。休思前度。叹五十加三，明朝领取，闲看五星聚。

又 和中斋端午韵

醒复醒、行吟泽畔，焉能忍此终古。招魂过海枫林暝，招得魂归无处。朝又暮。但依旧，禁街人静冬冬鼓。画船沈雨。听欸乃渔歌，兴亡事远，咽咽未能句。

君且住。能歌吾不如汝。悠悠鼓枻而去。沧洲揽结芳成艾，唤作张三李五。羌自苦。更闲却，玉堂端帖多多许。无人自语。把画扇鸾边，香罗雪底，题作午年午。

又 赠友人

想幼安、辽东归后，自羞年少龙首。长安市上垆边卧，枉却快行家走。空两袖。染醉墨淋漓，把似天香透。功名邂逅。便六一词高，君谟字伟，但见说行昼。

人间事，苦似成丹无候。神清苔字如镂。明年六十闻歌后，颇记薄醺醺否。儿拍手。笑马上葛疆，也作家山友。烦伊起寿。更时复一中，毋多酌我，疏影共三嗅。

又 水东桃花下赋

也何须、晴如那日，欣然且过江去。玄都纵有看花便，耿耿自羞前度。堪恨处。人道是，漫山先落坡翁句。东风绮语。但适意当前，来寻须赋，此土亦吾圃。

海山石，犹记芙蓉城主。弹过飞种成土。是间便作仙客杏，谁与一栽千树。朝又暮。怅二十五年，临路花如故，人生自苦。只唤渡观桃，侵寻至此，世事奈何许。

又

醉与君、狂歌又笑，不知当日何调。孤山梅下吟魂冷，说甚那时苏小。沧波渺。奈此岛，累累竟是谁家表。归欤白鸟。看四圣飘香，朱门金榜，化作竺飞峤。

衰也久，旧游梦翠禽绕。块兮轧、皎兮窈。相思一夜窗前白，谁识余怀渺渺。残年了。听画角，悲凉又是霜天晓。余音杳缈。叹五十之年，我加八九，君隔几科诏。

又 辛巳自寿年五十

是耶非、吾年如此，更痴更悔今昨。狂吟近日疏于酒，转似秋山瘦削。浑未觉。恁儿子门生，前度登高弱。情怀又恶。叹亲友中年，不堪离别，况复久零落。

长生药。有分神仙难学。人生聊复行乐。百年半梦随流水，半在南枝北萼。妾命薄。但寂寞黄昏，时听城楼角。愁无可著。且取醉尊前，明朝休问，昨日已忘却。

又 寿王城山

对尊前、簪花骑竹，老胡起起能舞。春风浩荡天涯去，惟有薰吟自语。槐正午。看万户蜂脾，帘幕双双乳。娇儿骏女。漫学得琵琶，依稀马上，总是主恩处。

凌烟像，空倚临风玉树。升沈事遽如许。刘郎惯是瑶池客，又醉碧桃三度。花下数。记三度三千，结子多红雨。年年五五。共准拟阶庭，钗符献酒，袅袅缀双虎。

又 李府尹美任

待借留、几曾留得，来鸿空怨秋老。至今父老依依恨，犹说李将军好。东门草。早不为东风，遮却长安道。余民如槁。愿金印重来，洪都开府，定复几时到。

秋江鹭，尤记当年潦倒。沧洲无复华皓。朝饥堕泪荒田雨，洗忆窝蜂败扫。天能报。看凤烛亭亭，玉树宽人抱。风霜善保。但逢驿寄书，无书寄语，要说趋朝早。

金缕曲 送五峰归九江

世事如何说。似举鞍、回头笑问，并州儿葛。手障尘埃黄花路，千里龙沙如雪。著破帽、萧萧余发。行过故人柴桑里，抚长松、老倒山间月。聊共舞，命湘瑟。

春风五老多年别。看使君、神交意气，依然晚合。袖有玉龙提携去，满眼黄金台骨。说不尽、古人痴绝。我醉看天天看我，听秋

全宋词 刘辰翁

风，吹动檐间铁。长啸起，两山裂。

意难忘 元宵雨

角动寒谯。看雨中灯市，雪意潇潇。星球明戏马，歌管杂鸣刁。泥没膝，舞停腰。焰蜡任风销。更可怜、红啼桃槛，绿黯杨桥。

当年乐事朝朝。曾锦鞍呼妓，金屋藏娇。围香春斗酒，坐月夜吹箫。今老矣，倦歌谣。嫌杀杜家乔。漫三杯、踞炉觅句，断送春宵。

大酺 春寒

任琐窗深、重帘闭，春寒知有人处。常年笑花信，问东风情性，是娇是妒。冰柳成须，吹桃欲削，知更海棠堪否。相将燕归又，看香泥半雪，欲归还误。漫低回芳草，依稀寒食，朱门封絮。

少年惯羁旅。乱山断，敲树唤船渡。正暗想、鸡声落月，梅影孤屏，更梦衾、千重似雾。相如倦游去。掩四壁、凄其春暮。休回首、都门路。几番行晓，个个阿娇深贮。而今断烟细雨。

谒金门 惜春

风又雨。春事自无多许。欲待柳花团作絮。柳花冰未吐。

全宋词 刘辰翁

翠袖不禁春误。沈却绿烟红雾。将谓花寒留得住，一晴春又暮。

临江仙

过眼纷纷遥集，来归往往羝儿。草间塞口袴间啼。提携都不是，何似未生时。

城上胡笳自怨，楼头画角休吹。谁人不动故乡思。江南秋尚可，塞外草先衰。

水调歌头

游洞岩，夜大风雨，彭明叔索赋，醉墨颠倒

坐久语寂寞，泉响忽翻空。不知龙者为雨，雨者为成龙。看取交流万壑，不数飞来千丈，高屋总淙淙。是事等恶剧，裂石敢争雄。

敲铿訇，扞滑仄，藉蒙〔茸〕。苍浪向来半掩，厚意复谁容。欲说正元旧事，未必玄都千树，得似洞中红。檐语亦颠倒，洗尔不平胸。

撩寮怨

青山和前韵忆旧时学馆，因复感慨同赋

漫道十年前事，闷怀天又阴。何须恨、典了西湖，更笑君、宴罢琼林。闲时数声啼鸟，凄然似、上阳宫女心。记断桥、急管危

弦，歌声远，玉树金缕沈。

看万年枝上禽。徊徨落月，断肠理绝弦
琴。魂梦追寻。挥泪赋白头吟。当年未知行
乐，无日夜、望乡音。何期至今。绿杨外、
芳草庭院深。

刘大辨

失调名

凌云多少功业。

刘 焘

花心动

偏忆江南，有尘表丰神，世外标格。低
傍小桥，斜出疏篱，似向陇头曾识。暗香孤
韵冰雪里，初不怕、春寒要勒。问桃杏贤瞒，
怎生向前争得。

省共萧娘笑摘。玉纤映琼枝，照人一色。
澹粉晕酥，多少工夫，到得寿阳宫额。再三
留待东君看，管都将、别花不惜。但只恐、
南楼又三弄笛。

八宝妆

门掩黄昏，画堂人寂，暮雨乍收残暑。
帘卷疏星门户悄，隐隐严城钟鼓。空街烟暝
半开，斜日朦胧，银河澄淡风凄楚。还是凤
楼人远，桃源无路。

惆怅夜久星繁，碧空望断，玉箫声在何
处。念谁伴、茜裙翠袖，共携手、瑶台归去。
对修竹、森森院宇。曲屏香暖凝沈炷。问对
酒当歌，情怀记得刘郎否。

转调满庭芳

风急霜浓，天低云淡，过来孤雁声切。
雁儿且住，略听自家说。你是离群到此，我
共那人才相别。松江岸，黄芦影里，天更待
飞雪。

声声肠欲断，和我也、泪珠点点成血。
一江流水，流也呜咽。告你高飞远举，前程
事、永没磨折。须知道、飘零聚散，终有见
时节。

菩萨蛮 四时四首回文

春

小红桃脸花中笑。笑中花脸桃红小。垂
柳拂帘低。低帘拂柳垂。

袅花风鬓绕。绕鬓风花袅。归路月沈西。
西沈月路归。

夏

簟纹双映冰肌艳。艳肌冰映双纹簟。窗
外竹生风。风生竹外窗。

点红潮醉脸。脸醉潮红点。廊上月昏黄。
黄昏月上廊。

秋

露盘金冷初阑暑。暑阑初冷金盘露。风
细引鸣蛩。蛩鸣引细风。

雨零愁远路。路远愁零雨。空醉一尊同。

同尊一醉空。

冬

悄琼霏玉堆檐雪。雪檐堆玉霏琼屑。山
远对眉攒。攒眉对远山。

拆梅寒映月。月映寒梅拆。阑倚暂愁宽。
宽愁暂倚阑。

又 四首

春

湿花春雨如珠泣。泣珠如雨春花湿。花
枕并敲斜。斜敲并枕花。

织文回字密。密字回文织。嗟更数年华。
华年数更嗟。

夏

润肌饶汗香红沁。沁红香汗饶肌润。低
槛小山围。围山小槛低。

枕横钗坠鬓。鬓坠钗横枕。归梦与郎期。
期郎与梦归。

秋

绿窗斜动摇风竹。竹风摇动斜窗绿。虚
幌夕凉初。初凉夕幌虚。

曲眉愁翠蹙。蹙翠愁眉曲。无雁寄书来。
来书寄雁无。

冬

雪窗寒听孤灯灭。灭灯孤听寒窗雪。残
漏惜衾闲。闲衾惜漏残。

说时常恨别。别恨常时说。还不奈宵寒。

全宋词 刘 焘

寒宵奈不还。

玉交枝

念谁伴、茜裙翠袖。

刘德秀

贺新郎 西湖

雨沐秋容薄。莹湖光、琉璃千顷，浪平如削。步绕湖边佳绝处，时涌琼楼珠阁。记一一、经行皆昨。十万人家空翠里，借姮娥、玉鉴相依约。卷雾箔，飞烟幕。

天机云锦才收却。放芙蓉、岸花十里，翠红成幄。向晚买舟撑月去，笑引银汉共酌。醉欲起、骑鲸碧落。试唤坡仙哦妙句，问淡妆、此夕如何著。只云月，是梳掠。

刘鼎臣妻

鹧鸪天 剪彩花送夫省试

金屋无人夜剪缯。宝钗翻作齿痕轻。临
行执手殷勤送，衬取萧郎两鬓青。

听嘱付，好看承。千金不抵此时情。明年
宴罢琼林晚，酒面微红相映明。

刘斧

谪仙怨

晴山碍日横天。绿叠君王马前。銮辂西
巡蜀国，龙颜东望秦川。

曲江魂断芳草，妃子愁凝暮烟。长笛此时
吹罢，何言独为婵娟。

刘公子

虞美人 寿女人 二月十一

揆‘先’四日花朝节。红紫争罗列。传言
玉女降生朝。箕宿光联婺宿、灿云霄。

遍衣红袖齐歌舞。称颂椒觞举。群仙列
侍宴瑶池。王母麻姑同寿、更无期。

刘珙

满江红 遥寿仲固叔谊

南郭新居 ,忆乡社、久成疏隔。乘暇日、风吹衣袂 ,花迎村陌。果核鸡豚张燕豆 ,儿童父老联宾席。想笋舆、到处水增光 ,山添色。

应情念 ,天涯侄。随官牒 ,飘萍迹。叹离多聚少 ,感今思昔。鬓影羞临湘水绿 ,梦魂常对屏山碧。凭画栏、搔首望归云 ,情无极。

刘光祖

洞仙歌 荷花

晚风收暑，小池塘荷净。独倚胡床酒初醒。起徘徊、时有香气吹来，云藻乱，叶底游鱼动影。

空擎承露盖，不见冰容，惆怅明妆晓鸾镜。后夜月凉时，月淡花低，幽梦觉、欲凭谁省。且应记、临流凭阑干，便遥想，江南红酣千顷。

鹊桥仙 留别

相逢一笑，又成相避，南雁归时霜透。明朝人在短亭西，看舞袖、双双行酒。

歌声此处，秋声何处，几度乱愁搔首。如何不寄一行书，有万绪、千端别后。

昭君怨 别恨

人在醉乡居住。记得旧曾来去。疏雨听芭蕉。梦魂遥。

惆怅柳烟何处。目送落霞江浦。明夜月

当楼，照人愁

江城子 梅花

十分雪意却成霜。暮云黄。月微茫。只有梅花，依旧吐幽芳。还喜无边春信漏，疏影下，觅浮香。

才清端是紫薇郎。别鹓行。忆宫墙。夜半胡为，人与月交相。君合召归吾老矣，月随去，照西厢。

长相思 别意

玉尊凉。玉人凉。若听离歌须断肠。休教成鬓霜。

画桥西，画桥东。有泪分明清涨同。如何留醉翁。

水调歌头 旅思

客梦一回醒，三度碧梧秋。仰看今夕天上，河汉又西流。早晚凉风过雁，惊落空阶一叶，急雨闹清沟。归计休令暮，宵露浥征裘。

古来今，生老病，许多愁。那堪更说、无限功业镜中羞。只有青山高致，对此还论世事，举白与君浮。送我一杯酒，谁起舞凉州。

临江仙 春思

小院回廊春寂寂，晚来独自闲行。画帘东畔碧云生。也知无雨，空滴枕边声。

一簇小桃开又落，低头拾取红英。东风相送忘相迎。梨花寒食，到得锦官城。

又 自咏

我似万山千里外，悠然一片归云。宫衔犹自带云云。谁知前进士，已是故将军。

闲坐闲行闲饮酒，闲拈闲字闲文。诸公留我笑纷纷。一枝簪宝髻，六幅舞罗裙。

踏莎行 春暮

扫径花零，闭门春晚。恨长无奈东风短。起来消息探茶蘼，雪条玉蕊都开遍。

晚月魂清，夕阳香远。故山别后谁拘管。多情于此更情多，一枝嗅罢还重捻。

醉落魄 春日怀故山

春风开者。一时还共春风谢。柳条送我今槐夏。不饮香醪，辜负人生也。

曲塘泉细幽琴写。胡床滑簟应无价。日迟睡起帘钩挂。何不归欤，花竹秀而野。

沁园春 寿晁帅七十

画戟如霜，绮疏如水，篆香渐微。向莺花多处，青山衮衮，鹭舄散后，落屑霏霏。曾是鸾台金马客，一场梦觉来人事非。多少话，付无心云叶，自在闲飞。

想看燕鸿易感，□几度春往秋又归。见黄余露点，东坡菊赋，清传雪片，处士梅诗。向此年年开寿斝，算今古人生七十稀。歌啸外，作皇朝遗老，名字辉辉。

刘贵翁

满庭芳 萍

宫鸟西飞 ,杨花北去 ,春风飘向伊谁。盈盈小小 ,轻薄不堪肥。天付风流到骨 ,消不尽、流落青池。谁知道 ,踏歌朝暮 ,痴绝待渠归。

恹恹 ,春似酒 ,日痕生绀 ,裙色明漪。笑东家西沼 ,到处依依。同是东风种得 ,独无据 ,飘泊年时。青梅落 ,水光帘影 ,小翠立横枝。

刘 过

沁园春 御阅还上郭殿帅

玉带猩袍，遥望翠华，马去似龙。拥貂蝉争出，千官鳞集，貔貅不断，万骑云从。细柳营开，团花袍窄，人指汾阳郭令公。山西将，算韬铃有种，五世元戎。

旌旗蔽满寒空。鱼阵整、从容虎帐中。想刀明似雪，纵横脱鞘，箭飞如雨，霹雳鸣弓。威撼边城，气吞胡虏，惨淡尘沙吹北风。中兴事，看君王神武，驾驭英雄。

又 题黄尚书夫人书壁后

缓辔徐驱，儿童聚观，神仙画图。正芹塘雨过，泥融路软，金莲自策，小小篮舆。傍柳题诗，穿花劝酒，嗅蕊攀条得自如。经行处，有苍松夹道，不用传呼。

清泉怪石盘纡。信风景江淮各异殊。记东城赋就，纱笼素壁，西山句好，帘卷晴珠。白玉堂深，黄金印大，无此文君载后车。挥毫罢，看淋漓雪壁，真草行书。

又 寄辛稼轩

古岂无人，可以似吾，稼轩者谁。拥七

州都督，虽然陶侃，机明神鉴，未必能诗。常袞何如，羊公聊尔，千骑东方侯会稽。中原事，纵匈奴未灭，毕竟男儿。

平生出处天知。算整顿乾坤终有时。问湖南宾客，侵寻老矣，江西户口，流落何之。尽日楼台，四边屏障，目断江山魂欲飞。长安道，奈世无刘表，王粲畴依。

又 寄孙竹湖

问讯竹湖，竹如之何，如何未归。道吴山越水，无非佳处，来无定止，去亦何之。莫是秋来，未能忘耳，心与孤云相伴飞。愁无奈，但北窗寄傲，南涧题诗。

人生万事成痴。算世上久无公是非。恨云台突兀，无君子者，雪堂寥落，有美人兮。疏雨梧桐，微云河汉，钟鼎山林无限悲。阳山县，是昌黎误汝，汝误昌黎。

又 卢蒲江席上，时有新第宗室

一剑横空，飞过洞庭，又为此来。有汝阳璘者，唱名殿陛，玉川公子，开宴尊罍。四举无成，十年不调，大宋神仙刘秀才。如何好，将百千万事，付两三杯。

未尝戚戚于怀。问自古英雄安在哉。任钱塘江上，潮生潮落，姑苏台畔，花谢花开。盗号书生，强名举子，未老雪从头上催。谁羨汝，拥三千珠履，十二金钗。

又 寿

玉带金鱼，绿鬓朱颜，神仙画图。把擎天柱石，空留绿野，济川舟楫，闲舫西湖。

天欲安刘，公归重赵，许大元勋谁得如。平章处，看人如伊吕，世似唐虞。

不须别样规模。但收揽人才多用儒。况自昔军中，胆能寒虏，而今胸次，气欲吞胡。紫府真人，黑头元宰，收敛神功寂似无。归来好，正芝香枣熟，鹤瘦松臞。

又 寄稼轩承旨

斗酒彘肩，风雨渡江，岂不快哉。被香山居士，约林和靖，与东坡老，驾勒吾回。坡谓西湖，正如西子，浓抹淡妆临镜台。二公者，皆掉头不顾，只管衔杯。

白云天竺飞来。图画里、峥嵘楼观开。爱东西双涧，纵横水绕，两峰南北，高下云堆。逋曰不然，暗香浮动，争似孤山先探梅。须晴去，访稼轩未晚，且此徘徊。

又

柳思花情，湖山应怪，先生又来。想旧时谈舌，依然解使，六丁奔走，驱斥风雷。翠袖传觞，金貂换酒，痛饮何妨三百杯。人间世，算谪仙去后，谁是天才。

碧窗画鼓船斋。胸次与乾坤一样开。试云间招手，下呼余子，逡巡去矣，但觉尘埃。若是花时，无风无雨，一日须来一百回。教人道，看玉山自倒，不用相推。

又 张路分秋阅

万马不嘶，一声寒角，令行柳营。见秋原如掌，枪刀突出，星驰铁骑，阵势纵横。人在没幢，戎韬总制，羽扇从容裘带轻。君

知否，是山西将种，曾系诗盟。

龙蛇纸上飞腾。看落笔四筵风雨惊。便尘沙出塞，封侯万里，印金如斗，未惬平生。拂拭腰间，吹毛剑在，不斩楼兰心不平。归来晚，听随军鼓吹，已带边声。

又 观竞渡

画鹢凌风，红旗翻雪，灵鼉震雷。叹沈湘去国，怀沙吊古，江山凝恨，父老兴哀。正直难留，灵修已化，三户真能存楚哉。空江上，但烟波渺渺，岁月洄洄。

持杯。西眺徘徊。些千载忠魂来不来。谩争标夺胜，鱼龙喷薄，呼声贾勇，地裂山摧。香黍缠丝，宝符插艾，犹有樽前儿女怀。兴亡事，付浮云一笑，身在天涯。

又 赠王禹锡

自注铜瓶，作梅花供，尊前数枝。说边头旧话，人生消得，几番行役，问我何之。小队红旗，黄金大印，直待封侯知几时。杯行处，且淋漓一醉，明日东西。

如椽健笔鸾飞。还为写春风陌上词。便平生豪气，销磨酒里，依然此乐，儿辈争知。霜重貂裘，夜寒如水，饮到月斜犹未归。仙山路，有笙簧度曲，声到琴丝。

又 送王玉良

万里湖南，江山历历，皆吾旧游。看飞凫仙子，张帆直上，周郎赤壁，鹦鹉汀洲。吸尽西江，醉中横笛，人在岳阳楼上头。波涛静，泛洞庭青草，重整兰舟。

长沙会府风流。有万户娉婷帘玉钩。恨楚城春晚，岸花樯燕，还将客送，不与人留。且唤阳城，更招元结，摩抚之余歌咏休。心期处，算世间真有，骑鹤扬州。

又 咏别

一别三年，一日三秋，庶几见之。念丹霞秋冷，风巾雾屨，五湖春暖，雨笠烟蓑。山水光中，要人携手，独欠金华俞紫芝。谁知道，向醪醑香里，杯酒同持。

油然川泳云飞。但口不能言心自知。便狂敲铜斗，我歌君和，醉拈如意，我舞君随。风韵如君，岂堪言别，别后如之何勿思。须金玉，再相逢莫负，芷约兰期。

又 王汝良自长沙归

一笛横风，稳转船头，系楫大江。还有人争说，鸣琴手段，教侬重吐，锦绣肝肠。不复少年，插花槌鼓，雅意在乎云水乡。阳关泪，笑琼姬犹恋，奇俊王郎。

谈兵齿颊冰霜。有万户侯封何用忙。借烟霞且作，诗中队仗，鹭鸶已是，归日班收行。收敛平生，筹边胸次，以酒浇之书传香。消凝处，怕三更枕上，疏雨潇湘。

又 美人指甲

销薄春冰，碾轻寒玉，渐长渐弯。见凤鞋泥污，偎人强剔，龙涎香断，拨火轻翻。学抚瑶琴，时时欲剪，更掬水鱼鳞波底寒。纤柔处，试摘花香满，镂枣成班。

时将粉泪偷弹。记绾玉曾教柳傅看。算

恩情相著，搔便玉体，归期暗数，画遍阑干。
每到相思，沈吟静处，斜倚朱唇皓齿间。风流甚，把仙郎暗掐，莫放春闲。

又 美人足

洛浦凌波，为谁微步，轻尘暗生。记踏花芳径，乱红不损，步苔幽砌，嫩绿无痕。衬玉罗湄，销金样窄，载不起、盈盈一段春。嬉游倦，笑教人款捻，微褪些跟。

有时自度歌声。悄不觉、微尖点拍频。忆金莲移换，文鸳得侣，绣茵催袞，舞凤轻分。懊恨深遮，牵情半露，出没风前烟缕裙。知何似，似一钩新月，浅碧笼云。

水调歌头

春事能几许，密叶著青梅。日高花困，海棠风暖想都开。不惜春衣典尽，只怕春光归去，片片点苍苔。能得几时好，追赏莫徘徊。

雨飘红，风换翠，苦相催。人生行乐，且须痛饮莫辞杯。坐则高谈风月，醉则恣眠芳草，醒后亦佳哉。湖上新亭好，何事不曾来。

又

弓剑出榆塞，铅槊上蓬山。得之浑不费力，失亦匹如闲。未必古人皆是，未必今人俱错，世事沐猴冠。老子不分别，内外与中间。

酒须饮，诗可作，铗休弹。人生行乐，

何自催得鬓毛斑。达则牙旗金甲，穷则蹇驴破帽，莫作两般看。世事只如此，自有识鸱鸢。

又 寿王汝良

文采汉机轴，人物晋风流。丈夫有此，便可谈笑觅封侯。试问湘南水石，今古阅人多矣，曾见此公不。名姓出天上，声誉塞南州。斩楼兰，擒颉利，志须酬。青衫何事，犹在楚尾与吴头。闻道长安灞水，尽是三槐风月，好奉板舆游。此曲为君寿，为我唤歌喉。

念奴娇 留别辛稼轩

知音者少，算乾坤许大，著身何处。直待功成方肯退，何日可寻归路。多景楼前，垂虹亭下，一枕眠秋雨。虚名相误，十年枉费辛苦。

不是奏赋明光，上书北阙，无惊人之语。我自匆忙天未许，赢得衣裾尘土。白璧追欢，黄金买笑，付与君为主。莼鲈江上，浩然明日归去。

又 七夕

并肩楼上，小阑干、独记年时凭处。百岁光阴弹指过，消得几番寒暑。鹊去桥空，燕飞钗在，不见穿针女。老怀凄断，夜凉知共谁诉。

不管天上人间，秋期月影，两处相思苦。闲揭纱窗人未寝，泪眼不曾晴雨。花落莲汀，

叶喧梧井，孤雁应为侣。浩歌而已；一杯长记时序。

糖多令

安远楼小集，侑觞歌板之姬黄其姓者，乞词于龙洲道人，为赋此糖多令，同柳阜之、刘去非、石民瞻、周嘉仲、陈孟参、孟容，时八月五日也。

按原题只“安远楼小集”五字，此从强村丛书本龙洲词

芦叶满汀洲。寒沙带浅流。二十年、重过南楼。柳下系舟犹未稳，能几日、又中秋。

黄鹤断矶头。故人今不在。旧江山、浑是新愁。欲买桂花同载酒，终不是、少年游。

满江红 同襄阳帅泛湖

猎猎风蒲，画船转、碧湾沙浦。都不是、蓼汀桃岸，橘洲梅渚。指点山公骑马地，经由羊祜登山处。悄一如、人在水晶宫，销烦暑。

薰风动，帘旌举。秦筝奏，凌波舞。拚冰壶沈醉，晚凉归去。侵岸一篙杨柳浪，过云几点荷花雨。倚楼人、十里凭阑干，神仙侣。

又 高帅席上

敌面风轻，一两点、海棠微雨。春总在、英雄元帅，晓来游处。楼阁万家帘幕卷，江郊十里旌旗驻。有黄鹂、百舌啭新声，垂杨

舞。

寒食近，喧箫鼓。车马闹，铜鞮路。尽不妨沈醉，与花为主。风韵可将图画比，笑谈尽是惊人语。问何如、邹湛岷山头，陪羊祜。

又 寿

霜树啼鸦，梅欲放、小春清晓。庆初度、佩环风外，笑声云表。一柱独擎梁栋重，十年整顿乾坤了。种春风、桃李满人间，知多少。

功甚大，心常小。居廊庙，思耕钓。奈华夷休戚，系王颦笑。盟府山河书带砺，成周师保须周召。看貂蝉、绿鬓本天人，真难老。

谒金门 次京口赋

归不去。船泊早春梅渚。试听玉人歌白苧。行云无觅处。

翦烛写诗无语。漠漠寒生窗户。明日短篷眠夜雨。宝钗留半股。

又

秋兴恶。愁怯罗衾风弱。雨线垂垂晴又落。轻烟笼翠箔。

休道旅怀萧索。生怕香浓灰薄。桂子莫教孤酒约。诗情浑落魄。

贺新郎

平原纳宠姬，能奏方响，席上有作

倦舞轮袍后。正鸾慵凤困，依然怨新怀旧。别有艳妆来执乐，春笋微揜罗袖。试一曲、琅璈初奏。莫放珠帘容易卷，怕人知、世有梨园手。钗玉冷，钏金瘦。

烛花对翦明于昼。画堂深、屏山掩翠，炭红围兽。错认佩环犹未是，依约雏莺啜柳。任箭滴、铜壶银漏。一片雄心天外去，为声清、响彻云霄透。人醉也，尚呼酒。

又 春思

院宇重重掩。醉沈沈、亭阴转午，绣帘高卷。金鸭香浓喷宝篆，惊起雕梁语燕。正一架、酴醾开遍。嫩萼梢头舒素脸。似月娥、初试宫妆浅。风力嫩，异香软。

佳人无意拈针线。绕朱阑、六曲徘徊，为他留恋。试把花心轻轻数，暗卜归期近远。柰数了、依然重怨。把酒问春春不管。枉教人、只恁空肠断。肠断处，怎消遣。

又

老去相如倦。向文君说似，而今怎生消遣。衣袂京尘曾染处，空有香红尚软。料彼此、魂销肠断。一枕新凉眠客舍，听梧桐、疏雨秋声颤。灯晕冷，记初见。

楼低不放珠帘卷。晚妆残、翠钿狼藉，泪痕凝面。人道愁来须殢酒，无奈愁深酒浅。但寄兴、焦琴纨扇。莫鼓琵琶江上曲，怕荻

花、枫叶俱凄怨。云万叠，寸心远。

又 游西湖

睡觉莺啼晓。醉西湖、两峰日日，买花簪帽。去尽酒徒无人问，唯有玉山自倒。任拍手、儿童争笑。一舸乘风翩然去，避鱼龙、不见波声悄。歌韵歇，唤苏小。

神仙路远蓬莱岛。紫云深、参差禁树，有烟花绕。人世红尘西障日，百计不如归好。付乐事、与他年少。费尽柳金梨雪句，问沈香亭北何时召。心未惬，鬓先老。

又 赠张彦功

晓印霜花步。梦半醒、扶上雕鞍，马嘶人去。岚湿青丝双辔冷，缓鞚野梅江路。听画角、吹残更鼓。悲壮寒声撩客恨，甚貂裘、重拥愁无数。霜月白，照离绪。

青楼回首家何处。早山遥、水阔天低，断肠烟树。谁念天涯牢落况，轻负暖烟浓雨。记酒醒、香销时语。客里归鞚须早发，怕天寒、风急相思苦。应为我，翠眉聚。

又 赠邻人朱唐卿

多病刘郎瘦。最伤心、天寒岁晚，客他乡久。大舸翩翩何许至，元是高阳旧友。便一笑、相欢携手。为问武昌城下月，定何如、扬子江头柳。追往事，两眉皱。

烛花细翦明于昼。唤青娥、小红楼上，殷勤劝酒。昵昵琵琶恩怨语，春笋轻笼翠袖。看舞彻、金钗微溜。若见故乡吾父老，道长

安、市上狂如旧。重会面，几时又。

又

弹铗西来路。记匆匆、经行十日，几番风雨。梦里寻秋秋不见，秋在平芜远树。雁信落、家山何处。万里西风吹客鬓，把菱花、自笑人如许。留不住，少年去。

男儿事业无凭据。记当年、悲歌击楫，酒酣箕踞。腰下光铓三尺剑，时解挑灯夜语。谁更识、此时情绪。唤起杜陵风月手，写江东渭北相思句。歌此恨，慰羁旅。

水龙吟 寄陆放翁

谪仙狂客何如，看来毕竟归田好。玉堂无此，三山海上，虚无缥缈。读罢离骚，酒香犹在，觉人间小。任菜花葵麦，刘郎去后，桃开处、春多少。

一夜雪迷兰棹。傍寒溪、欲寻安道。而今纵有，新诗冰柱，有知音否。想见鸾飞，如椽健笔，檄书亲草。算平生、白傅风流，未可向、香山老。

又

庆流阅古无穷，相门又见生名世。致君事业，全如忠献，经天纬地。十二年间，挺身为国，勋庸知几。便书之竹帛，铭之彝鼎，勤劳意、竟谁记。

一自平章庶政，觉人心、顿然兴起。朝廷既正，乾坤交泰，华夷欢喜。行定中原，锦衣归相，分茅□□。看貂蝉绿鬓，中书上

考，过三千岁。

祝英台近

笑天涯，还倦客。欲起病无力。风雨春归，一日近一日。看人结束征衫，前呵骑马，腰剑上、陇西平贼。

鬓分白。只可归去家山，无田种瓜得。空抱遗书，憔悴小楼侧。杜鹃不管人愁，月明枝上，直啼到、枕边相觅。

柳梢青 送卢梅坡

泛菊杯深，吹梅角远，同在京城。聚散匆匆，雪边孤雁，水上浮萍。

教人怎不伤情。觉几度、魂飞梦惊。后夜相思，尘随马去，月逐舟行。

霜天晓角

霜天晓角。梦回滋味恶。酒醒不禁寒力，纱窗外、月华薄。

拥衾思旧约。无情风透幕。惟有梅花相伴，不成是、也吹落。

辘轳金井 席上赠马金判舞姬

翠眉重扫。后房深、自唤小蛮娇小。绣带罗垂，报浓妆才了。堂虚夜悄。但依约、

全宋词 刘 过

鼓箫声闹。一曲梅花，尊前舞彻，梨园新调。

高阳醉、玉山未倒。看鞋飞凤翼，钗梁微袅。秋满东湖，更西风凉早。桃源路杳。记流水、泛舟曾到。桂子香浓，梧桐影转，月寒天晓。

好事近 咏茶筴

谁斫碧琅玕，影撼半庭风月。尚有岁寒心在，留得数茎华发。

龙孙戏弄碧波涛，随手清风发。滚到浪花深处，起一窝香雪。

四字令

情深意真。眉长鬓青。小楼明月调箏。写春风数声。

思君忆君。魂牵梦萦。翠销香暖云屏。更那堪酒醒。

蝶恋花 赠张守宠姬

帘幕闻声歌已妙。一曲尊前，真个梅花早。眉黛两山谁为扫。风流京兆江南调。

醉得白须人易老。老去侯鯖，旧也曾年少。后夜短篷霜月晓。梦魂依约云山绕。

又

宝鉴年来微有晕。懒照容华，人远天涯近。昨夜灯花还失信。无心更唱江城引。

全宋词 刘 过

行过短墙回首认。醉撼花梢，红雨飞成阵。拌了为郎憔悴损。庞儿恰似江梅韵。

临江仙

满院花香晴昼永，恹恹亭户无人。谁将心绪管青春。游丝知我懒，江柳也眉颦。

近水远山都积恨，可堪芳草如茵。何曾一日不思君。无书凭朔雁，有泪在罗巾。

又

数叠小山亭馆静，落花红雨园林。画楼风月想重临。琵琶金凤语，长笛水龙吟。

青眼已伤前遇少，白头孤负知音。苔墙藓井夜沈沈。无聊成独坐，有恨即沾襟。

又

长短驿亭南北路，蒙茸醉拥驼裘。雪天行计欠人留。严风催酒醒，微雨替梅愁。

自作小词呵冻写，冷金淡衬银钩。此情知得几时休。寒云迷洛浦，残梦绕秦楼。

又 茶词

红袖扶来聊促膝，龙团共破春温。高标终是绝尘氛。两箱留烛影，一水试云痕。

饮罢清风生两腋，余香齿颊犹存。离情凄咽更休论。银鞍和月载，金碾为谁分。

江城子

海棠风韵玉梅春。小腰身。晓妆新。长

是花时，犹系茜罗裙。一撮精神娇欲滴，说不似，画难真。

楼前江柳又江云。隔音尘。泪沾巾。一点征帆，烟浪渺无津。万斛相思红豆子，凭寄与，个中人。

又

淡香幽艳露华浓。晚妆慵。略匀红。春困恹恹，□□鬓云松。早是自来莲步小，新样子，为谁弓。

画堂西畔曲栏东。醉醒中，苦匆匆。卷上珠帘，依旧半床空。香炷满炉人未寝，花弄月，竹摇风。

浣溪沙 赠妓徐楚楚

黄鹤楼前识楚卿。彩云重叠拥娉婷。席间谈笑觉风生。

标格胜如张好好，情怀浓似薛琼琼。半帘花月听弹筝。

又 春晚书情

墙外蒙蒙雨湿烟。参差小树绿阴圆。残春中酒落花前。

海燕成巢终是客，鰕鱼入夜几曾眠。人间一段恶因缘。

又 留别

著意寻芳已自迟。可堪容易送春归。酒阑无奈思依依。

杨柳小桥人远别，梨花深巷月斜辉，此

情惟我与君知。

又

谁把幽香透骨薰。韵高全似玉楼人。几
时劝酒不深颦。

竹里绝怜闲体态，月边无限好精神。一
枝斜插坐生春。

又

雾鬓云鬟已懒梳。君休乔木妾归欤。且
来卖酒伴相如，

骨细肌丰周昉画，肉多韵胜子瞻书。琵
琶弦索尚能无。

满庭芳

浅约鸦黄，轻匀螺黛，故教取次梳妆。
减轻琶面，新样小鸾凰。每为花娇玉软，慵
对客、斜倚银床。春来病，兰薰半歇，满筵
舞衣裳。

悲凉。人事改，三春秣艳，一夜繁霜。
似人归洛浦，云散高唐。痛念平生情分，孤
负我、临老风光。罗裙在，凭谁留意，去觅
反魂香。

西江月

细雨黄梅初熟，微风燕子交飞。手拈团
扇写新题。心事恹恹难寄。

片月只堪供恨，双星却有重期。石榴裙

子正芬菲。知为何人慵系。

又

素面偏宜酒晕，晓妆净洗啼痕。只疑身是玉梅魂。长为春风瘦损。

冉冉烟生兰渚，娟娟月挂愁村。落花飞絮耿黄昏。又是一番新恨。

又 武昌妓徐楚楚号问月索题

楼上佳人楚楚，天边皓月徐徐。呼童忙为卷虾须。试问中情几句。

圆少却因底事，缺多毕竟何如。嫦娥无语谩踟躇。飞过画栏西去。

天仙子 初赴省别妾

别酒醺醺容易醉。回过头来三十里。马儿只管去如飞，牵一会。坐一会。断送杀人山共水。

是则青衫终可喜。不道恩情拚得未。雪迷村店酒旗斜，去也是。住也是。烦恼自家烦恼你。

又

彩笔恹恹慵赋咏。斗草闲来寻小径。西园春事只供愁，当好景。成孤另。春又那知人欲病。

洗尽残妆临晚镜。淡玉一团浆水莹。强持檀板近芳樽，云遏定。君须听。低唱月来花弄影。

六州歌头 题岳鄂王庙

中兴诸将，谁是万人英。身草莽，人虽死，气填膺。尚如生。年少起河朔，弓两石，剑三尺，定襄汉，开虢洛，洗洞庭。北望帝京。狡兔依然在，良犬先烹。过旧时营垒，荆鄂有遗民。忆故将军。泪如倾。

说当年事，知恨苦，不奉诏，伪耶真。臣有罪，陛下圣，可鉴临。一片心。万古分茅土，终不到，旧奸臣。人世夜，白日照，忽开明。袞佩冕圭百拜，九泉下、荣感君恩。看年年三月，满地野花春。卤簿迎神。

又

镇长淮，一都会，古扬州。升平日，珠帘十里春风、小红楼。谁知艰难去，边尘暗，胡马扰，笙歌散，衣冠渡，使人愁。屈指细思，血战成何事，万户封侯。但琼花无恙，开落几轻秋。故垒荒丘。似含羞。

怅望金陵宅，丹阳郡，山不断绸缪。兴亡梦，荣枯泪，水东流。甚时休。野灶炊烟里，依然是，宿貔貅。叹灯火，今萧索，尚淹留。莫上醉翁亭，看蒙蒙雨、杨柳丝柔。笑书生无用，富贵拙身谋。骑鹤东游。

沁园春 送辛幼安弟赴桂林官

天下稼轩，文章有弟，看来未迟。正三齐盗起，两河民散，势倾似土，国泛如杯。

猛士云飞，狂胡灰灭，机会之来人共知。何为者，望桂林西去，一骑星驰。

离筵不用多悲。唤红袖佳人分藕丝。种黄柑千户，梅花万里，等闲游戏，毕竟男儿。入幕来南，筹边如北，翻覆手高来去棋。公余且，画玉簪珠履，倩米元晖。

八声甘州 送湖北招抚吴猎

问紫岩去后汉公卿，不知几貂蝉。谁能借留侯箸，著祖生鞭。依旧尘沙万里，河洛染腥膻。谁识道山客，衣钵曾传。

共记玉堂对策，欲先明大义，次第筹边。况重湖八桂，袖手已多年。望中原驱驰去也，拥十州、牙纛正翩翩。春风早，看东南王气，飞绕星躔。

四犯翦梅花 上建康钱大郎寿

水殿风凉，赐环归、正是梦熊华旦叠雪罗轻，称云章题扇西清侍宴。望黄伞、日华笼辇。金券三王，玉堂四世，帝恩偏眷。

临安记、龙飞凤舞，信神明有后，竹梧阴满。笑折花看，橐荷香红润。功名岁晚。带河与、砺山长远。麟脯杯行，狨鞞坐稳，内家宣劝。

小桃红 在襄州作

晚入纱窗静。戏弄菱花镜。翠袖轻匀，

全宋词 刘 过

玉纤弹去，小妆红粉。画行人、愁外两青山，
与尊前离恨。

宿酒醺难醒。笑记香肩并。暖借莲腮，
碧云微透，晕眉斜印。最多情、生怕外人猜，
拭香津微搵。

竹香子 同郭季端访旧不遇，有作

一琐窗儿明快。料想那人不在，熏笼脱
下旧衣裳，件件香难赛。

匆匆去得忒煞。这镜儿、也不曾盖。千
朝百日不曾来，没这些儿个采。

祝英台近 同妓游帅司东园

窄轻衫，联宝辔，花里控金勒。有底风
光，都在画阑侧。日迟春暖融融，杏红深处，
为花醉、一鞭春色。

对娇质。为我歌捧瑶觞，欢声动阡陌。
□似多情，飞上鬓云碧。晚来约住青骢，蹋
花归去，乱红碎、一庭风月。

临江仙 四景

半雨半晴模样，乍寒乍热天时。榴花香
逐湿风飞。绿云翻翠浪，水急转前溪。

谁识清凉意思，珊瑚枕冷先知。秋光预
若借些儿。剩催金粟闹，素魄好扬辉。

鹧鸪天

楼外云山千万重。画眉人隔小帘栊。风垂舞柳春犹浅，雪点酥胸暖未融。

携手处，又相逢。夜阑心事与郎同。一杯自劝羔儿酒，十幅销金暖帐笼。

清平乐 赠妓

忔憎憎地。一捻儿年纪。待道瘦来肥不是。宜著淡黄衫子。

唇边一点樱多。见人频敛双蛾。我自金陵怀古，唱时休唱西河。

西江月

堂上谋臣尊俎，边头将士干戈。天时地利与人和。燕可伐欤曰可。

今日楼台鼎鼐，明年带砺山河。大家齐唱大风歌。不日四方来贺。

临江仙

行道桥南无酒卖，老天犹困英雄。

糖多令

解缆蓼花湾。好风吹去帆。二十年、重

过新滩。洛浦凌波人去后，空梦绕、翠屏间。
飞雾湿征衫。苍苍烟树寒。望星河、低处长安。绮陌红楼应笑我，为梅事、过江南。

贺新郎

水浴芙蓉净。护浓香、迟开半敛，靓妆临镜。长忆耶溪薰风里，年少红颜照映。夜露冷、酒随香醒。回首当时同舟侣，为相思、怕折琼瑶柄。千万缕，意难罄。

玻璃三万六千顷。洗精神、尘埃尽绝，窈然端整。浪蕊年来都慵问，爱此浓情淡性。待移种、灵根玉井。太一真人今何在，取高花、十丈供烟艇。来伴我，泛清影。

清平乐

新来塞北。传到真消息。赤地居民无一粒。更五单于争立。

维师尚父鹰扬。熊黑百万堂堂。看取黄金假钺。归来异姓真王。

西吴曲 怀襄阳

说襄阳、旧事重省。记铜驼巷陌、醉还醒。笑莺花别后，刘郎憔悴萍梗。倦客天涯，还买个、西风轻艇。便欲访、骑马山翁，问岷首、那时风景。

楚王城里，知几度轻过，摩挲故宫柳瘦。

全宋词 刘 过

漫吊景。冷烟衰草凄迷，伤心兴废，赖有阳春古郢。乾坤谁望，陆百里路中原，空老尽英雄，肠断剑锋冷。

行香子 山水扇面

佛寺云边。茅舍山前。树阴中、酒旆低悬。峰峦空翠，溪水青连，只欠梅花，欠沙鸟，欠渔船。

无限风烟。景趣天然。最宜他。隐者盘旋。何人村墅，若个林泉。恰似歙湖，似枋口，似斜川。

望江南 元宵

元宵景，天气正融融。柳线正垂金落索，梅花初谢玉玲珑。明月映高空。

贤太守，欢乐与民同。箫鼓聒残灯火市，轮蹄踏破广寒宫。良夜莫匆匆。

刘 翰

桂殿秋 寿于湖先生

青帝子，碧莲宫。不驾云车骑白龙。瑶池路远羽衣湿，玉佩泠泠明月中。

又 同上

双玉节，到神京。碧杯仙露冷如冰。一声金磬千花发，洞口天风吹酒醒。

蝶恋花

团扇题诗春又晚。小梦惊残，碧草池塘满。一曲银钩帘半卷。绿窗睡足莺声软。

瘦损衣围罗带减。前度风流，陡觉心情懒。谁品新腔拈翠管。画楼吹彻江南怨。

萋萋芳草。怨得王孙老。瘦损腰围罗带小。长是锦书来少。

玉箫吹落梅花。晓寒犹透轻纱。惊起半屏幽梦，小窗淡月啼鸦。

又

鸳鸯翡翠。小小池塘水。落絮游丝花满地。度日阑干独倚。

全宋词 刘 翰

金刀裁就春衫。起来初试轻寒。满把相思清恨，题诗欲寄江南。

好事近

花底一声莺，花上半钩斜月。月落乌啼何处，点飞英如雪。

东风吹尽去年愁，解放丁香结。惊动小亭红雨，舞双双金蝶。

菩萨蛮

去时满地花阴月。归来落尽梧桐叶。帘外小梅残。绿窗幽梦寒。

明朝提玉勒。又作江南客。芳草遍长亭。东风吹恨生。

刘沆

甘州

余客燕山，心传曾君携日观葡萄见示，辄倚玉田
甘州韵，形容墨妙之万一云

爱累累、万颗贯骊珠，特地写幽芳。想黄
昏云淡，夜深人静，清影横窗。冷澹一枝两叶，
笔下老秋光。参透圆明相，日观开荒。

最是柔髭修梗，映风姿雾质，雅趣悠长。
更淋漓草圣，把玩墨犹香。珍重好、卷藏归去，
枕屏间、偏称道人床。江南路，后回重见，同话
凄凉。

刘 浩

满江红 寿陈侍郎 十一月十五

岳渎储精，冰壶里、精神可掬。三万卷、龙蛇落纸，琅玕撑腹。便合弹冠登要路，如何袖手緘空谷。又谁知、天独授先生，长生箓。

鹤易怨，龟多缩。竹太瘦，梅偏独。算人间何物，可传心曲。但愿君如天上月，年年此夜团如玉。更有人、千里共婵娟，偷香祝。

刘 几

梅花曲 以介父三诗度曲

汉宫中侍女，娇额半涂黄。盈盈粉色凌时，寒玉体、先透薄妆。好借月魂来，娉婷画烛旁。惟恐随、阳春好梦去，所思飞扬。

宜向风亭把盏，酬孤艳，醉永夕何妨。雪径蕊、真凝密，降回舆、认暗香。不为藉我作和羹，肯放结子花狂。向上林，留此占年芳。

又

结子非贪，有香不俗，宜当鼎鼐尝。偶先红紫，度韶华、玉笛占年芳。众花杂色满上林，未能教、腊雪埋藏。却怕春风漏泄，一一尽天香。

不须更御铅黄。知国色，禀自天真殊常。只裁云缕，奈芳滑、玉体想仙妆。少陵为尔东阁。美艳激诗肠。当已阴未雨春光。无心赋海棠。

又

浅浅池塘。深深庭院，复出短短垣墙。年年为尔，若九真巡会、宝惜流芳。向人自

有，绵渺无言，深意深藏。倾国倾城，天教与、抵死芳香。

袅须金色，轻危欲压，绰约冠中央。蒂团红蜡，兰肌粉艳巧能妆。婵娟一种风流，如雪如冰衣霓裳。永日依倚，春风笑野棠。

花发状元红慢

三春向暮，万卉成阴、有嘉艳方坼。娇姿嫩质。冠群品，共赏倾城倾国。上苑晴昼暄，千素万红尤奇特。绮筵开，会咏歌才子，压倒元白。

别有芳幽苞小，步障华丝，绮轩油壁。与紫鸳鸯、素蛱蝶。自清旦、往往连夕。巧莺喧翠管，娇燕语雕梁留客。武陵人，念梦役意浓，堪遣情溺。

刘 鉴

贺新郎 贺臞翁倅生曾孙

曾作莺迁贺。道玉皇、久敕薇垣，分君星颗。只待好年好时日，约束东风吹堕。到今日、看来真个。恰好丁年翁七十，五云间、太乙吹藜火。青一点，杉溪左。

太翁阴鹭天来大。后隆山、层一层高，层层突过。簪绂蝉联孙又子，眼里人家谁那。算只有、臞翁恁麽。孙陆机云翁卫武，便履声、毡复尚书坐。拚几许，犀钱果。

满江红 上元呈徐静观

袅袅春幡，恰十日、又逢元夕。人正在、景清堂上，金樽娱客。蜡炬红摇花外竹，定香清透梅边石。听儿童、父老说青原，东风国。

平易政，人皆悦。真实念，无知得。想旌旗一路，又添春色。满眼变成金色界，举头身近琼楼月。问明年、何处著鳌山，蓬莱北。

刘润谷

西江月 贺人女晬

淑质生当良月 晬辰喜遇今朝。掌心托个
儒人苗。早晚夫人争叫。

阿母神仙苗裔 阿爷宰相丰标。阿兄气宇
更飘飘。阿弟看看速肖。

刘将孙

踏莎行 闲游

水际轻烟 ,沙边微雨。荷花芳草垂杨渡。
多情移徙忽成愁 ,依稀恰是西湖路。
血染红笺 ,泪题锦句。西湖岂忆相思苦。
只应幽梦解重来 ,梦中不识从何去。

阮郎归 舟中作

斜阳江路柳青青。传杯那放停。上船不
记送人行。南风吹酒醒。
江曲曲 路萦萦。月明潮水生。送将残梦
作浮萍。角声何处城。

南乡子 重阳效东坡作

山色泛秋光。点点东篱菊又黄。岁月欺
人如此去 ,堂堂。一事无成两鬓霜。
佳节共持觞。无限杯供有限狂。明月明
年诗句苦 ,茫茫。细把茱萸感慨长。

八声甘州 九日登高

不看萸、把酒对名山，无帽厌西风。渺四海故人，一尊今雨，万里长空。宇宙此山此日，今夕几人同。举世谁不醉，独属陶公。

当日白衣几许，漫凄其寄兴，落日篱东。抚停云六合，借醉托孤踪。□吊古、不须多感，□古人、那得共杯中。拚酩酊，明年此会，谁此从容。

又 和人春雪词

看东风、天上放梅开，经岁又新成。笑柳眼迷青，桃腮改白，蝶舞尘惊。任是万红千紫，无力与春争。想建章鸂鶒，犹是残羹。

不比腊前憔悴，拨寒炉榾柮，茶薄烟清。快玉龙战罢，四野回收兵。望红花、扶桑国里，玉玲珑、□□海天平。晴窗下，疏疏花雨，滴滴春声。

又 送春

又江南、三月更明朝，便已是南风。拟强驻韶光，狂追柳絮，卧占残红。早向尊前沈醉，莫听五更钟。赢得春工笑，恼杀渠侬。

只道春风不改，□年来岁去，柳密花浓。但沈腰潘鬓，无复旧时容。春还是、多情多恨，便不教、绿满洛阳宫。只消得，无情风雨，断送匆匆。

满江红 建安戏用林碧山韵

正好花时，忽办得、匆匆来去。道一往无

情 却又别顰愁妩。四海云鬟高样髻 ,长思红袖□分路。怪近来、不怨客毡寒 ,婵娟误。

黄花约 ,终难据。曾未肯 ,清园住。只昼思夜梦 ,浅斟低诉。莲子擘开谁在惹 ,徐娘一笑来何暮。又争知、寂寞白头吟 ,寒机素。

又 和李圆峤话别

南浦绿波 ,只断送、行人行色。虽只是、鹏抃九万 ,天池春碧。鸾侣凤朋争快睹 ,鸥盟鹭宿空曾识。到玉堂、天上念西江 ,今非昔。

公去也 ,宁怀别。人感旧 ,情空切。但岁寒松柏 ,相期茂悦。好在莫偿尘土债 ,风流宁可金门客。俯人间、大暑少清风 ,多炎热。

又

五日风雨 ,萧然独坐 ,偶检康与之伯可顺庵词 ,见其中櫟括金铜仙人辞汉歌 ,自谓缚虎手 ,殊不佳。因改此调 ,虽不能如贺方回诸作 ,然稍觉平妥。长日无所用心 ,非欲求加昔人也

千里酸风 ,茂陵客、咸阳古道。宫门夜、马嘶无迹 ,东关云晓。牵上魏车将汉月 ,忆君清泪知多少。怅土花、三十六宫墙 ,秋风袅。

浥露兰 ,啼痕绕。画阑桂 ,雕香早。便天还知道 ,和天也老。独出携盘谁送客 ,刘郎陵上烟迷草。悄渭城、已远月荒凉 ,波声小。

摸鱼儿 己卯元夕

又匆匆、一番元夕 ,无灯更愁风雨。人间天上无归梦 ,惟有春来春去。愁不语。漫泪湿香绡 ,□草人何许。百年胜处。还更有琉璃 ,

春棚月架,万眼蝶罗否。

风流事,孤负后来儿女。可怜薄命三五。千金无买吴呆处,更说龙飞凤舞。今又古。便剩有才情,无分登楼赋。春醪独抚。也难觅阿瞒,肯容狂客,醉里试歌舞。

又 甲申客路闻鹃

雨萧萧、春寒欲暮。杜鹃声转□□。东风与汝何恩怨,强管人间去住。行且去。漫憔悴十年,愁得身成树。青青故宇。看浩荡灵修,徘徊落日,不乐复何故。

曾听处。少日京华行路。青灯梦断无语。风林飒飒鸡声乱,摇落壮心如土。今又古。任啼到天明,清血流红雨。人生几许。且赢得刘郎,看花眼惯,懒复赋前度。

又 用前韵调敬德

甚平生、风流谢客,刀头梦送酸楚。不堪又得花间曲,猛忆云英霜杵。闲情赋。谁催就月明,云鬓犀梳吐。才情几许。待遗策重来,吹箫一弄,鸾凤共轻举。

留春住。买得绿波南浦。黄金□散如土。蔷薇洞口三生路。无奈春光顿阻。新□绪。也待见东邻,花艳墙低处。东风看取。便娇送飞梭,半摧编贝,笑咏尚高古。

金缕曲 用稼轩韵作

我老无能矣。叹人生、得开笑口,一年闲几。去景悠悠如有待。白发已非春事。便一笑、何曾是喜。我本渔樵孟诸野,向举家、尽叹

今如是 ,空自苦 ,有谁似。

堆堆独坐文书里。是无能、爱闲爱静 ,清时有味。出处古今无真是 ,往往君言有理。看攘臂、后来锋起。汉晋唐虞一杯水 ,只鲁连、犹未知之耳。况碌碌 ,共余子。

江城子 和子昂题水仙女卷

云涛白凤贺瑶池。仗葳蕤。路芳菲。十月温汤 ,赐浴卸罗衣。半点檀心天一笑 ,琼奴弱 ,玉环肥。

风流谁合媚金闺。露将晞。雪争晖。贝阙珠宫 ,环佩月中归。误杀洛滨狂子建 ,情脉脉 ,恨依依。

江城梅花引 登高

明霞回雨霁秋空。笑难逢。步城东。直上翠微 ,客有可人同。回首向来轻节序 ,筋力异 ,心犹在 ,愧鬓蓬。

悲年冉冉江滚滚。骑台平 ,蒋陵冷。天高年晚 ,山河险 ,烟雾冥濛。一幅乌纱 ,闲著傲西风。古往今来只如此 ,便潦倒 ,渺乾坤 ,醉眼中。

六州歌头 元夕和宜可

天涯倦容 ,如梦说今宵。承平事 ,车尘涨 ,马鸣萧。火城朝。狂歌闲嬉笑 ,平康客 ,五陵

侠 闲相待 ,沙河路 ,灞陵桥。万眼琉璃 ,目眩去闲买 ,一翦梅烧。数金蛾彩蝶 ,簇带那人娇 ,说著魂销。掩鲛绡。

波翻海 ,尘换世 ,铜仙泪 ,铁心烧。渺何地 ,踈朱履 ,解金貂。步宫腰。瑶池惊燕罢 ,瓶落井 ,箭篱弨。灯楼倒 ,吴儿老 ,绛都迢。点点梅梢残雪 ,似东风、吹恨难消。悄山村渔火 ,风鬢立春宵。绕寒潮。

水调歌头 败荷

摇风犹似旆 ,倾雨不成盘。西风未禁十日 ,早作背时看。寂寞六郎秋扇 ,牵补灵均破屋 ,风露半襟寒。坐感青年晚 ,不但翠云残。

叹此君 ,深隐映 ,早阑珊。人间受尽炎热 ,暑夕几凭阑。待得良宵灏气 ,正是好天良月 ,红到绿垂干。摇落从此始 ,感慨不能闲。

沁园春

近见旧词 ,有櫟括前后赤壁赋者 ,殊不佳。长日无所用心 ,漫填沁园春二阙 ,不能如公哨遍之变化 ,又局于韵字 ,不能效公用陶诗之精整 ,姑就本语 ,拈拾排比 ,粗以自遣云

壬戌之秋 ,七夕既望 ,苏子泛舟。正赤壁风清 ,举杯属客 ,东山月上 ,遗世乘流。桂棹叩舷 ,洞箫倚和 ,何事呜呜怨泣幽。悄危坐 ,抚苍苍东望 ,渺渺荆州。

客云天地蜉蝣。记千里舳舻旗帜浮。叹孟德周郎 ,英雄安在 ,武昌夏口 ,山水相繆。客

亦知夫 盈虚如彼 山月江风有尽不。喜更酌，
任东方既白 与子遨游。

又

十月雪堂 将归临皋 二客从坡。适薄暮
得鱼 细鳞巨口 新霜脱叶 月步行歌。有客无
肴 有肴无酒 如此风清月白何。归谋妇 得旧
藏斗酒 重载婆娑。

登虬踞虎嵯峨。更凭醉攀翻栖鹊窠。曾
岁月几何 江流断岸 山川非昔 夜啸扪萝。孤
鹤横江 羽衣入梦 应悟飞鸣昔我过。开户视，
但寂寥四顾 万顷烟波。

又

大桥名清江桥 在樟镇十里许 有无闻翁赋沁园
春 满庭芳二阕 书避乱所见女子 未有埋冤姐姐 衔
恨婆婆语 极俚。后有螺川杨氏和二首 又自序生杨
嫁罗 丙子暮春 自涪翁亭下舟行 追骑迫 间逃入山，
卒不免于驱掠。行三日 经此桥 睹无闻二词 以为特
未见其苦 乃和于壁。复云 观者毋谓弄笔墨非好人
家儿女 此词虽俚 谅当近情 而首及权奸误国。又
云 便归去 懒东涂西抹 学少年婆。又云 错应谁铸。
皆追记往日之事 甚可哀也。因念南北之交 若此何
限 心常痛之 适触于目 因其调为赋一词 悉叙其意，
辞不足而情有余悲矣

流水断桥 坏壁春风 一曲韦娘。记宰相
开元 弄权疮痍 全家骆谷 追骑仓皇。彩凤随
鸦 琼奴失意 可似人间白面郎。知他是 燕南
牧马 塞北驱羊。

啼痕自诉衷肠。尚把笔低徊愧下堂。叹
国手无棋 危涂何策 书窗如梦。世路方长。
青冢琵琶 穹庐笳拍 未比渠侬泪万行。二十

载 ,竟何时委玉 ,何地埋香。

忆旧游 前题分得论字

正落花时节 ,憔悴东风 ,绿满愁痕。悄客
梦惊呼伴侣 ,断鸿有约 ,回泊归云。江空共道
惆怅 ,夜雨隔篷闻。尽世外纵横 ,人间恩怨 ,细
酌重论。

叹他乡异县 ,渺旧雨新知 ,历落情真。匆
匆那忍别 ,料当君思我 ,我亦思君。人生自非
麋鹿 ,无计久同群。此去重销魂 ,黄昏细雨人
闭门。

刘金坛

浣溪沙

标致清高不染尘。星冠云髻紫霞裙。门
掩斜阳无一事，抚瑶琴。

虚馆幽花偏惹恨，小窗闲月最消魂。此际
得教还俗去，谢天尊。

刘 涇

减字木兰花

凭谁妙笔。横扫素缣三百尺。天下应无。
此是钱塘湖上图。

一般奇绝。云淡天高秋夜月。费尽丹青。
只这些儿画不成。

夏初临 夏景

泛水新荷，舞风轻燕，园林夏日初长。
庭树阴浓，雏莺学弄新簧。小桥飞入横塘。
跨青苹、绿藻幽香。朱阑斜倚，霜纨未摇，
衣袂先凉。

歌欢稀遇，怨别多同，路遥水远，烟淡
梅横。轻衫短帽，相携洞府流觞。况有红妆。
醉归来、宝蜡成行。拂牙床。纱厨半开，月
在回廊。

刘景翔

念奴娇 瑞香

甚情幻化 ,似流酥围暖 ,酣春娇寐。不数
锦篝烘古篆 ,沁入屏山沈水。笑吐丁香 ,紫绡
衬粉 ,房列还同蒂。翠球移影 ,媚人清晓风细。

依约玉骨盈盈 ,小春暖逗 ,开到灯宵际。
疑是九华仙梦冷 ,误落人间游戏。比雪情多 ,
评梅香浅。三白还堪瑞。尘缘洗尽 ,醒来还又
葱翠。

小重山 枕屏风

山翠晴岚曲曲偎。红香浮玉醉窝颓。不
烦人筑避风台。潇湘路 ,随意自徘徊。春倦怕
频催。琵琶私语近、问谁来。春风那隔锦云
堆。梦中蝶 ,飞去又飞来。

玉楼春 落花

可怜又误江南景。雨膩风喧愁入暝。依
稀碧玉水边魂 ,憔悴绿珠楼外影。

全宋词 刘景翔

点点随人飞远近。薄幸相逢情怎忍。年年三月化香尘，天上人间看梦醒。

如梦令

独立荷汀烟渚。一霎锦云香雨。似为我无情，惊起鸳鸯飞去。飞去。飞去。却在绿杨深处。

刘 菊 房

暮山溪

醉魂离梦，捻合难成片。恶味怕黄昏，
更西风，梧桐深院。蝉松翠妩，记那日相逢，
情缱绻，语玲珑，人静凌波见。

香云曾约，念阻题红怨。应是绿窗寒，
也思郎、云衣谁换。郎今销黯，步楚竹江空，
云缥缈，水淼茫，不抵相思半。

刘均国

梅花引

千里月，千山雪。梅花正落寒时节。一枝昂。一枝藏。清香冷艳、天赋与孤光。孤光似被珠帘隔。风度烟遮好颜色。粉垂垂。玉累累。先春挺秀，不管百花知。

似霜结。与霜别。莫使幽人容易折。矮墙边。矮窗前。横斜峭影，重叠斗婵娟。黄昏惯听楼头角。只恐听时零乱落。醉来看。醒来看。萦绊丽人，潇洒倚阑干。

刘濬

期夜月

金钩花绶系双月。腰肢软低折。揜皓腕，
萦绣结。轻盈宛转，妙若凤鸾飞越。无别。
香檀急扣转清切。翻纤手飘瞥。催画鼓，追
脆管，锵洋雅奏，尚与众音为节。

当时妙选舞袖。慧性雅资，名为殊绝。
满座倾心注目，不甚窥回雪。纤怯。逡巡一
曲霓裳彻。汗透鲛绡肌润，教人传香粉，媚
容秀发。宛降蕊珠宫阙。

刘 克 逊

水调歌头

同黄主簿登清风峡刘魁读书岩赋水调歌头调

解变西昆体，一赋冠群英。清风峡畔，至今堂已读书名。富贵轻于尘土，孝义高于山岳，惜不大其成。陵谷纵迁改，草木亦光荣。

与仇香，穿阮屐，试同登。石龕虽窄，可容一几短檠灯。千仞苍崖如削，四面翠屏不断，云雾镇长生。最爱岩前水，犹作诵弦声。

刘克庄

哨 遍

昔坡翁以盘谷序配归去来词。然陶词既櫟括入律，韩序则未也。暇日，游方氏龙山别墅，试效顰为之，俾主人刻之崖石云

胜处可宫，平处可田，泉土尤甘美。深复深，路绝住人稀。有人兮、盘旋于此。送子归。是他隐居求志。是要明主媒当世。嗟此意谁论，其言甚壮，孔颜犹有遗旨。大丈夫之被遇于时。入则坐庙朝出旗麾。列屋名姬，夹道武夫，满前才子。噫。有命存焉，吾非恶此而逃之。富贵人所欲，如之何、幸而致。向茂树堪休，清泉可濯，谷中别有闲天地。况脍细于丝，蕨甜似蜜，采于山，钓于水。大丈夫不遇之所为。唐处士、依稀是吾师。觉山林、尊如朝市。五侯门下宾客，扰扰趋形势。嗟盘之乐，谁争子所，占断千秋万岁。呼童秣马更膏车，便与君，从此逝矣。

六州歌头 客赠牡丹

维摩病起，兀坐等枯株。清晨里，谁来

问，是文殊。遣名姝。夺尽群花色，浴才出，醒初解，千万态，娇无力，困相扶。绝代佳人，不入金张室，却访吾庐。对茶铛禅榻，笑杀此翁臞。珠髻金壶。始消渠。

忆承平日，繁华事，修成谱，写成图。奇绝甚，欧公记，蔡公书。古来无。一自京华隔，问姚魏、竟何如。多应是，彩云散，劫灰余。野鹿衔将花去，休回首、河洛丘墟。漫伤春吊古，梦绕汉唐都。歌罢欷歔。

水调歌头 游蒲涧追和崔菊坡韵

余顷为仪真督邮，白事维扬，崔公锐欲罗致。属先受制置使李公之辟，崔公始聘洪公舜俞入幕。后二十五年，奉使岭外，拜公祠象，俯仰今昔，辄和公所作水调歌头以寓悲慨云。

敕使竟空反，公不出梅关。当年玉座记忆，仄席问平安。羽扇尉佗城上，野服仙游阁下，辽鹤几时还。赖有蜀耆旧，健笔与书丹。

青油士，珠履客，各凋残。四方蹙蹙靡骋，独此尚宽闲。丞相祠堂何处，太傅石碑堕泪，木老瀑泉寒。往者不可作，置酒且登山。

又 喜归

遣作岭头使，似戍玉门关。来时送者，举酒珍重祝身安。街畔小儿拍笑，马上是翁矍铄，头与璧俱还。何处得仙诀，发白颊犹丹。

屋茅破，篱菊瘦，架签残。老夫自计甚

审，忙定不如闲。客难扬雄拓落，友笑王良来往，面汗背芒寒。再拜谢不敏，早晚乞还山。

又 解印有期戏作

老子颇更事，打透利名关。百年扰扰于役，何异入槐安。梦里偶然得意，醒后才堪发笑，蚁穴驾车还。恰佩南柯印，仿佛穀曾丹。

客未散，日初昝，酒犹残。向来幻境安在，回首总成闲。莫问浮云起灭，且跨刚风游戏，露冷玉箫寒。寄语抱朴子，候我石楼山。

又 八月上浣解印别同官席上赋

半世惯歧路，不怕唱阳关。朝来印绶解去，今夕枕初安。莫是散场优孟，又似下棚傀儡，脱了戏衫还。老去事多忘，公莫笑师丹。

笔端花，胸中锦，两消残。江湖水草空旷，何必养天闲。久苦诸君共事，更尽一杯别酒，风露夜深寒。回首行乐地，明日隔云山。

又 客散循堤步月而作

落日几呼渡，佳夕每留关。有时来照清浅，鬢雪似潘安。一曲亲蒙君赐，两岸更无人迹，惟见鹭飞还。隙地欠栽接，蕉荔杂黄丹。

柳全疏，松尚幼，怕摧残。旁人笑我痴计，管钥费防闲。翁意在乎林壑，客亦知夫

水月，满腹贮清寒。赋咏差有愧，赤壁与滁山。

又 次夕，觞客湖上，赋葛仙事

羯虜问周鼎，柱史出秦关。苦求句漏，何意身世远差安。不见跼鸢堕水，时有飞鸿遵渚，乐此久忘还。采药寓言耳，胸次有灵丹。

钓游处，榕叶暗，荻花残。自翁仙后千载，输与水鸥闲。我读内篇未竟，忽被急符驱去，洞闭白云寒。回首愧幽子，隐约海中山。

又 十三夜，同官载酒相别，不见月作

怪事广寒殿，此夕不开关。林间乌鹊相贺，暂得一枝安。只在浮云深处，谁驾长风挟取，明镜忽飞还。玉兔呼不应，难觅臼中丹。

酒行深，歌听彻，笛吹残。嫦娥老去孤另，离别匹如闲。待得银盘擎出，只怕玉峰醉倒，衰病不禁寒。卿去我欲睡，孤负此湖山。

又 癸卯中秋作

老年有奇事，天放两中秋。使君飞榭千尺，缥缈见麟洲。景物东徐城上，岁月北征诗里，圆缺几时休。俯仰慨今昔，惟酒可浇愁。

风露高，河汉澹，素光流。贾胡野老相庆，四海十分收。竞看姮娥金镜，争信仙人玉斧，费了一番修。衰晚笔无力，谁伴赋黄

楼。

又 和仓部弟寿词

岁晚太玄草，深悔赋长杨。向来户外之屨，已饱各飞扬。阁上青藜安在，院里金莲去矣，且爱短檠光。衰懒倦宾客，谁访老任棠。

叹时人，怜黠小，笑鲐黄。汝曹变灭臭腐，侬底愈芬香。苦羨阿龙则甚，学取幼安亦可，坐穴几藜床。零落雁行小，敢不举君觞。

沁园春 梦孚若

何处相逢，登宝钗楼，访铜雀台。唤厨人斫就，东溟鲸脍，圉人呈罢，西极龙媒。天下英雄，使君与操，余子谁堪共酒杯。车千两，载燕南赵北，剑客奇才。饮酣画鼓如雷。谁信被晨鸡轻唤回。叹年光过尽，功名未立，书生老去，机会方来。使李将军，遇高皇帝，万户侯何足道哉。披衣起，但凄凉感旧，慷慨生哀。

又 送孙季蕃吊方漕西归

岁暮天寒，一剑飘然，幅巾布裘。尽缘云鸟道，跻攀绝顶，拍天鲸浸，笑傲中流。畴昔奇君，紫髯铁面，生子当如孙仲谋。争知道，向中年犹未，建节封侯。南来万里何求。因感慨桥公成远游。叹名姬骏马，都成昨梦，只鸡斗酒，谁吊新丘。天地无情，功名有命，千古英雄只么休。平生客，独羊昙

一个，洒泪西州。

又 送包尉

我羨君归，一路秋风，芙蓉木犀。想慈颜望久，灵乌乍噪，新眉画就，郎马频嘶。忙脱征衫，快呼斗酒，细为家人说建溪。争知道，这中年怀抱，最怕分携。丈夫南北东西。应笑杀离筵粉泪啼。怅佳人来未，碧云冉冉，王孙去后，芳草萋萋。明日相思，山重水复，古道人稀茅店鸡。元龙老，有高楼百尺，谁共登梯。

又 答九华叶贤良

一卷阴符，二石硬弓，百斤宝刀。更玉花骢喷，鸣鞭电抹，乌丝阑展，醉墨龙跳。牛角书生，虬髯豪客，谈笑皆堪折简招。依稀记，曾请纓系粤，草檄征辽。当年目视云霄。谁信道凄凉今折腰。怅燕然未勒，南归草草，长安不见，北望迢迢。老去胸中，有些磊块，歌罢犹须著酒浇。休休也，但帽边鬓改，镜里颜凋。

又 同前

我梦见君，戴飞霞冠，著宫锦袍。与牧之高会，齐山诗酒，谪仙同载，采石风涛。万卷星罗，千篇电扫，肯学穷儿事楚骚。掀髯啸，有鱼龙鼓舞，狐兔悲号。英雄埋没蓬蒿。谁摸索当年刘与曹。叹事机易失，功名难偶，诛茅西崦，种秫东皋。栅有鸡豚，庭无羔雁，道是先生索价高。人间窄，待相期海上，共摘蟠桃。

又

癸卯佛生翼日，将晓，梦中有作。既醒，但易数字

有个头陀，形等枯株，心犹死灰。幸春山笋贱，无人争吃，夜炉芋美，与客同煨。何处幡花，忽相导引，莫是天宫迎赴斋。又疑道，向毗耶城里，讲席初开。这边尚自徘徊。笑那里纷纷早见猜。有尊神奋杵，拳粗似钵，名缙竖拂，喝猛如雷。老子无能，山僧不会，谁误檀那举请哉。山中去，便百千亿劫，休下山来。

又 和吴尚书叔永

我所思兮，延陵季子，别来九春。笑是非浮论，白衣苍狗，文章定价，秋月华星。独步岷峨，后身坡颖，何必荀家有二仁。中朝里，看叔兮袞斧，伯也丝纶。洛中曾识机云。记玉立堂堂九尺身。叹苕溪渔艇，幽人孤往，雁山马鬣，吊客谁经。宣室厘残，玄都花谢，回首旧游存几人。新腔美，堪洗空恩怨，唤起交情。

又 吴叔永尚书和余旧作，再答

莫羨渠侬，白玉成楼，黄金筑台。也不消颠怪，骑麟被发，谁能委曲，令鸩为媒。鬓有二毛，袖闲双手，只了持螯与把杯。公过矣，赏陈登豪气，杜牧粗才。便烦问讯张雷。甚斗宿无光剑不回。想阁中鸣佩，时携客去，壁间悬榻，近有谁来。撤我虎皮，让君牛耳，谁道两贤相厄哉。中年后，向歌阑

易感，乐极生哀。

又 维扬作

辽鹤重来，不见繁华，只见凋残。甚都无人诵，何郎诗句，也无人报，书记平安。闾里俱非，江山略是，纵有高楼莫倚栏。沈吟处，但萤飞草际，雁起芦间。不辞露宿风餐。怕万里归来双鬓斑。算这边赢得，黑貂裘敝，那边输了，翡翠衾寒。檄草流传，吟笺倚阁，开到琼花亦懒看。君记取，向中州差乐，塞地无欢。

又 答陈上舍应祥

华发萧萧，归碧鸡坊，出金马门。把一枝色笔，掷还郭璞，些儿残锦，回乞天孙。永免朝参，更无宣锁，送老三家水竹村。休休也，任巫阳来下，未易招魂。茅檐安得庖厨。倩便了沽来酒满樽。叹角巾东路，吾寻初服，上书北阙，子漫危言。漏院霜靴，火城雪鬣，得似先生败絮温。安危事，付布衣融泰，鼎足膺蕃。

又

平章生日丁卯

某兹者恭审某官，笃生名世，光辅新朝。昴储精、岳降神，方启中兴之运；河如带、山若砺，未酬再造之功。某逾望三台，敬熏一瓣。短衣饭牛而至旦，业已归耕；搢笏笼鸽以放生，未由旅贺。

载籍以来，于宇宙间，有功者谁。自唐尧咨禹，水行由地，宗周微管，夏变为夷。谢傅棋边，莱公骰畔，淝水澶渊送捷旗。天不偶，生堂堂国老，真太平基。雅怀厌倦台

司。新天子殷勤留帝师。向朝堂袞绣，万羊非泰，湖山绦褐，两鹤相随。寿过磻溪，德如淇澳，进了丹书作抑诗。蒯缙客，愿年年岁岁，来献新词。

又 二鹿

驯于蹇驴，清于赐驹，我行尔从。幸柴车堪驾，何惭韩众，药苗可采，长伴庞公。野涧泉甘，阳坡草暖，有柏叶松枝充短供。休梦想，去游灵囿沼，入望夷宫。与夸夺子争雄。生与死未知谁手中。况噉齧者众，放麀人少，大将触网，小亦伤弓。风月和柔，山林深密，折角何如且养茸。二虫喜，各衔花拜跪，来寿樗翁。

又

剥啄谁欵，户外一宾，布衣麻鞋。有舌端雄辨，机锋破的，袖中行卷，锦绣成堆。阖启上宾，依观诸老，个主人公喜挽推。怎奈向，今十分衰飒，非昔形骸。阖言宾怒如雷。因底事朱门晏未开。假使汝主公，做他将相，懒迎揖客，紧闭翘材。病叟惭惶，尊官宁耐，待铁拐先生旋出来。宾性急，怀生毛名纸，兴尽而回。

又 寄竹溪

老子衰颓，晚与亲朋，约法三章。有谈除目者，勒回车马，谈时事者，麾出门墙。已挂衣冠，怕言轩冕，犯令先当举罚觞。书尺里，但平安二字，多少深长。溪翁苦未相忘。我今有双鱼烦寄将。道荒芜羞对，宫中

莲烛，昏花难映，阁上藜光。闻庙瑟音，识关雎乱，诗学专门尽不妨。百年后，尚庶几申白，不数韦康。

又 梦中作梅词

天造梅花，有许孤高，有许芬芳。似湘娥凝望，敛君山黛，明妃远嫁，作汉宫妆。冷艳谁知，素标难褻，又似夷齐饿首阳。幽雅意，纵写之缣楮，未得毫芒。曾经诸老平章。只一个孤山说影香。便诏书存问，漫招处士，节旄落尽，早屈中郎。日暮天寒，山空月堕，茅舍清于白玉堂。宁淡杀，不敢凭羌笛，告诉凄凉。

又 和林卿韵

畴昔遭逢，薰殿之琴，清庙之璋。谢锦袍打扮，佯狂太白，黄冠结裹，老大知章。种杏仙人，看桃君子，得似篱边嗅晚香。从人笑，笑安车迎晚，只履归忙。后身定作班扬。彼撼树蚍蜉不自量。偶有时戏笔，官奴藏去，有时醉坠，宗武扶将。永别鸛鸾，已盟猿鹤，肯学周顛出草堂。从人笑，我韩公齿豁，张镐眉苍。

又 再和

惭愧清朝，罢贡包茅，住发牙璋。便羊裘归去，难留严子，牛衣病卧，肯泣王章。畴昔忧天，如今怀土，田舍鸡肥社酒香。甘雨足，且免扶锄苦，免踏车忙。先生少拟荀扬。晚自觉才衰可斗量。甚都无白凤，飞来玄草，亦无紫气，下烛干将。待得新亭，倒

持手版，何似抽还政事堂。荣与辱，算到头由我，不属苍苍。

又 三和

吉梦维何，男子之祥，载弄之璋。嗟我辰安在，斯文后死，力侔元气，手抉天章。学稼田荒，炼丹灶坏，稽首南华一瓣香。休休也，免王良友笑，屑往来忙。浮名斗挹箕扬。世岂有明珠百斛量。叹种来瑶草，年深未熟，挑成锦字，道远难将。迂转不行，形容尽变，盍改称呼号瞎堂遗弓远，怆帝乡云白，禹会山苍。

又 四和

余少之时，赋如仲宣，檄如孔璋。也曾观万舞，铺陈商颂，曾闻九奏，制作尧章。抖擞空囊，存留谏笏，犹带虚皇案畔香。今归矣，省听鸡骑马，趁早朝忙。榻前密启明扬。宰物者方持玉尺量。元未尝弃汝，白云耄及，无宁寿我，或者天将富有图书，贫无钗泽，不似安昌列后堂。新腔好，任伊川看见，非褻穹苍。

又 五和。韵狭不可复和，偶读孔明传，戏成

昔卧龙公，北走曹瞒，西克刘璋。看沙头八阵，百神呵护，渭滨一表，三代文章。绝笑渠侬，平生奸伪，死未忘情履与香。筹笔处，遣子丹引去，仲达奔忙。纷纷跋扈飞扬。这老子高深未易量。但纶巾指授，关河震动，灵旗征讨，夷汉宾将

到得市朝，变为陵谷，千载烝尝丞相堂。

锦城外，有啜鹂音好，古柏皮苍。

又 六和

少工艺文，朱丝练弦，黄流在璋值虞廷
夏击，箫韶之乐，周王寿考，追琢其章。汾
水雁飞，鼎湖龙远，魂返今无异域香。浮生
短，更两轮屋角，来去荒忙。

人言八十鹰扬。笑千岁如何尺捶量。但
负图龟马，藏之为宝，舐丹鸡犬，去不能将。
友鲁申公，师浮丘伯，尚可教书村学堂。投
老泪，瞻越山紫翠，陵树青苍。

又 七和

安得奇材，颈系单于，首提子璋。便做
些功业，胜穷措大，聚萤武子，吞凤君章笑
杀竖儒，错翻故纸，屈马何曾有艳香。榆塞
外，恰枣红时候，想羽书忙。

腰钱骑鹤维扬。分表事谁能预测量。叹
防身一剑，壮图濩落，建侯万里，老境相将。
读枕函书，宝家藏笏，免使他人笑弗堂。吾
衰矣，虽尚存右臂，不解擎苍。

又

八和。景定壬戌，经筵读唐鉴彻章，余忝劝诵，
蒙恩赐赉内墨二笏。后四年发篋见之，有感。

帝赐玄圭，臣妾潘衡，奴隶侯璋。因封
还除目，见瞋鬼质，窜涂贄卷，取怨奇章。
肯比寒儒，自夸秘宝，十袭庭邾寸许香。下
岩石，要朝朝磨试，不论闲忙。何须狗监揄
扬。这衡尺曾经圣手量。纵埋之地下，居然
光怪，栖之梁上，亦恐偷将。蓬户无人，花

村有犬，添几重茅覆野堂。交游少，约文房四友，泛浩摩苍。

又 九和

历事三朝，覲而执圭，祭而裸璋。更宫莲引入，视淮南草，御屏录了，露会稽章。贪膜外荣，遗身后臭，晬也平生漫传香。颜发改，独丹基无恙，事在休忙。曹丘生莫游扬。这瞎汉还曾自配量。已化为胡蝶，穿花栩栩，懒陪鹓鹭，佩玉锵锵。机蹉面前，钟闻饭后，我上堂时众下堂。从前错，欲区区手援，天下黔苍。

又 十和。林卿得女

莫信人言，虺不如熊，瓦不如璋。为孟坚补史，班昭才学，中郎传业，蔡琰词章。尽洗铅华，亦无瓔珞，犹带栴檀国里香。笑贫女，尚寒机轧轧，催嫁衣忙。好速不数潘杨。占梦者曾言大秤量。待银河浪静，金针穿了，蓝桥路近，玉杵携将。倩似凝之，娘如道韞，帘卷燕飞王谢堂。恁时节，看孙皆朱紫，翁未皤苍。

汉宫春 秘书弟家赏红梅

青女初晴，向丑梢枯干，幻出妍姿。休烦苑吏剪彩，别有神司。东皇太乙，敕瑶姬、淡傅胭脂。还似得、华清汤暖，薄绡半卸冰肌。

应笑楚宫痴绝，略施朱则个，便妒蛾眉。唐人更无籍在，浪比红儿。祥云难聚，且丁

宁、铁笛轻吹。拚醉倒，花间一霎，莫教绛雪离披。

又 再和前韵

多谢句芒，露十分春信，一种仙姿。主人领客卜夜，也唤分司。天葩国艳，几曾烦、薄粉浓脂。微似有，酒潮玉颊，更无粟起香肌。

犹记老婆年少，爱斜簪宝髻，浅印红眉。回头笑他桃杏，太赤些儿。而今零落，更禁当、多少风吹。君看取，梢头点滴，绝胜树下纷披。

又 三和

酷爱名花，本不贪妖艳，惟赏幽姿。乌台旧案累汝，牵惹随司。冰层雪积，独伊家、点绛凝脂。应冷笑，海棠醉睡，牡丹未免丰肌。

舞殿歌台此际，各新涂妆额，别画宫眉。那知有人淡泊，不识虫儿。春莺去也，玉参差、分付谁吹。空传得，暗香疏影，琐窗卷了还披。

又 四和

墙角残红，恍徐娘虽老，尚有丰姿。纷纶绛节导从，不要街司。随波万点，似阿房、漂出残脂。休懊恼，丹铅褪尽，本来冰雪为肌。

老子平生心铁，被色香牵动，愁上双眉。且祝东风小缓，沥酒芒儿。道伊解冻，甚潘郎、鬓雪难吹。犹忆侍，钧天广宴，万红舞

袖披披。

又 呈张别驾

京辇相逢，忆茂陵临御，俱诣天官。绛纱玉斧咫尺，先引头班。桃花满观，与贞元、朝士同看。归骑晚，春城笳吹，冶游侵晓方还。

回首龙髯何在，漫共谈前事，泪洒桥山。谁怜白头柱史，独出函关。君如春柳，到而今、也带苍颜。凭寄语，江州司马，琵琶且止休弹。

又 癸亥生日

老子今年，忽七旬加七，饱阅炎凉。夜窗犹坐书案，点勘偏旁。浮荣膜外，这些儿、感谢苍苍。试看取，名园甲第，主人几个还乡。

淇澳磻溪二叟，向王朝抑抑，牧野洋洋。申公被蒲轮算，来议明堂。平章前哲，驾青牛、去底差强。自欒括，山歌送酒，不消假手长房。

又 吴侍郎生日

此老先生，尚不留东阁，肯博西凉。我侬争敢，来近思旷之旁。朱颜未改，绝胜如、蔡义张苍。元自有，安丹灶地，何须求白云乡。

欲缀小词称寿，□譬如河伯，观海眈洋。遥知垂弧甲第，置酒华堂。且吟梁甫，谁管他、冶子田强。试问取，壶翁仙诀，几时传与君房。

又 丞相生日乙丑

吉语西来，已袞归行阙，册拜头厅。唐家岂可，一日轻去玄龄。洛英蜀客，老成人、几半朝廷。但管取，三边无警，活他百万生灵。

槐第安排敕设，有藕如船大，有枣如瓶。瑶环瑜珥绕席，个个宁馨。一般奇特，中台星、拜老人星。谁知得，眉攒万国，华筵少醉多醒。

又 陈尚书生日

公似寒梅，向层冰积雪，越样清奇。仙溪前辈相望，可比方谁。百篇剴切，似君谟、又似当时。更正简，相君颡面，崇清老子庞眉。

未可卷怀袖手，续平泉庄记，绿野堂诗。苦言譬如食榄，回味方思。嗣皇访落，怪鹤书、直恁来迟。烦借问，二童一马，几时入尉瞻仪。

又 题钟肇长短句

谢病归来，便文殊相问，懒下禅床。雀罗晨有剥啄，颠倒衣裳。袖中贽卷，原夫辈、安敢争强。若不是，子期苗裔，也应通谱元常。

村叟鸡鸣籁动，更休烦箫管，自协宫商。酒边唤回柳七，压倒秦郎。一觴一咏，老尚书、闲杀何妨。烦问讯，雪洲健否，别来莫有新腔。

念奴娇 木犀

绕篱寻菊，菊犹迟、舍北芙蓉浑未。却是小山丛桂里，一夜天香飘坠。约束奴兵，丁宁稚子，莫扫青苔砌。风高露冷，倚栏疑匪人世。

客有载酒过余，朗吟招隐，洗尽悲秋意。白发长官穷似虱，刚被天公调戏。遍地堆金，满空雨粟，不济渊明事。残英剩馥，明朝犹可同醉。

又 菊

老夫白首，尚儿嬉、废圃一番料理。餐饮落英并坠露，重把离骚拈起。野艳幽香，深黄浅白，占断西风里。飞来双蝶，绕丛欲去还止。

尝试诮次群芳，梅花差可，伯仲之间耳。佛说诸天金色界，未必庄严如此。尚友灵均，定交元亮，结好天随子。篱边坡下，一杯聊泛霜蕊。

又 壬寅生日

比如去岁前年，今朝差觉门庭静。玉轴锦标无一首，知道先生远佞。假使文殊，携诸菩萨，来问维摩病。无花堪散，亦无香积斋衬。

回首雪浪惊心，黄茅过顶，瘴毒如炊甑。山鬼海神俱长者，饶得书生穷命。不慕飞仙，不贪成佛，不要钻天令。年年今日，白头母子家庆。

又 寿方德润

卯君来处，与眉州仙子，依稀同日。一自前朝龚蔡后，颇觉壶山岑寂。谁料端平，继居遗补，复有斯人出。幅巾林下，姓名玉座长忆。

须信谄语尤甘，忠言最苦，橄欖何如蜜。诸老萧疏星欲晓，留取南都铁壁。洛社自佳，镜湖虽好，莫问君王乞。年年岁岁，大家同做真率。

又 丙午郑少师生日

禁中张宴，苦留公、未许归寻初服。千载君臣鱼有水，不比严光文叔。火德中天，客星一夕，草草聊同宿。重来凝碧，依然赓载相属。

过眼夸夺纷纷，浮云野马，几度棋翻局。客话凤池三入事，洗耳湖光一曲。伯始泉荒，稚圭圃冷，占断西风菊。年年岁岁，金英常泛芳醪。

又 居厚弟生日

素馨茉莉，向炎天、别有一般标致。淡妆绰约堪□□，导引海山大士。从者谁欤，青藜阁下，汉卯金之子。云阶月地，夜深凉意如水。

客又疑这仙翁，唐玄都观里，咏桃花底。且赌樽前身见在，休管汉唐时事。坡颖归迟，机云发早，得似侬兄弟。屨来户外，但言二叟犹醉。

又

七月望夕观月，昔方孚若每以是夕泛湖觴客，云修坡公故事

天风浩动，扫残暑、推上一轮圆魄。爱举眉山公旧话，与客泛舟赤壁。一自奎星，去朝帝所，叹洞箫声息。空余二赋，至今凄动金石。

长记诗境平生，诗豪酒圣，亦自仙中谪。畴昔停桡追欢处，忍听邻人吹笛。董相林荒，贺公湖在，俯仰成陈迹。两翁已矣，年年孤负今夕。

又

少时独步词场，引弦百发无虚矢。岁晚却蒙昆体力，世业工修鞋底。曾裂白麻，曾涂墨敕，谪堕俄徵起。鼎湖龙去，老臣何以堪此。

回首当日遭逢，譬如春梦，误入华胥里。推枕黄梁犹未熟，封拜几王侯矣。似瓮中蛇，似蕉中鹿，又似槐中蚁。先人书在，尚堪追补遗史。

又 和诚斋休致韵

此翁双手，顿闲处、且把香篝笼袖。西掖北门辞不要，肯要南柯太守。小小亭台，些些竹木，何必灵和柳。地行仙里，合推依做班首。

取次著绝交书，续归田录，谁掣先生肘。莫遣朝衣梅醜了，留祝南山之寿。苍妓上厅，老僧封院，得似樗庵叟。虚名身后，生前且

一杯酒。

又 再和

梦中忘却，已闲退、谏草犹藏怀袖。文不会、铺张粉饰，武又安能战守。秃似葫芦，辣于姜桂，衰飒同蒲柳。没安顿处，不如归去丘首。

岁晚筋力都非，任空花眩眼，枯杨生肘。客举前修三数个，待与刘君为寿。或号憨郎或称钝汉或自呼聾叟一篇齐物，读时咽以卮酒。

又 三和

戏衫抛了，下棚去、谁笑郭郎长袖。小小草庵无宝贝，何必神呵鬼守。黄奶篝灯，青奴拂榻，莫要他桃柳客来问字，此翁高卧摇首。

仿佛曾子当年，商歌满屋，衣不完衿肘。混沌若教休凿窍，巧历安知其寿。文叔故人，仲华几个，输与羊裘叟。浮生如寄，切身之物惟酒。

又 丙寅生日

老逢初度，小儿女、盘问翁翁年纪。屈指先贤，仿佛似，当日申公归邸。跛子形骸，瞎堂顶相，更折当门齿。麒麟阁上，定无人物如此。

追忆太白知章，自骑鲸去后，酒徒无几。恶客相寻，道先生、清晓中醒慵起。不袖青蛇，不骑黄鹤，混迹红尘里。彭聃安在，吾师淇澳君子。

又 二和

并游英俊，从头数、富贵消磨谁纪。道眼看来，叹人生如寄，家如旅邸。教婢羹藜，课奴种韭，聊诳残牙齿。草堂绵蕝，百年栖托于此。

岁晚笔秃无花，探怀中残锦，剪裁余几。腰脚顽麻，赐他灵寿杖，也难扶起。离绝交游，变更名姓，日暮空山里。老儋复出，不知谁氏之子。

又 三和

四朝遗老，须眉白、巧历不知其纪。真唤九重为座主，肯谒侯门王邸。晚会耆英，未论爵德，乡曲无如齿。酒酣度曲，妙音久不闻此。

堪叹化鹤重来，但累累华表，旧人存几。散尽黄金，留篋中团扇，怕秋风起。结绮歌阑，披香宴悄，放出深宫里。颠毛虽秃，尚堪封管城子。

又 四和

太丘晚节，把家事、一切传他谏记。业已休休，又谁解露绶，会稽郡邸。张丈殷兄，阮生朱老，相与为唇齿。酒楼犹记，谪仙尝醉于此。

一二耆旧贻书，新来强健否，问年今几。谢傅当时，却因个甚，抛了东山起。对局含颦闻箏堕泪，围在愁城里。吾评晋士，不如归去来子

又 五和

隆乾间事，两翁有、手泽遗编曾纪。余掌兰台修纂到，景定初开忠邸。坏起复麻，奋涂归笔，嚼碎张巡齿。德音犹在，非卿何足语此。

老来兹事都休，问门前宾客，今朝来几。达汝空函，投伊大瓮内，谁曾提起。丹汞灰飞，黄梁炊熟，跳出槐宫里。儿童不识，秃翁定是谁子。

又 六和

轮云世故，千万态、过眼谁能殚纪。只履携归消许急，日暮行人问邸。麝以脐灾，獬为尾累，焚象都因齿。后之览者，亦将有感于此。

检点洛下同盟，萧疏甚，白发戴花人几。一觉齁齁，笑仆家越石，闻鸡而起。颜发俱非，头皮犹在，胜捉来官里。俗间俚耳，未曾闻这腔子。

又

自填曲子，自歌之、岂是行家官样。眼瞎背驼方引去，羞杀陈抟种放。折起残编，寄声太乙，不必烦藜杖。陈人束阁，让他来者居上。

安乐值几多钱，且幅巾绦褐，准云台象。长扇矮壶山南北，忘却晓随天仗。六逸七贤，五更三老，元不论资望。香山误矣，渔翁何减为相。

又 丁卯生朝

小孙盘问翁翁，今朝怎不陈弧矢。翁道暮年惟只眼，不比六根全底。常日谈玄，余龄守黑，赤霄从何起。鬓须雪白，可堪委顿如此。

心知病有根苗，短檠吹了，世界朦胧里。纵有金篦能去翳，不敢复囊萤矣。但愿从今，疾行如鹿，更细书如蚁。都无用处，留他教传麟史。

解连环 戊午生日

旁人嘲我。甚鬓毛都秃，齿牙频堕。不记是、何代何年，尽元祐熙宁，侬常暗么。退下驴儿，今老矣、岂堪推磨。要挂冠神武，几番说了，这回真个。

亲朋纷纷来贺。况弟兄对榻，儿女团坐。愿世世、相守茅檐，便宰相时来，二郎休作佐。白苧乌巾，谁信道、神仙曾过。拣人间、有松风处，曲肱高卧。

又 甲子生日

揆余初度。笑汝曹绯绿，乃翁苍素。一甲子、带水拖泥，今岁谢君恩，放还山去。政事堂中，把手版、分明抽付。向门前客道，老子出游，人不知处。

小车万花引路。又谁能记得，观里千树。老冉冉、欢意阑珊，纵桃叶多情，难唤同渡。买只船儿，稳载取、笔床茶具。便芸瓜、一生一世，胜侯千户。

又

悬弧之旦。忆争骑竹马，各怀金弹。恨岁月、去我堂堂，向酒畔愁生，镜中颜换。灶坏丹飞，慢追悔、邺侯婚宦。已发心忏悔，免去猴冠，卸下麟楦。

依稀仆家铁汉。虽未梢老寿，初节磨难。幸闻早、省了柳枝，更送了朝云，尘念俱断。丈室萧然，独病与、乐天相伴。但归依西方，拈起向来一瓣。

又 乙丑生日

左弧悬了。把柴门闷定，悄无人到。惭愧得、一二亲朋，□□□□□，温存枯槁。玉轴银钩，撻掇我、比磻溪老。乏琼琚可报，惟有声声，司马称好。

卷收猿鞮锦袄。且行拾遗穗，醉藉芳草。做一个、物外闲人，省山重担擎，天大烦恼。昔似龙鸾，今踏飒、不惊鱼鸟。愿从兹、享回仙寿，准汾阳考。

木兰花慢 寿王实之

瀛洲真学士，为底事、在红尘。为语触宫闱，沈香亭里，瞋谪仙人。为亲近君侧者，见万言策子惹刘蕡。为是尚方请剑，汉廷多惮朱云。

君言往事勿重陈。且斗酒边身。也不会区区，算他甲子，记甚庚寅。尔曹譬如朝菌，又安知、老柏与灵椿。世上荣华难保，古来名节如新。

又 癸卯生日

病翁将耳顺，牙齿落、鬢毛疏。也惭愧君恩，放还田舍，免诣公车。儿时某丘某水，到如今、老矣可樵渔。宝马华轩无分，蹇驴破帽如初。

浮名箕斗竟成虚。磨折总因渠。帝锡余别号，江湖聱叟，山泽仙臞。樽前未宜感慨，事犹须、看岁晏何如。卫武耄年作戒，伏生九十传书。

又 送郑伯昌

古人吾不见，君莫是、郑当时。更筑就山房，躬耕谷口，名动京师。诸公任他衮衮，与杜陵野老共襟期。有客至门先喜，得钱沽酒何疑。

昔年连辔柳边归。陈迹恍难追。况种桃道士，看花君子，回首皆非。相逢故人问讯，道刘郎、老去久无诗。把作一场春梦，觉来莫要寻思。

又 丁未中秋

水亭凝望久，期不至、拟还差。隔翠幌银屏，新眉初画，半面犹遮。须臾淡烟薄霭，被西风扫尽不留些。失了白衣苍狗，夺回雪兔金蟆。

乘云径到玉皇家。人世鼓三挝。试自判此生，更看几度，小住为佳。何须如钩似玦，便相将、只有半菱花。莫遣素娥知道，和他发也苍华。

又 渔父词

海滨蓑笠叟，驼背曲、鹤形臞。定不是凡人，古来贤哲，多隐于渔。任公子、龙伯氏，思量来岛大上钓鱼。又说巨鳌吞饵，牵翻员峤方壶。

磻溪老子雪眉须。肘后有丹书。被西伯载归，营丘茅土，牧野檀车。世间久无是事，问苔矶、痴坐待谁欤。只怕先生渴睡，钓竿拂著珊瑚。

又 赵叟生日

郡人元未识，新太守、定何如。待说向诸贤，西桥人物，个个清臞。相将下车许久，但凝香之乐一些无。残漏几筹视事，浓油一盏观书。

旁人徒见两轮朱。玉色未尝腴。有无穷阴鹭，三农衣食，万衲钟鱼。尔依迎新送旧，似君侯、清约更谁欤。欲举一杯寿酒，却愁破费兵厨。

又 己未生日

新来衰态见，书懒读，镜休看。笑量窄才慳，卷无警策，杯有留残。思量减些年甲，怎奈何、须与鬓难瞒。假使诏催上道，不如敕放还山。

数年前乞挂衣冠。耄矣尚盘桓。且行歌拾穗，未应天上，解胜人间。仙家更无理会，至今传、都厕处刘安。莫怪是翁矍铄，止缘老子痴顽。

又 客赠牡丹

维摩居士室，晨有鹊、噪檐声。排闷者谁欤，冶容袿服，宝髻珠璎。疑是毗耶城里，那天魔、变作散花人。姑射神仙雪艳，开元妃子春醒。

廊延第一次西京。姚魏是知名。向欧九记中，思公屏上，描画难成。一自朝陵使去，赚洛阳、花鸟望升平。感慨桑榆暮景，抉挑草木微情。

摸鱼儿

怪新年、倚楼看镜，清狂浑不如旧。暮云千里伤心处，那更乱蝉疏柳。凝望久。怆故国，百年陵阙谁回首。功名大谬。叹采药名山，读书精舍，此计几时就。封侯事，久矣输人妙手。沧洲聊作渔叟。高冠长剑浑闲物，世上切身惟酒。千载后。君试看，拔山扛鼎俱乌有。英雄骨朽。问顾曲周郎，而今还解，来听小词否。

又 海棠

甚春来、冷烟凄雨，朝朝迟了芳信。蓦然作暖晴三日，又觉万姝娇困。霜点鬓。潘令老，年年不带看花分。才情减尽。怅玉局飞仙，石湖绝笔，辜负这风韵。倾城色，懊恼佳人薄命。墙头岑寂谁问。东风日暮无聊赖，吹得胭脂成粉。君细认。花共酒，古来二事天尤吝。年光去迅。漫绿叶成阴，青苔满地，做得异时恨。

又 用实之韵。

便披蓑、荷锄归去，何须身著宫锦。与谁共话桑麻事，朱老阮生尤稔。筛样饼。瓮样茧，长须赤脚供樵饪。清流浊品。尽扫去胸中，置诸膜外，对酒莫辞饮。华胥梦，怕杀人惊晓枕。疏窗惟月来闯。一生常被弓旌误，且告朝家追寝。愁个甚。君管取，有薇堪采松堪荫。茅山再任。幸不是谋臣，又非世将，免犯道家禁。

转调二郎神

余生日，林农卿赠此词，终篇押一韵，效嘏一首

抽还手版，受用处、十分轻省。便衣剪家机，饭炊躬稼，且免支移系省。帝悯龙钟蠲朝谒，予长假、毋烦申省。笑木石虚斋，暮年忺做，端明提省。

闲冷。囊金散尽，书筒来省。有小小楼儿，看山待月，绝胜崔公望省。两鹤随轩，一奴负锸，此外诸余从省。把一身本末，绿章奏过，泰玄都省。

又 再和

黄梁梦觉，忽跳出、北扉西省。今似得何人，老僧退院，秀才下省。罢草河西淮南诏，没一字、谪尚书省。已交侣樵渔，免教人道，弥封官省。

多幸。条冰解去，新衔全省。笑杀太师光，赐灵寿杖，有诏扶他入省。死谥醉侯，

生封诗伯，此事不关朝省。便茅屋、送老云边，也胜倚金华省。

又 三和

一筇两屨，导从比、在京差省。更不草白麻，不批黄敕，稍觉心清力省。幸有善和书堪读，何必然藜芸省。且阁起庄骚，专看老易，课程尤省。

梦境。槐阴禁苑，药翻纶省。纸裹里，有青铜钱三百，送与酒家展省。吊李白坟，挂徐君剑，零落端平同省

仅留得、老子婆娑，怎不拂衣华省。

又 四和

近来塞上，喜蜡弹、羽书清省。更万灶分屯，百年和籴，惭愧而今半省。蒙鞞残兵骑猪遁，永绝生猺侵省。做个太平民，戴花身健，催租符省。

何幸。行人来密，佞军抽省。但进有都俞，退无科琐，不用依时出省。子厚南宫，仲舒西掖，又报岑参东省。趁此际、纳禄悬车，亦为大司农省。

又 五和

人言官冗，老病底、法当先省。况行则蹒跚，立时跛倚，幸免做他两省客怕逢迎书慵答，得省处、而今姑省。笑落尽桃花，仆家梦得，重来郎省。

凉冷。练衣差薄，蒲葵堪省。叹三纪单栖，二毛纯白，情味似潘骑省。鬻马遣姬，惟书与画，点检依然难省。也不用、畜犬防

偷，老去睡眠常省。

长相思 惜梅

寒相催。暖相催。催了开时催谢时。丁
宁花放迟。

角声吹。笛声吹。吹了南枝吹北枝。明
朝成雪飞。

又 寄远

朝有时。暮有时。潮水犹知日两回。人
生长别离。

来有时。去有时。燕子犹知社后归。君
行无定期。

又 饯别

风萧萧。雨萧萧。相送津亭折柳条。春
愁不自聊。

烟迢迢。水迢迢。准拟江边驻画桡。舟
人频报潮。

又

烟凄凄。草凄凄。野火原头烧断碑。不
知名姓谁。

印累累。冢累累。千万人中几个归。荣
华朝露晞。

又

劝一杯。复一杯。短锺相随死便埋。英
雄安在哉。

眉不开。怀不开。幸有江边旧钓台。拂

衣归去来。

昭君怨 牡丹

曾看洛阳旧谱。只许姚黄独步。若比广陵花。太亏他。

旧日王侯园圃。今日荆榛狐兔。君莫说中州。怕花愁。

又 琼花

后土宫中标韵。天上人间一本。道号玉真妃。字琼姬。

我与花曾半面。流落天涯重见。莫把玉箫吹。怕惊飞。

又

一个恰雷州住。一个又廉州去。名姓在金瓯。不如休。

昨日沙堤行马。今日都门飘瓦。君莫上长竿。下来难。

生查子 元夕戏陈敬叟

繁灯夺霁华。戏鼓侵明发。物色旧时同，情味中年别。

浅画镜中眉，深拜楼西月。人散市声收，渐入愁时节。

满江红 夜雨凉甚，忽动从戎之兴

金甲雕戈，记当日、辕门初立。磨盾鼻、

一挥千纸，龙蛇犹湿。铁马晓嘶营壁冷，楼船夜渡风涛急。有谁怜、猿臂故将军，无功级。

平戎策，从军什。零落尽，慵收拾。把茶经香传，时时温习。生怕客谈榆塞事，且教儿诵花间集。叹臣之壮也不如人，今何及。

又 二月廿四夜海棠花下作

老子年来，颇自许、心肠铁石。尚一点、消磨未尽，爱花成癖。懊恼每嫌寒勒住，丁宁莫被晴烘坼。柰暄风烈日太无情，如何得。

张画烛，频频惜。凭素手，轻轻摘。更几番雨过，彩云无迹。今夕不来花下饮，明朝空向枝头觅。对残红满院杜鹃啼，添愁寂。

又 题范尉梅谷

赤日黄埃，梦不到、清溪翠麓。空健美、君家别墅，几株幽独。骨冷肌清偏要月，天寒日暮尤宜竹。想主人、杖履绕千回，山南北。

宁委涧，嫌金屋。宁映水，羞银烛。叹出群风韵，背时装束，竞爱东邻姬傅粉，谁怜空谷人如玉。笑林逋、何逊漫为诗，无人读。

又 送宋惠父入江西幕

满腹诗书，余事到、穰苴兵法。新受了、乌公书币，著鞭垂发。黄纸红旗喧道路，黑风青草空巢穴。向幼安、宣子顶头行，方奇特。

溪峒事，听侬说。龚遂外，无长策。便

献俘非勇，纳降非怯。帐下健儿休尽锐，草间赤子俱求活。到崆峒、快寄凯歌来，宽离别。

又

落日登楼，谁管领、倦游狂客。待唤起、沧浪渔父，隔江吹笛。看水看山身尚健，忧晴忧雨头先白。对暮云、不见美人来，遥天碧。

山中鹤，应相忆。沙上鹭，浑相识。想石田茅屋，草深三尺。空有鬢如潘骑省，断无面见陶彭泽。便倒倾、海水浣衣尘，难湔涤。

又 送王实之

天壤王郎，数人物、方今第一。谈笑里、风霆惊座，云烟生笔。落落元龙湖海气，琅琅董相天人策。问如何、十载尚青衫，诸侯客。

易爱底，些官职。难保底，些名节。拟闭门投辖，剧谈三日。畴昔评君天下宝，当为天下苍生惜。向临分、慷慨出商声，摧金石。

又 寿王实之

鹤驭来时，长占定、一年清绝。九万里、纤云收尽，帝青空阔。月露偏为丹桂地，风霜欲放黄花节。听玉笙、缥缈度缙山，吹初彻。

曾直把，龙鳞批。曾戏取，鲸牙拔。向绛河濯足，咸池晞发。俗子底量吾辈事，天

仙不在臞儒列。世岂无、瑶草与蟠桃，堪攀掇。

又 和王实之韵送郑伯昌

怪雨盲风，留不住、江边行色。烦问讯、冥鸿高士，钓鳌词客。千百年传吾辈话，二三子系斯文脉。听王郎、一曲玉箫声，淒金石。

晞发处，怡山碧。垂钓处，沧溟白。笑而今拙宦，他年遗直。只愿常留相见面，未宜轻屈平生膝。有狂谈、欲吐且休休，惊邻壁。

又 四首并和实之

往日封章，曾耸动、君王颜色。今似得、三闾公子，四明狂客。古不能箝言者口，天方欲寿中朝脉。算人间、岂有病无医，须针石。

年冉冉，袍犹碧。心耿耿，头先白。笑臣舒迂缓，臣山愚直。拂袖归来羞炙手，望尘拜了难伸膝。把富春濑与首阳山，图斋壁。

又

三黜归来，饭疏食、浑无愠色。中年后、家如旅舍，身如行客。轩冕岂非疣赘具，烟霞已是膏肓脉。有些儿、隙地更疏泉，堆卷石。

邻媪饷，新筠碧。溪友卖，鲜鳞白。向陈编冷笑，孔明元直。俗事不教污两耳，宴居聊可盘双膝。取当年、行脚一枝筇，悬高壁。

又

畴昔胪传，仗下奏、祥云五色。何况是、西山弟子，鹤山宾客。上帝照临忠义胆，老师付授文章脉。问此君、仿佛似何人，徂徕石。

园官菜，登盘碧。田舍米，翻匙白。懒投诗见素，寄书杓直。德耀不嫌为隐髻，龟儿已解摇吟膝。有谁怜、给札老相如，家徒壁。

又

下见西山，料他日、面无惭色。君记取、不为吕党，亦非秦客有意挽回当世事，无方延得诸贤脉。笑海波、渺渺几时平，空衔石。

园五亩，纷红碧。家四世，传清白。任天孙笑拙，女嬃嫌直。老去何烦援以手，向来不要加诸膝。待深山、深处著茅斋，看青壁。

又 寿唐夫人

八十加三，人尽讶、还童返少。争信道、夜春晓织，总曾经了。凜凜共姜当日誓，谆谆孟母平生教。到如今、象服拥鱼轩，天之报。

如船藕，如瓜枣。斑衣舞，金钟醮。望秋宵一点，老人星照。尘世少如娘福寿，上苍知得儿忠孝。待看他、孙子又生孙，添怀抱。

又 和叔永吴尚书，时吴丧少子

著破青鞋，浑不忆、踏他龙尾。更冷笑、

痴人擘划，二三百岁。殇子彭篴谁寿夭，灵均渔父争醒醉。向江天、极目羨禽鱼，悠然矣。

杯中物，姑停止。床头易，聊抛废。慨事常八九，不如人意。白雪调高尤协律，落霞语好终伤绮。待烦公、老手一摩挲，文公记。

又 丹桂

昨日梢头，点点似、玉尘珠砾。一夜里、天公染就，金丹颜色。体质翻嫌西子白，浓妆却笑东邻赤。尽重重、帘幕不能遮，香消息。

寒日短，霜飞急。未摇落，须怜惜。且乱簪破帽，旋呼鸣瑟。便好移来云月地，莫教归去梅檀国。怕彩鸾、隐见霎时间，寻无迹。

又

祷祝封姨，休把做、扬沙吹砾。费西帝、许多薰染，浓香深色。满插铜匱芳气烈，高张画烛祥光赤。向先生、鼻观细参来，三千息。

人老大，年华急。花妖艳，天公惜。到一枝摇落，千林萧瑟。摘蕊莫教轻糝地，返魂依旧能倾国。待彩云、月下再来时，寻陈迹。

又

月露晶英，融结做、秦宫块砾。长殿后、一年芳事，十分秋色。织女机边云锦烂，天

台赋里晴霞赤。恍女仙、空际驾翔鸾，来游息。

装束晚，飘零急。今不乐，空追惜。欠红牙按舞，朱弦调瑟。岂是时无花鸟使，是他自择风霜国。任落英、狼藉委苍苔，稀行迹。

又

谁把灵丹，点化了、荒园瓦砾。奇特处、恰当秋杪，不争春色。因甚素娥脂粉艳，怪他白帝车旗赤。叹暮年、无句比红儿，芳心息。

狂飙起，行云急。开与谢，俱堪惜。唤妓行按酒，客来操瑟。扑鼻微香薰世界，解颜一笑迷人国。怕匆匆、归去广寒宫，难踪迹。

又

楮叶工夫，辛苦似、镂冰炊砾。君看取、天公巧处，自然形色。发彩已非前度绿，眼花休问何时赤。又谁能、月下待红娘，传音息。

投辖饮，追欢急。持帚扫，痴心惜。有顷簾谐律，不消竽瑟。点点散来居士室，丛丛生占骚人国，便高烧、绛蜡写乌丝，留真迹。

又

糝径红裯，莫要放、儿童抛砾。知渠是、仙家变幻，佛家空色。青女无端工剪彩，紫姑有祟曾迷赤。但双双、戏蝶绕空枝，飞还

息。

鲸量减，驹阴急。芳事过，余情惜。漫新腔窈渺，奏云和瑟。飘荡随他红叶水，萧条化作青芜国。忆桥边、池上共攀翻，空留迹。

又 端午

梅雨初收，浑不辨、东陂南荡。清旦里、鼓饶动地，车轮空巷。画舫稍渐京犇俗，红旗会踏吴儿浪。共葬鱼娘子斩蛟翁，穷欢赏。

麻与麦，俱成长。蕉与荔，应来享。有累臣泽畔，感时惆怅。纵使菖蒲生九节，争如白发长千丈。但浩然一笑独醒人，空悲壮。

又 丁巳中秋

说与行云，且捋就、嫦娥今夕。俄变见、金蛇能紫，玉蟾能白。九万里风清黑眚，三千世界纯银色。想天寒、桂老已吹香，堪攀摘。

湘妃远，谁鸣瑟。桓伊去，谁横笛。叹素光如旧，朱颜非昔。老去欢惊无奈减，向来酒量常嫌窄。倩何人、天外挽冰轮，应留得。

又 林元质侍郎生日 四月二十九日

天上人间，好时节、无过初夏。君记取、瞿昙生后，纯阳来也。风骨清臞如野鹤，门庭低小才旋马。更旁无红粉有青奴，堪娱夜。

鲸口吸，银瓶泻。蝇头字，篝灯写。数而今铁笔，谁如公者。便合去开丞相阁，未应牵入耆英社。待调羹事了却归来，寻前话。

又 庆抑斋元枢八十

屈指耆英，谁似得、三朝元老。尚留个、管夷吾在，何忧江表。世道方占公出处，裔夷争问今年貌。怎不移、此手整乾坤，长闲了。

灵寿却，斑衣绕。如瓶李，如瓜枣。把禅龕闭定，怕蒲轮到。师尚父年浑未艾，中书令考犹为少。看画盆、岁岁浴曾玄，添怀抱。

又 次韵徐使君癸亥灯夕

笳鼓春城，处处有、丰年语笑。浑忘却、金莲前导，青藜下照。白雪唱来偏寡和，朱颜老去难重少。羨遨头、四十已专城，真英妙。

奎文宠，崇儒教。田毛喜，宽租诏。有春陵之什，无潮州表。怪雨盲风稀发作，华星秋月争光耀。看来年、此夜侍端门，开佳兆。

又 再和

奎墨西来，落笔处、亲蒙天笑。谁信道、郡人生怕，福星移照。宾客唱予还和汝，使君安老兼怀少。况醉能同乐醒能文，新腔妙。

无诸国，渐声教。元结辈，宣明诏。恍梦中辽鹤，重来华表。一盏勘书殊简径，万灯侍辇曾荣耀。怪晴檐、乾鹊语查查，公归兆。

又 傅相生日癸亥

江左惟公，争些子、吾其衽发。谈笑里、

旄头泛扫，斗杓旋斡。投一粒丹元气转，下三数著输棋活。把晋朝王谢传同看，谁忧劣。

飞凯奏，清夔峡。蠲和余，宽畿浙。有三千功行，待从头说。玉斝满斟长寿酒，冰轮探借中秋月。更慈帏、喜见凤将雏，添丹穴。

又 傅相生日甲子

见宰官身，出只手、擎他宇宙。筹边外、招徕名胜，登崇勋旧。不下莱公扶景德，又如涑水开元祐。尽从渠、干贄及吾门，归斯受。

上林苑，多花柳。祁连塞，稀刁斗。更红旗破贼，黄云栖亩。阿母瑶池枝上实，仙人太华峰头藕。泻铜盘、沆瀣入金卮，为公寿。

又

礼乐衣冠，浑靠走、堂堂国老。出双手、把天裂处，等闲补了。谢傅东山心未遂，周郎赤壁功犹小。事难于张赵两元台，扶炎绍。

恢鹤禁，迎商皓。开兔苑，延枚叟。喜奎星来聚，旄头都扫。重译争询裴令貌，御诗也祝汾阳考。更何须、远向海山求，安期枣。

又 海棠

压倒群芳，天赋与、十分秾艳。娇嫩处、有情皆惜，无香何慊。恰则才如针粟大，忽然谁把胭脂染。放迟开、不肯媚梅花，羞寒俭。

时易过，春难占。欢事薄，才情欠。觉芳心欲诉，冶容微敛。四畔人来攀折去，一番雨有离披渐。更那堪、几阵夜来风，吹千点。

又

嫌杀双轮，驾行客、之燕适粤。也不喜、船儿无赖，载他江浙。荡子不归鸳被冷，昭君远嫁毡车发。叹子规、闲管昔人愁，啼成血。

渭城柳，争攀折。关山月，空圆缺。有琵琶改语，锦书难说。若要人生长美满，除非世上无离别。算古今、此恨似连环，何时绝。

水龙吟 己亥自寿二首

年年岁岁今朝，左弧悬罢浑无事。吾衰久矣，我辰安在，老之将至。懒写京书，怕看除目，败人佳思。把东篱掩定，北窗开了，悠然酌、颓然睡。

客有过门投贖。道先生访华胥氏。谁能辛苦，陪他绮语，记他奇字。屈指先贤，戴花老监，岂其苗裔。待异时约取，宽夫彦国，入耆英会。

又

先生放逐方归，不如前辈抽身早。台郎旧秩，看来俗似，散人新号。起舞非狂，行吟非怨，高眠非傲。叹终南捷径，太行盘谷，用卿法、从吾好。

闭了草庐长啸。后将军来时休报。床头书在，古人出处，令人非笑。制个淡词，呷些薄酒，野花簪帽。愿云台任满，又还因任，赛汾阳考。

又 自和前二首

病翁一榻萧然不知世有欢娱事。雀罗庭院，载醪客去，催租人至。报答秋光，要些酒量，要些诗思。奈长鲸罢吸，寒蛩息响，茶瓯外、惟贪睡。穷巷幸无干贄。或相过、莫知谁氏。柴门草户，阙人守舍，任伊题字。自和山歌，国风之变，离骚之裔。待从今向去，年年强健，插花高会。

又

平生酷爱渊明，偶然一出归来早。题诗信意，也书甲子，也书年号。陶侃孙儿，孟嘉甥子，疑狂疑傲。与柴桑樵牧，斜川鱼鸟，同盟后、归于好。

除了登临吟啸。事如天、莫相谗报。田园闲静，市朝翻覆，回头堪笑。节序催人，东篱把菊，西风吹帽。做先生处士，一生一世，不论资考。

又 辛亥安晚生朝

祁公一度貂蝉，先生三度貂蝉了。燔柴升辂，银蟾烛夜，金乌腾晓。喜动龙颜，瑞班虹玉，归功元老。纵擎天力倦，明农心切，先还取、中书考。

未著留侯难办，算除非、烦他商皓。紫芝产遍，赤松待久，何时高蹈。人世无过，

鱼羹饭美，布衾铭好。待角巾东路，蹇驴北阜。伴公游钓。

又 癸丑生日，时再得明道词

依然这后村翁，阿谁改换新曹号。虚名砂砾，旁观冷笑，何曾明道。吟歇后诗，说无生话，热瞒村獠。被儿童盘问，先生因甚，身顽健、年多少。

不茹园公芝草。不曾餐、安期瓜枣。要知甲子，陈抟差大，邵雍差小。肯学痴人，据鞍求用，染髭藏老。待眉毛覆面，看千桃谢，阅三松倒。

又 丙辰生日

儿童不识樵翁，挽衣借问年今几。少如彦国，大如君实，披襟高比。德业天渊，有些似处，须眉而已。愿老身无事，小车乘兴，名园内、行窝里。

做取出关周史。莫做他、下山园绮。从人谤道，是浮丘伯，是庚桑子。背伛肩高，幅巾藜杖，敝袍穿履。向画图上面，十分似个，见端门底。

又

即令七十平头，岂能久作人间客。左车牙落，半分臂小，几茎须白。挟种树书，举障尘扇，著游山屐。任蛙蟆胜负，鱼龙变化，侬方在、华胥国。

岛大功名官职。眼中花、须臾无迹。小儿破贼，二郎作相，有何奇特。同辈萧疏，且留铁汉，要摩铜狄。向宝钗楼里，天津桥

上，月明横笛。

又 丁巳生日

不须更问旁人，劝君自拂青铜照。幅巾短褐，有些野逸，有些村拗。两度呼来，也曾批敕，也曾还诏。笑先生此手，今堪何用，苔矶上、堪垂钓。

白雪新腔高妙。把侬家、调疏称道。六韬未试，抑诗未作，如何归老。玉带金貂，星儿快活，天来烦恼。待自笈年甲，缴还官职，换山翁号。

又

徐仲晦、方蒙仲各和余去岁笛字韵为寿，戏答二君

行藏自决于心，不消谋及门前客。平生慕用，著书玄晏，挂冠贞白。帝奖孤高，别加九锡，一筇双屐。更赐之车服，胙之茅土，依稀在、槐安国。

频领竹宫清职。仰飞仙、犹龙无迹。与谁同去，挑包徐甲，负辕班特。蹉过明师，且寻狎友，杜康仪狄。笑谢公旷达，暮年垂泪，听桓郎笛。

又

方蒙仲、王景长和余丙辰、丁巳二词，走笔答之

先生避谤山栖，戒门不纳高轩客。谁欵来者，吟诗张碧，诙谐侯白。礼数由他，谢郎著帽，王郎穿屐。且问花随柳，举杯邀月，那须预、人家国。香案旁边供职。鸟飞空、何曾留迹。臞翁铁汉，两贤安在，百夫之特。

但愿王师，早俘颡利，早禽长狄。便太平无事，卖薪沽酒，骑牛腰笛。

又

当年玉立清扬，屋梁落月偏相照。而今衰飒，形骸百丑，情怀十拗。久已饰巾，尚堪扶杖，听山东诏。尽后车载汝，营丘封汝，何必在、磻溪钓。

晚悟僂书玄妙。懒从他、钟离传道。不论资望推排，也做五更三老。宋玉多悲，唐衢喜哭，好闲烦恼。问天公，扑断散人二字，赐龟蒙号。

又

此翁饱阅人间，三生似是刘宾客。若论辈行，早陪韩柳，晚交元白。老矣安能，为人取履，与人争屐。叹酒泉郡远，醉乡路绝，今何处、堪开国。

解去冰衔华职。遍空山、难寻行迹。道旁喘月，田间卧草，也胜郊特。宰相□□，周公留召，娄公容狄。喜时平身健，三行社饮，一声樵笛。

又

病夫鬓秃颜苍，不堪持向清溪照。一生柄凿，壮夫瞋懦，通人嫌拗。让当行家，勒浯西颂，草淮南诏。幸脱离沮洳，浮游江海，悠然逝、毋吞钓。

宴坐蒲团观妙。怪痴儿、舂粮求道。古人尚齿，迎他商皓，拜他庞老。鸠杖蒲轮，把身束缚，替人愁恼。煞为僧不了，下梢犹

要，紫衣师号

又 林中书生日 六月十九日

虬斋不是凡人，海山仙圣知来处。清英融结，佩瑶台月，饮金茎露。翰墨流行，禁中有本，御前停箸。向弘文馆里，薰风殿上，亲属和、微凉句。

已被昭阳人妒。更那堪、鼎成龙去。曾传宝苑，曾将玉杵，付长生兔。地覆天翻，河清海浅，朱颜常驻。算给扶朝者，临雍拜者，下梢须做。

又 丁卯生日

此翁幸自偏盲，那堪右目生微翳。羽流襁谢，缙郎忏悔，天乎无罪。客曰不然，也因口腹，也因瞻视。汝夜披黄卷，日餐丹荔，贻伊戚、将谁恚。

长智都缘更事。尽今生、十分珍卫。暮年怕杀，汗青蠹简，擘红高会。也莫贪他，君谟旧谱，子云奇字。特邀张司业，看花题竹，韩家园内。

风流子 白莲

松桂各参天。石桥下，新种一池莲。似仙子御风，来从姑射，地灵献宝，产向蓝田。曾入先生虚白屋，不喜傅朱铅。记茂叔溪头，深衣听讲，远公社里，素衲安禅。

山间。多红鹤，端相久，蓦地飞去蹁跹。但蝶戏鹭翘，有时偷近旁边。对月中乍可，伴娥孤另，墙头谁肯，窥玉三年。俗客浓妆，

安知国艳天然。

满庭芳

凉月如冰，素涛翻雪，人世依约三更。
扁舟乘兴，莫计水云程。忽到一洲奇绝，花
无数、多不知名。浑疑是，芙蓉城里，又似
牡丹坪。

蓬莱，应不远，天风海浪，满目凄清。
更一声铁笛，石裂龙惊。回顾尘寰局促，挥
袂去、散发骑鲸。蘧蘧觉，元来是梦，钟动
野鸡鸣。

贺新郎

吾少多奇节。颇揶揄、玉关定远，壶头
新息。一剑防身行万里，选甚南溟北极。看
塞雁、衔来秋色。不但槊棋夸妙手，管城君、
亦自无勍敌。终贾辈，恐难匹。酒肠诗胆新
来窄。向西风、登高望远，乱山斜日。安得
良弓并快马，聊与诸公角力。漫醉把、栏干
频拍。莫恨寒蟾离海晚，待与君、秉烛游今
夕。欢易买，健难得。

又 送陈真州子华

北望神州路。试平章、这场公事，怎生
分付。记得太行山百万，曾入宗爷驾驭。今
把作、握蛇骑虎。君去京东豪杰喜，想投戈、
下拜真吾父。谈笑里，定齐鲁。两河萧瑟惟
狐兔。问当年、祖生去后，有人来否。多少

新亭挥泪客，谁梦中原块土。算事业、须由人做。应笑书生心胆怯，向车中、闭置如新妇。空目送，塞鸿去。

又 杜子昕凯歌

尽说番和汉。这琵琶、依稀似曲，蓦然弦断。作么一年来一度，欺得南人技短。叹几处、城危如卵。元凯后身居玉帐，报胡儿、休作寻常看。布严令，运奇算。开门决斗雌雄判。笑中宵、奚车毡屋，兽惊禽散。个个巍冠横麈柄，谁了君王此段。也莫靠、长江能限。不论周郎并幼度，便仲尼、复起嗟微管。驰露布，筑京观。

又 跋唐伯玉奏稿

宣引东华去。似当年、文皇亲擢，马周徒步。殿上风霜生白简，下殿扁舟已具。怎不与、官家留住。古有一言腰相印，谁教他、满筐婴鳞疏。还笏退，不回顾。新来边报犹飞羽。问诸公、可无长策，少宽明主。攀槛朱云头雪白，流落如今底处。但一片、丹心如故。赖有越台堪眺望，那中原、莫已平安否。风色恶，海天暮。

又 送唐伯玉还朝

驿骑联翩至。道台家、筹边方急，酒行姑止。作麽携将琴鹤去，不管州人堕泪。富与贵、平生无味。可但红尘难著脚，便山林、未有安身地。搔白发，兀相对。前身小范疑公是。忆当年、天章阁上，建明尤伟。庆历诸贤方得路，便不容他老子。须著放、延州

城里。一句殷勤牢记取，在朝廷、最好图西事。何必向，玉关外。

又 送黄成父还朝

飞诏从天下。道中朝、名流欲尽，君王思贾。时事祇今堪痛哭，未可徐徐俟驾。好著手、扶将宗社。多少法筵龙象众，听灵山、属付些儿话。千百世，要传写。子方行矣乘骢马。又送他、江南太史，去游毡厦。老我伴身惟有影，倚遍风轩月榭。怅玉手、何时重把。君向柳边花底问，看贞元、朝士谁存者。桃满观，几开谢。

又 戊戌寿张守

南国秋容晚。晓寒轻、菊花台榭，拒霜池馆。试向壶山堂上望，万顷黄云刈遍。总吃著、君侯方寸。不要汉廷夸击断，要史家、编入循良传。春脚到，福星见。家家香火人人愿。要还他、庆元狨座，建炎蝉冕。稳奉安舆迎两国，谁谓山遥水远。福寿比、河沙难算。来岁而今黄花节，早参鸾、入侍瑶池宴。风浩荡，海清浅。

又 端午

深院榴花吐。画帘开、练衣纨扇，午风清暑。儿女纷纷夸结束，新样钗符艾虎。早已有、游人观渡。老大逢场慵作戏，任陌头、年少争旗鼓。溪雨急，浪花舞。灵均标致高如许。忆生平、既纫兰佩，更怀椒糈。谁信骚魂千载后，波底垂涎角黍。又说是、蛟馋龙怒。把似而今醒到了，料当年、醉死差无

苦。聊一笑，吊千古。

又 九日

湛湛长空黑。更那堪、斜风细雨，乱愁如织。老眼平生空四海，赖有高楼百尺。看浩荡、千崖秋色。白发书生神州泪，尽凄凉、不向牛山滴。追往事，去无迹。少年自负凌云笔。到而今、春华落尽，满怀萧瑟。常恨世人新意少，爱说南朝狂客。把破帽、年年拈出、若对黄花孤负酒，怕黄花、也笑人岑寂。鸿北去，日西匿。

又 寄题聂侍郎郁孤台

绝顶规危榭。跨高寒、鸟飞不过，云生其下。斤斲无声人按堵，翕吻青红变化。览城郭、山川如画。阁老凤楼修造手，笑谈间、突出凌云厦。台上景，买无价。唾壶麈尾登临暇。似当年、滁阳太字，欧阳公也。倾倒赣江供砚滴，判断雪天月夜。更唤取、邹枚司马。铜雀凌歊歌舞散，访残砖、断甃无存者。馀翰墨，被风雅。

又

动地东风起。画桥西、绕溪桑柘，漫山桃李。寂寂墙阴苍苔径，犹印前回屐齿。惊岁月、飙驰云驶。太息攀翻长亭树，是先生、手种今如此。君不乐，欲何俟。傍人错会渊明意。笑斯翁、皇皇汲汲，登山临水。佳处径呼篮舆去，彷彿柴桑栗里。从我者、门生儿子。尝试平章先贤传，屈原醒、不似刘伶醉。拚酩酊，卧花底。

又 宋庵访梅

鹊报千林喜。还猛省、谢家池馆，早寒天气。要与瑶姬叙离索，草草杯盘藉地。怅减尽、何郎才思。不愿玉堂并金屋，愿年年、岁岁花间醉。餐秀色，挹高致。西园飞盖东山妓。问何如、半山雪里，孤山烟外。管甚夜深风露冷，人与长瓶共睡。任翠羽、枝头多事。老子平生无他过，为梅花、受取风流罪。簪白发，莫教坠。

又 游水东周家花园

溪上收残雨。倚画栏、薄绵乍脱，日阴亭午。闹市不知春色处，散在荒园废墅。渐小白、长红无数。客子虽非河阳令，也随缘、暂作莺花主。那可负，瓮中醕。碧云四合千岩暮。恨匆匆、余方有事，子姑归去。趁取群芳未摇落，暇日提鱼就煮。叹激电、光阴如许。回首明年何处，问桃花、尚记刘郎否。公莫笑，醉中语。

又 和咏茶蘼

曾与瑶姬约。恍相逢、翠裳摇曳，珠篝联络。风露青冥非人世，揽结玉龙骖鹤。爱万朵、千条纤弱。祷祝花神怜惜取，问开时、晴雨须斟酌。枝上雪，莫消却。恼人匹似中狂药。凭危栏、烛光交映，乐声遥作。身上春衫香薰透，看到参横月落。算茉莉、犹低一著。坐有缙山王郎子，倚玉箫、度曲难为酢。君不饮，铸成错。

又 用前韵赋黄荼蘼

想赴瑶池约。向东风、名姬骏马，翠鞵金络。太液池边鹄群下，又似南楼呼鹤。画不就、秣纤娇弱。罗帕封香来天上，泻铜盘、沆瀣供清酌。春去也，被留却。芳魂再返应无药。似诗咏、绿衣黄里，感伤而作。爱惜尚嫌蜂采去，何况流莺蹴落。且放下、珠帘遮著。除却江南黄九外，有何人、敢与花酬酢。君认取，莫教错。

又 再用约字

浅把宫黄约。细端相、普陀烟里，金身珠络。萼绿华轻罗袜小，飞下祥云仙鹤。朵朵赛、蜂腰纤弱。已被色香撩病思，尽鹅儿、酒美无多酌。看不足，怕残却。人间难得伤春药。更枝头、流莺呼起，少年狂作。留取姚家花相伴，羞与万红同落。未肯让、蜡梅先著。乐府今无黄绢手，问斯人、清唱何人酢。休草草，认题错。

又 客赠芍药

一梦扬州事。画堂深、金瓶万朵，元戎高会。座上祥云层层起，不减洛中姚魏。叹别后、关山迢递。国色天香何处有，想东风、犹忆狂书记。惊岁月，一弹指。数枝清晓烦驰骑。向小窗、依稀重见，芜城妖丽。料得花怜侬消瘦，侬亦怜花憔悴。漫怅望、竹西歌吹。老矣应无骑鹤日，但春衫、点点当时泪。那更有，旧情味。

又 郡宴和韵

草草池亭宴。又何须、珠璫络臂，琵琶遮面。宾主一时词翰手，倏忽龙蛇满案。传写处、尘飞莺啭。但得时平鱼稻熟，这腐儒、不用青精饭。阴雾扫，霁华见。使君偿了丰年愿。便从今、也无敲扑，也无厨传。试拂笼纱看壁记，几个标名渠观。想九牧、闻风争羨。此老饱知民疾苦，早归来、载笔薰风殿。诗有讽，赋无劝。

又 再和前韵

梦断钧天宴。怪人间、曲吹别调，局翻新面。不是先生瘖哑了，怕杀乌台旧案。但掩耳、蝉嘶禽啭。老去把茅依地主，有瓦盆盛酒荷包饭。停造请，免朝见。少狂误发功名愿。苦贪他、生前死后，美官佳传。白发归来还自笑，管辖希夷古观。看一道、冰衔堪羨。妃子将军瞋酖未已，问匡山、何似金銮殿。休更待，杜鹃劝。

又 题蒲涧寺

风露驱炎毒。记仙翁、飘然谪堕，吹笙骑鹄。历历汉初秦季事，山下瓜犹未熟。过眼见、群雄分鹿。想得拂衣游汗漫，试回头、刘项俱蛮触。斫鲸脍，脯麟肉。越人好事因成俗。拥遨头、如云士女，山南山北。问讯先生无恙否，齐鲁干戈满目。且游戏、扶胥黄木。不是世无瓜样枣，便有来、肯饱痴儿腹。聊举酒，笑相属。

又

王实之喜余出岭，命爱姬歌新词以相劳，辄次其韵

此腹元空洞。少年时、诸公过矣，上天吹送。老大被他禁害杀，身与浮名孰重。这鼓笛、休休拈弄。彩笔掷还残锦去愿今生、来世无妖梦。且饭犊，莫吞凤。

新来瘖哑如翁仲。羨王郎、骖鸾缥缈，玉箫吹动。应笑夔州村里女，炙面生愁进奉。要绝代、倾城安用。今古何人知此理，有吾家、酒德先生颂。三万卷，漫充栋。

又 蒙恩主崇禧，再用前韵

主判茅君洞。有檐间、查查喜鹊，晓来传送。几度黄符披戴了，此度君恩越重。仆五任词庙：被贺监、天随调弄。做取散人千百岁，笑渠侬、一霎邯郸梦。歌而过，凤兮凤。

汉园织屨希陈仲。问先生、加齐卿相，可无心动。除却醴泉中太乙，拣个名山自奉。那捷径、输他藏用。有耳不曾闻黜陟，免教人、贬驳徂徕颂。服兰佩，结茅栋。

又 三和

谪下神清洞。更遭他、揶揄黠鬼，路旁遮送。薄命书生鸡肋尔，却笑尊拳忒重。破故纸、谁教繆弄。一枕茅檐春睡美，便周公、大圣何须梦。门前客，任题凤。卜邻羊仲并求仲。愿春来、西畴雨足，土膏犁动。白发巡官占岁稔，不问京房翼奉。棒与瓮、从今

无用。醉与老农同击壤，莫随人、投献嘉禾颂。在陋巷，胜华栋。

又 席上闻歌有感

妾出于微贱。小年时、朱弦弹绝，玉笙吹遍。粗识国风关雎乱，羞学流莺百啭。总不涉、闺情春怨。谁向西邻公子说，要珠鞍、迎入梨花院。身未动，意先懒。主家十二楼连苑。那人人、靓妆按曲，绣帘初卷。道是华堂箫管唱，笑杀鸡坊拍袞。回首望、侯门天远。我有平生离鸾操，颇哀而不愠微而婉。聊一奏，更三叹。

又 生日用实之来韵

鬓雪今千缕。更休休、痴心呆望，故人明主。晚学瞿聃无所得，不解飞升灭度。似晓鼓、冬冬挝五。散尽朝来汤饼客，且烹鸡、要饭茅容母。怕回首，太行路。麟台学士微云句。便樽前、周郎复出，审音无误。安得春莺雪儿辈，轻拍红牙按舞。也莫笑、侬家蛮语。老去山歌尤协律，又何须、手笔如燕许。援琴操，促箏柱。

又 再用前韵

放逐身蓝缕。被门前、群鸥戏狎，见推盟主。若把士师三黜比，老子多他两度。袖手看、名场呼五。不会车边望尘拜，免他年、青史羞潘母。句曲洞，是归路。平生怕道萧萧句。况新来、冠敝弁侧，醉人多误。管甚是非并礼法，顿足低昂起舞。任百鸟、喧啾春语。欲托朱弦写悲壮，这琴心、脉脉谁堪

许。君按拍，我调柱。

又 实之三和有忧边之语，走笔答之

国脉微如缕。问长缨、何时入手，缚将戎主。未必人间无好汉，谁与宽些尺度。试看取、当年韩五。岂有谷城公付授，也不干、曾遇骊山母。谈笑起，两河路。少时棋枰曾联句。叹而今、登楼揽镜，事机频误。闻说北风吹面急，边上冲梯屡舞。君莫道、投鞭虚语。自古一贤能制难，有金汤、便可无张许。快投笔，莫题柱。

又 四用缕字韵为王实之寿

万字如针缕。忆王郎、丹墀大对，气为文主。贵近旁观俱失色，仰止如天圣度。笑杜牧、成名居五。晚面清光犹苦谏，似封人、恳切言君母。谪尘世，错行路。当时宜和薰风句。又那知、青云一跌，被才名误。输与灵和殿前柳，柔软随风学舞。怪两鸟、新来停语。不是先生高索价，问何时、宰相先生许。举杯祝，莫倾柱。

又 实之用前韵为老者寿，戏答

身畔无丝缕。但从前、练裳练帨，做他家主。甲子一周加二纪，兔走乌飞几度。赛孔子、如来三五。鹤发萧萧无可截，要一杯、留客惭陶母。门外草，欲迷路。

朗吟白雪阳春句。待夫君、骊驹不至，鹊声还误。老去聊攀莱子例，倒著斑衣戏舞。记田舍、火炉头语。肘后黄金腰下印，有高堂、未敢将身许。且扇枕，莫倚柱。

又 张倅生日

辇路东风里。试回头、金闺昨梦，侵寻三纪。岁晚岿然灵光殿，仆与君侯而已。漫过眼、几番桃李。珠履金钗常满座，问谁人、得似张公子。驰骥馥，佩龟紫。宿云收尽檐声止。玳筵开、高台风月，后堂罗绮。恰近洛人修禊节，莫惜飞觞临水。怕则怕、追锋徵起。此老一生江海客，愿风云、际会从今始。宁郁郁，久居此。

又 九日与二弟二客郊行

老去光阴驶。向西风、疏林变缟，残霞成绮。尚喜暮年腰脚健，不碍登山临水。算自古、英游能几。客与桓公俱臭腐，独流传、吹帽狂生尔。后来者，亦犹此。篮舆伊轧柴桑里。问黄花、没些消息，空篱而已。赖有一般芙蓉月，偏照先生怀里。且觅个、栏干同倚。检点樽前谁见在，忆平生、共插茱萸底。欢未足，饮姑止。

又

己未九日同季弟子侄饮仓部弟免庵，艮翁、宫教来会

忆昔俱年少。向斯晨、登高怀古，赋诗舒啸。追数樽前插花客，人物并皆佳妙。禁几度、西风残照。元子寄奴曾富贵，到而今、一一消磨了。君不乐，后人笑。山南山北添华表。叹归来、谢池草合，黄台瓜少。老去

爱持齐物论，谁管彭殇寿夭。待细说、教天知道。不羨两苏并二宋，愿弟兄、岁岁同吹帽。杯到手，莫辞醕。

又 居厚、良翁皆和，余亦继作

何必游嵩少。屋边山、松风浩荡，虎龙吟啸。旧效楚人悲秋作，晚爱陶诗高妙。发如此、临流羞照。屈指向来夸毗子，被西风、一笔都勾了。曾不满，达人笑。当年玉振于江表。怅而今、老身空在，欢娱全少。假使真如彭祖寿，蒙叟犹嗤渠夭。偶落笔、不经人道。岁晚连床谈至晓，胜冈头、出没看乌帽。君举白，我频醕。

又

人老难重少。强迫陪、李侯痛饮，刘郎清啸。报答秋光无一字，虚说君房语妙。且匣起、青铜休照。赖有多情篱下菊，待西风、不肯先开了。留晚节，发孤笑。

孔璋客绍衡依表。有谁怜、戴花翁病，插萸人少。生不逢场闲则剧，年似龚生犹夭。吃紧处、无人曾道。到得扶他迂叟出，算貂蝉、未抵深衣帽。街酒贱，更沽醕。

又 四用韵

犹记臣之少。兴狂时、过陈遵饮，对孙登啸。岁晚登临多感慨，但觉齐山诗妙。任蓉月、柳风吹照。金印不来丹飞去，拟神仙、富贵都差了。空铸错，与人笑。

九年前拜悬车表。试回看、柴桑菊老，玄都花少。周也曾言殇子寿，佛以白头。未

后句、岩头曾道。头似秃鹫巾裹懒，最不宜
蝉冕宜僧帽。杯中物，直须酌。

又

五用韵。读坡公和陶诗，其九篇为重九作，乃
叙坡事而赋之

行乐尤宜少。忆坡公、洞箫听罢，划然
长啸。四海共知霜鬓满，莫问近来何妙。也
不记、金莲曾照。老没太官糕酒分，把茱萸、
便准登高了。齐得丧，等嘻笑。集无韩子潮
州表。数当时、南迁者众，北归人少。赤壁
玉堂均一梦，此岂蛮烟能夭。与同叔、俱尝
知道。谁向进贤冠底说，画出来、不似眉山
帽。秋菊盞，献公酌。

又 六用韵。叙谪仙为宫教兄寿

鹏赋年犹少。晚飘蓬、夜郎秋浦，渔歌
猿啸。骏马名姬俱散去，参透南华微妙。敛
万丈、光芒回照。妃子将军瞋个甚，老先生、
拂袖金闺了。供玉齿，粲然笑。

解骖赖有汾阳老。叹今人、布衣交薄，
绨袍情少。黄祖斗筲何足算，鹦鹉才高命夭。
与贺监、其归同道。脱下锦袍与呆底，谪仙
人、白苧乌纱帽邀素月，入杯酌。

又 傅相生日壬戌

低局从头错。解危机、除非唤取，国棋
来著。不信胡儿能胆大，南岸安他阵脚。谈
笑里、乌巢空幕。西起岷峨东海岱，有捷旗、
露布无宵柝。莘渭后，到秋壑。

淮田犁遍吴田获。问台家、山河宇宙，

是谁擎托。自觉怀中残锦尽，采色彰施技薄。视柳雅、韩碑瞠若。稽首鲁公黄发颂，世何人、堪继奚斯作。楚狂语，莫删却。

又 癸亥九日

宿雨轻飘洒。少年时、追欢记节，同人于野。老去登临无脚力，徙倚屋东篱榭。但极目、海山如画。千古惟传吹帽汉，大将军、野马尘埃也。须彩笔，为陶写。

鹤归旧里空悲咤。叹原头、累累高冢，洛英凋谢。留得香山病居士，却入渔翁保社。怅谁伴、先生情话。樽有葡萄簪有菊，西凉州、不似东篱下。休唤醒，利名者。

又

拂袖归来也。懒追陪、竹林嵇阮，兰亭王谢。谁与此翁相暖热，赖有平生伯雅。且放意、高吟闲话。山鸟山花皆上客，又何须、胜似公荣者。胸磊块，总浇下。

盘龙痴绝求鹅炙。这先生、黄齏瓮熟，味珍无价。酒颂一篇差要妙，庄列诸书土苴。任礼法、中人嘲骂。君特未知其趣耳，若还知、火急来投社。共秉烛，惜今夜。

又 甲子端午

过眼光阴驶。忆垂髫、留连节物，逢场游戏。初试练衣弄纨扇，斗采菖蒲涧里。今发白、颜苍如此。艾子萧郎方用事，怪先生、苦死纫兰芷。君不乐，欲何俟。

头标夺得群儿喜。向溪边。旁观助噪，叹吾衰矣。欲建鼓旗无气力，唤起龙泉改委

但酒户、加封而已。晚觉醉乡差快活，那独醒、公子真呆底。聊洗净，笛箏耳。

又 二鹤

家有仙禽二。早追随、先生杖屦，互乡童子。旦旦池边三薰沐，夜夜山中警睡。且伴我、人间游戏。此老生平哀大陆，到末梢、始忆华亭唳。评往事，败佳思。

古云鹤算谁能纪。叹归来、山川如故，人民非是。但愿主君高飞去，莫爱乘轩禄位。更赛过、令威千岁。假使焦山真羽化，待华阳贞逸铭方瘞。我拍手，渠展翅。

洞仙歌

癸亥生朝和居厚弟韵，题谪仙像

上林全树，曾借君栖宿。朝过瑶台暮群玉。忽翩然、脱下宫锦袍来，□□□，却向齐州受篆。

等闲挥醉笔，欵唾千篇，长与诗家窃膏馥。身是酒星文星，刚被诗人，□唤做、禁中颇牧。便散发、骑鲸去何妨，从我者谁欤，安期徐福。

又 和居厚弟韵

眇难揽镜，跛尤难穿履。赖有胡公菊潭水。信医言、断了重碧轻红，禁害杀，不遣高吟大醉。

古来稀七十，添许多年，赢得笺天致君事。莫问客去门前，金尽床头，留宝扇、御诗珍秘。畴昔慕、乘崖老尚书，到晚节依稀，

有些儿似。

八声甘州 雁

物微生处远，往还来、非但稻梁求。似爱长安日，怕阴山雪，善自为谋。个里幸无鸣镝，随意占沙洲。归兴何妨待，风景和柔。

昔到衡阳回去，今随阳避地，遍海南头。与西川流寓，彼此各淹留。未得云中消息，登望乡台了又登楼。江天阔，几行草字，字字含愁。

烛影摇红 用林卿韵

拙者平生，不曾乞得天孙巧。那回忝扈属车来，岂是齐卿小。此膝不曾屈了。更休文、腰难运掉。前贤样子，表圣宜休，申公告老。

凉簟安眠，绝胜僦直铃声搅。集中大半是诗词，幸没潮州表。月夕花朝咏啸。叹人间、愁多乐少。蓬莱有路，办个船儿，逆风也到。

祝英台近

雨凄迷，风料峭。情绪被花恼。白白红红，满地无人扫。可堪解佩盟寒，坠楼命薄，更杜宇、枝头闲炒。

绿阴绕。青帝结束匆匆，转眼朱明了。

怕与春辞，茗芋玉山倒。后期觉做明年，春
年年好，却不道、明年人老。

最高楼 戊戌自寿

南岳后，累任作祠官。试说与君看。仙
都玉局才交卸，新衔又管华州山。怪先生，
吟胆壮，饮肠宽。

去岁拥、旌旗称太守。今岁带、笏簪称
漫叟。慵入闹，惯投闲。有时拂袖寻种放，
有时摧枕就陈抟。任旁人，嘲潦倒，笑痴顽。

又 再题周登乐府

周郎后，直数到清真。君莫是前身。八
音相应谐韶乐，一声未了落梁尘。笑而今，
轻郢客，重巴人。

只少个、绿珠横玉笛。更少个、雪儿弹
锦瑟。欺贺晏，压黄秦。可怜樵唱并菱曲，
不逢御手与龙巾。且醉眠，篷底月，瓮间春。

又 乙卯生日

吾衰矣，百事且随缘。只字不笺天。几
曾三宿为归计，更巴一岁是希年。记儿时，
闻祖父，说隆乾。

我不与、少年争遇合。你莫共、老僧争
戒腊。靴皴面，帔垂肩。锦袍夺去饶之问，
虎皮撤起付伊川。剩空身，无长物，可飞仙。

又

吾衰矣，不慕勒燕然。不爱画凌烟。此
生惭愧支离叟，何功消受水衡钱。错教人，

占卦气，算流年。

漫摘取、野花簪一朵。更拣取、小词填一个。晞素发，暖丹田。罗浮杖胜如旌节，华阳巾不减貂蝉。这先生，非散圣，即臞仙。

又

辛亥后，六请挂衣冠。甲子始休官。白驹恰则来空谷，青牛早已出函关。笑狂生，还笏易，上竿难。

也莫爱、宫中请内相。也莫爱、堂中呼六丈。但祷祝，要痴顽。懒挥玉斧重修月，不扶铁拐会登山。免飞升，长快活，戏人间。

又

臣少也，豪举泛星槎。飘逸吐天葩。穆陵误奖推儒宿，龙泉曾唤做行家。今耄矣，文跌宕，字麻茶。

同队者、多为公与相。广坐里、都无兄与丈。生有限，望犹奢。补还瞎子重开卷，放教跛子出看花。地行仙，疑是汝，不争些。

又 林中书生日

金闺彦，荷蕢过山前。把钓坐溪边。呼来每得天颜笑，放归犹作地行仙。尽教人，瞋避俗，谤逃禅。

且緘了、淳夫三昧口。更袖了、坡公三制手。宁殿后，不争先。小于卫武二十岁，大于绛老两三年。这高名，并上寿，几人全。

风入松 福清道中作

橐泉梦断夜初长。别馆凄凉。细思二十

年前事，叹人琴、已矣俱亡。改尽潘郎鬓发，
消残荀令衣香。

多年布被冷如霜。到处同床。箫声一去
无消息，但回首、天海茫茫。旧日风烟草树，
而今总断人肠。

又 同前

归鞍尚欲小徘徊。逆境难排。人言酒是
消忧物，奈病馀、孤负金罍。萧瑟捣衣时候，
凄凉鼓缶情怀。

远林摇落晚风哀。野店犹开。多情惟是
灯前影，伴此翁、同去同来。逆旅主人相问，
今回老似前回。

又 癸卯至石塘追和十五年前韵

残更难睡抵年长。晓月凄凉。芙蓉院落
深深闭，叹芳卿、今在今亡。绝笔无求凰曲，
痴心有返魂香。

起来休镊鬓边霜。半被堆床。定归兜率
蓬莱去，奈人间、无路茫茫。缘断漫三弹指，
忧来欲九回肠。

又

攀翻宰树暂徘徊。草草安排。昔人徒步
陈鸡絮，愧公家、仆马觥罍。华表旧愁满目，
黄梁残梦伤怀。

欲将庄列等欢哀。对卷慵开。凭高指点
虚无路，问何年、辽鹤归来。宿酒得风渐解，
小舆待月同回。

临江仙 己酉和实之灯夕

玉笛钿车当日事，东涂西抹都曾。等闲

曲子压和凝纵游非草草，已醉强惺惺。

今向三家村送老，身如罢讲吴僧。高楼百尺不须登。半炉烧叶火，一盏勘书灯。

又 县圃种花

落魄长官江海客，少豪万里寻春。而今憔悴向溪滨。断无觞咏兴，惟有簿书尘。

手插海棠三百本，等闲妆点芳辰。他年绛雪映红云。丁宁风与月，记取种花人。

又

庚子重阳，余以漕摄帅，会前帅唐伯玉、前漕黄成父于越王台。明年是日，寓海丰县驿作

去岁越王台上饮，席间二客如龙。凭高吊古壮怀同。马嘶千嶂暮，乐奏半天中。今岁三家村市里，故人各自西东。菊花时节酒樽空。可怜双雪鬓，禁得几秋风。

又 潮惠道中

不见仙湖能几日，尘沙变尽形容。夜来月冷露华浓。都忘茅屋下，但记画船中。

两岸绿阴犹未合，更须补竹添松。最怜几树木芙蓉。手栽才数尺，别后为谁红。

浪淘沙 丁未生日

去岁诣公车。天语勤渠。绛纱玉斧照寒儒。恰似昔人曾梦到，帝所清都。

骨相太清臞。谪堕须臾。今年黄敕换称呼。只为此翁霜鬓秃，老不中书。

又

早岁类寒蛩。晚节遭逢。曾开黄卷侍重瞳。归去青藜光照牖，阶药翻红。

出昼颇匆匆。主眷犹浓。除官全似紫阳翁。换个新街头面改，又似包公辞郡得小龙。

又

纸帐素屏遮。全似僧家。无端霜月闯窗纱。唤起玉关征戍梦，几叠寒笳。

岁晚客天涯。短发苍华。今年衰似去年些。诗酒新来俱倚阁，孤负梅花。

又

叠嶂碧周遮。游子思家。掩藏白发赖乌纱。落日倚楼千万恨，社鼓城笳。

老去淡生涯。虚掷年华。腊茶孟子太清些。待得痴儿公事毕，谢了梅花。

又 素馨

目力已茫茫。缝菊为囊。论衡何必帐中藏。却爱素馨清鼻观，采伴禅床。

风露送新凉。山麝开房。旋吹银烛闭华堂。无奈纱厨遮不住，一地闻香。

凤凰阁

元规端委，得似幼舆丘壑。人言此辈宜高阁。几载种天随菊，采庞公药。龙尾道。难安汗脚。

浮荣菌蕈，选甚庶官从橐。对床句、子

全宋词 刘克庄

真佳作。安用羨伊结驷，叹侏罗雀。呼便了、沽来共酌。

法驾导引

樵柯烂，丹灶熟，一跳出红尘。斗紫一双龙奋蛰，帝青九万里为程。赤脚踏层云。

鞭鸾上，骑麟下，彷彿睹昆仑。洒马鬃泉苏赤地，翻蟾滴水涨沧溟。笑杀懵仙人。

一翦梅 袁州解印

陌上行人怪府公。还是诗穷。还是文穷。下车上马太匆匆。来是春风。去是秋风。

阶衔免得带兵农。嬉到昏钟。睡到斋钟。不消提岳与知宫。唤作山翁。唤作溪翁。

又 余赴广东，实之夜饯于风亭

束纆宵行十里强。挑得诗囊。抛了衣囊。天寒路滑马蹄僵。元是王郎。来送刘郎。

酒酣耳热说文章。惊倒邻墙。推倒胡床。旁观拍手笑疏狂。疏又何防。狂又何妨。

踏莎行 甲午重九牛山作

日月跳丸，光阴脱兔。登临不用深怀古。向来吹帽插花人，尽随残照西风去。老矣征衫，飘然客路。炊烟三两人家住。欲携斗酒答秋光，山深无觅黄花处。

又 巧夕

驱鹊营桥，呼蟾出海，朝朝暮暮遥相望。
谁知风雨此时来，银河便有些波浪。

玉兔迷离，金鸡嘲哳，二星无语空惆怅。
元来上界也多魔，天孙长怨牵牛旷。

玉楼春 戏林推

年年跃马长安市。客舍似家家似寄。青
钱换酒日无何，红烛呼卢宵不寐。

易挑锦妇机中字。难得玉人心下事。男
儿西北有神州，莫滴水西桥畔泪。

鹊桥仙 戊戌生朝

金风淅淅，银河淡淡，长少群贤毕会。
平生心事曲生知，怪此夕、惺惺相对。

玄花生眼，新霜点鬓，不肯遮藏老态。
人间何处有仙方，擘划得、二三百岁。

又 桃巷弟生日

御屏录了，冰衔换了，酷似香山居士。
草堂丹灶莫留他，且领取、忠州刺史。

移来芳树，摘来珍果，压尽来禽青李。
三千年一荐金盘，又不是、玄都栽底。

又 答桃巷弟和篇

阁中芸冷，观中桃谢，谁问贞元朝士。
吾宗一句好书绅，但记取、毋污青史不交平
勃，不游田窦，也不朋他牛李。平章此去似

何人，似洛社。戴花舞底。

又 林侍郎生日

出通明殿，入耆英社，谁似侍郎洪福。
掌中元自有三珠，更检校、诸孙夜读。

管他莱相，管他鹤相，留我本来面目。
希夷一枕未曾醒，笑人世、几回翻局。

又 居厚弟生日

俱登瀛馆，俱还洛社，各自健如黄犊。
不消外监与留台，也不要、嵩山崇福。

我如原父，君如贡父，且把汉书重读。
韩公当局等闲过，又看到、温公当局。

又 乡守赵丞相生日

去年无麦，今年多稼，尽是君侯心地。
向来寺寺总拘桩，今有不拘桩底寺。

省仓展日，米场镌价，万落千村蒙惠。
更将补纳放宽些，便是个、西京循吏。

又 庚申生日

香芸辟蠹，青藜烛阁，天上宝书万轴。
前回读得未精详，更罚走、一遭重读。

松风如故，丹炉如故，坐阅人间陵谷。
回头调戏窃桃儿，且宁耐、等他桃熟。

又 足痛

有时块坐，有时扶起，门外草深三尺。
山禽肯唤我为歌，句句道、哥行不得。

此儿害跛，群儿拍手，次第加公九锡。
不消长麈短辕车，但乞取、一枝鹤膝。

又 生日和居厚弟

女孙笄珥，男孙袍笏，少长今朝咸集。
且留晚节伴寒香，莫要似、春华性急。

大招吟了，巫咸下了，未爱修门重入。
我依不做佛漳闽，免大雪、庭中呆立。

又 林卿生日

一封奏御，九重知己，不假吹嘘送上。
从今稳稳到蓬莱，三万里、没些风浪。臣年
虽老，臣卿尚少，一片丹心葵向。何须远比
马宾王，且做取、本朝种放。

又 居厚生日

我如龚胜，君如龚舍，拂袖同归乡里。
共骑竹马有谁存，总唤入、耆英社里。

苍华尚黑，黄婆方旺，争问翁年今几。
一门两个老人星，直看见、孙儿生子。

又 乡守赵计院生日

蒲鞭渐弛，鋤筒渐少，安用知他帘外。
从今也莫察渊鱼，做到不忍欺田地。

四民香火，五营笳吹，来献一杯寿水。
大家赞祝太夫人，长伴取、鲁侯燕喜。

柳梢青 贺方听蛙八十

申白苛留。绮园浪出，老不知羞。输与
先生，一枝鹤膝，一领羊裘。

便教赐履营丘。争似把、渔竿到头。冷
落磻溪，张皇牧野，著甚来由。

鹧鸪天 腹疾困睡和朱希真词

前度看花白发郎。平生痼疾是清狂。幸
然无事污青史，省得教人奏赤章。

游侠窟，少年场。输他群谢与诸王。居
人不识庚桑楚，弟子谁从魏伯阳。

又 戏题周登乐府

诗变齐梁体已浇。香奁新制出唐朝。纷
纷竞奏桑间曲，寂寂谁知爨下焦。

挥彩笔，展红绡。十分峭措称妖娆。可
怜才子如公瑾，未有佳人敌小乔。

卜算子 惜海棠

尽是手成持，合得天饶借。风雨于花有
底雠，著意相陵藉。

做暖逼教开，做冷催教谢。不负明年花
下人，只负栽花者。

又

片片蝶衣轻，点点猩红小。道是天公不
惜花，百种千般巧。

朝见树头繁，暮见枝头少。道是天公果
惜花，雨洗风吹了。

又

乱似盎中丝，密似风中絮。行遍茫茫禹
迹来，底是无愁处。

好客挽难留，俗事推难去。惟有翻身入

醉乡，愁欲来无路。

又 良翁礼部生日

开阁广延贤，负宸勤求旧。应念南宫老舍人，闲袖丝纶手。

两制必当仁，五福无过寿。且喜新年不要□，天要开元祐。

又 曹守生朝十二月初六日

东叟宁馨儿，南国循良守。先把炉熏祝帝尧，次祝君侯寿。

广致米商船，多酿兵厨酒。客有须眉似盖延，许至华堂否。

又 燕

已怪社衎期，尚喜巢如故。过了清明未肯来，莫被春寒误。

常傍画檐飞，忽委空梁去。忘却王家与谢家，别有衔泥处。

又 茉莉

老圃献花来，异域移根至。相对炎官火伞中，便有清凉意。

淡薄古梳妆，娴雅仙标致。欲起涪翁再品花，压了山矾弟。

朝天子

宿雨频飘洒。欢喜西畴耕者。终朝连夜。有珠玑鸣瓦。

渐白水、青秧鸥鹭下。老学种花兼学稼。

心两挂。这几树、海棠休也。

清平乐 五月十五夜玩月

纤云扫迹。万顷玻璃色。醉跨玉龙游八极。历历天青海碧。

水晶宫殿飘香。群仙方按霓裳。消得几多风露，变教人世清凉。

又

风高浪快。万里骑蟾背。曾识姮娥真体态。素面元无粉黛。

身游银阙珠宫。俯看积气濛濛。醉里偶摇桂树，人间唤作凉风。

又 赠陈参议师文侍儿

宫腰束素。只怕能轻举。好筑避风台护取。莫遣惊鸿飞去。

一团香玉温柔。笑颦俱有风流。贪与箫郎眉语，不知舞错伊州。

又 丹阳舟中作

休弹别鹤。泪与弦俱落。欢事中年如水薄。怀抱那堪作恶。

昨宵月露高楼。今朝烟雨孤舟。除是无身方了，有身长有闲愁。

又 居厚弟生日

冰轮万里。云卷天如洗。先向海山生大士。却诞卯金之子。

冰盆荔子堪尝。胆瓶茉莉尤香。震旦人人炎热。补陀夜夜清凉。

又 居厚弟生日

人间喘汗。无计翻银汉。有个至人来震旦。宴坐补陀岩畔。

吾闻福寿难量。待看海底生桑。乞取净瓶一滴，普教大地清凉。

好事近 壬戌生日和居厚弟

老不计生朝，惭愧阿连书尺。雪鬓霜髭不管，管眼腰黄赤。

待将心事自笺天，莫费子公力。乞赐先生处士，换一张黄敕。

菩萨蛮 戏林推

小鬟解事高烧烛。群花围绕搏蒲局。道是五陵儿。风骚满肚皮。

玉鞭鞭玉马。戏走章台下。笑杀灞桥翁。骑驴风雪中。

忆秦娥 暮春

游人绝。绿阴满野芳菲歇。芳菲歇。养蚕天气，采茶时节。

枝头杜宇啼成血。陌头杨柳吹成雪。吹成雪。淡烟微雨，江南三月。

又 上巳

修禊节。晋人风味终然别。终然别。当时宾主，至今清绝。

等闲写就兰亭帖。岂知留与人闲说。人闲说。永和之岁，暮春之月。

又

泥滑滑。一声声唤征鞍发。征鞍发。客亭杨柳，不禁攀折。

荀郎衣上香初歇。萧郎心下书难说。书难说。霎时吹散，一生愁绝。

又

春醒薄。梦中球马豪如昨。豪如昨。月明横笛，晓寒吹角。

古来成败难描摸。而今却悔当时错。当时错。铁衣犹在，不堪重著。

又

梅谢了。塞垣冻解鸿归早。鸿归早。恁伊问讯，大梁遗老。

浙河西面边声悄。淮河北去炊烟少。炊烟少。宣和宫殿，冷烟衰草。

西江月 腰痛，旧传陈复斋名方，岁久失之

思邈方书去失，休文老病来攻。新年筋力太龙钟。腰似铁猫儿重。

雅拜怎生搢笏，徐行也要扶筇。田翁邀饮不能从。难伴诸公上雍。

朝中措 元质侍郎生日

恰为仙佛做生辰。公又绂麒麟。黑白几枰屡变，丹青百奏如新。

都门钱底，洛中画底，莫是前身。虽老不扶灵寿，有时更上蒲轮。

又 艮翁生日

受持鼻祖五千言。留得谷神存。伴我赋诗茅屋，饶渠待诏金门。

此翁岁晚，有书充栋，有酒盈樽。君看多花早落，孰如仙李蟠根。

又 艮翁生日

仙风道骨北山翁。万卷著胸中。涣若宦情冰释，作□醉面桃红。

千林冻槁，一枝雪艳，消息先通。颜色□青精饭，姓名在碧纱笼。

又 陈左藏生日

海天万顷碧玻璃。风露洗炎曦。鹦鹉绿毛导从，蟾□雪色追随。

分明来处，补陀大士，先后同时。觅取善财童子，膝边要个孙儿。

水调歌头 和西外判宗湖楼韵

君看郭西景，浑不减孤山。飞楼突兀百尺、轮奂侈前观。绝唱新词寡和，堕泪旧碑无恙，往事付惊澜。不见辽鹤返，惟对水鸥

闲。

又何必，珠翠盛，管弦欢。唾壶麈尾潇洒，领客上高寒。丞相功存宗庙，祭酒义兼家国，世事尚相关。风月寓意耳，莫作晋人看。

贺新郎 琼花

辜负东风约。忆曾将、淮南草木、笔端笼络。后土祠中明月夜，忽有瑶姬跨鹤。迥不比、水仙低弱。天上人间惟一本，倒千钟、琼露花前酌，追往事，怎忘却。

移根应费仙家药。漫回头、关山信断，堡城笳作。问讯而今平安否，莫遣玉箫惊落。但画卷、依稀描著白发愧无渡江曲，与君家、子敬相酬酢。新旧恨，两交错。

满江红 寿汤侍郎

晓色朦胧，佳色在、黄堂深处。记当日、霓旌飞下，鸾翔凤翥。兰省旧游隆注简，竹符新剖宽忧顾。有江南、千里好溪山，留君住。

牙板唱，花裯舞。云液滑，霞觞举。顾朱颜绿鬓，年年如许。见说相门须出相，何时再筑沙堤路。看便飞、丹诏日边来，朝天去。

水调歌头 寿胡详定

风露洗玉宇，星斗灿银潢。云间笙鹤来

下，人世变凄凉。九转金丹成后，一朵红云深处，玉立侍虚皇。却笑跨夺子，草草梦黄梁。

君记否，齐桓□，鲁灵光。中原公案未了，直下欠人当。试问玉门关外，何似金銮殿上，此段及平章。富贵倘来耳，万代姓名香。

乳燕飞 寿干官

风流八十，是人间妆点，孩儿眉额。再著三星添上面，又是一般奇特。且置零头，举将成数，算起君须识。从今十倍，恰当彭祖八百。

更把百倍添来，庄椿身世，又十头添撇。况迈非熊年纪在，管取方来勋业。子既生孙，孙还又子，堆几床牙笏。瑶池会宴，饱看几度桃实。

水龙吟 寿赵癯斋

昔人风调谁高，二疏盛日还乡里。公卿祖道，百城围尽，争传佳事。闻自垂车日，都门外、送车凡几。今世无工，尽置之勿道，焜煌处、独青史。

佳甚东阳山水。是昔时、钓游某地。风流脱似，洛中耆老，一人而已。好为霞觞酌，正庭阶、彩衣荣侍。便明朝有诏，启门解说，值先生醉。

刘 澜

庆宫春 重登峨眉亭感旧

春翦绿波，日明金渚，镜光尽浸寒碧。
喜溢双蛾，迎风一笑，两情依旧脉脉。那时
同醉，锦袍湿、乌纱敲侧。英游何在，满目
青山，飞下孤白。

片帆谁上天门，我亦明朝，是天门客。
平生高兴，青莲一叶，从此飘然八极。矾头
绿树，见白马、书生破敌。百年前事，欲问
东风，酒醒长笛。

瑞鹤仙 海棠

向阳看未足。更露立阑干，日高人独。
江空佩鸣玉。问烟鬟霞脸，为谁膏沐。情闲
景淑。嫁东风、无媒自卜。凤台高，贪伴吹
笙，惊下九天霜鹄。

红蹙。花开不到，杜老溪庄，已公茅屋。
山城水国。欢易断，梦难续。记年时马上，
人酣花醉，乐奏开元旧曲。夜归来，贺锦漫
天，绛纱万烛。

齐天乐 吴兴郡宴遇旧人

玉钗分向金华后，回头路迷仙苑。落翠惊风，流戏逐水，谁信人间重见。花深半面。尚歌得新词，柳家三变。绿叶阴阴，可怜不似那时看。

刘郎今度更老，雅怀都不到，书带题扇。花信风高，苔溪月冷，明日云帆天远。尘缘较短。怪一梦轻回，酒阑歌散。别鹤惊心，感时花泪溅。

买陂塘 游天台雁荡东湖

御风来、翠乡深处，连天云锦平远。卧游已动蓬舟兴，那在芙蓉城畔。巾懒岸。任压顶嵯峨，满鬓丝零乱。飞吟水殿。载十丈青青，随波弄粉，菰雨泪如霰。

斜阳外，也有新妆半面。无言应对花怨。西湖千顷腥尘暗。更忆鉴湖一片。何日见。试折藕占丝，丝与肠俱断。遐征渐倦。当颍尾湖头，绿波彩笔，相伴老坡健。

刘袤

临江仙 补李后主词

樱桃结子春归尽，蝶翻金粉双飞。子规啼月小楼西。玉钩罗幕，惆怅卷金泥。

门巷寂寥人去后，望残烟草低迷。李煜。何时重听玉骢嘶。扑帘飞絮，依约梦回时。

刘南翁

如梦令 春晚

没计断春归路。借问春归何处。莺燕也含愁，总对落花无语。春去。春去。门掩一庭疏雨。

刘锜

鹧鸪天

竹引牵牛花满街。疏篱茅舍月光筛。琉璃盏内茅柴酒，白玉盘中簇豆梅。休懊恼，且开怀。平生赢得笑颜开。三千里地无知己，十万军中挂印来。

刘 潜

水调歌头 上曹玮

六郡酒泉。

六州歌头 项羽庙

秦亡草昧，刘项起吞并。驱龙虎。鞭寰宇。斩长鲸。扫欃枪。血染彭门战。视馀耳，皆鹰犬。平祸乱。归炎汉。势奔倾。兵散月明。风急旌旗乱，刁斗三更。命虞姬相对，泣听楚歌声。玉帐魂惊。

泪盈盈。恨花无主。凝愁绪。挥雪刃，掩泉扃。时不利。骓不逝。困阴陵。叱追兵。暗鸣摧天地，望归路，忍偷生。功盖世。成闲纪。建遗灵。江静水寒烟冷，波纹细、古木凋零。遣行人到此，追念痛伤情。胜负难凭。

水调歌头

落日塞垣路，风劲戛貂裘。翩翩数骑闲

猎，深入黑山头。极目平沙千里，惟见雕弓白羽，铁面骇骅骝。隐隐望青冢，特地起闲愁。

汉天子，方鼎盛，四百州。玉颜皓齿，深锁三十六宫秋。堂有经纶贤相，边有纵横谋将，不作翠蛾羞。戎虏和乐也，圣主永无优。

刘 清 夫

念奴娇 武夷咏梅

乱山深处，见寒梅一朵，皎然如雪。的
的妍姿羞半吐，斜映小窗幽绝。玉染香腮，
酥凝冷艳、容态天然别。故人虽远，对花谁
肯轻折。

疑是姑射神仙，幔亭宴罢，迤迤停瑶节。
爱此溪山供秀润，饱玩洞天风月。万石丛中，
百花头上，谁与争高洁。粗桃俗李，不须连
夜催发。

沁园春 咏刘篁嶠碧莲，时内子将诞

浅碧芙蓉，素艳亭亭，前身阿娇。记湘
滨露冷，酥容倍洁，华清水滑，酒晕全消。
瑶剪丰肥，云翻碎萼，白羽鲜明时自摇。风
流处，是古香幽韵，时度鲜飙。

琼枝璧月清标。对千朵婵娟倾翠瓢。况
水晶台榭，低迷净绿，冰霜词调，隐约轻桡。
细认金房，钟奇孕秀，已觉青衿横素腰。西
风晚，看花开十丈，玉井非遥。

金菊对芙蓉

沙邑宰绾琴妓，用旧韵戏之

浅拂春山，慢横秋水，玉纤闲理丝桐。
按清冷繁露，淡伫悲风。素弦瑶轸调新韵，
颤翠翘、金簇芙蓉。叠蠲重锁，轻挑慢摘，
特地情浓。

泛商刻羽无穷。似和鸣鸾凤，律应雌雄。
问高山流水，此意谁同。个中只许知音听，
有茂陵、车马雍容。画帘人静，琴心三叠，
时倒金钟。

水调歌头

残腊卷愁去，春至莫闲愁。荣枯会有成
说，无处著机谋。身世石中敲火，富贵草头
垂露，何用苦贪求。三尺布衣剑，千载赤松
游。

忆亲朋，方卯角，总白头。羊肠世路峨
嶮，莫莫且休休。选甚范侯高爵，遮莫陶公
钜产，争似五湖舟。万事付蜗角，止坎谩乘
流。

玉楼春

柳梢绿小眉如印。乍暖还寒犹未定。惜
花长是为花愁，殢酒却嫌添酒病。蝇头蜗角

全宋词 刘清夫

都休竞。万古豪华同一尽。东君晓夜促归期，
三十六番花递信。

刘清之

鹧鸪天 子寿母

柳色青青罩翠烟。花光灼灼映临川。欲知窈窕呈祥日，恰近清明淑景天。浮瑞霭，庆真仙。不须男女祝椿年。异时早约西王母，剩折蟠桃荐寿筵。

青玉案 子寿父

江南十月春风早。见枝上、梅英小。爱日初升清雾晓。绣筵中启，星图高挂，膝下斑衣绕。

今年献寿多欢笑。弄玉新将二雏好。此曲尊前何所祷。十分康乐，十分强健，一树庄椿老。

刘仁父

踏莎行 赠傀儡人刘师父

不假牵丝 ,何劳刻木。天然容貌施妆束。
把头全仗姓刘人 ,就中学写秦城筑。
伎俩优长 ,恢谐软熟。当场喝采醒群目。
赠行无以表殷勤 ,特将谢意标芳轴。

刘山老

满庭芳

跛子年来，形容何似，俨然一部髭须。
世间许大，拐上做工夫。选甚南州北县，逢
著处、酒满葫芦。醺醺醉，不知明日，何处
度朝晡。

洛阳，花看了，归来帝里，一事全无。
又还与瓠羹，再作门徒。蓦地思量下水，浪
网上、芦席横铺。呵呵笑，睢阳门外，有个
大南湖。

刘省斋

沁园春 赠较弓会诸友

男子才生，桑弧蓬矢，志期古同。况平生慷慨，胸襟磊落，弛张洞晓，经艺该通。笔扫云烟，腹储兵甲，志气天边万丈虹。行藏事，笑不侯李广，射石夸雄。

仰天一问穷通。叹风虎云龙时未逢。羨傅岩版筑，终符求象，渭滨渔钓，果兆非熊。白额未除，长鲸未脍，臂健何嫌二石弓。天山定，任扶桑高挂，凌阁图功。

刘使君

醉亭楼

平生性格 ,随分好些春色。沈醉恋花陌。
虽然年老心未老 ,满头花压巾帽侧。鬓如霜 ,
须似雪 ,自嗟恻。

几个相知劝我染 ,几个相知劝我摘。染摘
有何益。当初怕成短命鬼 ,如今已过中年客。
且留些 ,妆晚景 ,尽教白。

刘氏

沁园春

我生不辰 ,逢此百罹 ,况乎乱离。奈恶因缘到 ,不夫不主 ,被擒捉去 ,为妾为妻。父母公姑 ,弟兄姊妹 ,流落不知东与西。心中事 ,把家书写下 ,分付伊谁。

越人北向燕支。回首望、雁峰天一涯。奈翠鬟云软 ,笠儿怎带 ,柳腰春细 ,马性难骑。缺月疏桐 ,淡烟衰草 ,对此如何不泪垂。君知否 ,我生于何处 ,死亦魂归。

刘守

满江红 刘守解任

归去来兮 ,要待足、何时是足。荣对辱、饮
河鼯鼠 ,无过满腹。浴月朝霞红赛锦 ,排云晚
岫青如玉。更修筠、与合抱长松 ,依梅麓。

森画戟 ,漫符竹。舞袖短 ,辕驹局。惟茧
丝堡障 ,医疮剜肉。节对开炉应去也 ,钗头又
有长生箬。算归程、恐到荔枝乡 ,已过熟。

刘 述

家山好

挂冠归去旧烟萝。闲身健，养天和。功名富贵非由我，莫贪他。这歧路、足风波。

水晶宫里家山好，物外胜游多。晴溪短棹，时时醉唱里棱罗。天公奈我何。

刘素香

如梦令

邂逅相逢如故。引起春心追慕。高挂彩
鸾灯，正是儿家庭户。那步。那步。千万来宵
垂顾。

刘天迪

齐天乐 严县尹席上和李观我韵

瑞麟香软飞瑶席 ,吟仙笑陪欢宴。桐影吹香 ,梅阴弄碧 ,一味微凉堪荐。停杯缓劝。记罗帕求诗 ,琵琶遮面。十载扬州 ,梦回前事楚云远。

人生总是逆旅 ,但相逢一笑 ,如此何限。采石宫袍 ,沈香醉笔 ,何似轻衫小扇。流年暗换。甚新雨情怀 ,故园心眼。明日西江 ,斜阳帆影转。

一萼红 夜闻南妇哭北夫

拥孤衾 ,正朔风凄紧 ,毡帐夜生寒。春梦无凭 ,秋期又误 ,迢递烟水云山。断肠处、黄茅瘴雨 ,恨骢马、憔悴只空还。揉翠盟孤 ,啼红怨切 ,暗老朱颜。堪叹扬州十里 ,甚倡条冶叶 ,不省春残。蔡琰悲笳 ,昭君怨曲 ,何预当日悲欢。谩赢得、西邻倦客 ,空惆怅、今古上眉端。梦破梅花 ,角声又报春阑。

虞美人 春残念远

子规解劝春归去。春亦无心住。江南风景正堪怜。到得而今不去、待何年。

无端往事萦心曲。两鬓先惊绿。蔷薇花发望春归。谢了蔷薇、又见楝花飞。

蝶恋花

日暮杨花飞乱雪。宝镜慵拈,强整双鸳结。烧罢夜香愁万叠。穿花暗避阶前月。

凤尾罗衾寒尚怯,却悔当时,容易成分别。闷对枕鸾谁共说。柔情一点蔷薇血。

凤栖梧 舞酒妓

一翦晴波娇欲溜。绿怨红愁,长为春风瘦。舞罢金杯眉黛皱。背人倦倚晴窗绣。

脸晕潮生微带酒。催唱新词,不应频摇手。闲把琵琶调未就。羞郎却又垂红袖。

点绛唇 书事

一笑相逢,依稀似是桃根旧。娇波频溜。悄可灵犀透。

扶过危桥,轻引纤纤手。频回首。何时还又。微月黄昏后。

刘天义

后庭花

云鬟堆绿鸦。罗裙籁绛纱。巧锁眉颦柳，
轻匀脸衬霞。小妆髻。凌波罗袜，洞天何处
家。

刘 天 游

氏州第一

冰缩寒流，川凝冻霭，前回鹭渚冬晚。
燕阁红炉，驼峰翠釜，曾忆花柔酒软。云海
沧洲，甚又寄、南来客雁。洒雪朱门，回桡
剡曲，镜华霜满。

万里银霄凝望眼。恁吟袖、画阑空暖。
树带潮墟，笳鸣古戍，簇仲宣幽怨。想愁思、
春近也，随宫绣、时宽一线。昨夜扁舟，梦
湖山、眉横黛浅。

刘彤

临江仙

千里长安名利客，轻离轻散寻常。难禁三月好风光。满阶芳草绿，一片杏花香。

记得年时临上马，看人眼泪汪汪。如今不忍更思量。恨无千日酒，空断九回肠。

刘望之

鹊桥仙

只应将巧畀人间 ,定却向、人间乞取。

如梦令

休絮。休絮。我自明朝归去。

水调歌头

劝子一杯酒 ,清泪不须流。人间千古 ,俯仰如梦说扬州。何况楚王台畔 ,为雨为云无限 ,人事付轻沤。聚散随来去 ,天地有虚舟。

谪仙人 ,解金龟 ,换美酒。载与君游 ,流水曲觞且賸酬。麾盖飞迎过霭 ,江滨响振歌喉 ,拚醉又何求。三万六千日 ,日日此优游。

刘仙伦

贺新郎

翠盖笼娇面。记当年、沈香亭北，醉中曾见。见了风流倾国艳，红紫纷纷过眼。算好处、何嫌春晚。谁把天香和晓露，倩东君、特地匀娇脸。千万朵，开时遍。

隔花听取提壶劝。道此花过了，春归蝶愁莺怨。挽住东君须醉倒，花底不妨留恋。待唤取、笙歌一片。最爱就中红一朵，似状元、得意春风殿。还惹起，少年恨。

木兰花慢 秋日海棠

渐秋空向晚，被风雨、趲重阳。正木落疏林，海棠枝上，忽见红妆。料应妒他兰菊，任年年，独甚占秋光。故把春风娇面，向人逞艳呈芳。

看来毕竟此花强。只是欠些香。诮一似当年，五陵公子，却厌膏粱。肯来水边竹下，与幽人、相对说凄凉。只恐夜深花睡，五更微有清霜。

菩萨蛮

东风去了秦楼畔。一川烟草无人管。芳
树雨初晴。黄鹂三两声。

海棠花已谢。春事无多也。只有牡丹时。
知他归不归。

贺新郎 寿王侍郎简卿

某兹者共审某官道协降神，祥开诞旦。五百年
而名世，允谓间生；八千岁而为春，定膺难老。俯
仰都无於愧怍，谤讟何损于忠良。却雁鹜而暂得闲
身，对龟鹤而永绥眉寿。辄陈俚语，上祝台躔。狂
斐是惭，览掷为幸。

小队停钲鼓。向沙边、柳下维舟，庆公
初度。平尽群蛮方易镇，此事多应有数。奈
自古、功成人妒。君看乐羊中山役，任谤书、
盈筐终无据。千载下，竟谁与。

诗中带得西山雨。指天台，雁荡归欤，
寿乡深处。缓急朝廷须公出，更作中流砥柱。
笑痴騃、纷纷儿女。多少人间不平事，有皇
天、老眼能区处。挥玉斝，听金缕。

又 题吴江

重唤松江渡。叹垂虹亭下，销磨几番今
古。依旧四桥风景在，为问坡仙甚处。但遗
爱、沙边鸥鹭。天水相连苍茫外，更碧云、
去尽山无数。潮正落，日还暮。

十年到此长凝伫。恨无人、与共秋风，

鲙丝莼缕。小转朱弦弹九奏，拟致湘妃伴侣。
俄皓月、飞来烟渚。恍若乘槎河汉上，怕客星、
犯斗蛟龙怒。歌欸乃，过江去。

又 赠建康郑玉脱籍

郑玉非娼女。叹尘缘未了，飘零被春留住。
肠断胭脂坡下路。成甚心情意绪。生怕入、梨园歌舞。
寂寞阳台云雨散，算人间、谁是吹箫侣。空买断，两眉聚。

新来镜里惊如许。暗伤怀、莺老花残，几番春暮。
事逐孤鸿都已往，月落千山杜宇。念修竹、天寒何处。
不念琐窗并绣户，妾从前、命薄甘荆布。谁为作，解绂主。

念奴娇 送张明之赴京西幕

觥觥东下，望西江千里，苍茫烟水。试问襄州何处是，
雉堞连云天际。叔子残碑，卧龙陈迹，遗恨斜阳里。
后来人物，如君瓌伟能几。

其肯为我来耶，河阳下士，正自强人意，勿谓时平无事也，
便以言兵为讳。眼底山河，楼头鼓角，都是英雄泪。功名机会，
要须闲暇先备。

又 感怀呈洪守

吴山青处，恨长安路断，黄尘如雾。荆楚西来行堑远，
北过淮堧严扈。九塞貔貅，三关虎豹，空作陪京固。天高难叫，
若为得诉忠语。

追念江左英雄，中兴事业，枉被奸臣误。

不见翠华移跸处，枉负吾皇神武。击楫凭谁，问筹无计，何日宽忧顾。倚筇长叹，满怀清泪如雨。

又 长沙赵帅席上作

西风何事，为行人扫荡，烦襟如洗。垂涨蒸澜都卷尽，一片潇湘清泚。酒病惊秋，诗愁入鬓，对景人千里。楚宫故事，一时分付流水。

江上买取扁舟，排云涌浪，直过金沙尾。归去江南丘壑处，不用来寻月姊。风露杯深，芙蓉裳冷，笑傲烟霞里。草庐依旧，卧龙知为谁起。

满江红 题快阁和徐宰韵

快阁东西，鸥边问、晚晴可喜。鸥解语、既盟之后，两翁曾倚。笛弄惯听黄鲁直，履声深识徐渊子。添我来、相对两忘机，真相似。

也不种，闲桃李。也不玩，佳山水。有新诗字字，爱民而已。一片心闲秋水外，三年人在春风里。涨一篙、江水送归鸿，明朝是。

又 春晚

著意留春，留不住、春归难恋。最苦是、梅天烟雨，麦秋庭院。嫩竹阴浓莺出谷，柔桑采尽蚕成茧。奈沈腰、宽尽有谁知，难消遣。

幽阁恨，双眉敛。香笺寄，飞鸿远。向

全宋词 刘仙伦

风帘羞见，一双归燕。翠被闲将情做梦，青楼赚得恩成怨。对尊前、莫惜唤琼姬，持杯劝。

霜天晓角 题蛾眉亭

倚空绝壁。直下江千尺。天际两蛾凝黛，愁与恨、几时极。

暮潮风正急。酒醒闻塞笛。试问谪仙何处，青山外、远烟碧。

诉衷情 客中

征衣薄薄不禁风。长日雨丝中。又是一年春事，花信到梧桐。

云漠漠，水溶溶。去匆匆。客怀今夜，家在江西，身在江东。

江神子 洪守出歌姬就席口占

华堂深处出娉婷。语声轻。笑声清。燕语莺啼，一一付春情。恰似洛阳花正发，见花好，不知名。

金瓯盛酒玉纤擎。满盈盈。劝深深。不怕主人，教你十分斟。只怕酒阑歌罢后，人不见，暮山青。

系裙腰 愁别

山儿矗矗水儿清。船儿似叶儿轻。风儿

全宋词 刘仙伦

更没人情。月儿明。厮合造、送人行

眼儿赧赧泪儿倾。灯儿更冷清清。遭逢
著雁儿，又没前程。一声声。怎生得、梦儿
成。

永遇乐 春暮有怀

青幄蔽林，白毡铺径，红雨迷楚。昼阁
关愁，风帘卷恨，尽日萦情绪。阳台云去，
文园人病，寂寞翠尊雕俎。惜韶容、匆匆易
失，芳丛对眼如雾。

巾敲润裊，衣宽凉渗，又觉渐回骄暑。
解箨吹香，遗丸荐脆，小芰浮鸳浦。画栏如
旧，依稀犹记，伫立一钩莲步。黯销魂，那
堪又听，杜鹃更苦。

菩萨蛮 怨别

吹箫人去行云杳。香篝翠被都闲了。叠
损缕金衣。是他浑不知。

冷烟寒食夜。淡月梨花下。犹自软心肠。
为他烧夜香。

江神子

东风吹梦落巫山。整云鬟。却霜纨。雪
貌冰肤，曾共控双鸾。吹罢玉箫香雾湿，残
月坠，乱峰寒。解珰回首忆前欢。见无缘。
恨无端。憔悴萧郎，赢得带围宽。红叶不传

全宋词 刘仙伦

天上信，空流水，到人间。

蝶恋花

小立东风谁共语。碧尽行云，依约兰皋暮。谁问离怀知几许。一溪流水和烟雨。

媚荡杨花无著处。才伴春来，忙底随春去。只恐游蜂黏得住。斜阳芳草江头路。

一剪梅

唱到阳关第四声。香带轻分。罗带轻分。杏花时节雨纷纷。山绕孤村。水绕孤村。

更没心情共酒尊。春衫香满，空有啼痕。一般离思两销魂。马上黄昏。楼上黄昏。

沁园春 庆彭司户

闻道参军，今日垂弧，胜如去年。正新颁蓝绶，天香芬馥，初开黄牒，御墨新鲜。鼻祖登科，已逾百载，衣钵于今喜再传。图南事，看抟风九万，击水三千。

官曹小试民编。有奕世甘棠在道边。向樽前有兴，细斟清醪，琴中得趣，缓拂朱弦。东观酬书，西垣草制，此去掀腾好看鞭。应难老，信君家眉寿，自有钱山。

好事近 庆祝司理

春事恰平分，南极夜来星瑞。闻道都曹

初度，拥万红千翠。

长才杰出应时须，一郡赖纲纪。看即诏还入覲，上鸳行班里。

沁园春 寿共大卿恕斋治易

周易一书，更三圣人，深切著明。凡变通动静，有形有象，盈虚消息，时止时行。天相名卿，日探妙趣，往古来今无两心。褰帷暇，手韦编不置，聊以娱情。

如今祝寿殷勤。请得以推评理致新。看九重有命，晋侯锡马，三公论道，鼎足承君。同厥震男，拔乎泰茹，玉笋班中聊步什。贤奋建，定丰亨豫大，扬夬王庭。

喜迁莺 寿令人

祥云笼昼。正梅花弄粉，岁寒时候。长记今朝，瑶台仙子，降作人间明秀。四德生来全备，绿鬓年年依旧。更满目，儿妇儿孙，森罗前后。

知否。笙歌奏。去岁芳筵，好事今年又。寿烛高烧，寿词齐唱，满劝长生酒。元自荣华富贵，况复康宁福寿。愿此去，等鹤算龟龄，天长地久。

鹧鸪天

帘幕祥风动玉钩。凤箫声彻瑞烟浮。萧

全宋词 刘仙伦

郎玉女来相会，今日齐眉醉玉楼。

同富贵、共风流。一封花诰一封侯。更须有子腰金斗，镜里双鸾到白头。

满江红 寿郡幕

过了烧灯，杨柳外、无边春色。庆初度、香浮东阁，瑞呈南极。翰墨场中推老手，曾魁多士催勅敌。到而今、官簿在天台，神仙籍。

和月倚，南坡石，滴露点，床头易。看白头红颊，目光摇碧。富贵康强仍有子，人生似此应难得。更摩挲、铜狄说当年，真消息。

好事近 二月十八日

桃李绿阴浓，屈指中和三六。恰是仙翁初度，霭瑞烟芬馥。

歌喉宛转绕华堂，总是长生曲。他日临清亭上，看儿孙朝服。

满江红 寿留守正 月初三

凤历更端，才信宿、年华方好。深院宇、祥风飘荡，瑞烟缭绕。闻道君侯当诞日，欢声解压春寒峭。更九衢、烟火近元宵，闻嬉笑。

人正在，蓬莱岛。烧绛蜡，斟清醪。听

全宋词 刘仙伦

清歌艳曲，一声云杪。奠枕江淮无一事，留都宫殿千门晓。看赐环、千岁侍君王，人难老。

念奴娇 寿尚倅 三月初一

一番春事，到芗林、更两日重三节。百品名花饶笑处，喜遇诞弥佳月。巢叶灵龟，舞琴野鹤，总是千年物。来为公寿，纶巾长映华发。

平生圣处工夫，道□深味，胸次真冰雪。高蹈丘园还谢了，枚叟蒲轮朝谒。时上篮舆，相随孙子，庆满床簪笏。南丰道价，敬持一瓣香爇。

满江红 寿胡漕 六月初一

夜半天风，吹佩玉、列仙初度。又恰是、人间六月，叶萸方吐。黄纸除书惊乍到，青毡旧物欣重睹。拥皇华、玉节待清秋，江南去。

招壮士，增王旅。漕廩粟，资淮浦。济江南嘉绩，久闻当宁。明弼堂前山满眼，来鸿庭后花无数。看召环、即到寿星边，朝明主。

醉蓬莱 寿七十一 九月十八

昨长庚入梦，昴宿呈祥，岳神钟秀。降

全宋词 刘仙伦

产英贤，信道由天祐。萸萸飞三，九秋将暮，
遇称觞时候。香爇沈檀，曲调金缕，满斟春
酒。

试纪绛年，六身二首，甲子方延，才经
八九。款醉蓬莱，寿与天长久。桂子青春，
兰孙方茂，谅箕裘方绍。折桂来秋，成名指
日，家毡复旧。

刘 颀

满庭芳

莺老梅黄，水寒烟淡，断香谁与添温。
宝缸初上，花影伴芳尊。细细轻帘半卷，凭
对阑、山色黄昏。人千里，小楼幽草，何处
梦王孙。

十年，羁旅兴，舟前水驿，马上烟村。
记小亭香墨，题恨犹存。几夜江湖旧梦，空
凄怨、多少销魂。归鸦被，角声惊起，微雨
暗重门。

刘性初

醉蓬莱

喜首夏清和 ,槐绿成阴 ,榴红正朵。仙鹤
蹁跹 ,来致千秋贺。南极长明 ,后天不老 ,瑞霭
浮青琐。满树蟠桃 ,瑶池捧献 ,一年一颗。

好敞亭台 ,剩添花柳 ,时醉时歌 ,时行时
坐。受用黄庭 ,宝熟丹田火。晓对青山 ,日吟
白发 ,尽功名江左。戏彩亭边 ,陶陶自得 ,有何
不可。

刘铉

少年游 戏友人与女客对棋

石榴花下薄罗衣。睡起却寻棋。未省高低，被伊春笋，拈了白玻璃。

钏脱钗斜浑不省，意重子声迟。对面痴心，只愁收局，肠断欲输时。

蝶恋花 送春

人自怜春春未去。萱草石榴，也解留春住。只道送春无送处。山花落得红成路。

高处莺啼低蝶舞。何况日长，燕子能言语。付与光阴相客主。晴云又卷西边雨。

乌夜啼 石榴

垂杨影里残红。甚匆匆。只有榴花、全不怨东风。

暮雨急。晓鸦湿。绿玲珑。比似茜裙初染、一般同。

刘学箕

松江哨遍

长桥，天下绝景也。松江太湖，举目千里，风涛不作，水面砥平。归帆征棹，相望于黄芦烟草之际。去来乎桥之左右者，若非人世，极画工之巧每来维舟，未尝即去，徜徉延伫，意尽然后行。至欲作数语以状风景胜概，辞不意逮，笔随句阁，良可慨叹。己未冬，自云阳归闽。桥西，披衣登垂虹。时夜将半，雪月交辉。水天一色，顾影长啸，不知身之寄于旅。返而登舟，谓偕行者周生曰：佳哉斯景也，讵可无乐乎？于是相与破霜蟹，斫细鳞，持两螯，举大白，歌赤壁之赋。酒酣乐甚。周生请曰：今日之事，安可无一言以识之？余曰：然。遂櫟括坡仙之语，为哨遍一阕，词成而歌之。生笑曰：以公之才，岂不能自寓意数语，而乃缀缉古人之词章，得不为名文疵乎？余曰：不然。昔坡仙盖尝以靖节之词寄声乎此曲矣，人莫有非之者。余虽不敏，不敢自亚于昔人。然拜心效颦，不自知丑，盖有之矣。而寓意于言之所乐，则虽贤不肖抑何异哉。今取其言之足以寄吾意者，而为之歌，知所以自乐耳，子何哂焉

木叶尽凋，湖色接天，雪月明江水。凌万顷、一苇纵所之。若凭虚驭风仙子。听洞箫、绵延不绝如缕，馀音袅袅游丝曳。乃举

酒赋诗，玉鳞霜蟹，是中风味偏美。任满头堆絮雪花飞。更月澹篷窗冻云垂。山郁苍苍，桥卧沈沈，夜鹊惊起。

噫。倚兰桨兮。我今恍惚遗身世。渔樵甘放浪，蜉蝣然、寄天地。叹富贵何时。功名浪语，人生寓乐虽情尔。知逝者如斯。盈虚如彼，则知变者如是。且物生宇宙各有司。非已有纤毫莫得之。委吾心、耳目所寄。用之而不竭，取则不吾禁，自色自声，本非有意。望东来孤鹤缟其衣。快乘之、从此仙矣。

蝶恋花 北津夜雪

灯火已收正月半。一夜东风，吹得寒威转。怪得美人贪睡暖。飞瑛积玉千林变。

道是柳绵春尚浅。比著梅花，花已都零乱。漠漠一天迷望眼。多情更把征衣点。

贺新郎

代黄端夫 白牡丹，京师妓李师师也。画者曲尽其妙，输棋者赋之

午睡莺惊起。鬓云偏、髻鬆未整，凤钗斜坠。宿酒残妆无意绪，春恨春愁如水。谁共说、厌厌情味。手展流苏腰肢瘦，叹黄金、两钿香消臂。心事远，仗谁寄。

帘栊渐是槐风细。对梧桐、清阴满院，夏初天气。回首春空梨花梦，屈指从头暗记。叹薄幸、抛人容易。目断孤鸿沈双鲤，恨萧郎、不寄相思字。幽恨积，黛眉翠。

全宋词 刘学箕

忆王孙 清明病酒

淑景韶光晴昼。帘外雨、欲无还有。流莺枝上转新声，梦初醒、厌厌病酒。

天边碧草凝情久。思旧事、不堪搔首。怀人有恨水云深，又绿暗、桥西柳。

恋绣衾 闺怨

柳絮风翻高下飞。雨笼晴、香径尚泥。女伴笑、踏青好，凤钗偏、花压鬓垂。

乱莺双燕春情绪，搅愁心、欲诉向谁。人问道、因谁瘦，捻青梅、闲敛黛眉。

惜分飞 柳絮

池上楼台堤上路。尽日悠扬飞舞。欲下还重举。又随胡蝶墙东去。

糝径飘空无定处。来往绿窗朱户。却被春风妒。送将蛛网留连住。

浣溪沙 木犀

天上仙人萼绿华。何年分种小山家。九秋风露溢窗纱。

密密翠罗攒玉叶，团团黄粟刻金花。一枝归插鬓云斜。

贺新郎

近闻北虏衰乱，诸公未有劝上修饬内治以待外攘者。书生感愤不能已，用辛稼轩金缕词韵述怀。此词盖鹭鸶林寄陈同甫者，韵险甚。稼轩自和凡三篇，语意俱到。捧心效颦，辄不自揆，同志毋以其迂而废其言

往事何堪说。念人生、消磨寒暑。漫营裘葛。少日功名频看镜，绿鬓鬢髻未雪。渐老矣、愁生华发。国耻家仇何年报，痛伤神、遥望关河月。悲愤积，付湘瑟。

人生未可随时别。守忠诚、不替天意，自能符合。误国诸人今何在，回首怨深次骨。叹南北、久成离绝。中夜闻鸡狂起舞，袖青蛇、戛击光磨铁。三太息，眦空裂。

同前 再韵赋梅

东阁凭诗说。对丰姿、飘然杖屦，澹然巾葛。竹外一枝斜更好，玉质冰肌粲雪。谁折向、满头宣发。水驿云窗烟庭院，更宜晴、宜雨还宜月。霜夜永，景萧瑟。

孤芳夔与群芳别。陇程遥、攀条难寄，碧云惊合。桃李漫山空春艳，不比仙风道骨。有潇洒、清新奇绝。我被幽香相懊恼，宋广平、岂但心如铁。飞暗度，石吹裂。

同前 再韵赋雪

晓听儿曹说。道前村、疏梅莫与，蔽萧缠葛。急与呼童诛翦尽，趁此江天暮雪。唤小艇、渔翁鹤发，凜冽寒风吹酒面，与何人、

共泛山阴月。归浩叹，御琴瑟。

世寰恍惚山川别。望琼楼、玉宇相映，烂银环合。冰柱雪车新句就，不疗饥肠病骨。奈野鸟、千山飞绝。我笑书生贫亦甚，诵布衾、岁久寒如铁。儿恶卧，踏里裂。

满江红 避暑

午转槐阴，正炎暑、侵肌似醉。问何处、披襟散发，解衣扬袂。傍沼茅亭杨柳绿，倚崖草阁梧桐翠。唤玉人、纤手掬清泉，生凉意。

开枕簟，浮瓜芰。琼液浅，歌喉细。对文禽雪鹭，助成幽致。十顷碧莲潇洒国，万竿修竹清凉世。算此时、情绪有谁同，吾依自。

同前 双头莲

一柄双花，低翠盖、呈祥现美。人正在、薰风亭上，满襟如水。二陆比方夸俊少，两乔相并修容止。雨初晴、午永斗红酣，真奇耳。

双白鹭，双赭鲤。飞与泳，俱来此。缩双鬢天上，侍香童子。双剑丰城双孕秀，双鳧叶县双趋起。谩空谈、国土本无双，今双矣。

沁园春 叹世

浮利虚名，算来何用，蜗角蝇头。笑劳

生一梦，两输催逼，脆如朝露，轻若春沤。
有限精神，无穷世路，劫劫忙忙谁肯休。堪
惊叹，叹痴人未悟，终日营求。

百年光景云浮。把意马心猿须早收。有
真仙秘诀，飡霞导引，丹砂铅汞，早与身谋。
闲是闲非，他强我弱，一任从教风马牛。还
知道，上蓬莱稳路，八表神游。

念奴娇 次韵范正之柳絮

水轩沙岸，午风轻、飘动一天晴雪。日
色晶荧光眩眼，细逐游丝明灭。帘幕中间，
楼台侧畔，浑是瑶瑛积。缀松黏竹，恍然如
对三绝。

遥认仿佛飞花，花非还似，恼乱多情客。
点染春衫无定度，又转沈香亭北。密密疏疏，
斜斜整整，似雪难分别。坡仙不见，后人
有口何说。

同前 次人韵

断虹开霁，净秋容、点点初收微雨。夕
下生阴山影澹，缥缈烟云吞吐。乌帽风偏，
青鞋沙软，误入桃溪坞。多情鸥鹭，偶来忽
又飞去。

日暮修竹佳人，雾绡琼佩，绰约疑仙侣。
愧我禅心春尽絮，不逐东风飞舞。红叶题诗，
紫云传恨，密意渠能诉。此情疏隔，不关楼
外烟树。

菩萨蛮

暮涛掀浪溪流急。单衣未试春寒力。是

处绿阴浓。春深杨柳风。

人依溪岸住。酒美忘归去。巢燕堕芹泥。
幽禽花外啼。

同前

鸦儿学画犹嫌丑。佯羞步步随娘后。春
浅瘦花枝。凝愁为阿谁。

那回筵畔见。有意相留恋。只恐后期愆。
章台飞柳绵。

鹧鸪天 赋云

楼外银屏入望赊。楼前鸥鹭舞交加。穿
林淅沥飞琼悄，度嶂缤纷过柳花。

歌白雪，醉流霞。晚寒寒似夜来些。明
朝酒醒掀帘幕，帘幕依然卖酒家。

西江月

世事从来无据，人生自古难凭。茫如天
水有云萍。聚散任他形影。

每怪东阳瘦损，常嗤骑省多情。如今我
也瘦棱棱。却喜青青两鬓。

水调歌头 饮垂虹

三载役京口，十度过松江。垂虹亭下烟
水，长是映篷窗。钓得锦鳞成鲙，快把双螯
浩饮，豪气未能降。醉舞影零乱，心逐浪春
撞。

景苍茫，歌欵乃，石空碇。蒹葭深处，
适意鱼鸟自双双。便拟轻舟短棹，明月清风
长共，与世绝纷纭。嘉遁有真隐，不羨鹿门
庞。

醉落魄 用范石湖韵

江头离席。晚潮双橹催行色。往来属玉
双飞白。笑我多情，犹作未归客。

红尘奔走何时息。归心还似投林翼。角
巾醉里从欵侧。独立东风，天际露岑碧。

长相思 西湖夜醉

湖山横。湖水平。买个湖船一叶轻。傍
湖随柳行。

秋风清。秋月明。谁捣秋砧烟外声。悲
秋无尽情。

鹧鸪天 发舟安康，朋游见留，往复三用韵

芳草萋萋入眼浓。一年花事又匆匆。吐
舒桃脸今朝雨，零落梅妆昨夜风。

云接野，水连空。画栏十二倚谁同。两
眉新恨无分付，独立苍苔数落红。

同前

梦绕天涯去意浓。客愁春恨两匆匆。绿
波初涨桃花浪，画鹢楫轻随柳絮风。

无笔力，判虚空。关山千里两心同。鱼

书雁字都休问，只看啼痕翠袖红。

同前

山色都如归兴浓。春融融处客匆匆。岸
花影里莺吟雾，江阁阴中燕受风。

凭画楫，睇层空。情衷待说几时同。不
如且尽樽中绿，图得醺醺醉脸红。

菩萨蛮 杏花

昨日杏花春满树。今晨雨过香填路。零
落软胭脂。湿红无力飞。

转头春易去。春色归何处。待密与春期。
春归人也归。

浣溪沙 送连景昭归三山

来日江头柳带香。去时篱下菊花黄。人
生离别几凄凉。

拂面红尘飞冉冉，背人白日去堂堂。尺
书休负雁南翔。

眼儿媚

十年不见柳腰肢。契阔几何时。天遥地
远，秋悲春恨，只在双眉。

雁声今夜楼西畔，情愫渺难期。杏花风
景，梧桐夜月，都是相思。

桃源忆故人

暮霞散绮西溪浦。天上晴云开絮。清绝梅花几树。恼乱春愁处。

小桥流水人来去。沙岸浴鸥飞鹭。谁画江南好处。著我闲巾屦。

糖多令 登多景楼

何处浣离忧。消除许大愁。望长江、衮衮东流。一去乡关能几日，才屈指、又中秋。

芦叶满汀洲。沙矶小艇收。醉归来、明月江楼。欲把情怀输写尽，终不似、少年游。

小重山

春水东流一苇杭。春情翦不断，汉江长。江花江草为谁芳。浑不似，沙暖睡鸳鸯。

且道不思量。怕他知得后，痛肝肠。路遥天阔水茫茫。成病也，教我怎禁当。

行香子 鄱阳□鱼

雪白肥鱖。墨黑修鲈。柳穿腮、小大相兼。金刀批脔，鲜活甘甜。或时爇，或时煮，或时醃。

揜腕佳人，玉手纤纤。缕银丝、取意无厌。羹须澹煮，滋味重添。滴儿醢，呷儿酒，

撮儿盐。

临江仙 富池岸下

人在空江烟浪里，叶舟轻似浮沤。此心无怨也无忧。汉江迷望眼，袞袞直东流。

两岸荻芦青不断，四山冈岭绸缪。晚风吹袂冷飕飕。谁知三伏暑，全似菊花秋。

渔家傲 白湖观捕鱼

汉水悠悠还漾漾。渔翁出没穿风浪。千尺丝纶垂两桨。收又放。月明长在烟波上。

钓得活鳞鳊缩项。斲成玉液香浮盎。醉倒自歌歌自唱。轻袅缆。碧芦红蓼清滩傍。

菩萨蛮 鄂渚岸下

烟汀一抹蒹葭渚。风亭两下荷花浦。月色漾波浮。波流月自留。

若耶溪上女。两两三三去。眉黛敛羞〔蛾〕。采菱随棹歌。

乌夜啼 夜泊阳子江

长亭急管生愁。楚天秋。落日寒鸦飞尽、水悠悠。

红蓼岸。白苹散。浴轻鸥。人在碧云深处、倚高楼。

虞美人

寒来暑往何时了。世故催人老。一人口
插几张匙。何用波波劫劫、没休时。

饥来吃饭困来睡。莫把身为累。谁能较
短与量长。落叶西风一梦、熟黄梁。

贺新郎 送郑材卿

莫向愁人说。叹人生、不如意事，十常
七八。是则中年伤怀抱，客里何堪送客。又
添取、一襟凄咽。岸柳凋零秋容澹，黯消凝、
怎忍轻攀折。重会面，甚时节。

杏花丽日梅花雪。记当时、一觴一咏，
楚云湘月。别后君休劳春梦，转眼江南塞北。
莫漫被、闲愁萦结。且判离筵今夕醉，霎时
间、便见兰舟发。空怅望，水云阔。

刘学颜

齐天乐 寿刘耕斋

红冈小塔枫林路，曾见承平歌舞。舞罢人归，月斜影转，重见郎官星度。乡关境土，又二十余年，桑麻深露。说与闾巷，少年知得当时否。

如今苍颜白发，问耕聊尔耳，依稀农圃。父老吾伊，深山鸡黍，谁念乱离父母。村南昼午。谩对客烹茶，笑谈今古。千岁迢迢，竹风时扫户。

刘 垵

湘灵瑟 故妓周懿葬桥南

酸风泠泠。哀笳吹数声。碎雨冥冥。泣
瑶英。

花心路，芙蓉城。相思几回魂惊。肠断
坟草青。

醉思仙 黄南山县寄所寓

琼楼几间。瑶徽几弹。觅花声绕回阑。
悄微闻佩环。

帘栊昼闲。炉薰昼残。午风摇曳屏山。
露裙红一班。

点绛唇

风卷游云，梨云梦冷人何处。一溪烟雨。
遮断垂杨路。

恨入琴心，能写当时语。愁无绪。泪痕
红蠹。犹带香如故。

浣溪沙 道情

已断因缘莫更寻，寻时烦恼不如心。从
今休听世间音。

鸾梦渐随秋水远，鹤情甘伴野云深。隔
楼花月自阴阴。

菩萨蛮 题山馆

长亭望断来时路。楼台杳霭迷花雾。山
雨隔窗声。思君魂梦惊。

泪痕侵褥锦。闲却鸳鸯枕。有泪不须垂。
金鞍明月归。

又 和詹天游

故园青草依然绿。故宫废址空乔木。孤
兔穴岩城。悠悠万感生。

胡笳吹汉月。北语南人说。红紫闹东风。
湖山一梦中。

谒金门 题建昌城楼

云薄薄。人静黄梅院落。细数花期并柳
约。新愁沾一握。

梦醒从前多错。寄恨画檐灵鹊。明月欲
西天寂寞。魂销连晓角。

又 庆彭教任满

花雾暖。红逗海棠开半。毡坐谈经春四

换。今朝官正满。

好上鳌坡虎观。好近御屏香案。休笑吾
侬行色缓。待君来作伴。

又

临汝有歌者稍慧。成淳中，尝与吟朋夜醉其楼。
对予唱贺新郎词。至“刘郎正是当年少。更那堪、
天教赋与，许多才调”之句，笑谓余曰：古曲名今
日恰好使得。予因以此意作小词题壁，明日遂行。
后二年再访之，壁间醉墨尚存，而人已他适矣。然
旧词多有见之者，姑录于此。

眉月小。红烛画楼歌绕。唱到刘郎频笑
道。古词今恰好。

深夜银屏香袅。明日雕鞍尘杳。一饷春
风容易晓。三生思不了。

又 题吕真人醉桃源像

春正媚。闲步武陵源里。千树霞燕红散
绮。一枝高插髻。

飞过洞庭烟水。酩酊莫教花坠。铅鼎温
温神谒帝。何曾真是醉。

清平乐 赠教坊乐师

铿金戛玉。弹就神仙曲。铁拨鹑弦清更
熟。新腔浑胜俗。

教坊尽道名师。声华都处俱知。指日内
前宣唤，云韶独步丹墀。

太常引 送丁使君

甘棠春色满南丰。春好处、在夔宫。官

全宋词 刘 垕

柳映墙红。对墙柳、常思耐翁。

文章太守，词华哲匠，人与易居东。攀
恋计无从。判行省、重临旧封。

柳梢青 哀二歌者，邓元实同赋

青岛西沈，彩鸾北去，月冷河桥。梦事
荒凉，垂杨暗老，几度魂销。

云边音信迢迢。把楚些、凭谁为招。万
叠清愁，西风横笛，吹落寒潮。

恋绣衾 城南净凉亭赋

轻风吹雾月满廊。芙蕖香、飘入隔窗。
记旧月、闲庭院，擘碎红、蒙幂晓妆。

如今两鬓秋凄恻，负凌波、万顷凄凉。
花若惜、刘郎老，倩藕丝、牵住夕阳。

临江仙 和陈宪使韵

朔雪驱将残腊去，东风放出新晴。绣衣
瑞彩照岩城。江天收宿霭，湖水动春声。

要净狐噪并鳝舞，未烦鹤怨猿惊。元龙
老气正峥嵘。毫端肤寸润，野烧绿痕生。

洞仙歌 大德壬寅秋送刘春谷学正

津亭折柳，正秋光如画。绕路黄花拥朝
马。叹市槐景淡，池藻波寒，分明是、三载

春风难舍。

军峰天际碧，云隔空同，无奈相思月明夜。薇药早催人，应占先春，休如我、醉卧水边林下。待来岁、今时庆除书，绣锦映宫花，玉京随驾。

西湖明月引 用白云翁韵送客游行都

江村烟雨暗萧萧。涨寒潮。送春桡。目断京尘，何日听鸾箫。金雀觚棱千里外，指天际，碧云深，魂欲飘。

薰炉炷愁烟尽销。酒孤斟、谁与招。满怀情思，任吟笺、赋笔难描。惆怅山风、吹梦老秋宵。绿漾湖心波影阔，终待到，借垂杨、月半桥。

意难忘 咸淳癸酉用清真韵

汀柳初黄。送流车出陌，别酒浮觞。乱山迷去路，空阁带余香。人渐远，意凄凉。更暮雨淋浪。悔不辨，窄衫细马，两两交相。

春梁语燕犹双。叹晓窗新月，独照刘郎。寄笺频误约，临镜想慵妆。知几梦，恼愁肠。任更驻何妨。但只怜，绿阴匝匝，过了韶光。

六么令 云舍赵使君同赋

晓来寒角，吹起愁相触。乱云黯淡江渚，疏柳双鸦宿。锦瑟银屏何处，花雾翻香曲。

柔红娇绿。魂销往梦，羞向孤梅说幽独。

燕支曾印素袂，绛艳收残馥。频问讯，道新来闷损纤腰束。多谢芳心倦恋，罗结文鸳蹴。前欢谁卜。云笺封蜡，就寄相思恨盈掬。

满庭芳 春日过城东旧游

帘卷疏棂，楼平危堞，几回笋玉凭阑。觅花呼酒、更共理哀弹。暖日柔风好景，行云绕、莺燕翩翻。谁知道，冶游重到，已赋解连环。

乘云，行处去，花深隔院，应恨春闲。但紫骝嘶度，时望重关。长恨江楼柳老，女郎腰、又负眠三。东城路，一回一感，愁见月儿弯。

天香 次韵赋牡丹

雨秀风明，烟柔雾滑，魏家初试娇紫。翠羽低云，檀心晕粉，独冠洛京新谱。沉香醉墨，曾赋与、昭阳仙侣。尘世几经朝暮，花神岂知今古。

愁听流莺自语，叹唐宫、草青如许。空有天边皓月，见霓裳舞。更后百年人换，又谁记、今番看花处。流水夕阳，断魂钟鼓。

烛影摇红 月下牡丹

院落黄昏，残霞收尽帘纤雨。天香富贵

洛阳城，巧费春工作。自笑平生吟苦。写不尽、此花风度。玉堂银烛，翠幄画阑，万红争妒。

那更深宵，寒光幻出清都府。嫦娥跨影下人间，来按红鸾舞。连夜杯行休驻。生怕化、彩云飞去。酒阑人静，月淡尘清，晓风轻露。

长相思 客中 景定壬戌秋

雾隔平林，风欺败褐，十分秋满黄华。荒庭人静，声惨寒蛩，惊回羁思如麻。庾信多愁，有中宵清梦，迢递还家。楚水绕天涯。黯销魂、几度栖鸦。

对绿橘黄橙，故园在念，怅望归路犹赊。此情吟不尽，被西风、吹入胡笳。目极黄云，飞渡处、临流自嗟。又斜阳、征鸿影断，夜来空信灯花。

选冠子 送歌者入闽，用月巢韵

暝靄迷红，水天笼晓，帆去野潮声急。离鸾独倚，巧燕双飞，忍向东风飘拆。尘销紫曲阑干，筝雁成声，顿成孤臆。叹舟回人远，钿花芡泽，悄无痕迹。

憔悴损，俊赏杜郎，多情荀令，欲写别愁无力。闽星南转，江月西沈，空拟梦来今夕。古驿荒村，谁怜腻粉风侵，松蝉云湿。但断魂烟浪，痴看桥西落日。

惜余春慢 春雨

玉勒丝鞭，彩旗红索。总向愁中休了。偏怜景媚，为甚愁浓，都为雨多晴少。桃杏开到梨花，红印香印，绿平幽沼。也无饶、红药殿春，更作薄寒清峭。

尘梦里、暗换年华，东风能几，又把一番春老。莺花过眼，蚕麦当头，朝日浓阴笼晓。休恨烟林杜鹃，只恨啼鸠，呼云声杳。到如今，暖霭烘晴，满地绿阴芳草。

买陂塘 与沈润宇、邓元实同赋

暮云沈、凄凄花陌，荒苔青润鸳甃。娇红一捻不胜春，苦雨酸雨僝僽。从别后。但暗忆娉婷，几把垂杨蹂。香销韩袖。念莺燕悲吟，凤鸾仙去，空负摘花手。

铜铺掩，窥见文窗依旧。箏琶尘暗弦绉。欲圆春梦今犹未，怪得西飞太骤。凝伫久。拟待倩、鸿都羽客寻仙偶。青衫湿透。叹玉骨沈埋，芳魂缥缈，何处酌尊酒。

又 兵后过旧游

倚楼西、西风惊鬓，吹回尘思萧瑟。碧桃花下骖鸾梦，十载雨沈云隔。空自忆。漫红蜡香笺，难写旧凄恻。烟村水国。欲闲却琴心，蠹残篋面，老尽看花客。

河桥侧。曾试雕鞍玉勒。如今已忘南北。人间纵有垂杨在，欲挽一丝无力。君莫拍。

浑不似、年时爱听酒边笛。湘帘巷陌。但斜照断烟，淡萤衰草，零落旧春色。

贺新郎 催花呈赵云舍

办著春游费。奈狂风吹寒，禁定满城花事。天暝云深时度雨。院落秦筝未试。倩谁趲、杏娇桃媚。韶色三停今过一，只淡黄杨柳装愁思。芳径滑，绣窗闭。

玉炉闷炷香温被。忆去年、匆匆胜赏，梦沈烟水。遥望秋千新彩索，难把旧痕重系。待暖入、香红十里。别拥双鸾迎素月，教明年、不恨今惟悴。莺共燕，汝知未。

又 答赵清远见寄韵

莫笑刘郎老。老刘郎平生，不是山林怀抱。梦里风云翻海岳，觉后狂歌坠帽。叹几度、荒鸡误晓。天际晴云开五色，纵今年、意气犹年少。机事远，有时到。

凯歌檄笔凭谁道。对村中、一溪流水，半林斜照。赖有可人堪话旧，时共掀髯绝倒。也来问、袞衣茸帽。聊且问天占百岁，看乾坤、此事如何了。肠断处，春城草。

又

醉里江南路。问梅花、经年冷落，几番烟雨。玉骨冰肌终是别，犹带孤山瑞露。想蕴藉、和羹风度。万紫千红嫌妒早，羨仙标、岂比人间侣。聊玩弄，六花舞。

云寒木落山城暮。忽飘来、暗香万斛，春浮江浦。茅舍竹篱词客老，拟傍东风千树。

全宋词 刘 埙

看好月、亭亭当午。流水村中清浅处，称横
斜疏影相容与。时索笑，想应许。

刘 夔

宝鼎现

浓阴堆积，迥野空旷，将回微煦。还是
觉、早梅依旧，清艳枝枝攒晓树。弄霁影、
尽脂凝香蒂，琼削纤葩竞吐。对几处园林，
芳菲消息，都因传去。

取次台榭，等闲院落，偏宜独擅芳步。
长恁恐、寿阳妆面，姑射冰肤成暗妒。笑杏
坞、共桃蹊夸丽，一霎狂风骤雨。又争似、
年年此际，先得东皇为主。

好似雪里精神，曾解恼、游人吟顾。想
当时折赠，端的凭谁付与。荡醉目、恨同云
阻。画角声将暮。想异时成实，和羹止渴，
还应得路。

洞仙歌

凄凉楚弄，行客肠曾断。涛卷秋容暗淮
甸。去年时、还是今日孤舟，烟浪里，身与
江云共远。

别来丹枕梦，几过沧洲，皓月而今为谁
满。薄幸苦无端，误却婵娟，有人在、玉楼

全宋词 刘 夔

天半。最不愤、西风破帆来，甚时节，收拾望中心眼。

金明春

宝历延洪，昌辰开泰，崧岳储灵特异。贤才并，□时间出，尽一一惊人绝艺。捧乡书、气格飘飘，似阆苑神仙，参差相继。纵子墨文章，相如才调，骤觉雷声平地。

太守宾兴当此际。正瑞霭寒轻，虚堂风细。舞腰旋、飞尘仿佛，歌管递、清声嘹唳。况相将、桂籍荣登，对酒面鳞红，何妨沈醉。但管取明年，宫花重戴，共赏金明春意。

内家娇

绰约群芳里，阳和意，偏向一枝浓。南国骤惊，动人奇艳，未饶西洛，百本千丛。斩新弄，晓来无比格，半坼断肠红。三月洞天，又还疑是，赋情楚客，窥见墙东。

朱栏干、遍倚生愁，怕无计、奈雨禁风。别有瑞烟幕幕，时与遮笼。便纵使当日，文忠品第，赵昌模写，难更形容。应念故园桃李，羞怨春工。

安平乐慢

细想劳生，等闲聚散，冉冉轻似秋烟。莲心暗苦，月意难圆。神京去路三千。当日

全宋词 刘 夙

风流，有妖饶枕上，软媚尊前。何计访蓬仙。
断肠中、一叶晴川。

到而今，追思往事，奈向梦也难到奴边。
自恨不如兰灯，通宵尚照伊眠。恰道无缘。
被人劝休莫瞒天。多应是、前生负你，今世
使我偿填。

佳人醉 元宵上太守

月到楼台第几。十里金虫成缀。袅琅玕、
争胷绛球起。试新妆、嬉春粉黛，盈盈暗香，
结谁家秣李。

拥缇骑。箫鼓沸三市。别指春风画隼，
归度鳌山影里。闻红翠。挥觞不待、游人分
袂。悄朱帘十二。

惜双双令

风外橘花香暗度。飞絮绾、残春归去。
酝造黄梅雨。冷烟晓占横塘路。

翠屏人在天低处。惊梦断、行云无据。
此恨凭谁诉。恁情却倩危弦语。

清平乐

东风依旧。著意随堤柳。搓得鹅儿黄欲
就。天色清明厮句。

去年紫陌朱门。今朝雨魄云魂。断送一
生憔悴，知他几个黄昏。

刘一止

洞仙歌

细风轻雾，锁山城清晓。冷蕊疏枝为谁好。对斜桥孤驿，流水溅溅，无限意，清影徘徊自照。

何郎空立马，恼乱余香，绮思凭花更娟妙。肠断处，天涯路远音稀，行人怨、角声吹老。叹客里经春又三年，向月地云阶，负伊多少。

夜行船

十顷疏梅开半就。折芳条、嫩香沾袖。今度何郎，尊前疑怪，花共那人俱瘦。

恻恻轻寒吹散酒。高城近、怕听更漏。可惜溪桥，月明风露，长是在人归后。

念奴娇 和曾宏父九日见贻

江边故国，望南云缥缈，连山修木。远忆渊明束带见，乡里儿曹何辱。世味熏人，

折腰从事，俯仰何时足。可怜菊下，醉吟谁共徵逐。

我爱九日佳名，飘然归思，想当年丘谷。梦绕篱边犹眷恋，满把清尊余馥。援笔洪都，如君英妙，满座方倾属。月台挥袖，叫云声断横玉。

又

故山秋晚，叹萧萧华发，霜林同色。崖谷题诗追旧赏，往往苍苔绿壁。二士权奇，一翁衰病，努力攀筇屐。佛香吹过，了知境是空寂。

别后风月佳时，拄颐何事，想东林遥碧。小研蛮笺惊秀句，天巧何曾雕刻。倚马雄才，凌云逸气，路觉丹青直。三千牍就，看君归奏文石。

又 和陈元载中秋小集

燕台暮集，对秋容凄紧，松阴幂幂。徙倚阑边临翠壑，千顷风烟横出。坐待冰轮，天空云散，一色如苍璧。姮娥有意，为谁来赴今夕。

身世如许飘流，佳时轻过了，他年空忆。我辈情钟端未愧，昔日兰亭陈迹。坐上何人，骊歌凄断，语别还应惜。有心红烛，替人珠泪频滴。

又

中秋后一夕泊舟城外

水烟收尽，望汀苹千顷，银光如幂。霜镜无痕清夜久，惟有惊鱼跳出。月在杯中，

我疑天赐，欢饮仍如璧。姮娥应为，后期偿赛今夕。

遥想当日同盟，山斋孤讽，有新诗相忆。聚散难常空怅望，萍梗飘流踪迹。明月明年，此身此夜，知与谁同惜。参横河侧，短篷清露时滴。

踏莎行 游凤凰台

二水中分，三山半落。风云气象通寥廓。少年怀古有新诗，清愁不是伤春作。

六代豪华，一时燕乐。从教雨打风吹却。与君携酒近阑干，月明满地天无幕。

虞美人 族兄无言赴召

浪花云叶交加舞。身近青冥路。天知此客解骑鲸。今夜一江明月、送行行。

从今直上鳌峰去。应记经行处。莫将险语乱江声。却怕月中高卧、彩虹惊。

江城子 王元渤舍人将赴吉州，因以戏之

秋香岩下著尊罍。小徘徊。莫停杯。来岁花时，相望两悠哉。看取修眉萦度曲，真个泪，界香腮。

船头击鼓片帆开。晓风吹。首应回。景物撩人，诗思不胜催。会有江山凄惋句，凭过雁，寄侬来。

临江仙 饯别王景源赴临江军

柳外双旌斜照日，匆匆去意难留。大江
旁畔老诸侯。举觞仍气概，觅句更风流。

迟暮不堪容易别，溪声为写离愁。自从
今日转船头。他时扶杖叟，独立向沧洲。

又 和王元渤韵

落日西风原上好，笛声谁奏伊凉。缓寻
山径掇幽芳。平生真自许，江海老潜郎。

最爱杯中浮蚁闹，鹅儿破壳娇黄。使君
醉里是家乡。更追修禊帖，一咏一传觞。

雪月交光

正五云飞仗，缟练褰裳，乱空交舞。拂
石归来，向玉阶微步。欲唤冰娥，暂凭风使，
为扫氛驱雾。渐见停轮，人间未识，高空真
侣。

千里无尘，地连天迥，倦客西来，路迷
江树。故国烟深，想溪树何处。云鬓分行，
翠眉萦曲，对夜寒尊俎。清影徘徊，端应坐
有，风流能赋。

望海潮

垂杨深院，啼莺清昼，东风细绕檐牙。
野色乱春，娇云捧日，燕翻蝶舞交加。温诏
下天涯。早画船飞楫，叠鼓鸣挝。共挽旌幢，

缓留丝竹醉韶华。

江都自古豪夸。正迷楼堕絮，月观吹花。玉宸眷深，金瓯望重，何人暗草黄麻。归路接堤沙。宴上林风月，紫阙烟霞。凤检飞来，便将春色到朝家。

醉蓬莱 秀城元夕

正官桥柳润，候馆梅开，暮云凄冽。泽国春归，是烧灯时节。吹绽红蕖，挽低星斗，共水光澄彻。霜瓦楼台，参差似与，蓬壶相接。

千骑遨游，万家嬉笑，帘卷东风，弄妆成列。慢舞尊前，看轻盈回雪。来岁今宵，舜韶声里，对六鳌双阙。凤检飞来，玉骢去踏，青门华月。

望明河 赠路侍郎使高丽

华旌耀日，报天上使星，初辞金阙。许国精忠，试此日傅岩，济川舟楫。向来鸡林外，况传咏、篇章雄绝。问人地、真是唐朝第一，未论勋业。

鲸波霁云千叠。望仙驭缥缈，神山明灭。万里勤劳，也等是壮年，绣衣持节。丈夫功名事，未肯向、尊前轻伤别。看飞棹、归侍宸游，宴赏太平风月。

蓦山溪 叶左丞生日

卿云衍苒，翠壁天开就。移下小方壶，

照初日、嘉林濯秀。君恩暂许，丘壑憩夔龙，
开径竹，续岩花，小试丹青手。

声名德业，汉代谁居右。红旆碧油幢，
想今古、山中未有。霜松手种，应待茯苓生，
斋酿熟，玉泉香，还上萱堂寿。

生查子

城头长短更，水调高低唱。别酒不盈斟，
泪洒风烟上。

明年二月时，更向城阴望。只有旧歌辞，
传作风流样。

清平乐

相望吴楚。远信无凭据。欲倩春风吹泪
去。化作愁云恨雨。

春应已到三吴。楚江日夜东徂。惟有溯
流鱼上，不知尺素来无。

青玉案

小山遮断蓝桥路。恨短梦、难飞去。长
记修眉萦曲度。约花开槛，映风招袖，总是
怜渠处。

追欢我已伤迟暮。犹有多情旧时句。极
目高楼千尺许。竹枝三唱，为君凄断，东日
西边雨。

梦横塘

浪痕经雨，鬓影吹寒，晓来无限萧瑟。野色分桥，翦不断、溪山风物。船系朱藤，路迷烟寺，远鸥浮没。听疏钟断鼓，似近还遥，惊心事、伤羁客。

新醅旋压鹅黄，拚清愁在眼，酒病萦骨。绣阁娇慵，争解说、短封传忆。念谁伴、涂妆绾结。嚼蕊吹花弄秋色。恨对南云，此时凄断，有何人知得。

西河

山驿晚，行人昨停征辔。白沙翠竹锁柴门，乱峰相倚。一番急雨洗天回，扫云风定还起。

念凄断，谁与寄。双鱼尺素难委。遥知洞户隔烟窗，簾横秋水。淡花明玉不胜寒，绿尊初试冰蚁。

小欢细酌任敲醉。扑流萤、应卜心事。谁记天涯憔悴。对今宵、皓月明河千里。梦越空城疏烟里。

眼儿媚

度岁经年两看承。谁信有轻分。从前稳过，如今方悔，不会温存。

眼前无限经行地，何处不销魂。多应为

你，不看风月，睡过黄昏。

水调歌头 和李泰发尚书泊舟严陵

千古严陵濑，清夜月荒凉。水明沙净，
波面一叶弄孤光。北望旄头天际，杀气遥昏
楚甸，云树失青苍。愁绝未归客，衰鬓点吴
霜。

听江边，鸣宝瑟，想英皇。骑鲸仙裔，
高韵清绝胜风篁。醉入无何境界，却笑昔人
底事，远慕白云乡。不见咸阳道，烟草茂陵
荒。

又

缥缈青溪畔，山翠欲黏天。纵云台上，
揽风招月自何年。新旧今逢二妙，人地一时
清绝，高并两峰寒。歌发烟霏外，人在去留
间。

著方床，容老子，醉时眠。一尊相属，
高会何意此时圆。况是古今难遇，人月竹花
俱妙，曾见句中传。不向今宵醉，忍负四婵
娟。

鹧鸪天

岩下清阴引兴长。坐中初识令君香。揽
将风月归诗藪，乞得溪山作醉乡。

怜我老，与传觞。吴霜点鬓又何妨。只
应银烛交红夜，羞对双歌发彩光。

木兰花 饯别王元渤赴吉州

桂香台上秋风裊。鸭绿溪前离思渺。一
卮芳醕细深倾，听尽阳关须醉倒。政成早晚
传温诏。莫恋江城歌吹绕。明年身到凤池边，
重看春波生故沼。

浣溪沙

午夜明蟾冷浸溪。姮娥应有辟寒犀。桂
岩仍在曲阑西。

擷蕊攀条情未已，经丘寻壑想招携。不
应痴马惜障泥。

点绛唇

洞户香凝，宴开特地风烟好。靓妆娟妙。
玉雪光相照。

认是桃源，绿水红云绕。真曾到。漾舟
人老。应被桃花笑。

又

云鬓分行，照人明艳新妆就。御香窗牖。
细酌鹅儿酒。

铁拨鶺弦，一试春风手。龙仙奏。绛霄
声透。不许人间有。

临江仙

台上风光浓欲滴，傍阑芳桂阴成。乱山相对长官青。琢诗能句好，举酒见心倾。

团扇不应秋后弃，几年仁惠风行。渭城柳色若为情。一尊松竹底，三唱和秋声。

蓦山溪

王家人地，奕奕争高秀。金紫照青春，想当日、乌衣巷口。声名气概，今见两朱轡，诗似锦，酒如澠，属意风光厚。

酿泉石壁，未减南阳寿。清兴与谁同，探梅萼、溪桥驿堠。东风御柳，应访此韩翃，归步稳，赤墀边，肯记幽栖否。

念奴娇

小舟漂兀，犯溪烟深入，无穷寒碧。路绕莲塘浑乱眼，千顷朱朱白白。闻说高情，寻盟鸥鹭，爱此风标客。掀髯一笑，顿忘身世形迹。

我爱古邑风流，碧峰争秀峙，相持如掖。制锦才雄应未怕，百里文书堆积。吏散庭空，举觞邀月，饮兴何妨剧。却怜宣子，杖头才挂钱百。

柳梢青

柳汀烟暮。常记岸帻，风流张绪。酒兴
诗情，而今移向，那边佳处。

使君自乐萧闲，未肯副，岩廊虚位。不
念寒窗，老人幽梦，追寻无据。

鹊桥仙

春风真个，取将花去，酬我清阴满院。
名园清昼漏签迟，未肯负、酒朋歌伴。

使君情在，暮云合处，卧看碧峰峨弁。
向来魂梦几曾真，休怨断、楼高不见。

浣溪沙

曾向蓬莱得姓名。坐中省识是飞琼。琵
琶翻作步虚声。

一自当时收拨后，世间弦索不堪听。梦
回凄断月胧明。

点绛唇 和王元渤舍人见贻

岁月飘流，故人相望如箕斗。畔愁千首。
诗骨能清瘦。

白日鹑弦，同看春风手。君知否。袖痕
别后，犹有临歧酒。

又

山邑新凉，夜堂爽气侵南斗。为谁骧首。
月冷冰蛾瘦。

八万二千，雕琢琼瑶手。君知否。待君
归后。双照杯中酒。

望海潮

东郊人报，春风消息，先归御柳宫梅。
残雪恋枝，轻阴阁雨，郁葱瑞气佳哉。清晓
九门开。听舜韶声举，迤邐天街。双阙连云，
六鳌横海驾峰来。

华灯竞簇楼台。正丰年共乐，欢意徘徊。
帘卷弄妆，尘香趁马，轻寒细入人怀。争待
凤舆回。看一天星斗，移下蓬莱。是处歌谣，
太平声入万年杯。

青玉案

马头双鹊飞来喜。惜凝望、音书至。一
掬离怀千万事。绿窗深夜，短笺封就，应也
寻人寄。

春风鬓畔疏梅蕊。映妆艳、清如洗。苦
恨眼边常忆记。楚宫行路，倚桥攀驿，供尽
梅花泪。

喜迁莺 晓行

晓光催角。听宿鸟未惊，邻鸡先觉。迤

迥烟村，马嘶人起，残月尚穿林薄。泪痕带
霜微凝，酒力冲寒犹弱。叹倦客、悄不禁，
重染风尘京洛。

追念，人别后，心事万重，难觅孤鸿托。
翠幌娇深，曲屏香暖，争念岁寒飘泊。怨月
恨花烦恼，不是不曾经著。这情味，望一成
消减，新来还恶。

踏莎行

淡月精神，疏梅风韵。粉香融脸胭脂润。
袖痕犹带玉虬烟，六朝窄样裁宫锦。

眉黛分愁，眼波传信。酒阑画烛交红影。
有期无定却瞋人，索强我早谙伊性。

浣溪沙

莫问新欢与旧愁。浅颦微笑总风流。眼
波横注楚江秋。

十字街头家住处，心肠四散见时休。揽
风招月是朱楼。

刘应几

忆旧游 闻雁

记铜驼载酒 ,翠陌吹箫 ,曾听相呼。不尽离离意 ,觉柔肠如剪 ,立马踟蹰。人生似此苍鬓 ,禁得几声疏。想怨入秋深 ,愁随天远 ,满目平芜。

音书未曾寄 ,正人在燕台 ,忘却回车。奈菰蒲旧地 ,山空木落 ,霜老泉枯。月明仙掌何处 ,转首失栖乌。待说与云间 ,潇湘近日风卷湖。

刘应李

祝英台近 登武夷平林

濯沧浪，歌窈窕，云日弄微霁。屏倚曾空，鹤去几何岁。尚留洞草芊青，岩花重碧，游泳处、露中风袂。

木兰舫。亭外冉冉斜阳，杯行尚联断独凭危兰。解渴漱寒水。少须酒力还低，茶香不断，清与处月明川底。

刘应雄

木兰花慢 元夕郡侯邀赋

梅妆堪点额，觉残雪、未全消。忽春递南枝，小窗明透，渐褪寒骄。天公似怜人意，便挽回、和气做元宵。太守公家事了，何妨银烛高烧。

旋开铁锁粲星桥。快灯市、客相邀。且同乐时平，唱弹弦索，对舞纤腰。传柑记陪佳宴，待说来、须更换金貂。只恐出关人早，鸡鸣又报趣朝。

刘 云 甫

蝶恋花

寿陈山泉（“陈”字原作“东”，从一百二十七卷本翰墨大全）

一点郎星光彻晓。许大乾坤，难著经纶手。拂袖归来应自笑。山翁偏爱林泉好。

庭下儿孙歌寿酒。不献蟠桃，不数安期枣。且喜今朝云出岫。定知霖雨苍生早。

全宋词 刘震孙

刘 震 孙

贺新郎

怕绿野堂边，刘郎去后，谁伴老裴度。

刘镇

贺新郎

翠葆摇新竹。正榴花、枝头叶底，斗红争绿。谁在纱窗停针线，闲理竹西旧曲。又还是、兰汤新浴。手弄合欢双彩索，笑偎人、福寿低相祝。金凤辔，艾花矗。

龙舟暎水飞相逐。记当年、怀沙旧恨，至今遗俗。雨过平芜浮天阔，画鹢凌波尽簇。沸十里、笙歌声续。好是蟾钩随归棹，任欢呼、船重成颓玉。犹未忍，罩银烛。

天香 对梅花怀王侍御

漠漠江皋，迢迢驿路，天教为春传信。万木丛边，百花头上，不管雪飞风紧。寻交访旧，惟翠竹、寒松相认。不意牵丝动兴，何心衬妆添晕。

孤标最甘冷落，不许蝶亲蜂近。直自从来，洁白，个中清韵。尽做重闻塞管，也何害、香销粉痕尽。待到和羹，才明底蕴。

刘 镇

念奴娇

调冰弄雪，想花神清梦，徘徊南土。一夏天香收不起，付与蕊仙无语。秀入精神，凉生肌骨，销尽人间暑。稼轩愁绝，惜花还胜儿女。

长记歌酒阑珊，开时向晚，笑浥金茎露。月浸栏干天似水，谁伴秋娘窗户。困殢云鬟，醉欹风帽，总是牵情处。返魂何在，玉川风味如许。

行香子 赠柳儿行（题从花庵词选补）

露叶烟条。天与多娇。算风流、张绪难消。恼人春思，政自无聊。赖敛愁眉，酣醉眼，减围腰。

风絮相邀。蝶弄莺嘲。最关情、是短长桥。解骖分袂，催上兰桡。更绿波平，红日坠，碧云遥。

沁园春 和刘潜夫送孙花翁韵

谁似花翁，长年湖海，蹇驴弊裘。想红

尘醉帽，青楼歌扇，挥金谈笑，惜玉风流。
吴下阿蒙，江南老贺，肯为良田二顷谋。人
间世，算到头一梦，蝼蚁王侯。

悠悠。吾道何求。况白首相逢说旧游。
记疏风淡月，寒灯古寺，平章诗境，分付糟
丘。聚散抟沙，炎凉转烛，归去来兮万事休。
无何有，问从前那个，骑鹤扬州。

又 题西宗云山楼

爽气西来，玉削群峰，千杉万松。望疏
林清旷，晴烟紫翠，雪边回棹，柳外闻钟。
夜月琼田，夕阳金界，倒影楼台表里空。桥
阴曲，是旧来忠定，手种芙蓉。

仙翁。心事谁同。付鱼鸟相望一笑中，
向月梅香底，招邀和靖，云山高处，问讯梁
公。物象搜奇，风流怀古，消得文章万丈虹。
沈吟久，想依依春树，人在江东。

花心动 临安新亭

鸠雨催晴，遍园林、一番绿娇红媚。柳
外金衣，花底香须，消得艳阳天气。障泥步
锦寻芳路，称来往、纵横珠翠。笑携手，旗
亭问酒，更酬春思。

还记东山乐事。向歌雪香中，伴春沈醉。
粉袖殢人，彩笔题诗，陶写老来风味。夜深
银烛明如昼，待归去、看承花睡。梦云散，
屏山半熏沈水。

汉宫春 郑贺守席上怀旧

日软风柔，望暖红连岛，晴绿平川。寻

芳拾蕊，胜伴陌上鲜妍。玉骢归路，记青门、曾堕吟鞭。人去后，庭花弄影，一帘香月娟娟。

追念旧游何在，叹佳期虚度，锦瑟华年。博山夜来烬冷，谁换沈烟。屏帏半掩，奈梦云、不到愁边。春易老，相思无据，闲情分付鱼笺。

水龙吟 丙子立春怀内

三山腊雪才消，夜来谁转回寅斗。试灯帘幕，送寒幡胜，暗香携手。少日欢娱，旧游零落，异乡歌酒。到而今，生怕春来大早，空赢得、两眉皱。

春到兰湖少住，肯殷勤、访梅寻柳。相思人远，带围宽减，粉痕消瘦。双燕无凭，尺书难表，甚时回首。想画栏、倚遍东风，闲负却、桃花咒。

又 庚寅寄远

老来惯与春相识，长记伤春如故。去年今日，旧愁新恨，送将风絮。粉泪羞红，黛眉颦翠，推愁不去。任琐窗深闭，屏山半掩，还别有、愁来路。

回首画桥烟水，念故人、匆匆何处。客情怀远，云迷北树，草连南浦。离合悲欢，去留迟速，问春无语。笑刘郎，不道无桃可种，苦留春住。

又 丙戌清明和章质夫韵

弄晴台馆收烟候，时有燕泥香坠。宿醒

全宋词 刘 镇

未解，单衣初试，腾腾春思。前度桃花，去年人面，重门深闭。记彩鸾别后，青骢归去，长亭路、芳尘起。

十二屏山遍倚。任苍苔、点红如缀。黄昏人静，暖香吹月，一帘花碎。芳意婆娑，绿阴风雨，画桥烟水。笑多情司马，留春无计，湿青衫泪。

庆春泽 丙子元夕

灯火烘春，楼台浸月，良宵一刻千金。锦步承莲，彩云簇仗难寻，蓬壶影动星球转，映两行、宝珥瑶簪。恣嬉游，玉漏声催，未歇芳心。

笙歌十里夸张地，记年时行乐，憔悴而今。客里情怀，伴人闲笑闲吟。小桃未静刘郎老，把相思、细写瑶琴。怕归来，红紫欺风，三径成阴。

蝶恋花 丁丑七夕

谁送凉蟾消夜暑。河汉迢迢，牛女何曾渡。乞得巧来无用处。世间枉费闲针缕。

人在江南烟水路。头白鸳鸯，不道分飞苦。信远翻嗔乌鹊误。眉山暗锁巫阳雨。

柳梢青 七夕

干鹊收声，湿萤度影，庭院秋香。步月

移阴，梳云约翠，人在回廊。

醺醺宿酒残妆。待付与、温柔醉乡。却扇藏娇，牵衣索笑，今夜差凉。

又 戏简高菊涧

瞥眼光阴。章台旧路，杨柳春深。尚忆风流，殢人倚玉，替客挥金。

高阳醉后分襟。想妒雨、嗔云到今。消息真时，笑啼难处，方表人心。

江神子 （原误小重山，今正）吊方检详

思君梦里说邯郸。未成欢。已炊残。断送春归，风雨霎时间。空有生前医国手。医不到，子孙寒。

欲登诗境吊方干。倩谁看。北邙山。落落晨星，不见暮云还。莫在人间寻食客，寻见后，匹如闲。

临江仙 代闺怨

荡紫飘红芳信断，都无人问秣纤。吟鞭倚醉问凉蟾。香消金缕篆，尘压宝妆奁。

梦峡朝云飞不到，一春离绪厌厌。却疑归燕碍重帘。心期花底误，眉恨柳边添。

浣溪沙 丁亥钱元宵

帘幕收灯断续红。歌台人散彩云空。夜寒归路噤鱼龙。

全宋词 刘 镇

宿醉未消花市月，芳心已逐柳塘风。丁
宁莺燕莫匆匆。

清平乐 赵园避暑

柳阴庭院。帘约风前燕。著雨荷花红半
敛。消得盈盈绿扇。

竹光野色生寒。玉纤雪藕冰盘。长记酒
醒人静，暗香吹月栏干。

贺新郎 题王守西湖书院

云淡天垂野。望晴郊、疏烟半卷，断虹
低跨。老树连阴藏远景，十里湖光照夜。看
不尽、真山图画。春满轩窗无著处，更银蟾、
冷浸鸳鸯瓦。人共境，转幽雅。

文章太守归来也，似当年、和靖风流，
小孤山下。问讯佩兰餐菊友，曾约梅兄入社。
待付与、竹牖陶写。尘外闲寻行乐地，任傍
人、歌舞喧台榭。诗世界，有王谢。

江神子 三月晦日西湖饯春

送春曾到百花洲。夕阳收。暮云留。想
伴花神，骑鹤上扬州。回首湖山情味淡，重
把酒，更登楼。

相思南浦古津头。未拿舟。已惊鸥。柳
外归鸦，点点是离愁。空倚阳关三叠曲，歌
不尽，水东流。

阮郎归

寒阴漠漠夜来霜。阶庭风叶黄。归鸦数点带斜阳。谁家砧杵忙。

灯弄幌，月侵廊。熏笼添宝香。小屏低枕怯更长。和云入醉乡。

又 丹桂

金茎浥露未成霜。西风只旧凉。蕊仙何事换霞妆。恼人秋思长。

香世界，锦文章。花神不覆藏。小山骚客政清狂。同花入醉乡。

玉楼春 东山探梅

泠泠水向桥东去。漠漠云归溪上住。疏风淡月有来时，流水行云无觅处。

佳人独立相思苦。薄袖欺寒修竹暮。白头空负雪边春，著意问春春不语。

木兰花慢

看纤云护月，湛河汉，夜声收。正玉麈生风，银床坠露，凉叶飕飕。襟怀静吞八表，莫登山临水易惊秋。闲想多情宋玉，旧来空替人愁。

温柔。乡解老秋不。丝竹间秦讴。向橙橘香边，持螯把酒，聊伴清游。骚人自应念远，与黄花、评泊晋风流。明日莼鲈兴动，

待寻江上归舟。

感皇恩 寿赵路公八十

八十最风流，那谁不喜，况是精神可人意。太公当日，未必荣华如此。儿孙列两行，莱衣戏。

好景良辰，满堂和气。唱个新词管教美。愿同彭祖，尚有八百来岁。十分才一分，那里暨。

踏莎行 赠周节推宠姬

兰斛藏香，梅瓶浸玉。炉烟半袅屏山曲。谁烧银烛照黄昏，有人正倚萧萧竹。

白雪歌翻，红牙板促。周郎自是难回目。禁寒不饮告推人，春风吹聚眉尖绿。

绛都春 清明

和风乍扇，又还是去年，清明重到。喜见燕子，巧说千般如人道。墙头陌上青梅小。是处有、闲花芳草。偶然思想，前欢醉赏，牡丹时候。

当此三春媚景，好连宵恣乐，情怀歌酒。纵有珠珍，难买红颜长年少。从他乌兔茫茫走。更莫待、花残莺老。恁时欢笑，休把万金换了。

刘 之 才

兰陵王 赋胡伯雨别业

此何夕。天水空明一碧。商量赋、如此江山，几个斜阳了今昔。荒台步晚色。沙鸟依稀曾识。啼鸽外，人远未归，江阔晴虹卧千尺。

残碑藓痕积。记当日清游，夫君题墨。碧瑶仙去苍云隔。飞一镜秋冷，列屏天远，鸡声人语半郊邑。寄情又江国。

愁寂。怕闻笛。正怨苦溪猿，飞倦汀翼。阴阴翡翠迷津驿。慨世事尘化，吾心形役。清吟孤往，渺醉影，夜翠湿。

玲珑四犯

几叠云山，隔不断阑干，天外凝眺。秋与愁并，梧迳雨痕先表。娇梦半握芙蓉，奈曲曲、翠屏深窈。问愁根，当年谁种，漠漠淡烟衰草。

鸳鸯懒拂苹花影，记眉妩、萦情多少。辘轳玉虎牵丝转，听尽秋缸晓。算谁念、卧云衣冷，香压金蟾小。写新词、先寄江鸿归

去，且教知道。

声声慢 五日

湘云织玉，楚葛篝香，澡兰帘幕风静。
怨抑难招，沈魄当年独醒。莫唱江南古调，
念天涯、深情谁省。时暗换，最秦楼惆望，
归期无定。

曾是榴裙误写，怕照眼枝头，绛绡花并。
巧篆盘丝，午镜绿窗闹影。香蒲也应细剪，
但年年、断云愁冷。迎醉面，看银蟾、飞浴
露井。

贺新郎 忆鹤

苍蘚粘溪路。帐山君、悠然羽化，梦魂
何许。曾约秋云萦客袖，舞傍吟皋砚坞。矫
清唳、裂穿云宇。江碧空蒙无处问，问孤山、
梅底人知否。烟夜永，耿心语。

瑶华一去成幽阻。倚修篁、抱琴愁绝，
天寒日暮。城郭悲歌华表恨，此事销凝千古。
有招隐、小山能赋。蕙帐空兮谁夜怨，算课
骚、读易俱凄楚。步深窈，堕松露。

菩萨蛮

题花曾蘸花心露。当初误结丁香树。往
事小蛮窗。新愁桃叶江。

缓歌留薄醉。急鞦人千里。梅瘦月阑干。

断云春梦寒。

解连环

晚云粘湿。正吴峰惨澹，雨迷烟接。早
陡顿、秋事分携，甚连苑暮墙，菊荒苔匝。
空阔愁乡，更天外、怨鸿声黠。怕吟肩易瘦，
料理篝衣，细认香摺。

银缸半明半灭。念花营柳阵，何日消歇。
可是□、凝黯兰成，为情润才松，丽赋多愜。
洛浦溟蒙，漫伫想，明珰钩袜。告梧桐，夜
深略住，梦时一霎。

刘之翰

水调歌头 献田都统

凉露洗金井，一叶下梧桐。谪仙浪游，何事华发作诗翁。乌帽萧萧一幅，坐对清泉白石，矫首抚长松。独鹤归来晚，声在碧霄中。

神仙宅，留玉节，驻金猊。黔南一道、十万貔虎控雕弓。笑折碧荷倒影，自唱采莲新曲，词句满秋风。剑佩八千岁，长入大明宫。

刘子翬

蓦溪山 寄宝学

浮烟冷雨,今日还重九。秋去又秋来,但黄花、年年依旧。平台戏马,无处问英雄,茅舍底,竹篱东,伫立时搔首。

客来何有。草草三杯酒。一醉万缘空,莫贪伊、金印如斗。病翁老矣,谁共赋归来,芟垆麦,网溪鱼,未落他人后。

满庭芳 和明仲木犀花词

秋入微阴,凉生平远,小山愁绝天南。似闻还断,飞策遍千岩。叶底轻黄纂纂,恼人是、微裂芳缄。翛然胜,清真冷淡,无艳寄尘凡。

澄潭。敲两岸,波光摇动,碧影相参。任西风十里,吹度松杉。我自寒灰槁水,□神处、不觉醺酣。归来晚,飞花无迹,明月满空函。

南歌子 和章潮洲二首

卜夜容三献,微欢极一时。风流太守未庞眉。放出笔头光焰、压金闺。

全宋词 刘子翬

藻丽花骈蕊，清高雪亚枝。曼声恰与贯珠
宜。听此直教拚得、醉翻卮。

又

伎俩无多子，逍遥自许时。闲愁且莫著双
眉。恰有梅香一点、到幽闺。

宠辱棋翻局，光阴鸟度枝。颓然径醉是便
宜。拟倩潭风吹绿、涨瑶卮。

刘 子 实

念奴娇 寿仓使

一门相种，剩河英岳粹，共扶昌篆。夹辅正宜资鲁卫，左右秉持钧轴。缓驾轻车，任回虎节，何事劳山国。东民欲靖，作新少借康叔。

况是鸞鷖佳辰，雪霜深处，季孕椿松绿。天意特教荣晚节，挺挺世臣乔木。绣斧功成，袞衣促覲，莫恨公归速。一陶和气，要令天下蒙福。

沁园春 寿太守 十二月十三日

腊后寒收，柳眼青归，梅花笑生。正阳和有脚，日边送暖，洪钧换轴，天上回星。试巧春盘，介眉春酒，生意从头乐意新。须知道，是东风近也，玉燕逢辰。

举头闾阖开明。便稳驾轻车熟路行。向玉堂青琐，从容洒翰，长淮赤壁，谈笑麾兵。周洛犹尘，商〔岩〕未雨，天下苍生望太平。休槃涧，任清溪九曲，不放舟横。

刘 子 寰

昼锦堂

上缺 思纵步，时自驻篮舆，策杖荒郊。为有柔荑可坐，野菜时挑。思忆家山行乐处，片心时逐野云飘。歌长铗、遥寄故人，归路赋隐辞招。

解语花 雪

龙沙殿腊，兔苑留寒，花照冰壶夜。乱山平野。装珠树满眼，买春无价。墙头苑下。浑不见、桃夭杏冶。疑趁风、庾岭寒梅，触处都飘谢。

吹面峭寒未怕。览瑶池万里，飞观高榭。霓旌鹤驾。歌黄竹、胜跃踏青骄马。峰峦似画。但点缀、片时相借。惊望中、玉宇琼楼，残溜空鸳瓦。

玉漏迟 夏

翠草侵圆径。阴阴夏木，鸣鸠相应。纵目江天，窈窕雨昏烟暝。屋角黄梅乍熟，听

落颿、时敲金井。深院静。闲阶自长，花砖苔晕。

楼居篔簹枕清凉，尽永日阑干，与谁同凭。旧社鸥盟，零落断无音信。辽鹤追思旧事，向华表、空吟遗恨。萦念损。休怪暮年多病。

又 秋

暮天初过。雨凄清，顿觉今年秋早。夜景虚明，仿佛露华清晓。蕙草繁花竞吐，向暗里、幽香缥缈。下缺

醉蓬莱

访莺花陈迹，姚魏遗风，绿阴成幄。尚有余香，付宝阶红药，淮海维阳，物华天产，未觉输京洛。时世新妆，施朱傅粉，依然相若。

束素腰纤，捻红唇小，鄣袖娇看，倚阑柔弱。玉佩琼琚，劝王孙行乐。况是韶华，为伊挽驻，未放离情薄。顾盼阶前，留连醉里，莫教零落。

阮郎归

长条袅袅串红绡。无风时自摇。十分妖艳更苗条。殢春情态娇。

风影舞，露痕潮。买来和蝶饶。故园愁绝楚宫腰。相逢恨怎销。

好事近

秋色到东篱，一种露红先占。应念金英冷淡，摘胭脂浓染。

依稀十月小桃花，霜蕊破霞脸。何事渊明风致，却十分妖艳。

齐天乐 寿史沧洲

雅歌堂下新堤路。柳外行人相语。碧藕开花，金桃结子，三见使君初度。楼台北渚。似画出西湖，水云深处。彩鹢双飞，水亭开宴近重午。

溪蒲堪荐绿醕。幔亭何惜，为曾孙留住。碧水吟哦，沧洲梦想，未放舟横野渡。维申及甫。正夹辅中兴，擎天作柱，愿祝嵩高，岁添长命缕。

花发沁园春 呈史沧洲

换谱伊凉，选歌燕赵，一番乐事重起。花新笑靥，柳软纤腰，济楚众芳围里。年年佳会。长是傍、清明天气。正魏紫衣染天香，蜀妆红破春睡

一簇猩罗凤翠、遍东园西城，点检芳事。铃斋吏散，昼馆人稀，几阁管弦清脆。人生适意。流转共、风光游戏。到遇景，取次成欢，怎教良夜休醉。

玉楼春 题小竿岭

今来古往吴京道。岁岁荣枯原上草。行人几度到江滨，不觉身随风树老。

蒲花易晚芦花早。客里光阴如过鸟。一般垂柳短长亭，去路不如归路好。

沁园春 西岩三涧

云壑泉泓，小者如杯，大者如罍。更石筵平莹，宽容数客，淙流回激，环绕飞觥。三涧交流，两崖悬瀑，捣雪飞霜落翠屏。经行处，有丹萸碧草，古木苍藤。

徘徊却倚山楹。笑山水娱人若有情。见傍回侧转、峰峦叠叠，欲穷还有，岩谷层层。仰视云间，茅茨鸡犬，疑是仙家来避秦。青林表，望烟霞缥缈，隐隐鸾笙。

贺新郎 登玉田峰

拄杖凌高绝。望千山隐隐，波澜动摇天末。下有白云平远壑，涌起潮头喷雪。浸绝岛、孤峰出没。赤县神州何处是，但风烟、杳杳迷空阔。呼不见，古人物。

碧松枝下青瑶石。举头看、长空湛湛，淡琉璃色。上界星辰多官府，夸父忙鞭日月。任兔走、乌飞超忽。宇宙茫茫如许大，百年间、何用争优劣。身世事，一毛发。

满江红 风泉峡观泉

云壑飞泉，蒲根下、悬流陆续。堪爱处、石池湛湛，一方寒玉。暑际直当磐石坐，渴来自引悬瓢掬。听泠泠、清响泻琮玕，胜丝竹。

寒照胆，消炎燠。清彻骨，无尘俗。笑幽人忻玩，滞留空谷。静坐时看松鼠饮，醉眠不碍山禽浴。唤仙人、伴我酌琼瑶，餐秋菊。

霜天晓角 春愁

横阴漠漠。似觉罗衣薄。正是海棠时候，纱窗外、东风恶。

惜春春寂寞。寻花花冷落。不会这些情味，元不是、念离索。

洞仙歌 寄刘令君潜夫

风饕雨足，也解为花地。收拾浮云放新霁。爱调亭小翠，点滴猩红，新妆了，妃子朝来睡起。

遥知春有主，整顿欢娱，兴在新亭锦围底。便选歌燕赵，授简邹枚，须记作他日，城山盛事。笑东君不用管杨花，任飞去天涯，在东风里。

醉蓬莱 寿参政

正霜浮菊浅，露染枫深，九秋佳景。梅报南枝，一点和羹信。峻岳生申，太山瞻鲁，瑞启千年运。飞皇奎文，仪皇韶祉，明良相庆。

岁值丰登，道方开泰，塞骑尘收，海鲸波静。几斗璇枢，仰三阶平正。保定乾坤，亲扶日月，万宇同歌咏。比寿彭聃，侔勋周召，致君尧舜。

又 寿史令人

正花深绣阁，带拂流酥，暖帘初试。窈窕笙歌，拥新鲜珠翠。艳菊留金，早梅催粉，趁得瑶池会。画馆凝香，仙家正住，芙蓉城里。

榻寝开祥，玉枝祝寿，列院欢娱，满堂佳瑞。福寿双星，现碧霄天际。京兆时妆，如皋乐事，占世间荣贵。象服鱼轩，疏封大国，齐眉千岁。

霜天晓角 子庆母八十

满前儿女。今日都欢聚。今也阿弥八十，儿也五十五。

瓷甌并瓦注。山歌和社舞。但管年年强健，妆成个、西王母。

沁园春 庆叶镇 五月初八

长寿真人，玉佩琼裾，霞衣月裳。趁桃
迎初度，千年方熟，蒲经端午，三日留春。
兰杜綵旌，芙蓉搴盖，飞下清源云水乡。摘
烟雾，引天机织组，官样文章。

丁年璧水横翔。余剩馥残膏沾四方。仰
平生声望，九霄星斗，方来事业，万里风樯。
经世规模，出尘丰骨，须合盛之白玉堂。轩
腾去，看雍容槐棘，福艾耆庞。

刘_愿原

水调歌头

几载沧江梦 ,此夕复经过。双台双峙如画 ,空翠滴晴波。不是先生高节 ,激起清风千古 ,汉鼎复如何。矫首望天际 ,烟树翠婆娑。

危楼下 ,数不尽 ,去帆多。人人惊肉生髀 ,却日欲挥戈。谁识矶边泉石 ,别有壶中天地 ,烟雨一青蓑。自笑亦华发 ,三叹吊岩阿。

柳富

最高楼 别妓王幼玉

人间最苦，最苦是分离。伊爱我，我怜伊。青草岸头人独立，画船东去橹声迟。楚天低，回望处，两依依。

后会也知俱有愿，未知何日是佳期。心下事、乱如丝。好天良夜还虚过，辜负我、两心知。愿伊家，衷肠在，一双飞。

柳 华 淑

望江南

何处笛，觉妾梦难谐。春色恼人眠不得，
卷帘移步下香阶。呵冻卜金钗。

人去也，毕竟信音乖。翠锁双蛾空宛转，
雁行筝柱强安排。终是没情怀。

柳 永

正宫

黄莺儿

园林晴昼春谁主。暖律潜催，幽谷暄和，
黄鹂翩翩，乍迁芳树。观露湿缕金衣，叶映
如簧语。晓来枝上绵蛮，似把芳心、深意低
诉。

无据。乍出暖烟来，又趁游蜂去。恣狂
踪迹，两两相呼，终朝雾吟风舞。当上苑柳
秣时，别馆花深处。此际海燕偏饶，都把韶
光与。

玉女摇仙佩 佳人

飞琼伴侣，偶别珠宫，未返神仙行缀。
取次梳妆，寻常言语，有得几多姝丽。拟把
名花比。恐旁人笑我，谈何容易。细思算、
奇葩艳卉，惟是深红浅白而已。争如这多情，
占得人间，千娇百媚。

须信画堂绣阁，皓月清风，忍把光阴轻
弃。自古及今，佳人才子，少得当年双美。

且恁相偎倚。未消得、怜我多才多艺。愿奶奶、兰心蕙性，枕前言下，表余深意。为盟誓。今生断不孤鸳被。

雪梅香

景萧索，危楼独立面晴空。动悲秋情绪，当时宋玉应同。渔市孤烟袅寒碧，水村残叶舞愁红。楚天阔，浪浸斜阳，千里溶溶。

临风。想佳丽，别后愁颜，镇敛眉峰。可惜当年，顿乖雨迹云踪。雅态妍姿正欢洽，落花流水忽西东。无憀恨、相思意，尽分付征鸿。

尾 犯

夜雨滴空阶，孤馆梦回，情绪萧索。一片闲愁，想丹青难貌。秋渐老、蛩声正苦，夜将阑、灯花旋落。最无端处，总把良宵，祇恁孤眠却。

佳人应怪我，别后寡信轻诺。记得当初，翦香云为约。甚时向、幽闺深处，按新词、流霞共酌。再同欢笑，肯把金玉珠珍博。

早梅芳

海霞红，山烟翠。故都风景繁华地。谯门画戟，下临万井，金碧楼台相倚。芰荷浦溆，杨柳汀洲，映虹桥倒影，兰舟飞棹，游

人聚散，一片湖光里。

汉元侯，自从破虏征蛮，峻陟枢庭贵。
筹帷厌久，盛年昼锦，归来吾乡我里。铃斋
少讼，宴馆多欢，未周星，便恐皇家，图任
勋贤，又作登庸计。

斗百花 亦名夏州（小注据毛校乐章集补）

飒飒霜飘鸳瓦，翠幕轻寒微透，长门深
锁悄悄，满庭秋色将晚。眼看菊蕊，重阳泪
落如珠，长是淹残粉面。鸾辂音尘远。

无限幽恨，寄情空殢纨扇。应是帝王，
当初怪妾辞辇。陡顿今来，宫中第一妖娆，
却道昭阳飞燕。

其二

煦色韶光明媚。轻霭低笼芳树。池塘浅
蘸烟芜，帘幕闲垂风絮。春困厌厌，抛掷斗
草工夫，冷落踏青心绪。终日扃朱户。

远恨绵绵，淑景迟迟难度。年少傅粉，
依前醉眠何处。深院无人，黄昏乍拆秋千，
空锁满庭花雨。

其三

满搦宫腰纤细。年纪方当笄岁。刚被风
流沾惹，与合垂杨双髻。初学严妆，如描似
削身材，怯雨羞云情意。举措多娇媚。

争奈心性，未会先怜佳婿。长是夜深，
不肯便入鸳被。与解罗裳，盈盈背立银缸，
却道你但先睡。

甘草子

秋暮。乱洒衰荷，颗颗真珠雨。雨过月华生，冷彻鸳鸯浦。

池上凭阑愁无侣。奈此个、单栖情绪。却傍金笼共鹦鹉。念粉郎言语。

其二

秋尽。叶翦红绡，砌菊遗金粉。雁字一行来，还有边庭信。

飘散露华清风紧。动翠幕、晓寒犹嫩。中酒残妆慵整顿。聚两眉离恨。

中吕宫

送征衣

过韶阳。璇枢电绕，华渚虹流，运应千载会昌。罄寰宇、荐殊祥。吾皇。诞弥月，瑶图缵庆，玉叶腾芳。并景贶、三灵眷祐，挺英哲、掩前王。遇年年、嘉节清和，颁率土称觴。

无间要荒华夏，尽万里、走梯航。彤庭舜张大乐，禹会群方。鹓行。望上国，山呼鳌抃，遥爇炉香。竟就日、瞻云献寿，指南山、等无疆。愿巍巍、宝历鸿基，齐天地遥长。

昼夜乐

洞房记得初相遇。便只合、长相聚。何期小会幽欢，变作离情别绪。况值阑珊春色暮。对满目、乱花狂絮。直恐好风光，尽随伊归去。

一场寂寞凭谁诉。算前言、总轻负。早知恁地难拚，悔不当时留住。其奈风流端正外，更别有、系人心处。一日不思量，也攒眉千度。

其二

秀香家住桃花径。算神仙、才堪并。层波细翦明眸，腻玉圆搓素颈。爱把歌喉当筵逞。遏天边，乱云愁凝。言语似娇莺，一声声堪听。

洞房饮散帘帏静。拥香衾、欢心称。金炉麝袅青烟，凤帐烛摇红影。无限狂心乘酒兴。这欢娱、渐入嘉景。犹自怨邻鸡，道秋宵不永。

柳腰轻

英英妙舞腰肢软。章台柳、昭阳燕。锦衣冠盖，绮堂筵会，是处千金争选。顾香砌、丝管初调，倚轻风、佩环微颤。

乍入霓裳促遍。逞盈盈、渐催檀板。慢垂霞袖，急趋莲步，进退奇容千变。算何止、倾国倾城，暂回眸、万人肠断。

西江月

凤额绣帘高卷，兽环朱户频摇。两竿红日上花梢。春睡厌厌难觉。

好梦狂随飞絮，闲愁浓胜香醪。不成雨暮与云朝。又是韶光过了。

仙吕宫

倾杯乐

禁漏花深，绣工日永，蕙风布暖。变韶景、都门十二，元宵三五，银蟾光满。连云复道凌飞观。耸皇居丽，嘉气瑞烟葱茜。翠华宵幸，是处层城阆苑。

龙凤烛、交光星汉。对咫尺鳌山开羽扇。会乐府两籍神仙，梨园四部弦管。向晓色、都人未散。盈万井、山呼鳌抃。愿岁岁，天仗里、常瞻凤辇。

笛家弄

花发西园，草薰南陌，韶光明媚，乍晴轻暖清明后。水嬉舟动，禊饮筵开，银塘似染，金堤如绣。是处王孙，几多游妓，往往携纤手。遣离人、对嘉景，触目伤怀，尽成感旧。

别久。帝城当日，兰堂夜烛，百万呼卢，

画阁春风，十千沽酒。未省、宴处能忘管弦，
醉里不寻花柳。岂知秦楼，玉箫声断，前事
难重偶。空遗恨，望仙乡，一饷消凝，泪沾
襟袖。

大石调

倾杯乐

皓月初圆，暮云飘散，分明夜色如晴昼。
渐消尽、醺醺残酒。危阁迥、凉生襟袖。追
旧事、一饷凭阑久。如何媚容艳态，抵死孤
欢偶。朝思暮想，自家空恁添清瘦。

算到头、谁与伸剖。向道我别来，为伊
牵系，度岁经年，偷眼觑、也不忍觑花柳。
可惜恁、好景良宵，未曾略展双眉暂开口。
问甚时与你，深怜痛惜还依旧。

迎新春

嶰管变青律，帝里阳和新布。晴景回轻
煦。庆佳节、当三五。列华灯、千门万户。
遍九陌、罗绮香风微度。十里然绛树。鳌山
耸、喧天箫鼓。

渐天如水，素月当午。香径里、绝缨掷
果无数。更阑烛影花阴下，少年人、往往奇
遇。太平时、朝野多欢民康阜。随分良聚。
堪对此景，争忍独醒归去。

曲玉管

陇首云飞，江边日晚，烟波满目凭阑久。
立望关河萧索，千里清秋。忍凝眸。杳杳神京，
盈盈仙子，别来锦字终难偶。断雁无凭，
冉冉飞下汀洲。思悠悠。

暗想当初，有多少、幽欢佳会，岂知聚散难期，
翻成雨恨云愁。阻追游。每登山临水，惹起平生心事，
一场消黯，永日无言，却下层楼。

满朝欢

花隔铜壶，露晞金掌，都门十二清晓。
帝里风光烂漫，偏爱春杪。烟轻昼永，引莺啭上林，
鱼游灵沼。巷陌乍晴，香尘染惹，垂杨芳草。

因念秦楼彩凤，楚观朝云，往昔曾迷歌笑。
别来岁久，偶忆欢盟重到。人面桃花，未知何处，
但掩朱扉悄悄。尽日伫立无言，赢得凄凉怀抱。

梦还京

夜来匆匆饮散，敲枕背灯睡。酒力全轻，
醉魂易醒，风揭帘栊，梦断披衣重起。悄无寐。

追悔当初，绣阁话别太容易。日许时、

犹阻归计。甚况味。旅馆虚度残岁。想娇媚。
那里独守鸳帏静，永漏迢迢，也应暗同此意。

凤衔杯

有美瑶卿能染翰。千里寄、小诗长简。
想初裊苔笺，旋挥翠管红窗畔。渐玉箸、银
钩满。

锦囊收，犀轴卷。常珍重、小斋吟玩。
更宝若珠玑，置之怀袖时时看。似频见、千
娇面。

其二

追悔当初孤深愿。经年价、两成幽怨。
任越水吴山，似屏如障堪游玩。奈独自、慵
抬眼。

赏烟花，听弦管。图欢笑、转加肠断。
更时展丹青，强拈书信频频看。又争似、亲
相见。

鹤冲天

闲窗漏永，月冷霜华堕。悄悄下帘幕，
残灯火。再三追往事，离魂乱、愁肠锁。无
语沈吟坐。好天好景，未省展眉则个。

从前早是多成破。何况经岁月，相抛掷。
假使重相见，还得似、旧时麽。悔恨无计那。
迢迢良夜，自家只恁摧挫。

受恩深

雅致装庭宇。黄花开淡泞。细香明艳尽天与。助秀色堪餐，向晓自有真珠露。刚被金钱妒。拟买断秋天，容易独步。

粉蝶无情蜂已去。要上金尊，惟有诗人曾许。待宴赏重阳，恁时尽把芳心吐。陶令轻回顾。免憔悴东篱，冷烟寒雨。

看花回

屈指劳生百岁期。荣瘁相随。利牵名惹逡巡过，奈两轮、玉走金飞。红颜成白发，极品何为。

尘事常多雅会稀。忍不开眉。画堂歌管深深处，难忘酒盏花枝。醉乡风景好，携手同归。

其二

玉城金阶舞舜干。朝野多欢。九衢三市风光丽，正万家、急管繁弦。凤楼临绮陌，嘉气非烟。

雅俗熙熙物态妍。忍负芳年。笑筵歌席连昏昼，任旗亭、斗酒十千。赏心何处好，惟有尊前。

柳初新

东郊向晓星杓亚。报帝里，春来也。柳

抬烟眼，花匀露脸，渐觉绿娇红姹。妆点层台芳榭。运神功、丹青无价。

别有尧阶试罢。新郎君、成行如画。杏园风细，桃花浪暖，竞喜羽迁鳞化。遍九陌、相将游冶。骤香尘、宝鞍骄马。

两同心

嫩脸修蛾，淡匀轻扫。最爱学、宫体梳妆，偏能做、文人谈笑。绮筵前、舞燕歌云，别有轻妙。

饮散玉炉烟袅。洞房悄悄。锦帐里，低语偏浓，银烛下、细看俱好。那人人，昨夜分明，许伊偕老。

其二

伫立东风，断魂南国。花光媚、春醉琼楼。蟾彩迥、夜游香陌。忆当时、酒恋花迷，役损词客。

别有眼长腰搦。痛怜深惜。鸳会阻、夕雨凄飞，锦书断、暮云凝碧。想别来，好景良时，也应相忆。

女冠子

断云残雨。洒微凉，生轩户。动清籁、萧萧庭树。银河浓淡，华星明灭，轻云时度。莎阶寂静无睹。幽蛩切切秋吟苦。疏篁一径，流萤几点，飞来又去。

对月临风，空恁无眠耿耿，暗想旧日牵

情处。绮罗丛里，有人人、那回饮散，略曾
谐鸳侣。因循忍便睽阻。相思不得长相聚。
好天良夜，无端惹起，千愁万绪。

玉楼春

昭华夜醮连清曙。金殿霓旌笼瑞雾。九
枝擎烛灿繁星，百和焚香抽翠缕。

香罗荐地延真驭。万乘凝旒听秘语。卜
年无用考灵龟，从此乾坤齐历数。

其二

凤楼郁郁呈嘉瑞。降圣覃恩延四裔。醮
台清夜洞天严，公宴凌晨箫鼓沸。

保生酒劝椒香腻。延寿带垂金缕细。几
行鹓鹭望尧云，齐共南山呼万岁。

其三

皇都今夕知何夕。特地风光盈绮陌。金
丝玉管咽春空，蜡炬兰灯烧晓色。

凤楼十二神仙宅。珠履三千鹓鹭客。金
吾不禁六街游，狂杀云踪并雨迹。

其四

星闾上笏金章贵。重委外台疏近侍。百
常天阁旧通班，九岁国储新上计。

太仓日富中邦最。宣室夜思前席对。归
心怡悦酒肠宽，不泛千钟应不醉。

其五

阆风歧路连银阙。曾许金桃容易窃。乌

龙未睡定惊猜，鹦鹉能言防漏泄。

匆匆纵得邻香雪。窗隔残烟帘映月。别来也拟不思量，争奈馀香犹未歇。

金蕉叶

厌厌夜饮平阳第。添银烛、旋呼佳丽。巧笑难禁，艳歌无间声相继。准拟幕天席地。

金蕉叶泛金波齐，未更阑、已尽狂醉。就中有个风流，暗向灯光底。恼遍两行珠翠。

惜春郎

玉肌琼艳新妆饰。好壮观歌席。潘妃宝钏，阿娇金屋，应也消得。

属和新词多俊格。敢共我勍敌。恨少年、枉费疏狂，不早与伊相识。

传花枝

平生自负，风流才调。口儿里、道知张陈赵。唱新词，改难令，总知颠倒。解刷扮，能哄嗽，表里都峭。每遇著、饮席歌筵，人人尽道。可惜许老了。

阎罗大伯曾教来，道人生、但不须烦恼。遇良辰，当美景，追欢买笑。剩活取百十年，只恁厮好。若限满、鬼使来追，待倩个、掩通著到。

双 调

雨霖铃

寒蝉凄切。对长亭晚，骤雨初歇。都门帐饮无绪，留恋处、兰舟催发。执手相看泪眼，竟无语凝噎。念去去、千里烟波，暮霭沈沈楚天阔。

多情自古伤离别。更那堪、冷落清秋节。今宵酒醒何处，杨柳岸、晓风残月。此去经年，应是良辰、好景虚设。便纵有、千种风情，更与何人说。

定风波

伫立长堤，淡荡晚风起。骤雨歇、极目萧疏，塞柳万株，掩映箭波千里。走舟车向此，人人奔名竞利。念荡子、终日驱驱，争觉乡关转迢递。

何意。绣阁轻抛，锦字难逢，等闲度岁。奈泛泛旅迹，厌厌病绪，迩来谙尽，宦游滋味。此情怀、纵写香笺，凭谁与寄。算孟光、争得知我，继日添憔悴。

尉迟杯

宠佳丽。算九衢红粉皆难比。天然嫩脸修蛾，不假施朱描翠。盈盈秋水。恣雅态、

欲语先娇媚。每相逢、月夕花朝，自有怜才深意。

绸缪凤枕鸳被。深深处、琼枝玉树相倚。困极欢馀，芙蓉帐暖，别是恼人情味。风流事、难逢双美。况已断、香云为盟誓。且相将、共乐平生，未肯轻分连理。

慢卷袖

闲窗烛暗，孤帏夜永，敲枕难成寐。细屈指寻思，旧事前欢，都来未尽，平生深意。到得如今，万般追悔。空只添憔悴。对好景良辰，皱著眉儿，成甚滋味。

红茵翠被。当时事、一一堪垂泪。怎生得依前，似恁偎香倚暖，抱著日高犹睡。算得伊家，也应随分，烦恼心儿里。又争似从前，淡淡相看，免恁牵系。

征部乐

雅欢幽会，良辰可惜虚抛掷。每追念、狂踪旧迹。长祗恁、愁闷朝夕。凭谁去、花衢觅。细说此中端的。向我、转觉厌厌，役梦劳魂苦相忆。

须知最有，风前月下，心事始终难得。但愿我、虫虫心下，把人看待，长似初相识。况渐逢春色。便是有，举场消息。待这回、好好怜伊，更不轻离拆。

佳人醉

暮景萧萧雨霁。云淡天高风细。正月华如水。金波银汉，潋滟无际。冷浸书帷梦断，却披衣重起。临轩砌。

素光遥指。因念翠蛾，杳隔音尘何处，相望同千里。尽凝睇。厌厌无寐。渐晓雕阑独倚。

迷仙引

才过笄年，初绾云鬟，便学歌舞。席上尊前，王孙随分相许。算等闲、酬一笑，便千金慵觑。常祗恐、容易蕣华偷换，光阴虚度。

已受君恩顾。好与花为主。万里丹霄，何妨携手同归去。永弃却、烟花伴侣。免教人见妾，朝云暮雨。

御街行 圣寿（题据毛校乐章集补）

燔柴烟断星河曙。宝辇回天步。端门羽卫簇雕阑，六乐舜韶先举。鹤书飞下，鸡竿高耸，恩霈均寰宇。

赤霜袍烂飘香雾。喜色成春煦。九仪三事仰天颜，八彩旋生眉宇。椿龄无尽，萝图有庆，常作乾坤主。

其二

前时小饮春庭院。悔放笙歌散。归来中

夜酒醺醺，惹起旧愁无限。虽看坠楼换马，
争奈不是鸳鸯伴。

朦胧暗想如花面。欲梦还惊断。和衣拥
被不成眠，一枕万回千转。惟有画梁，新来
双燕，彻曙闻长叹。

归朝欢

别岸扁舟三两只。葭苇萧萧风淅淅。沙
汀宿雁破烟飞，溪桥残月和霜白。渐渐分曙
色。路遥山远多行役。往来人，只轮双桨，
尽是利名客。

一望乡关烟水隔。转觉归心生羽翼。愁
云恨雨两牵萦，新春残腊相催逼。岁华都瞬
息。浪萍风梗诚何益。归去来，玉楼深处，
有个人相忆。

采莲令

月华收，云淡霜天曙。西征客、此时情
苦。翠娥执手送临歧，轧轧开朱户。千娇面、
盈盈伫立，无言有泪，断肠争忍回顾。

一叶兰舟，便恁急桨凌波去。贪行色、
岂知离绪。万般方寸，但饮恨，脉脉同谁语。
更回首、重城不见，寒江天外，隐隐两三烟
树。

秋夜月

当初聚散。便唤作、无由再逢伊面。近

日来、不期而会重欢宴。向尊前、闲暇里，
敛著眉儿长叹。惹起旧愁无限。

盈盈泪眼。漫向我耳边，作万般幽怨。
奈你自家心下，有事难见。待信真个，恁别
无萦绊。不免收心，共伊长远。

巫山一段云

六六真游洞，三三物外天。九班麟稳破
非烟。何处按云轩。

昨夜麻姑陪宴。又话蓬莱清浅。几回山
脚弄云涛。彷彿见金鳌。

其二

琪树罗三殿，金龙抱九关。上清真籍总
群仙。朝拜五云间。

昨夜紫微诏下。急唤天书使者。令赉瑶
检降彤霞。重到汉皇家。

其三

清旦朝金母，斜阳醉玉龟。天风摇曳六
铢衣。鹤背觉孤危。

贪看海蟾狂戏。不道九关齐闭。相将何
处寄良宵。还去访三茅。

其四

阆苑年华永，嬉游别是情。人间三度见
河清。一番碧桃成。

金母忍将轻摘。留宴鳌峰真客。红犹闲
卧吠斜阳。方朔敢偷尝。

其五

萧氏贤夫妇，茅家好弟兄。羽轮飙驾赴层城。高会尽仙卿。

一曲云谣为寿。倒尽金壶碧酒。醺酣争撼白榆花。踏碎九光霞。

婆罗门令

昨宵里、恁和衣睡。今宵里、又恁和衣睡。小饮归来，初更过、醺醺醉。中夜后、何事还惊起。霜天冷，风细细。触疏窗、闪闪灯摇曳。

空床展转重追想，云雨梦、任敲枕难继。寸心万绪，咫尺千里。好景良天，彼此空有相怜意。未有相怜计。

小石调

法曲献仙音

追想秦楼心事，当年便约，于飞比翼。每恨临歧处，正携手、翻成云雨离拆。念倚玉偎香，前事顿轻掷。

惯怜惜。饶心性，镇厌厌多病，柳腰花态娇无力。早是乍清减，别后忍教愁寂。记取盟言，少孜煎、剩好将息。遇佳景、临风对月，事须时恁相忆。

西平乐

尽日凭高目，脉脉春情绪。嘉景清明渐近，时节轻寒乍暖，天气才晴又雨。烟光淡荡，妆点平芜远树。黯凝伫。台榭好、莺燕语。

正是和风丽日，几许繁红嫩绿，雅称嬉游去。奈阻隔、寻芳伴侣。秦楼凤吹，楚馆云约，空怅望、在何处。寂寞韶华暗度。可堪向晚，村落声声杜宇。

凤栖梧

帘下清歌帘外宴。虽爱新声，不见如花面。牙板数敲珠一串，梁尘暗落琉璃盏。

桐树花深孤凤怨。渐遏遥天，不放行云散。坐上少年听不惯。玉山未倒肠先断。

其二

伫倚危楼风细细。望极春愁，黯黯生天际。草色烟光残照里。无言谁会凭阑意。

拟把疏狂图一醉。对酒当歌，强乐还无味。衣带渐宽终不悔。为伊消得人憔悴。

其三

蜀锦地衣丝步障。屈曲回廊，静夜闲寻访。玉砌雕阑新月上。朱扉半掩人相望。

旋暖熏炉温斗帐。玉树琼枝，迤迤相偎傍。酒力渐浓春思荡。鸳鸯绣被翻红浪。

法曲第二

青翼传情，香径偷期，自觉当初草草。未省同衾枕，便轻许相将，平生欢笑。怎生向、人间好事到头少。漫懊懊。

细追思，恨从前容易，致得恩爱成烦恼。心下事千种，尽凭音耗。以此萦牵，等伊来、自家向道。洎相见，喜欢存问，又还忘了。

秋蕊香引

留不得。光阴催促，奈芳兰歇，好花谢，惟顷刻。彩云易散琉璃脆，验前事端的。

风月夜，几处前踪旧迹。忍思忆。这回望断，永作终天隔。向仙岛，归冥路，两无消息。

一寸金

井络天开，剑岭云横控西夏。地胜异、锦里风流，蚕市繁华，簇簇歌台舞榭。雅俗多游赏，轻裘俊、靓妆艳冶。当春昼，摸石江边，浣花溪畔景如画。

梦应三刀，桥名万里，中和政多暇。仗汉节、揽辔澄清，高掩武侯勋业，文翁风化。台鼎须贤久，方镇静、又思命驾。空遗爱，两蜀三川，异日成嘉话。

歇指调

永遇乐

薰风解愠，昼景清和，新霁时候。火德流光，萝图荐祉，累庆金枝秀。璇枢绕电，华渚流虹，是日挺生元后。缵唐虞垂拱，千载应期，万灵敷祐。

殊方异域，争贡琛赆，架嶽航波奔凑。三殿称觞，九仪就列，韶護锵金奏。藩侯瞻望彤庭，亲携僚吏，竞歌元首。祝尧龄、北极齐尊，南山共久。

其二

天阁英游，内朝密侍，当世荣遇。汉守分麾，尧庭请瑞，方面凭心膂。风驰千骑，云拥双旌，向晓洞开严署。拥朱幡、喜色欢声，处处竞歌来暮。

吴王旧国，今古江山秀异，人烟繁富。甘雨车行，仁风扇动，雅称安黎庶。棠郊成政，槐府登贤，非久定须归去。且乘闲、孙阁长开，融尊盛举。

卜算子

江枫渐老，汀蕙半凋，满目败红衰翠。楚客登临，正是暮秋天气。引疏砧、断续残阳里。对晚景、伤怀念远，新愁旧恨相继。

脉脉人千里。念两处风情，万重烟水。

全宋词 柳 永

雨歇天高，望断翠峰十二。尽无言、谁会凭高意。纵写得、离肠万种，奈归云谁寄。

鹊桥仙

屈征途，携书剑，迢迢匹马东去。惨离怀，嗟少年易分难聚。佳人方恁缱绻，便忍分鸳侣。当媚景，算密意幽欢，尽成轻负。

此际寸肠万绪。惨愁颜、断魂无语。和泪眼、片时几番回顾。伤心脉脉谁诉。但黯然凝伫。暮烟寒雨。望秦楼何处。

浪淘沙

梦觉、透窗风一线，寒灯吹息。那堪酒醒，又闻空阶，夜雨频滴。嗟因循、久作天涯客。负佳人、几许盟言，便忍把、从前欢会，陡顿翻成忧戚。

愁极。再三追思，洞房深处，几度饮散歌阑，香暖鸳鸯被，岂暂时疏散，费伊心力。缣云尤雨，有万般千种，相怜相惜。

恰到如今，天长漏永，无端自家疏隔。知何时、却拥秦云态，愿低帏昵枕，轻轻细说与，江乡夜夜，数寒更思忆。

夏云峰

宴堂深。轩楹雨，轻压暑气低沈。花洞彩舟泛翠，坐绕清浔。楚台风快，湘簟冷、

永日披襟。坐久觉、疏弦脆管，时换新音。

越娥兰态蕙心。逞妖艳、昵欢邀宠难禁。
筵上笑歌间发，舄履交侵。醉乡归处，须尽
兴、满酌高吟。向此免、名缰利锁，虚费光
阴。

浪淘沙令

（案调名原与上首同，据毛校乐章集改）

有个人人。飞燕精神。急锵环佩上华裯。
促拍尽随红袖举，风柳腰身。

簌簌轻裙。妙尽尖新。曲终独立敛香尘。
应是西施娇困也，眉黛双颦。

荔枝香

甚处寻芳赏翠，归去晚。缓步罗袜生尘，
来绕琼筵看。金缕霞衣轻褪，似觉春游倦。
遥认，众里盈盈好身段。

拟回首，又伫立、帘帟畔。素脸红眉，
时揭盖头微见。笑整金翘，一点芳心在娇眼。
王孙空恁肠断。

林钟商

古倾杯

冻水消痕，晓风生暖，春满东郊道。迟
迟淑景，烟和露润，偏绕长堤芳草。断鸿隐

隐归飞，江天杳杳。遥山变色，妆眉淡扫。
目极千里，闲倚危樯迥眺。

动几许、伤春怀抱。念何处、韶阳偏早。
想帝里看看，名园芳树，烂漫莺花好。追思
往昔年少。继日恁、把酒听歌，量金买笑。
别后暗负，光阴多少。

倾 杯

离宴殷勤，兰舟凝滞，看看送行南浦。
情知道世上，难使皓月长圆，彩云镇聚。算
人生、悲莫悲於轻别，最苦正欢娱，便分鸳
侣。泪流琼脸，梨花一枝春带雨。

惨黛蛾、盈盈无绪。共黯然消魂，重携
纤手，话别临行，犹自再三、问道君须去。
频耳畔低语。知多少、他日深盟，平生丹素。
从今尽把凭鳞羽。

破阵乐

露花倒影，烟芜蘸碧，灵沼波暖。金柳
摇风树树，系彩舫龙舟遥岸。千步虹桥，参
差雁齿，直趋水殿。绕金堤、曼衍鱼龙戏，
簇娇春罗绮，喧天丝管。霁色荣光，望中似
睹，蓬莱清浅。

时见。凤辇宸游，鸾觞禊饮，临翠水、
开镐宴。两两轻舠飞画楫，竞寻锦标霞烂。
罄欢娱，歌鱼藻，徘徊宛转。别有盈盈游女，
各委明珠，争收翠羽，相将归远。渐觉云海
沈沈，洞天日晚。

双声子

晚天萧索，断蓬踪迹，乘兴兰棹东游。
三吴风景，姑苏台榭，牢落暮霭初收。夫差
旧国，香径没、徒有荒丘。繁华处，悄无睹，
惟闻麋鹿呦呦。

想当年、空运筹决战，国王取霸无休。
江山如画，云涛烟浪，翻输范蠡扁舟。验前
经旧史，嗟漫载、当日风流。斜阳暮草茫茫，
尽成万古遗愁。

阳台路

楚天晚。坠冷枫败叶，疏红零乱。冒征
尘、匹马驱驱，愁见水遥山远。追念少年时，
正恁风帟，倚香偎暖。嬉游惯。又岂知、前
欢云雨分散。

此际空劳回首，望帝里、难收泪眼。暮
烟衰草，算暗锁、路歧无限。今宵又、依前
寄宿，甚处苇村山馆。寒灯畔。夜厌厌、凭
何消遣。

内家娇

煦景朝升，烟光昼敛，疏雨夜来新霁。
垂杨艳杏，丝软霞轻，绣出芳郊明媚。处处
踏青斗草，人人眷红偎翠。奈少年、自有新
愁旧恨，消遣无计。

帝里。风光当此际。正好恁携佳丽。阻归程迢递。奈好景难留，旧欢顿弃。早是伤春情绪，那堪困人天气。但赢得、独立高原，断魂一饷凝睇。

二郎神

炎光谢。过暮雨、芳尘轻洒。乍露冷风清庭户，爽天如水，玉钩遥挂。应是星娥嗟久阻，叙旧约、飙轮欲驾。极目处、微云暗度，耿耿银河高泻。

闲雅。须知此景，古今无价。运巧思、穿针楼上女，抬粉面、云鬟相亚。钿合金钗私语处，算谁在、回廊影下。愿天上人间，占得欢娱，年年今夜。

醉蓬莱

渐亭皋叶下，陇首云飞，素秋新霁。华阙中天，锁葱葱佳气。嫩菊黄深，拒霜红浅，近宝阶香砌。玉宇无尘，金茎有露，碧天如水。

正值升平，万几多暇，夜色澄鲜，漏声迢递。南极星中，有老人呈瑞。此际宸游，凤辇何处，度管弦清脆。太液波翻，披香帘卷，月明风细。

宣 清

残月朦胧，小宴阑珊，归来轻寒凜凜。

背银缸、孤馆乍眠，拥重衾、醉魄犹噤。永漏频传，前欢已去，离愁一枕。暗寻思、旧追游，神京风物如锦。

念掷果朋侪，绝缨宴会，当时曾痛饮。命舞燕翩翩，歌珠贯串，向玳筵前，尽是神仙流品。至更阑、疏狂转甚。更相将、凤帟鸳寝。玉钗乱横，任散尽高阳，这欢娱、甚时重恁。

锦堂春

坠髻慵梳，愁蛾懒画，心绪是事阑珊。觉新来憔悴，金缕衣宽。认得这疏狂意下，向人销譬如闲。把芳容整顿，恁地轻孤，争忍心安。

依前过了旧约，甚当初赚我，偷翦云鬟。几时得归来，香阁深关。待伊要、尤云殢雨，缠绣衾、不与同欢。尽更深、款款问伊，今后敢更无端。

定风波

自春来、惨绿愁红，芳心是事可可。日上花梢，莺穿柳带，犹压香衾卧。暖酥消，腻云弹。终日厌厌倦梳裹。无那。恨薄情一去，音书无个。

早知恁麽。悔当初、不把雕鞍锁。向鸡窗、只与蛮笺象管，拘束教吟课。镇相随，莫抛躲。针线闲拈伴伊坐。和我。免使年少，光阴虚过。

诉衷情近

雨晴气爽，伫立江楼望处。澄明远水生光，重叠暮山耸翠。遥认断桥幽径，隐隐渔村，向晚孤烟起。

残阳里。脉脉朱阑静倚。黯然情绪，未饮先如醉。愁无际。暮云过了，秋光老尽，故人千里。竟日空凝睇。

其二

景阑昼永，渐入清和气序。榆钱飘满闲阶，莲叶嫩生翠沼。遥望水边幽径，山崦孤村，是处园林好。

闲情悄。绮陌游人渐少。少年风韵，自觉随春老。追前好。帝城信阻，天涯目断，暮云芳草。伫立空残照。

留客住

偶登眺。凭小阑、艳阳时节，乍晴天气，是处闲花芳草。遥山万叠云散，涨海千里，潮平波浩渺。烟村院落，是谁家绿树，数声啼鸟。

旅情悄。远信沈沈，离魂杳杳。对景伤怀，度日无言谁表。惆怅旧欢何处，后约难凭，看看春又老。盈盈泪眼，望仙乡，隐隐断霞残照。

迎春乐

近来憔悴人惊怪。为别后、相思煞。我前生、负你愁烦债。便苦恁难开解。

良夜永、牵情无计奈。锦被里、馀香犹在。怎得依前灯下，恁意怜娇态。

隔帘听

咫尺凤衾鸳帐，欲去无因到。虾须窣地重门悄。认绣履频移，洞房杳杳。强语笑。逞如簧、再三轻巧。

梳妆早。琵琶闲抱。爱品相思调。声声似把芳心告。隔帘听，赢得断肠多少。恁烦恼。除非共伊知道。

凤归云

恋帝里，金谷园林，平康巷陌，触处繁华，连日疏狂，未尝轻负，寸心双眼。况佳人、尽天外行云，掌上飞燕。向玳筵、一一皆妙选。长是因酒沈迷，被花萦绊。

更可惜、淑景亭台，暑天枕簟。霜月夜凉，雪霰朝飞，一岁风光，尽堪随分，俊游清宴。算浮生事，瞬息光阴，锱铢名宦。正欢笑，试恁暂时分散。却是恨雨愁云，地遥天远。

抛球乐

晓来天气浓淡，微雨轻洒。近清明，风絮巷陌，烟草池塘，尽堪图画。艳杏暖、妆脸匀开，弱柳困、宫腰低亚。是处丽质盈盈，巧笑嬉嬉，手簇秋千架。戏彩球罗绶，金鸡芥羽，少年驰骋，芳郊绿野。占断五陵游，奏脆管、繁弦声和雅。

向名园深处，争泥画轮，竞羈宝马。取次罗列杯盘，就芳树、绿阴红影下。舞婆娑，歌宛转，仿佛莺娇燕姹。寸珠片玉，争似此、浓欢无价。任他美酒，十千一斗，饮竭仍解金貂贳。恣幕天席地，陶陶尽醉太平，且乐唐虞景化。须信艳阳天，看未足、已觉莺花谢。对绿蚁翠蛾，怎忍轻舍。

集贤宾

小楼深巷狂游遍，罗绮成丛。就中堪人属意，最是虫虫。有画难描雅态，无花可比芳容。几回饮散良宵永，鸳衾暖、凤枕香浓。算得人间天上，惟有两心同。

近来云雨忽西东。谕恼损情惊。纵然偷期暗会，长是匆匆。争似和鸣偕老，免教敛翠啼红。眼前时、暂疏欢宴，盟言在、更莫忡忡。待作真个宅院，方信有初终。

殢人娇

当日相逢，便有怜才深意。歌筵罢、偶

同鸳被。别来光景，看看经岁。昨夜里、方把旧欢重继。

晓月将沈，征骖已鞫。愁肠乱，又还分袂。良辰好景，恨浮名牵系。无分得、与你恣情浓睡。

思归乐

天幕清和堪宴聚。想得尽、高阳俦侣。皓齿善歌长袖舞。渐引入、醉乡深处。

晚岁光阴能几许。这巧宦、不须多取。共君把酒听杜宇。解再三、劝人归去。

应天长

残蝉渐绝。傍碧砌修梧，败叶微脱。风露凄清，正是登高时节。东篱霜乍结。绽金蕊、嫩香堪折。聚宴处，落帽风流，未饶前哲。

把酒与君说。恁好景佳辰，怎忍虚设。休效牛山，空对江天凝咽。尘劳无暂歇。遇良会、剩偷欢悦。歌声阕。杯兴方浓，莫便中辍。

合欢带

身材儿、早是妖娆。算风措、实难描。一个肌肤浑似玉，更都来、占了千娇。妍歌艳舞，莺惭巧舌，柳妒纤腰。自相逢，便觉

韩娥价减，飞燕声消。

桃花零落，溪水潺湲，重寻仙径非遥。
莫道千金酬一笑，便明珠、万斛须邀。檀郎
幸有，凌云词赋，掷果风标。况当年，便好
相携，凤楼深处吹箫。

少年游

长安古道马迟迟。高柳乱蝉栖。夕阳岛
外，秋风原上，目断四天垂。

归云一去无踪迹，何处是前期。狎兴生
疏，酒徒萧索，不似去年时。

其二

参差烟树灞陵桥。风物尽前朝。衰杨古
柳，几经攀折，憔悴楚宫腰。

夕阳闲淡秋光老，离思满蘼皋。一曲阳
关，断肠声尽，独自凭兰桡。

其三

层波潋滟远山横。一笑一倾城。酒容红
嫩，歌喉清丽，百媚坐中生。

墙头马上初相见，不准拟、恁多情。昨
夜杯阑，洞房深处，特地快逢迎。

其四

世间尤物意中人。轻细好腰身。香帏睡
起，发妆酒酺，红脸杏花春。

娇多爱把齐纨扇，和笑掩朱唇。心性温
柔，品流详雅，不称在风尘。

其五

淡黄衫子郁金香。长忆个人人。文谈闲雅，歌喉清丽，举措好精神。

当初为倚深深宠，无个事、爱娇瞋。想得别来，旧家模样，只是翠蛾颦。

其六

铃斋无讼宴游频。罗绮簇簪绅。施朱傅粉，丰肌清骨，容态尽天真。

舞裊歌扇花光里，翻回雪、驻行云。绮席阑珊，凤灯明灭，谁是意中人。

其七

帘垂深院冷萧萧。花外漏声遥。青灯未灭，红窗闲卧，魂梦去迢迢。

薄情漫有归消息，鸳鸯被、半香消。试问伊家，阿谁心绪，禁得恁无憀。

其八

一生赢得是凄凉。追前事、暗心伤。好天良夜，深屏香被，争忍便相忘。

王孙动是经年去，贪迷恋、有何长。万种千般，把伊情分，颠倒尽猜量。

其九

日高花榭懒梳头。无语倚妆楼。修眉敛黛，遥山横翠，相对结春愁。

王孙走马长楸陌，贪迷恋、少年游。似恁疏狂，费人拘管，争似不风流。

其十

佳人巧笑值千金。当日偶情深。几回饮

散，灯残香暖，好事尽鸳鸯。

如今万水千山阻，魂杳杳、信沈沈。孤
棹烟波，小楼风月，两处一般心。

长相思 京妓（题据毛校乐章集补）

画鼓喧街，兰灯满市，皎月初照严城。
清都绛阙夜景，风传银箭，露暖金茎。巷陌
纵横。过平康款辔，缓听歌声。凤烛荧荧。
那人家、未掩香屏。

向罗绮丛中，认得依稀旧日，雅态轻盈。
娇波艳冶，巧笑依然，有意相迎。墙头马上，
漫迟留、难写深诚。又岂知、名宦拘检，年
来减尽风情。

尾 犯

晴烟幂幂。渐东郊芳草，染成轻碧。野
塘风暖，游鱼动触，冰渐微坼。几行断雁，
旋次第、归霜碛。咏新诗，手捻江梅，故人
赠我春色。

似此光阴催逼。念浮生、不满百。虽照
人轩冕，润屋珠金，於身何益。一种劳心力。
图利禄，殆非长策。除是恁、点检笙歌，访
寻罗绮消得。

木兰花

心娘自小能歌舞。举意动容皆济楚。解

教天上念奴羞，不怕掌中飞燕妒。

玲珑绣扇花藏语。宛转香茵云衬步。王孙若拟赠千金，只在画楼东畔住。

其二

佳娘捧板花钿簇。唱出新声群艳伏。金鹅扇掩调累累，文杏梁高尘簌簌。

鸾吟凤啸清相续，管裂弦焦争可逐。何当夜召入连昌，飞上九天歌一曲。

其三

虫娘举措皆温润。每到婆娑偏恃俊。香檀敲缓玉纤迟，画鼓声催莲步紧。

贪为顾盼夸风韵。往往曲终情未尽。坐中年少暗消魂，争问青鸾家远近。

其四

酥娘一搦腰肢袅。回雪萦尘皆尽妙。几多狎客看无厌，一辈舞童功不到。

星眸顾指精神峭。罗袖迎风身段小。而今长大懒婆娑，只要千金酬一笑。

驻马听

凤枕鸾帷。二三载，如鱼似水相知。良天好景，深怜多爱，无非尽意依随。奈何伊。恣性灵、忒煞些儿。无事孜煎，万回千度，怎忍分离。

而今渐行渐远，渐觉虽悔难追。漫寄消寄息，终久奚为。也拟重论缱绻，争奈翻覆思维。纵再会，只恐恩情，难似当时。

诉衷情

一声画角日西曛。催促掩朱门。不堪更倚危阑，肠断已消魂。

年渐晚，雁空频。问无因。思心欲碎，愁泪难收，又是黄昏。

中吕调

戚 氏

晚秋天。一霎微雨洒庭轩。槛菊萧疏，井梧零乱惹残烟。凄然。望江关。飞云黯淡夕阳间。当时宋玉悲感，向此临水与登山。远道迢递，行人凄楚，倦听陇水潺湲。正蝉吟败叶，蛩响衰草，相应喧喧。

孤馆度日如年。风露渐变，悄悄至更阑。长天净，绛河清浅，皓月婵娟。思绵绵。夜永对景，那堪屈指，暗想从前。未名未禄，绮陌红楼，往往经岁迁延。

帝里风光好，当年少日，暮宴朝欢。况有狂朋怪侣，遇当歌、对酒竞留连。别来迅景如梭，旧游似梦，烟水程何限。念利名、憔悴长萦绊。追往事、空惨愁颜。漏箭移、稍觉轻寒。渐呜咽、画角数声残。对闲窗畔，停灯向晓，抱影无眠。

轮台子

一枕清宵好梦，可惜被、邻鸡唤觉。匆匆策马登途，满目淡烟衰草。前驱风触鸣珂，过霜林、渐觉惊栖鸟。冒征尘远况，自古凄凉长安道。行行又历孤村，楚天阔、望中未晓。

念劳生，惜芳年壮岁，离多欢少。叹断梗难停，暮云渐杳。但黯黯魂消，寸肠凭谁表。恁驱驱、何时是了。又争似、却返瑶京，重买千金笑。

引驾行

虹收残雨。蝉嘶败柳长堤暮。背都门、动消黯，西风片帆轻举。愁睹。泛画鹢翩翩，灵鼙隐隐下前浦。忍回首、佳人渐远，想高城、隔烟树。

几许。秦楼永昼，谢阁连宵奇遇。算赠笑千金，酬歌百琲，尽成轻负。南顾。念吴邦越国，风烟萧索在何处。独自个、千山万水，指天涯去。

望远行

绣帟睡起。残妆浅，无绪匀红补翠。藻井凝尘，金梯铺藓，寂寞凤楼十二。风絮纷纷，烟芜苒苒，永日画阑，沈吟独倚。望远

行，南陌春残悄归骑。

凝睇。消遣离愁无计。但暗掷、金钗买醉。对好景、空饮香醪，争奈转添珠泪。待伊游冶归来，故故解放翠羽，轻裙重系。见纤腰，图信人憔悴。

彩云归

蘅皋向晚舫轻航。卸云帆、水驿鱼乡。当暮天、霁色如晴昼，江练静、皎月飞光。那堪听、远村羌管，引离人断肠。此际浪萍风梗，度岁茫茫。

堪伤。朝欢暮宴，被多情、赋与凄凉。别来最苦，襟袖依约，尚有馀香。算得伊、鸳衾凤枕，夜永争不思量。牵情处，惟有临歧，一句难忘。

洞仙歌

佳景留心惯。况少年彼此，风情非浅。有笙歌巷陌，绮罗庭院。倾城巧笑如花面。恣雅态、明眸回美盼。同心绾。算国艳仙材，翻恨相逢晚。

缱绻。洞房悄悄，绣被重重，夜永欢馀，共有海约山盟，记得翠云偷翦。和鸣彩凤于飞燕。间柳径花阴携手遍。情眷恋。向其间、密约轻怜事何限。忍聚散。况已结深深愿。愿人间天上，暮云朝雨长相见。

离别难

花谢水流倏忽，嗟年少光阴。有天然、蕙质兰心。美韶容、何啻值千金。便因甚、翠弱红衰，缠绵香体，都不胜任。算神仙、五色灵丹无验，中路委瓶簪。

人悄悄，夜沈沈。闭香闺、永弃鸳衾。想娇魂媚魄非远，纵洪都方土也难寻。最苦是、好景良天，尊前歌笑，空想遗音。望断处，杳杳巫峰十二，千古暮云深。

击梧桐

香靥深深，姿姿媚媚，雅格奇容天与。自识伊来，便好看承，会得妖娆心素。临歧再约同欢，定是都把、平生相许。又恐恩情，易破难成，未免千般思虑。

近日书来，寒暄而已，苦没怱怱言语。便认得、听人教当，拟把前言轻负。见说兰台宋玉，多才多艺善词赋。试与问、朝朝暮暮。行云何处去。

夜半乐

冻云黯淡天气，扁舟一叶，乘兴离江渚。渡万壑千岩，越溪深处。怒涛渐息，樵风乍起，更闻商旅相呼。片帆高举。泛画鹢、翩翩过南浦。

望中酒旆闪闪，一簇烟村，数行霜树。残日下，渔人鸣榔归去。败荷零落，衰杨掩映，岸边两两三三，浣沙游女。避行客、含羞笑相语。

到此因念，绣阁轻抛，浪萍难驻。叹后约丁宁竟何据。惨离怀，空恨岁晚归期阻。凝泪眼、杳杳神京路。断鸿声远长天暮。

祭天神

叹笑筵歌席轻抛骰。背孤城、几舍烟村停画舸。更深钓叟归来，数点残灯火。被连绵宿酒醺醺，愁无那。寂寞拥、重衾卧。

又闻得、行客扁舟过。篷窗近，兰棹急，好梦还惊破。念平生、单栖踪迹，多感情怀，到此厌厌，向晓披衣坐。

过涧歇近

淮楚。旷望极，千里火云烧空，尽日西郊无雨。厌行旅。数幅轻帆旋落，舣棹蒹葭浦。避畏景，两两舟人夜深语。

此际争可，便恁奔名竞利去。九衢尘里，衣冠冒炎暑。回首江乡，月观风亭，水边石上，幸有散发披襟处。

中吕调

安公子

长川波潋滟。楚乡淮岸迢递，一霎烟汀雨过，芳草青如染。驱驱携书剑。当此好好景，自觉多愁多病，行役心情厌。

望处旷野沈沈，暮云黯黯。行侵夜色，又是急桨投村店。认去程将近，舟子相呼，遥指渔灯一点。

菊花新

欲掩香帏论缱绻。先敛双蛾愁夜短。催促少年郎，先去睡、鸳衾图暖。

须臾放了残针线。脱罗裳、恣情无限。留取帐前灯，时时待、看伊娇面。

过涧歇近

酒醒。梦才觉，小阁香炭成煤，洞户银蟾移影。人寂静。夜永清寒，翠瓦霜凝。疏帘风动，漏声隐隐，飘来转愁听。

怎向心绪，近日厌厌长似病。凤楼咫尺，佳期杳无定。展转无眠，粲枕冰冷。香虬烟断，是谁与把重衾整。

轮台子

雾敛澄江，烟消蓝光碧。彤霞衬遥天，

掩映断续，半空残月。孤村望处人寂寞，闻
钓叟、甚处一声羌笛。九疑山畔才雨过，斑
竹作、血痕添色。感行客。翻思故国，恨因
循阻隔。路久沈消息。

正老松枯柏情如织。闻野猿啼，愁听得。
见钓舟初出，芙蓉渡头，鸳鸯滩侧。干名利
禄终无益。念岁岁间阻，迢迢紫陌。翠蛾娇
艳，从别后经今，花开柳拆伤魂魄。利名牵
役。又争忍、把光景抛掷。

平 调

望汉月

明月明月明月。争奈乍圆还缺。恰如年
少洞房人，暂欢会、依前离别。

小楼凭槛处，正是去年时节。千里清光
又依旧，奈夜永、厌厌人绝。

归去来

初过元宵三五。慵困春情绪。灯月阑珊
嬉游处。游人尽、厌欢聚。

凭仗如花女。持杯谢、酒朋诗侣。馀醒
更不禁香醕。歌筵罢、且归去。

燕归梁

织锦裁编写意深。字值千金。一回披玩

一愁吟。肠成结、泪盈襟。

幽欢已散前期远，无繆赖、是而今。密凭归雁寄芳音。恐冷落、旧时心。

八六子

如花貌。当来便约，永结同心偕老。为妙年、俊格聪明，凌厉多方怜爱，何期养成心性近，元来都不相表。渐作分飞计料。

稍觉因情难供，恁殢恼。争克罢同欢笑。已是断弦尤续，覆水难收，常向人前诵谈，空遣时传音耗。漫悔懊。此事何时坏了。

长寿乐

尤红殢翠。近日来、陡把狂心牵系。罗绮丛中，笙歌筵上，有个人人可意。解严妆巧笑，取次言谈成娇媚。知几度、密约秦楼尽醉。仍携手，眷恋香衾绣被。

情渐美。算好把、夕雨朝云相继。便是仙禁春深，御炉香袅，临轩亲试。对天颜咫尺，定然魁甲登高第。待恁时、等著回来贺喜。好生地。剩与我儿利市。

仙吕调

望海潮

东南形胜，三吴都会，钱塘自古繁华。

烟柳画桥，风帘翠幕，参差十万人家。云树绕堤沙。怒涛卷霜雪，天堑无涯。市列珠玑，户盈罗绮竞豪奢。

重湖叠嶂清嘉。有三秋桂子，十里荷花。羌管弄晴，菱歌泛夜，嬉嬉钓叟莲娃。千骑拥高牙。乘醉听箫鼓，吟赏烟霞。异日图将好景，归去凤池夸。

如鱼水

轻霭浮空，乱峰倒影，潋滟十里银塘。绕岸垂杨。红楼朱阁相望。芰荷香。双双戏、鸂鶒鸳鸯。乍雨过、兰芷汀洲，望中依约似潇湘。

风淡淡，水茫茫。动一片晴光。画舫相将。盈盈红粉清商。紫薇郎。修禊饮、且乐仙乡。更归去，遍历銮坡凤沼，此景也难忘。

其二

帝里疏散，数载酒萦花系，九陌狂游。良景对珍筵恼，佳人自有风流。劝琼瓯。绛唇启、歌发清幽。被举措、艺足才高，在处别得艳姬留。

浮名利，拟拚休。是非莫挂心头。富贵岂由人，时会高志须酬。莫闲愁。共绿蚁、红粉相尤。向绣幄，醉倚芳姿睡，算除此外何求。

玉蝴蝶

望处雨收云断，凭阑悄悄，目送秋光。

晚景萧疏，堪动宋玉悲凉。水风轻、苹花渐老，月露冷、梧叶飘黄。遣情伤。故人何在，烟水茫茫。

难忘。文期酒会，几孤风月，屡变星霜。海阔山遥，未知何处是潇湘。念双燕、难凭远信，指暮天、空识归航。黯相望。断鸿声里，立尽斜阳。

其二

渐觉芳郊明媚，夜来膏雨，一洒尘埃。满目浅桃深杏，露染风裁。银塘静、鱼鳞篔展，烟岫翠、龟甲屏开。殷晴雷。云中鼓吹，游遍蓬莱。

徘徊。隼旟前后，三千珠履，十二金钗。雅俗熙熙，下车成宴尽春台。好雍容、东山妓女，堪笑傲、北海尊罍。且追陪。凤池归去，那更重来。

其三

是处小街斜巷，烂游花馆，连醉瑶卮。选得芳容端丽，冠绝吴姬。绛唇轻、笑歌尽雅，莲步稳、举措皆奇。出屏帏。倚风情态，约素腰肢。

当时。绮罗丛里，知名虽久，识面何迟。见了千花万柳，比并不如伊。未同欢、寸心暗许，欲话别、纤手重携。结前期。美人才子，合是相知。

其四

误入平康小巷，画檐深处，珠箔微褰。罗绮丛中，偶认旧识婵娟。翠眉开、娇横远

岫，绿鬓弹、浓染春烟。忆情牵。粉墙曾恁，
窥宋三年。

迁延。珊瑚筵上，亲持犀管，旋叠香笺。
要索新词，殢人含笑立尊前。按新声、珠喉
渐稳，想旧意、波脸增妍。苦留连。凤衾鸳
枕，忍负良天。

其五 重阳（题据毛校乐章集补）

淡荡素商行暮，远空雨歇，平野烟收。
满目江山，堪助楚客冥搜。素光动、云涛涨
晚，紫翠冷、霜岫横秋。景清幽。渚兰香谢，
汀树红愁。

良俦。西风吹帽，东篱携酒，共结欢游。
浅酌低吟，坐中俱是饮家流。对残晖、登临
休叹，赏令节、酩酊方酬。且相留。眼前尤
物，盏里忘忧。

满江红

暮雨初收，长川静、征帆夜落。临岛屿、
蓼烟疏散，苇风萧索。几许渔人飞短艇，尽
载灯火归村落。遣行客、当此念回程，伤漂
泊。

桐江好，烟漠漠。波似染，山如削。绕
严陵滩畔，鹭飞鱼跃。游宦区区成底事，平
生况有云泉约。归去来、一曲仲宣吟，从军
乐。

其二

访雨寻云，无非是、奇容艳色。就中有、
天真妖丽，自然标格。恶发姿颜欢喜面，细

追想处皆堪惜。自别后、幽怨与闲愁，成堆积。

鳞鸿阻，无信息。梦魂断，难寻觅。尽思量，休又怎生休得。谁恁多情凭向道，纵来相见且相忆。便不成、常遣似如今，轻抛掷。

其三

万恨千愁，将年少、衷肠牵系。残梦断、酒醒孤馆，夜长无味。可惜许枕前多少意，到如今两总无终始。独自个、赢得不成眠，成憔悴。

添伤感，将何计。空只恁，厌厌地。无人处思量，几度垂泪。不会得都来些子事，甚恁底死难拚弃。待到头、终久问伊看，如何是。

其四

匹马驱驱，摇征辔、溪边谷畔。望斜日西照，渐沈山半。两两栖禽归去急，对人相并声相唤。似笑我、独自向长途，离魂乱。

中心事，多伤感。人是宿，前村馆。想鸳衾今夜，共他谁暖。惟有枕前相思泪，背灯弹了依前满。怎忘得、香阁共伊时，嫌更短。

洞仙歌

乘兴，闲泛兰舟，渺渺烟波东去。淑气散幽香，满蕙兰汀渚。绿芜平畹，和风轻暖，曲岸垂杨，隐隐隔、桃花圃。芳树外，闪闪

酒旗遥举。

羁旅。渐入三吴风景，水村渔市。闲思更远神京，抛掷幽会小欢何处。不堪独倚危檣，凝情西望日边，繁华地、归程阻。空自叹当时，言约无据。伤心最苦。伫立对、碧云将暮。关河远，怎奈向、此时情绪。

引驾行

红尘紫陌，斜阳暮草长安道，是离人、断魂处，迢迢匹马西征。新晴。韶光明媚，轻烟淡薄和气暖，望花村、路隐映，摇鞭时过长亭。愁生。伤凤城仙子，别来千里重行行。又记得临歧，泪眼湿、莲脸盈盈。

消凝。花朝月夕，最苦冷落银屏。想媚容、耿耿无眠，屈指已算回程。相萦。空万般思忆，争如归去睹倾城。向绣帏、深处并枕，说如此牵情。

望远行

长空降瑞，寒风翦，淅淅瑶花初下。乱飘僧舍，密洒歌楼，迢迢渐迷鸳瓦。好是渔人，披得一蓑归去，江上晚来堪画。满长安，高却旗亭酒价。

幽雅。乘兴最宜访戴，泛小棹、越溪潇洒。皓鹤夺鲜，白鹇失素，千里广铺寒野。须信幽兰歌断，彤云收尽，别有瑶台琼榭。放一轮明月，交光清夜。

八声甘州

对潇潇、暮雨洒江天，一番洗清秋。渐露风凄惨，关河冷落，残照当楼。是处红衰翠减，苒苒物华休。惟有长江水，无语东流。

不忍登高临远，望故乡渺邈，归思难收。叹年来踪迹，何事苦淹留。想佳人、妆楼颙望，误几回、天际识归舟。争知我、倚阑干处，正恁凝愁。

临江仙

梦觉小庭院，冷风淅淅，疏雨潇潇。绮窗外，秋声败叶狂飘。心摇。奈寒漏永，孤帏悄，泪烛空烧。无端处，是绣衾鸳枕，闲过清宵。

萧条。牵情系恨，争向年少偏饶。觉新来、憔悴旧日风标。魂消。念欢娱事，烟波阻、后约方遥。还经岁，问怎生禁得，如许无聊。

竹马子

登孤垒荒凉，危亭旷望，静临烟渚。对雌霓挂雨，雄风拂槛，微收烦暑。渐觉一叶警秋，残蝉噪晚，素商时序。览景想前欢，指神京，非雾非烟深处。

向此成追感，新愁易积，故人难聚。凭

高尽日凝伫。赢得消魂无语。极目霁霭霏微，暝鸦零乱，萧索江城暮。南楼画角，又送残阳去。

小镇西

意中有个人，芳颜二八。天然俏、自来奸黠。最奇绝。是笑时、媚靥深深，百态千娇，再三偎著，再三香滑。

久离缺。夜来魂梦里，尤花殢雪。分明似旧家时节。正欢悦。被邻鸡唤起，一场寂寥，无眠向晓，空有半窗残月。

小镇西犯

水乡初禁火，青春未老。芳菲满、柳汀烟岛。波际红帏缥缈。尽杯盘小。歌袂褰，声声谐楚调。

路缭绕。野桥新市里，花秣妓好。引游人、竞来暄笑。酩酊谁家年少。信玉山倒。家何处，落日眠芳草。

迷神引

一叶扁舟轻帆卷。暂泊楚江南岸。孤城暮角，引胡笳怨。水茫茫，平沙雁、旋惊散。烟敛寒林簇，画屏展。天际遥山小，黛眉浅。

旧赏轻抛，到此成游宦。觉客程劳，年光晚。异乡风物，忍萧索、当愁眼。帝城赊，

秦楼阻，旅魂乱。芳草连空阔，残照满。佳人无消息，断云远。

促拍满路花

香靥融春雪，翠鬓弹秋烟。楚腰纤细正笄年。凤帏夜短，偏爱日高眠。起来贪颠耍，只恁残却黛眉，不整花钿。

有时携手闲坐，偎倚绿窗前。温柔情态尽人怜。画堂春过，悄悄落花天。最是娇痴处，尤殢檀郎，未教拆了秋千。

六么令

淡烟残照，摇曳溪光碧。溪边浅桃深杏，迤邐染春色。昨夜扁舟泊处，枕底当滩碛。波声渔笛。惊回好梦，梦里欲归归不得。

展转翻成无寐，因此伤行役。思念多媚多娇，咫尺千山隔。都为深情密爱，不忍轻离拆。好天良夕。鸳帷寂寞，算得也应暗相忆。

剔银灯

何事春工用意。绣画出、万红千翠。艳杏夭桃，垂杨芳草，各斗雨膏烟腻。如斯佳致。早晚是、读书天气。

渐渐园林明媚。便好安排欢计。论槛买花，盈车载酒，百琲千金邀妓。何妨沈醉。

有人伴、日高春睡。

红窗听

如削肌肤红玉莹。举措有、许多端正。
二年三岁同鸳寝。表温柔心性。

别后无非良夜永。如何向、名牵利役，
归期未定。算伊心里，却冤成薄幸。

临江仙

鸣珂碎撼都门晓，旌幢拥下天人。马摇
金辔破香尘。壶浆盈路，欢动一城春。

扬州曾是追游地，酒台花径仍存。凤箫
依旧月中闻。荆王魂梦，应认岭头云。

凤归云

向深秋，雨馀爽气肃西郊。陌上夜阑，
襟袖起凉飙。天末残星，流电未灭，闪闪隔
林梢。又是晓鸡声断，阳乌光动，渐分山路
迢迢。

驱驱行役，苒苒光阴，蝇头利禄，蜗角
功名，毕竟成何事，漫相高。抛掷云泉，狎
玩尘土，壮节等闲消。幸有五湖烟浪，一船
风月，会须归去老渔樵。

女冠子

淡烟飘薄。莺花谢、清和院落。树阴翠、

密叶成幄。麦秋霁景，夏云忽变奇峰、倚寥廓。波暖银塘，涨新萍绿鱼跃。想端忧多暇，陈王是日，嫩苔生阁。

正铄石天高，流金昼永，楚榭光风转蕙，披襟处、波翻翠幕。以文会友，沈李浮瓜忍轻诺。别馆清闲，避炎蒸、岂须河朔。但尊前随分，雅歌艳舞，尽成欢乐。

玉山枕

骤雨新霁。荡原野、清如洗。断霞散彩，残阳倒影，天外云峰，数朵相倚。露荷烟芷满池塘，见次第、几番红翠。当是时、河朔飞觴，避炎蒸，想风流堪继。

晚来高树清风起。动帘幕、生秋气。画楼昼寂，兰堂夜静，舞艳歌姝，渐任罗绮。讼闲时泰足风情，便争奈、雅歌都废。省教成、几阙清歌，尽新声，好尊前重理。

减字木兰花

花心柳眼。郎似游丝常惹绊。慵困谁怜。绣线金针不喜穿。

深房密宴。争向好天多聚散。绿锁窗前。几日春愁废管弦。

木兰花令

有个人人真攀羨。问著洋洋回却面。你

若无意向他人，为甚梦中频相见。

不如闻早还却愿。免使牵人虚魂乱。风流肠肚不坚牢，祇恐被伊牵引断。

甘州令

冻云深，淑气浅，寒欺绿野。轻雪伴、早梅飘谢。艳阳天，正明媚，却成潇洒。玉人歌，画楼酒，对此景、骤增高价。

卖花巷陌，放灯台榭。好时节、怎生轻舍。赖和风，荡霏霭，廓清良夜。玉尘铺，桂华满，素光里、更堪游冶。

西 施

苧萝妖艳世难偕。善媚悦君怀。后庭恃宠，尽使绝嫌猜。正恁朝欢暮宴，情未足，早江上兵来。

捧心调态军前死，罗绮旋变尘埃。至今想，怨魂无主尚徘徊。夜夜姑苏城外，当时月，但空照荒台。

其二

柳街灯市好花多。尽让美琼娥。万娇千媚，的的在层波。取次梳妆，自有天然态，爱浅画双蛾。

断肠最是金闺客，空怜爱、奈伊何。洞房咫尺，无计枉朝珂。有意怜才，每遇行云处，幸时恁相过。

其三

自从回步百花桥。便独处清宵。凤衾鸳枕，何事等闲抛。纵有余香，也似郎恩爱，向日夜潜消。

恐伊不信芳容改，将憔悴、写霜绡。更凭锦字，字字说情慆。要识愁肠，但看丁香树，渐结尽春梢。

河 传

翠深红浅。愁蛾黛蹙，娇波刀翦。奇容妙妓，争逞舞裊歌扇。妆光生粉面。

坐中醉客风流惯。尊前见。特地惊狂眼。不似少年时节，千金争选。相逢何太晚。

其二

淮岸。向晚。圆荷向背，芙蓉深浅。仙娥画舸，露渍红芳交乱。难分花与面。

采多渐觉轻船满。呼归伴。急桨烟村远。隐隐棹歌，渐被蒹葭遮断。曲终人不见。

郭郎儿近拍

（案调名原作郭郎儿近，此从毛校乐章集）

帝里。闲居小曲深坊，庭院沈沈朱户闭。新霁。畏景天气。薰风帘幕无人，永昼厌厌如度岁。

愁悴。枕篔微凉，睡久辗转慵起。砚席尘生，新诗小阁，等闲都尽废。这些儿、寂

寞情怀，何事新来常恁地。

南吕调

透碧霄

月华边。万年芳树起祥烟。帝居壮丽，皇家熙盛，宝运当千。端门清昼，觚稜照日，双阙中天。太平时、朝野多欢。遍锦街香陌，钧天歌吹，阊苑神仙。

昔观光得意，狂游风景，再睹更精妍。傍柳阴，寻花径，空恁鞦韆垂鞭。乐游雅戏，平康艳质，应也依然。仗何人、多谢婣娟。道宦途踪迹，歌酒情怀，不似当年。

木兰花慢

倚危楼伫立，乍萧索、晚晴初。渐素景衰残，风砧韵响，霜树红疏。云衢。见新雁过，奈佳人自别阻音书。空遣悲秋念远，寸肠万恨萦纡。

皇都。暗想欢游，成往事、动欷歔。念对酒当歌，低帏并枕，翻恁轻孤。归途。纵凝望处，但斜阳暮霭满平芜。赢得无言悄悄，凭阑尽日踟蹰。

其二

拆桐花烂漫，乍疏雨、洗清明。正艳杏烧林，缃桃绣野，芳景如屏。倾城。尽寻胜

去，骤雕鞍绀幘出郊垞。风暖繁弦脆管，万家竞奏新声。

盈盈。斗草踏青。人艳冶、递逢迎。向路傍往往，遗簪堕珥，珠翠纵横。欢情。对佳丽地，信金罍罄竭玉山倾。拚却明朝永日，画堂一枕春醒。

其三

古繁华茂苑，是当日、帝王州。咏人物鲜明，土风细腻，曾美诗流。寻幽。近香径处，聚莲娃钓叟簇汀洲。晴景吴波练静，万家绿水朱楼。

凝旒。乃眷东南，思共理、命贤侯。继梦得文章，乐天惠爱，布政优优。鳌头。况虚位久，遇名都胜景阻淹留。赢得兰堂醞酒，画船携妓欢游。

临江仙引

渡口、向晚，乘瘦马、陟平冈。西郊又送秋光。对暮山横翠，衬残叶飘黄。凭高念远，素景楚天，无处不凄凉。

香闺别来无信息，云愁雨恨难忘。指帝城归路，但烟水茫茫。凝情望断泪眼，尽日独立斜阳。

其二

上国。去客。停飞盖，促离筵。长安古道绵绵。见岸花啼露，对堤柳愁烟。物情人意，向此触目，无处不凄然。

醉拥征骖犹伫立，盈盈泪眼相看。况绣

帏人静，更山馆春寒。今宵怎向漏永，顿成两处孤眠。

其三

画舸、荡桨，随浪箭、隔岸虹。□荷占断秋容。疑水仙游泳，向别浦相逢。蛟丝雾吐渐收，细腰无力转娇慵。

罗袜凌波成旧恨，有谁更赋惊鸿。想媚魂香信，算密锁瑶宫。游人漫劳倦□，奈何不逐东风。

瑞鹧鸪

宝髻瑶簪。严妆巧，天然绿媚红深。绮罗丛里，独逞讴吟。一曲阳春定价，何啻值千金。倾听处，王孙帝子，鹤盖成阴。

凝态掩霞襟。动象板声声，怨思难任。嘹亮处，迥压弦管低沈。时恁回眸敛黛，空役五陵心。须信道，绿情寄意，别有知音。

其二

吴会风流。人烟好，高下水际山头。瑶台绛阙，依约蓬丘。万井千闾富庶，雄压十三州。触处青蛾画舸，红粉朱楼。

方面委元侯。致讼简时丰，继日欢游。襦温裤暖，已扇民讴。旦暮锋车命驾，重整济川舟。当恁时，沙堤路稳，归去难留。

忆帝京

薄衾小枕天气。乍觉别离滋味。展转数

寒更，起了还重睡。毕竟不成眠，一夜长如岁。

也拟待、却回征辔。又争奈、已成行计。万种思量，多方开解，只恁寂寞厌厌地。系我一生心，负你千行泪。

般涉调

塞 孤

一声鸡，又报残更歇。寤马巾车催发。草草主人灯下别。山路险，新霜滑。瑶珂响、起栖乌，金镫冷、敲残月。渐西风紧，襟袖凄冽。

遥指白玉京，望断黄金阙。远道何时行彻。算得佳人凝恨切。应念念，归时节。相见了、执柔荑，幽会处、偎香雪。免鸳衾、两恁虚设。

瑞鹧鸪

天将奇艳与寒梅。乍惊繁杏腊前开。暗想花神、巧作江南信，鲜染燕脂细剪裁。

寿阳妆罢无端饮，凌晨酒入香腮。恨听烟坞深中，谁恁吹羌管逐风来。绛雪纷纷落翠苔。

其二

全吴嘉会古风流。渭南往岁忆来游。西子方来、越相功成去，千里沧江一叶舟。

至今无限盈盈者，尽来拾翠芳洲。最是簇簇寒村，遥认南朝路、晚烟收。三两人家古渡头。

洞仙歌

嘉景，向少年彼此，争不雨沾云惹。奈傅粉英俊，梦兰品雅。金丝帐暖银屏亚。并粲枕、轻偎轻倚，绿娇红姹。算一笑，百琲明珠非价。

闲暇。每祇向、洞房深处，痛怜极宠，似觉些子轻孤，早背人沾洒。从来娇纵多猜讶。更对翦香云，须要深心同写。爱搵了双眉，索人重画。忍孤艳冶。断不等闲轻舍。鸳衾下。愿常恁、好天良夜。

安公子

远岸收残雨。雨残稍觉江天暮。拾翠汀洲人寂静，立双双鸥鹭。望几点、渔灯隐映蒹葭浦。停画桡、两两舟人语。道去程今夜，遥指前村烟树。

游宦成羁旅。短檣吟倚闲凝伫。万水千山迷远近，想乡关何处。

自别后、风亭月榭孤欢聚。刚断肠、惹得离情苦。听杜宇声声，劝人不如归去。

其二

梦觉清宵半。悄然屈指听银箭。惟有床前残泪烛，啼红相伴。暗惹起、云愁雨恨情

何限。从卧来、展转千余遍。恁数重鸳被，怎向孤眠不暖。

堪恨还堪叹。当初不合轻分散。及至厌厌独自个，却眼穿肠断。似恁地、深情密意如何拚。虽后约、的有于飞愿。奈片时难过，怎得如今便见。

长寿乐

繁红嫩翠。艳阳景，妆点神州明媚。是处楼台，朱门院落，弦管新声腾沸。恣游人、无限驰骤，娇马车如水。竟寻芳选胜，归来向晚，起通衢近远，香尘细细。

太平世。少年时，忍把韶光轻弃。况有红妆，楚腰越艳，一笑千金何啻。向尊前、舞袖飘雪，歌响行云止。愿长绳、且把飞鸟系。任好从容痛饮，谁能惜醉。

黄钟羽

倾 杯

水乡天气，洒蒹葭、露结寒生早。客馆更堪秋杪。空阶下、木叶飘零，飒飒声乾，狂风乱扫。当无绪、人静酒初醒，天外征鸿，知送谁家归信，穿云悲叫。

蛩响幽窗，鼠窥寒砚，一点银缸闲照。梦枕频惊，愁衾半拥，万里归心悄悄。往事追思多少。赢得空使方寸挠。断不成眠，此

夜厌厌，就中难晓。

大石调

倾 杯

金风淡荡，渐秋光老、清宵永。小院新晴天气，轻烟乍敛，皓月当轩练净。对千里寒光，念幽期阻、当残景，早是多情多病。那堪细把，旧约前欢重省。

最苦碧云信断，仙乡路杳，归鸿难倩。每高歌、强遣离怀，惨咽、翻成心耿耿。漏残露冷。空赢得、悄悄无言，愁绪终难整。又是立尽、梧桐碎影。

散水调

倾 杯

鹭落霜洲，雁横烟渚，分明画出秋色。暮雨乍歇。小楫夜泊，宿苇村山驿。何人月下临风处，起一声羌笛。离愁万绪，闻岸草、切切蛩吟如织。

为忆。芳容别后，水遥山远，何计凭鳞翼。想绣阁深沈，争知憔悴损、天涯行客。楚峡云归，高阳人散，寂寞狂踪迹。望京国。空目断、远峰凝碧。

黄钟宫

鹤冲天

黄金榜上。偶失龙头望。明代暂遗贤，
如何向。未遂风云便，争不恣狂荡。何须论
得丧。才子词人，自是白衣卿相。

烟花巷陌，依约丹青屏障。幸有意中人，
堪寻访。且恁偎红翠，风流事、平生畅。青
春都一饷。忍把浮名，换了浅斟低唱。

林钟商

木兰花 杏花

翦裁用尽春工意。浅蘸朝霞千万蕊。天
然淡泞好精神，洗尽严妆方见媚。风亭月榭
闲相倚。紫玉枝梢红蜡蒂。假饶花落未消愁，
煮酒杯盘催结子。

其二 海棠

东风催露千娇面。欲绽红深开处浅。日
高梳洗甚时忒，点滴燕脂匀未偏。

霏微雨罢残阳院。洗出都城新锦段。美
人纤手摘芳枝，插在钗头和凤颤。

其三 柳枝

黄金万缕风牵细。寒食初头春有味。殢

全宋词 柳 永

烟尤雨索春饶，一日三眠夸得意。

章街隋岸欢游地。高拂楼台低映水。楚王空待学风流，饿损宫腰终不似。

散水调

倾杯乐

楼锁轻烟，水横斜照，遥山半隐愁碧。片帆岸远，行客路杳，簇一天寒色。楚梅映雪数枝艳，报青春消息。年华梦促，音信断、声远飞鸿南北。

算伊别来无绪，翠消红减，双带长抛掷。但泪眼沈迷，看朱成碧。惹闲愁堆积。雨意云情，酒心花态，辜负高阳客。梦难极。和梦也、多时间隔。

歇指调

祭天神

忆绣衾相向轻轻语。屏山掩、红蜡长明，金兽盛熏兰炷。何期到此，酒态花情顿辜负。柔肠断、还是黄昏，那更满庭风雨。

听空阶和漏，碎声斗滴愁眉聚。算伊还共谁人，争知此冤苦。念千里烟波，迢迢前约，旧欢慵省，一向无心绪。

全宋词 柳 永

平 调

鹧鸪天

（案此首调名原作瑞鹧鸪，非，今按律改）

吹破残烟入夜风。一轩明月上帘栊。因
惊路远人还远，纵得心同寝未同。

情脉脉，意忡忡。碧云归去认无踪。只
应曾向前生里，爱把鸳鸯两处笼。

中吕调

归去来

一夜狂风雨。花英坠、碎红无数。垂杨
漫结黄金缕。尽春残、萦不住。蝶稀蜂散知
何处。殢尊酒、转添愁绪。多情不惯相思苦。
休惆怅、好归去。

中吕宫

梁州令

梦觉纱窗晓。残灯掩然空照。因思人事
苦萦牵，离愁别恨，无限何时了。

怜深定是心肠小。往往成烦恼。一生惆
怅情多少。月不长圆，春色易为老。

中吕调

燕归梁

轻蹑罗鞋掩绛绡。传音耗、苦相招。语声犹颤不成娇。乍得见、两魂消。

匆匆草草难留恋、还归去、又无聊。若谐雨夕与云朝。得似个、有器器。

夜半乐

艳阳天气，烟细风暖，芳郊澄朗闲凝伫。渐妆点亭台，参差佳树。舞腰困力，垂杨绿映，浅桃秾李天天，嫩红无数。度绮燕、流莺斗双语。

翠娥南陌簇簇，蹑影红阴，缓移娇步。抬粉面、韶容花光相妒。绛绡袖举。云鬟风颤，半遮檀口含羞，背人偷顾。竞斗草、金钗笑争赌。

对此嘉景，顿觉消凝，惹成愁绪。念解佩、轻盈在何处。忍良时、孤负少年等闲度。空望极、回首斜阳暮。叹浪萍风梗知何去。

越调

清平乐

繁华锦烂。已恨归期晚。翠减红稀莺似

懒。特地柔肠欲断。

不堪尊酒频倾。恼人转转愁生。

□□□□□□，多情争似无情。

中吕调

迷神引

红板桥头秋光暮。淡月映烟方煦。寒溪
蘸碧，绕垂杨路。重分飞，携纤手、泪如雨。
波急隋堤远，片帆举。倏忽年华改，向期阻。

时觉春残，渐渐飘花絮。好夕良天长孤
负。洞房闲掩，小屏空、无心觑。指归云，
仙乡杳、在何处。遥夜香衾暖，算谁与。知
他深深约，记得否。

失调名

多情到了多病。

爪茉莉 秋夜

每到秋来，转添甚况味。金风动、冷清
清地。残蝉噪晚，甚聒得、人心欲碎，更休
道、宋玉多悲，石人、也须下泪。

衾寒枕冷，夜迢迢、更无寐。深院静、
月明风细。巴巴望晓，怎生捱、更迢递。料
我儿、只在枕头根底，等人来、睡梦里。

女冠子 夏景

火云初布。迟迟永日炎暑。浓阴高树。黄鹂叶底，羽毛学整，方调娇语。薰风时渐动，峻阁池塘，芰荷争吐。画梁紫燕，对对衔泥，飞来又去。

想佳期、容易成辜负。共人人、同上画楼斟香醑。恨花无主。卧象床犀枕，成何情绪。有时魂梦断，半窗残月，透帘穿户。去年今夜，扇儿扇我，情人何处。

十二时 秋夜

晚晴初，淡烟笼月，风透蟾光如洗。觉翠帐、凉生秋思。渐入微寒天气。败叶敲窗，西风满院，睡不成还起。更漏咽、滴破忧心，万感并生，都在离人愁耳。

天怎知、当时一句，做得十分萦系。夜永有时，分明枕上，觑着孜孜地。烛暗时酒醒，元来又是梦里。

睡觉来、披衣独坐，万种无憀情意。怎得伊来，重谐云雨，再整馀香被。祝告天发愿，从今永无抛弃。

红窗迥

小园东，花共柳。红紫又一齐开了。引

将蜂蝶燕和莺，成阵价、忙忙走。花心偏向
蜂儿有。莺共燕、吃他拖逗。蜂儿却入、花
里藏身，胡蝶儿、你且退后。

西江月

师师生得艳冶，香香于我情多。安安那
更久比和。四个打成一个。

幸自苍皇未款，新词写处多磨。几回扯
了又重授。奸字中心著我。

凤凰阁

匆匆相见，懊恼恩情太薄。霎时云雨人
抛却。教我行思坐想，肌肤如削。恨只恨、
相违旧约。

相思成病，那更潇潇雨落。断肠人在阑
干角。山远水远人远，音信难托。这滋味、
黄昏又恶。

三台令

鱼藻池边射鸭，芙蓉苑里看花。日色赭
黄相似，不著红鸾扇遮。

池北池南草绿，殿前殿后花红。天子千
秋万岁，未央明月清风。

虞美人

春花秋月何时了。往事知多少。小楼昨夜又东风。故国不堪回首、月明中。

雕阑玉砌应犹在。只是朱颜改。问君都有几多愁。恰似一江春水、向东流。

多 丽

凤凰箫。新声远度兰桡。漾东风、湖光十里，参差绿盖红桥。暖云蘸、郁金衫色，晴烟抹、翡翠裙腰。罨画名园，闹红芳榭，蒲葵亭畔彩绳摇。满鸳鹭、落英堪藉，犹作带人娇。渍罗袂，莫揉痕退，生怕香销。

忆当年、尊前扇底，多情冶叶倡条。浴兰女、隔花偷盼，修禊客、临水相招。旧约寻欢，新声换谱，三生梦里可怜宵。纵留得、楝花寒在，啼鴂已无聊，江南恨，越王台上，几度回潮。

如梦令

郊外绿阴千里。掩映红裙十队。惜别语方长，车马催人速去。偷泪。偷泪。那得分身应你。

千秋岁

泰阶平了。又见三台耀。烽火静，櫜枪

扫。朝堂耆硕辅，樽俎英雄表。福无艾，山河带砺人难老。

渭水当年钓。晚应飞熊兆。同一吕，今偏早。乌纱头未白，笑把金樽倒。人争羨，二十四遍中书考。

西江月

腹内胎生异锦，笔端舌喷长江。纵教片绢字难偿。不屑与人称量。

我不求人富贵，人须求我文章。风流才子占词场。真是白衣卿相。

龙端是

忆旧游 题南楼

问南楼月色 ,十载相疏 ,何似今宵。旧雨菰蒲国 ,想波光雁影 ,远撼沅潇。拟苏堤上杨柳 ,烟碧为谁摇。叹庾扇尘深 ,胡床梦浅 ,翠减香销。

迢迢。谩回首 ,记酹酒江山 ,曾共金镳。暮色沈西垒 ,几狂朋来往 ,舟叶招招。浩歌拍手归去 ,风月两长桥。算此会何时 ,刘郎去后多嫩桃。

龙紫蓬

齐天乐 题滕王阁

雨帘云栋重寻处 ,青红半空飞去。 槛影侵鸥 ,檐光送雁 ,摇荡秋容千里。 歌珠舞翠。 怎禁得无情 ,一江流水。 可是西山 ,半眉新绿向人觑。

千年留下剩赏 ,尽登临无限 ,须付才思。 坏堞闲愁 ,危檣往恨 ,欲拍阑干无路。 新碑旧记。 更今古匆匆 ,一番兴废。 立尽斜阳 ,共谁评半语。

楼 采

瑞鹤仙

冻痕销梦草。又招得春归，旧家池沼。园扉掩寒峭。倩谁将花信，遍传深窈。追游趁早。便裁却、轻衫短帽。任残梅、飞满溪桥，和月醉眠清晓。

年小。青丝纤手，彩胜娇鬟，赋情谁表。南楼信杳。江云重，雁归少。记冲香嘶马，流红回岸，几度绿杨残照。想暗黄，依旧东风，灞陵古道。

玉漏迟

絮花寒食路。晴丝罥日，绿阴吹雾。客帽欺风，愁满画船烟浦。彩柱秋千散后，怅尘锁、燕帘莺户。从间阻。梦云无准，鬢霜如许。

夜永绣阁藏娇，记掩扇传歌，翦灯留语。月允星期，细把花须频数。弹指一襟幽恨，谩空趁、啼鹃声诉。深院宇。黄昏杏花微雨。

法曲献仙音

花匣么弦，象奩双陆，旧日留欢情意。
梦到银屏，恨裁兰烛，香篝夜阑鸳被。料燕子重来地。桐阴锁窗绮。

倦梳洗。晕芳钿、自羞鸾镜，罗袖冷，
烟柳画栏半倚。浅雨压荼蘼，指东风、芳事余几。院落黄昏，怕春莺、惊笑憔悴。倩柔红约定，
唤取玉箫同醉。

好事近

人去玉屏间，逗晓柳丝风急。帘外杏花
细雨，冱春红愁湿。

单衣初试曲尘罗，中酒病无力。应是绣
床慵困，倚秋千斜立。

二郎神

露床转玉，唤睡醒、绿云梳晓。正倦立
银屏，新宽衣带，生怯轻寒料峭。闷绝相思
无人问，便怨入、墙阴啼鸟。嗟露屋锁春，
晴风喧昼，柳轻梅小。

人悄。日长谩忆，秋千嬉笑。怅烬冷炉
薰，花深莺静，帘箔微红醉袅。带结留诗，
粉痕销帕，情远窃香年少。凝恨极，尽日凭
高目断，淡烟芳草。

玉楼春

东风破晓寒成阵。曲锁沈香簧语嫩。凤
钗敲枕玉声圆，罗袖拂屏金缕褪。

云头雁影占来信。歌底眉尖萦浅晕。淡
烟疏柳一帘春，细雨遥山千叠恨。

失调名 紫丁香

珠蹙花舆，翠翻莲额。

又

汗粉难融，袖香新窃。

楼 扶

水龙吟 次清真梨花韵

素娥洗尽繁妆，夜深步月秋千地。轻腮晕玉，柔肌笼粉，缁尘敛避。霁雪留香，晓云同梦，昭阳宫闭。怅仙园路杳，曲栏人寂，疏雨湿、盈盈泪。

未放游蜂叶底。怕春归、不禁狂吹。象床因倚，冰魂微醒，莺声唤起。愁对黄昏，恨催寒食，满襟离思。想千红过尽，一枝独冷，把梅花比。

菩萨蛮

丝丝杨柳莺声近。晚风吹过秋千影。寒色一帘轻。灯残梦不成。

耳边消息在。笑指花梢待。又是不归来。满庭花自开。

沁园春 登候涛山

开辟以来，便有此山，独当怒涛。正秋空万里，寒催雁信，尘寰一簇，轻等鸿毛。

小可诗情，寻常酒量，到此应须分外豪。难
为水，算平生未有，此番登高。

飘飘。身踏金鳌。笑终日风波无限劳。
看檣乌缥缈，帆归远浦，麈鱼杂沓，网带馀
潮。待约诗人，相将月夜，取次携杯持蟹螯。
乘桴意，问谁人领解，空立亭皋。

楼 槃

霜天晚角 梅

月淡风轻。黄昏未是清。吟到十分清处，
也不啻、二三更。

晓钟天未明。晓霜人未行。只有城头残
角，说得尽、我平生。

又

翦雪裁冰。有人嫌太清。又有人嫌太瘦，
都不是、我知音。

谁是我知音。孤山人姓林。一自西湖别
后，辜负我、到如今。

楼 钥

醉翁操 七月上浣游裴园

茫茫。苍苍。青山绕、千顷波光。新秋
露风荷吹香。悠扬心地翛然，生清凉。古岸
摇垂杨。时有白鹭飞来双。

隐君如在，鹤与翱翔。老仙何处，尚有
流风未忘。琴与君兮宫商。酒与君兮杯觞。
清欢殊未央。西山忽斜阳。欲去且徜徉。更
将霜鬓临沧浪。

又 和东坡韵咏风琴

泠然。清圆。谁弹。向屋山。何言。清
风至阴德之天。悠扬余响婵娟。方昼眠。迥
立八风前。八音相宣知孰贤。

有时悲壮，铿若龙泉。有时幽杳，仿佛
猿吟鹤怨。忽若巍巍山巅。荡荡几如流川。
聊将娱暮年。听之身欲仙。弦索满人间。未
有逸韵如此弦。

孝宗皇帝虞主自浙江还重华宫鼓吹导引曲

孝宗纯孝，前圣更何加，高蹈处重华。

丹成仙去龙辇远，越岸暮山遐。

波臣先为卷寒沙。来往护灵槎。九虞礼
举神祇乐，万世佑皇家。

孝宗皇帝神主自重华宫至太庙祔庙鼓吹导引曲

吾皇尽孝，宗庙务崇尊。钜典备弥文。
巍巍东向开基主，七世祔神孙。

追思九闰整乾坤。环宇慕洪恩。从今密
迓高宗室，千载事如存。

楼 锷

浣溪沙 双桧堂

夏半阳乌景最长。小池不断藕花香。电
影雷声催急雨，十分凉。

芡剥明珠随意嚼，瓜分琼玉趁时尝。双
桧堂深新酿好，且传觞。

卢 炳

西江月

残雪犹余远岭。晚烟半隐寒林。溶溶春涨碧波深。时有渔人钓艇。

倚岸野梅坠粉。蘸溪宫柳摇金。凭栏凝伫酒初醒。料得谁知此景。

念奴娇

晚天清楚，扫太虚纤翳，凉生江曲，四顾青冥天地阔，惟有残霞孤鹜。山气凝蓝，汀烟引素，竦竦浮群木。白苹风定，波澄万顷寒玉。

时有一叶渔舟，收纶垂钓，来往何幽独。短发萧萧襟袖冷，便觉都无祥溥。曳杖归来，夜深人悄，月照鳞鳞屋。藤床一枕，迥然清梦无俗。

鹊桥仙 七夕

余霞散绮，明河翻雪。隐隐鹊桥初结。牛郎织女两逢迎，□胜却、人间欢悦。

一宵相会，经年离别。此语真成浪说。
细思怎得似嫦娥，解独宿、广寒宫阙。

柳梢青

兰蕙心情，海棠韵度，杨柳腰肢。步稳
金莲，手纤春笋，肤似凝脂。

歌声舞态都宜。拚著个、坚心共伊。无
奈相思，带围宽尽，说与教知。

又 蜡梅

雅淡精神，铅黄未洗，犹带残妆。春艳
一枝，鹅儿颜色，染就纤裳。

月移影转南窗。特地送、些儿暗香。宿
酒初醒，这般滋味，梦断池塘。

谒金门

春寂寂。节物又催寒食。楼上卷帘双燕
入。断魂愁似织。

门外雨余风急。满地落英红湿。好梦惊
回无处觅。天涯芳草碧。

又

春事寂。苦笋鲋鱼初食。风卷绣帘飞絮
入。柳丝萦似织。

迅速韶光去急。过雨绿阴尤湿。回首旧
游何处觅。远山空伫碧。

又 送客

门巷寂。梅豆微酸怯食。别恨萦心愁易

入。寸肠如网织。

去橹咿哑声急。泪滴春衫轻湿。尺素待凭鱼雁觅。远烟凝处碧。

浣溪沙

水阔无尘午昼长。薰风十里藕花香。一番疏雨酿微凉。

旋点新茶消睡思，不将醺醪恼诗肠。阑干倚遍挹湖光。

贺新郎

绿遍芳郊木。早红褪香乾，堪叹韶华瞬目。薄幸东皇缘底事，得恁匆匆去速。正永日、初长晴淑。尤忆夜来成梦处，记分明、浑似瑶台宿。人语静，燕双逐。

纱窗一炷沈烟馥。拚淋漓剧饮，高枕春醒草屋。无计留春添怅望，空写新词叠幅。算负却、照妆画烛。欲说萦心些个事，恐教人、蹙损眉峰绿。慵倚遍，画阑曲。

菩萨蛮 和韵

梦回小枕敲寒玉。博山香暖沈烟续。帷薄怯轻纱。风牵幌带斜。

夜窗云影细。月送花阴至。身世在陶唐。闲愁不挂肠。

好事近

庭院欲昏黄，秋思恼人情乱。宝瑟试弹新曲，更与谁同伴。

阳台魂梦杳无踪，奴住巫山畔。不似楚襄云雨，俏输他一半。

减字木兰花

传消寄息。咫尺还如千里隔。欲见无由。惹起新愁与旧愁。

情怀如醉。敲枕连宵终不寐。无奈相思。此恨凭谁说与伊。

画堂春

轻红桃杏斗娇妍。晓来葱茜祥烟。霓旌绛节下云天。行地神仙。

盛事频封锦诰，歌声齐劝金莲。教从沧海变桑田。富贵长年。

临江仙 寿老人

弱水蓬莱真胜地，祥烟闪烁霓旌。瑶池欢会下云辇。康宁新喜事，淑善旧家声。

戏彩捧觞真乐事，蟠桃献寿千春。从今更愿子孙荣。加恩封锦诰，学道诵黄庭。

踏莎行

秋色人家，夕阳洲渚。西风催过黄华渡。
江烟引素忽飞来，水禽破暝双双去。

奔走红尘，栖迟羁旅。断肠犹忆江南句。
白云低处雁回峰，明朝便踏潇湘路。

杏花天

镂冰翦玉工夫费。做六出、飞花乱坠，
舞风情态谁相似。算只有、江梅可比。

极目处、琼瑶万里。海天阔、清寒似水。
从教高卷珠帘起。看三白、年丰瑞气。

水调歌头 题蒲圻景星亭上慕容宰

华亭新伟观，胜地得高雄。凭栏徙倚要
眇，万里景无穷。好是江流萦绕，那更云天
舒阔，叠嶂倚晴空。眼界无尽藏，怀抱有清
风。

主人贤，开绮席，泛金钟。放怀一笑，
许我满酌醉颜红。只恐玺书即下，促起飞
鳧东去，行作黑头公，还记今朝客，曾待一杯
同。

鹧鸪天

初过清明春昼长。紫红香雾蔼华堂。朱

颜阿母逢生日，彩戏儿孙捧寿觞。

齐祝颂，喜平康。天教两鬓正苍苍。壶
中日月应长久，笑看蟠桃几度芳。

菩萨蛮

石榴裙束纤腰袅。金莲稳衬弓靴小。娇
姿□羞人。伞低遮半身。

思情如纸薄。方信当初错。邂逅苦匆匆。
还疑是梦中。

踏莎行

雅淡容仪，温柔情性。偏伊赋得多风韵。
明眸翦水玉为肌，凤鞋弓小金莲衬。

相见虽频，欢娱无定。蛮笺写了凭谁问。
坚心好事有成时，须教人道都相称。

贺新郎

池馆闲凝目。有玉人、向晚妖娆，洗妆
梳束。雅淡容仪妃子样，羞使胭脂点触。莹
冰雪、精神难掬。好是月明微露下，似晚凉、
初向清泉浴。好对我，笑着缩。

好风拂面浑无俗。更撩人清兴，异香芬
馥。惹起新愁无著处，细与端相未足。俏不
忍、游蜂飞扑。可惜伊家娇媚态，问天公、
底事教幽独。待拉向，锦屏曲。

水调歌头

风驭过姑射，云佩挹浮丘。丁宁月姊，
为我澄霁一天秋。尽展冰奁玉鉴，要看瑶台
银阙，万里冷光浮。分与世间景，好在水边
楼。

想霓裳，呈妙舞，起清讴。蓝桥何处，
试寻玉杵恣追游。拟待铅霜捣就，缓引琼浆
沈醉，谁信是良筹。长啸跨鲸背，不必愿封
留。

武陵春 賡何显夫小舟有景

红荻黄芦秋已老，妆点楚江头。更有吴
姬拨小桡。来往自妖娆。

款款舫舟临别岸，短缆系花梢。料得前
身是莫愁。依旧有风流。

朝中措

晓来天气十分凉。时候近重阳。村落人
家潇洒，篱菊有芬芳。

年来渐觉，诗肠愈窄，酒量偏狂。好景
不须放过，何妨一醉千觞。

小重山

一见情怀便雅投。尊前成密约，意绸缪。

已成行计理归舟。空相忆，无计为伊留。

执别话离愁。萦牵滋味恶，在心头。而今无奈阻欢游。些子事，此恨两悠悠。

玉团儿 用周美成韵

绿云慢绾新梳束。这标致、诸余不俗。邂逅相逢，情怀雅合，全似深熟。

耳边笑语论心曲。把不定、红生脸肉。若得同欢，共伊偕老，心事忒足。

醉蓬莱 上南安太守庚戌正月

正春回紫陌，瑞霭飞浮，暖风轻扇。皓月初圆，觉严城寒浅。彩结鳌山，纱笼银烛，与□花争艳。午夜融和，红莲万顷，一齐开遍。

讼简民熙，史君行乐，簇拥朱轮，旌旗辉暖。鼎沸笙歌，遏行云不散。咫尺泥封，促朝天陛，侍玉皇香案。来岁元宵，龙灯影里，金杯宜劝。

一翦梅 元宵

灯火楼台万斛莲。千门喜笑，素月婵娟。几多急莞与繁弦。巷陌骈阗。毕献芳筵。

乐与民偕五马贤。绮罗丛里，一簇神仙。传柑雅宴约明年。尽夕留连。满泛金船。

满江红

碧眼真仙，算元住、蓬莱宫里。记当日、等闲跨鹤、人间游戏。要把忠勋扶帝业，更将姓字联宗系。拥朱轮、特地为民来，诗书帅。

千里地，都和气。十万户，生欢喜。祝黄堂眉寿，歌谣鼎沸。莫惜春醅供燕豆，便承芝检朝天陛。看云屏、隔坐并貂蝉，双清贵。

水调歌头 上沈倅

再拜识英度，喜气觉飞浮。神清骨秀，元是蓬莱谪仙流。盍去冲摩霄汉，刚向平分风月，半刺岭南州。素蕴未施展，阔步尚淹留。

从此去，朝帝阙，侍宸旒。论思献替、要须直与古人侔。好是羽仪朝著，勒就鼎彝勋业，却伴赤松游。曳杖太湖曲，笑傲八千秋。

清平乐 木犀

玻璃翦叶。点缀黄金屑。雅淡幽姿风味别。翠影婆娑弄月。

秋光占断江南。清香鼻观先参。一朵折来和露，乌云髻畔斜簪。

念奴娇 白莲呈罗教、黄法

凿开方沼，问何人种玉、工夫奇绝。幻出瀛州有□□，十万水仙罗列。风曳琼琚，露零珠佩，天上人装结。君看炎夏，堕来何处冰雪。

我来对此凉生，红尘飞尽，却笑凌波袜。最爱幽姿能雅淡，自蓄芳馨孤洁。挹取天浆，唤将空籁，齐作清歌发。不知尘世，晃然身在瑶阙。

又

碧池如染，把玻璃罽就，纤埃都绝。西国夫人空里坠，圆盖亭亭排列。莹质无瑕，尘心不染，远社堪重结。当时盛事，虎溪茗碗翻雪。

千载此意谁论，人争买笑，醉眼看罗袜。坐上如今皆我辈，素蕴从来黼洁。击节临风，停杯对月。浩气俱英发。两翁仙举，玉堂正在金阙。

又

好风明月，共芙蓉、占作人间三绝。试问千花还□□，敢与英姿同列。一曲千钟，凌云长啸，舒放愁肠结。人生易老，莫教双鬓添雪。

回首蝇利蜗名，微官多误，自笑尘生袜。争似玉人真妩媚。表里冰壶明洁。露下寒生，参横斗转，又听胡笳发。夜阑人静，一声清透云阙。

瑞鹧鸪

除夜，依逆旅主人，寒雨不止，夜酌
客里惊嗟又岁除。萧萧寒雨滴茅庐。山
深溪转泉声碎，夜永风摇烛影孤。
冷甚只多烧木叶，诗成无处写桃符。强
酬节物聊清酌，今岁屠苏自取疏。

武陵春

舟行三衢间，江干梅盛开，为风雨所妒，赋此
以惜之
常记江南春欲到，消息付南枝。疏影横
斜照水时。月淡暗香迟。
可惜江头千树玉，雨暗更风欺。传语东
君管领伊。憔悴有谁知。

鹧鸪天 席上戏作

秋月明眸两鬓浓。衫儿贴体绉轻红。清
声宛转歌金缕，纤手殷勤捧玉钟。
娇娅姹，语惺松。酒香沸沸透羞容。刘
郎莫恨相逢晚，且喜桃源路已通。

蓦山溪

淡妆西子，怎比西湖好。南北两长堤，
有罨画、楼台多少。翠光千顷，一片净琉璃，

泛兰舟，摇画桨，尽日金尊倒。

名园精舍，总被游人到。年少与佳人，共携手、嬉游歌笑。夕阳西下，沈醉尽归来，鞭宝马，闹竿随，簇著花藤轿。

又 与何遂夫为寿

韶华七换，阻庆生申旦。今日向高堂，载卮酒、为君满劝。绣帘低挂，瑞霭□香浓，倩双娥，敲象板，缓缓歌珠贯。

芝兰挺秀，俱是皇家彦。只这一般奇，见方寸、平生积善。几多厚德，天锡与遐龄，鬓长青，颜不老，日日开华宴。

减字木兰花

莎衫筠笠。正是村村农务急。绿水千畦。惭愧秧针出得齐。

风斜雨细。麦欲黄时寒又至。馊妇耕夫。画作今年稔岁图。

满江红 送赵季行赴金坛

积雨连朝，添新涨、一篙春碧。寒犹在、东风料峭，柳丝无力。系惹画船都不住，从教兰棹双飞急。泛大江、东去欲何之，瓜期迫。

龙钟裔，神仙伯。金闺彦，文章客。算河阳花县，恁生留得。制锦才高书善最，鸣琴化洽人欢怪。想未容、坐暖诏归来，君王侧。

踏莎行 过黄花渡，沽白酒，因成，呈天休

猎猎霜风，蒙蒙晓雾。归来喜踏江南路。
千林翠幄半红黄，试看青女工夫做。

茅舍疏篱，竹边低户。谁家酒滴真珠露。
旋酤一盏破清寒，趁晴同过黄花渡。

蝶恋花 和彭孚先韵

满架冰蕤开遍了。试问花神，留得春多少。
清胜荀香娇韵好。谢庭风月应难到。

酒酿新醅名不老。醉倒花前，真个无烦恼。
满座清欢供一笑。春醒拚却明窗晓。

点绛唇

过眼溪山，向来都是经行处。骖鸾人去。
冷落吹箫侣。

小立江亭，愁对蒹葭浦。无情绪。酒杯慵举。
闲看江枫舞。

诉衷情

无端风雨送清秋。天气冷飕飕。行人先
自离索，直是不禁愁。

思往事，忆前游。泪难收。重阳近也，
黄花依旧，谁伴清瓯。

念奴娇 上巳太守待同官曲水园，因成

快风收雨，正江城初霁，物华如许。丽日融和春思好，是处莺啼燕语。嫩绿成阴，落红堆绣，只恐春将暮。园林清昼，看看又见飞絮。

太守无限风流，铃斋多暇，载酒郊原路。几队旌旗光闪烁，鼓吹更翻新谱。曲水流觞，兰亭修禊，俯仰成今古。为君一醉，归时楼上初鼓。

冉冉云 牡丹盛开，招同官小饮，赋此

雨洗千红又春晚。留牡丹、倚阑初绽。娇娅姓、偏赋精神君看。算费尽、工夫点染。

带露天香最清远。太真妃、院妆体段，拚对花、满把流霞频劝。怕逐东风零乱。

减字木兰花 咏梅呈万教

冰姿雪艳。天赋精神偏冷淡。惟有清香。何逊扬州暗断肠。

孤芳好处。消得骚人题妙句。皴皴寒枝。未必生绡画得宜。

鹧鸪天 题广文官舍竹外梅花呈万教

阁雨浮云寒尚轻。商量雪意未全成。莫

全宋词 卢 炳

嫌竹外萧然处，忽有幽香透鼻清。

诗兴逸，酒魂醒。主人留客更多情。不
辞满引成痴客，且为梅花醉一觥。

水龙吟 庚韵中秋

晚晴一碧天如水，风约尘埃都扫。素娥
睡起，玉轮稳驾，初离海表。碾破秋云，涌
成银阙，光欺南斗。想广寒宫里，风流女伴，
应都把、仙歌奏。

夜永风生悄悄。耀冰雪、寒侵重嶠。今
宵休道，从来此夕，阴多晴少。坐久更深，
露冷襟袖，不禁清晓。更天风吹下，桂香拂
袂，想蟠根老。

柳梢青 冬月海棠

笑菊斯梅。嫌蜂却蝶，压尽寒蕤。月下
精神，醉时风韵，红透香腮。

天工造化难猜。甚怪我、愁眉未开。故
遣名花，凌霜带露，先送春来。

少年游 用周美成韵

绣罗褰子间金丝。打扮好容仪。晓雪明
肌，秋波入鬓，鞋小步行迟。

冠儿时样都相称，花插楝双枝。倩俏精
神，风流情态，惟有粉郎知。

汉宫春

向暖南枝，最是他潇洒，先带春回。因何事、向岁晚，搀占花魁。天公著意，安排巧、特地教开。知道是，仙翁诞节，琼英要泛金杯。

人学寿阳妆面，正梁州初按，羯鼓声催。年年此花开后，宴启蓬莱。朱颜不老，算难教、绿野徘徊。消息好，行看父子，和羹鼎鼐盐梅。

多 丽 寿邵郎中

庆佳辰。熊罴协梦生申。记当年、曾游月殿，笑谈高跃龙津。德弥高、源流孔孟，才迥出、黼黻卿云。亟步华涂，蜚英腾茂，姓名端的简枫宸。最好是、雍容兰省，直道事吾君。还知否，承明倦直，来抚斯民。

算人生、五马最贵，朱幡画戟行春。讼庭清、祥风和畅，铃斋静、佳气氤氲。寿宴香浓，梅繁柳嫩，年年今日劝芳尊。须信道、朱颜不老，眉寿等松椿。从兹去，袞衣特立，廊庙经纶。

满江红 贺赵县丞

媚景良时，无非是、三春富贵。花共柳、著工夫染，嫩红轻翠。日丽风和薰协气。莺

全宋词 卢 炳

吟燕舞皆欢意。况生辰、恰恰值清明，笙歌沸。

分天派，真龙裔。到月殿，攀仙桂。看眉间黄色，诏书将至。莫向蓝田分佐理。便趋紫禁参朝对。问玉皇、仙籍注长生，三千岁。

蝶恋花 和人探梅

罗幕护寒遮晓雾。爱日烘晴，又是年华暮。潇洒江梅争欲吐。暗香漏泄春来处。何日寻芳溪畔路。挈榼携筇，写景论心素。千里相逢真会遇。羨君解道江南句。

水调歌头

富贵本何物，底用苦趋奔。都为造物娱弄，人事覆来翻。须索高抬目力，觑破只同儿戏，不必更重论。但愿吾长健，赢得日加飧。

衣轻裘，乘驷马，驾高轩。算来荣耀，终输渔叟钓江村。休叹谋身太拙，未必折腰便是，炙手几曾温。清议不可辱，千古要长存。

满江红

罨画池亭，对十万、盈盈粉面。依翠盖、临风一曲，霓裳舞遍。亭上人如蓬岛客，坐

中别有飞琼伴。占世间、风月最清凉，宜开宴。

当盛旦，歌喉噉。齐祝寿，金尊劝。算才华合侍，玉皇香案。处事从来坚特操，立朝更要持公论。使他时、台阁振风声，朝天眷。

诉衷情

柴扉人寂草生畦。藤蔓乱萦篱。秋净楚天如水，云叶度墙低。

同把盏，且伸眉。对残晖。红茱笑捻，黄菊斜簪，恋饮忘归。

浣溪沙

常记京华昔浪游。青罗买笑万金酬。醉中曾此当貂裘。

自恨山翁今老矣，惜花心性谩风流。清樽独酌更何愁。

清平乐

方池小小。风折玻璃皱。数朵荷花开更好。把住薰风一笑。

芳容淡注胭脂。亭亭翠盖相依。只欠一双鸂鶒，便如画底屏帷。

菩萨蛮 用周美成韵

而今怕听相思曲。多情蹙损眉峰绿。惜别上扁舟。望穷江际楼。

蛮笺封了发。为忆人如雪。离恨写教看。休令盟约寒。

卢 氏

风栖梧 题泥溪驿

登山临水，不费于讴吟；易羽移商，聊舒于羈思。因成凤栖梧曲子一阕，聊书于壁。后之君子览之者，毋以妇人窃弄翰墨为罪。

蜀道青天烟霭翳。帝里繁华、迢递何时至。回望锦川挥粉泪。凤钗斜亸乌云膩。

[钿] 带双垂金缕细。玉珮玎珰，露滴寒如水。从此鸾妆添远意，画眉学得遥山翠。

卢祖皋

宴清都 初春

春讯飞琼管。风日薄、度墙啼鸟声乱。江城次第，笙歌翠合，绮罗香暖。溶溶涧渌冰泮。醉梦里、年华暗换。料黛眉重锁隋堤，芳心还动梁苑。

新来雁阔云音，鸾分鉴影，无计重见。啼春细雨，笼愁澹月，恁时庭院。离肠未语先断。算犹有、凭高望眼。更那堪、芳草连天，飞梅弄晚。

鱼游春水

离愁禁不去。好梦别来无觅处。风翻征袂，触目年芳如许。软红尘里鸣鞭镫，拾翠丛中句伴侣。都负岁时，暗关情绪。

昨夜山阴杜宇。似把归期惊倦旅。遥知楼倚东风，凝颦暗数。宝香拂拂遗鸳锦，心事悠悠寻燕语。芳草暮寒，乱花微雨。

倦寻芳

香泥垒燕，密叶巢莺，春晦寒浅。花径

风柔，著地舞裊红软。斗草烟欺罗袂薄，秋千影落春游倦。醉归来，记宝帐歌慵，锦屏香暖。

别来怅、光阴容易，还又酴醾，牡丹开遍。妒恨疏狂，那更柳花迎面。鸿羽难凭芳信短，长安犹近归期远。倚危楼，但镇日、绣帘高卷。

江城子

画楼帘幕卷新晴。掩银屏。晓寒轻。坠粉飘香，日日唤愁生。暗数十年湖上路，能几度，著娉婷。

年华空自感飘零。拥春醒。对谁醒。天阔云闲，无处觅箫声。载酒买花年少事，浑不似，旧心情。

又 寿外姑外舅

护霜云日霭晴空。锦围中。卷香风，弄玉乘鸾，人自蕊珠宫。天遣岁寒为伴侣，还待得，谪仙翁。

等闲随处是春功。笑相从。寸心同。不羨鱼轩，蝉冕共荣封。只爱阶庭兰玉秀，梅不老，对乔松。

又 外舅作梅坡因寿日作此

小山初筑自天成。架危亭。与云平。面面梅花，阑槛十分清。唤得长淮春意满，香暗度，月微明。

数枝长忆傍岩扃。杖履轻。醉中行。笑问东风，何日是归程。只怕和羹消息近，天

未许，遂幽情。

西江月

燕掠晴丝袅袅，鱼吹水叶粼粼。禁街微雨洒香尘。寒食清明相近。

漫著宫罗试暖，闲呼社酒酬春。晚风帘幕悄无人。二十四番花讯。

画堂春

玉屏回梦月平阑。元来香冷衣单。柳风特地更将寒。吹上眉端。

云羽未回征雁，镜花空舞双鸾。去年芳径又斓斑。门掩春闲。

又

柳黄移上袂罗单。酒醒娇蹙风鬟。茗瓯才试鹧鸪斑。沈炷熏残。

夜雨可无归梦，晓风何处征鞍。海棠开了尚凭阑。划地春寒。

又

柳塘风紧絮交飞。漾花一水平池。暖香飘径日迟迟。何处酴醾。

胡蝶梦中寒浅，杜鹃声里春归。镜容不似旧家时。羞对清溪。

清平乐

镜屏开晓。寒入宫罗峭。脉脉不知春又

老。帘外舞红多少。

旧时驻马香阶。如今细雨苍苔。残梦不堪重理，一双胡蝶飞来。

又

柳边深院。燕语明如翦。消息无凭听又懒。隔断画屏双扇。

宝杯金缕红牙。醉魂几度儿家。何处一春游荡，梦中犹恨杨花。

又

玉肌春瘦。别凤离鸾后。柳外画船看翠袖。眼艳风流依旧。

杏梁语燕绸缪。可堪前梦悠悠。几度欲成花雨，断云还过南楼。

又 庚申中吴对雪

朔风凝沍。不放云来去。稚柳回春能几许。一夜满城飞絮。

羊羔酒面频倾。护寒香缓娇屏。唤取雪儿对舞，看他若个轻盈。

乌夜啼

几曲微风按柳，生香暖日蒸花。鸳鸯睡足芳塘晚，新绿小窗纱。

尺素难将情绪，嫩罗还试年华。凭高无处寻残梦，春思入琵琶。

又

照水飞禽斗影，舞风小径低花。征鸿排

尽相思字，音信落谁家。

系恨腰围顿减，禁愁酒力难加。楼高日暮休帘卷，芳草满天涯。

又

柳色津头泫绿，桃花渡口啼红。一春又负西湖醉，离恨雨声中。

客袂迢迢西塞，馀寒翦翦东风。谁家拂水飞来燕，惆怅小楼东。

又 西湖

漾暖纹波贴贴，吹晴丝雨蒙蒙。轻衫短帽西湖路，花气扑春骢。

斗草褰衣湿翠，秋千瞥眼飞红。日长不放春醪困，立尽海棠风。

又

段段寒沙浅水，萧萧暮雨孤篷。香罗不共征衫远，砧杵客愁中。

别恨慵看杨柳，归期暗数芙蓉。碧梧声到纱窗晓，昨夜几秋风。

谒金门

风不定。移去移来帘影。一雨林塘新绿净。杏梁归燕并。

翠袖玉屏金镜。日薄绮疏人静。心事一春疑酒病。鸟啼花满径。

又

兰棹举。相趁落红飞去。一隙轻帘凝睇

处。柳丝牵不住。

昨日翠蛾金缕。今夜碧波烟渚。好梦无凭窗又雨。天涯知几许。

又

闲院宇。犹自行来行去。花片无声帘外雨。峭寒生碧树。

做弄清明时序。料理春醒情绪。忆得归时停棹处。画桥看落絮。

又

深院静。隔叶鸣禽相应。金鸭云寒闲梦醒。转帘花月影。

闲步碧阶香径。弹翠残红慵整。明日阴晴犹未定。试教移小艇。

又

寒半退。斜掩小屏珠翠。柳眼才醒桃欲醉。日高帘影碎。

暗解鸳鸯罗带。独立晚风谁会。心事悠悠人好在。画桥流水外。

又

人寂寞。帘外翠阴如幄。团扇藤床花间错。雨边残梦觉。

翠浅粉销香薄。临镜不忺梳掠。新恨悠悠无处托。棋声闲院落。

又

闲睡足。冰柱乱敲寒玉。簇簇庭阴嘉树绿。晚蝉声断续。

一雨藕花新浴。香破小窗幽独。重理焦

桐寻旧曲。隔墙风动竹。

又

香漠漠。低卷水风池阁。玉腕笼纱金半约。睡浓团扇落。

雨后凉生云薄。女伴棹歌声乐。采得双莲迎笑剥。柳阴多处泊。

又

秋几许。荒蓼败荷烟渚。贴水飞鸥江欲暮。风帆追急羽。

蝶梦转头无据。愁到曲屏深处。寒入双城扃绣户。也应闻细雨。

又

罗袖褪。短鬓独搔谁恨。叶叶秋声风袞袞。万端心一寸。

钗凤镜鸾谁问。想见粉香啼损。倩尽飞鸿终未稳。夜来寒陡顿。

鹧鸪天

纤指轻拈小砑红。自调宫羽按歌童。寒馀芍药阑边雨，香落酴醾架底风。

闲意态，小房栊。丁宁须满玉西东。一春醉得莺花老，不似年时怨玉容。

又

庭绿初圆结荫浓。香沟收拾旧梢红。池塘少歇鸣蛙雨，帘幕轻回舞燕风。

春又老，笑谁同。澹烟斜日小楼东。相

思一曲临风笛，吹过云山第几重。

又

岸柳黄深绿已垂。庭花红遍白还飞。几回画蜡银台梦，双字香罗金缕衣。

山浅澹，水茫漪。顿无消息许多时。杏梁知有新来燕，下却重帘不放归。

踏莎行

夜雨灯深，春风寒浅。梅姿雪态怜娇软。锦笺闲轴旧緘情，酒边一顾清歌遍。

玉局弹愁，冰弦写怨。几时纤手教重见。小楼低隔一街尘，为谁长恁巫山远。

琴调相思引

陆续鸣鸠呼晓晴。霏微残雾湿春城。未成梅雨，先做麦寒轻。

长日恹恹花又落，短屏曲曲酒初醒。小舟无绪，闲带牡丹行。

又 同子高舫舟叶家庄

夹岸垂杨步障深。露桥横截影沈沈。数家篱落，一晌晚凉侵。

闲倚短篙停夜月，静看双翅落栖禽。久无羁思，前事忽惊心。

眼儿媚

玉钩清晓上帘衣。香雾湿春枝。馀寒逗

雨，罗裙无赖，重暖金猊。

柳边谁寄东风缆，流水只年时。无人为记，天涯归思，梁燕空飞。

更漏子

玉钩裁，罗袜浅。心事漫拈针线。钗半
弹，鬓慵梳。新来消瘦无。

江南路。花无数。春梦不知何处。帘影
转，暝禽西。看看眉黛低。

又

蓼花繁，桐叶下。寂寂梦回凉夜。城角
断，砌蛩悲。月高风起时。

衣上泪。谁堪寄。一寸妾心千里。人北
去，雁南征。满庭秋草生。

锦园春三犯 赋牡丹

昼长人倦。正凋红涨绿，懒莺忙燕。丝
雨蒙晴，放珠帘高卷。神仙笑宴。半醒醉、
彩鸾飞遍。碧玉阑干，青油幢幕，沈香庭院。

洛阳图画旧见。向天香深处，犹认娇面。
雾縠霞绡，闻绮罗裁剪，情高意远。怕容易、
晓风吹散。一笑何妨，银台换蜡，铜壶催箭。

又 赋海棠

醉痕潮玉。爱柔英未吐，露丛如簇。绝
艳矜春，分流芳金谷。风梳雨沐。耿空抱、
夜阑清淑。杜老情疏，黄州赋冷，谁怜幽独。

玉环睡醒未足。记传榆试火，高照宫烛。
锦幄风翻，渺春容难续。迷红怨绿。漫惟有、
旧愁相触。一舸东游，何时更约，西飞鸿鹄。

水龙吟 赋芍药

杜鹃啼老春红，翠阴满眼愁无奈。飞来
何处，凤辇鸾驭，霞裾云佩。风槛娇凭，露
梢慵亸，酒浓微退。念洛阳人去，香魂又返，
依然是，风流在。

银烛光摇彩翠。画堂深、莫辞沈醉。十
年一觉，扬州春梦，离愁似海。浩态难留，
粉香吹散，几时重会。向尊前笑折，一枝红
玉，帽檐斜戴。

又 赋酴醾

荡红流水无声，暮烟细草黏天远。低回
倦蝶，往来忙燕。芳期顿懒。绿雾迷墙，翠
虬腾架，雪明香暖。笑依依欲挽，春风教住，
还疑是，相逢晚。

不似梅妆瘦减。占人间、丰神萧散。攀
条弄蕊，天涯犹记，曲阑小院。老去情怀，
酒边风味，有时重见。对枕帟空想，东床旧
梦，带将离恨。

又 淮西重午

会昌湖上扁舟，几年不醉西山路。流光
又是，宫衣初试，安榴半吐。千里江山，满
川烟草，薰风淮楚。念离骚恨远，独醒人去，
阑干外，谁怀古。

亦有鱼龙戏舞。艳晴川、绮罗歌鼓。乡

情节意，尊前同是，天涯羁旅。涨绿池塘，翠阴庭院，归期无据。问明年此夜，一眉新月，照人何处。

又

世间谁似蓬仙，坐间八帙齐眉寿。兰阶更喜，孙枝相映，红芳绿秀。鹤舞修庭，鹭飞青嶂，帘垂晴昼。向闲中时有，奚囊背锦，开松户，看云岫。

不羨印金垂斗。笑纷纷、白云苍狗。银髯似戟，红颜如炼，风流依旧。野□晴初，陇梅花下，玉笙吹酒。怅今年又是，题笺寄远，倩传杯手。

渡江云 赋荷花

锦云香满镜，岸巾横笛，浮醉一舟轻。别愁萦短鬓，晚凉池阁，此地忽逢迎。柄圆敲绿，倚风流、还恁娉婷。凭画阑，嫣然输笑，无语寄心情。

盈盈。露华匀玉，日影酣红，记晚妆慵整。还暗惊、人间离合，羞对池苹。三年一觉西湖梦，又等闲、金井秋声。销魂久，夜深月冷风清。

洞仙歌 赋茉莉

玉肌翠袖，较似酴醾瘦。几度熏醒夜窗酒。问炎洲何事，得许清凉，尘不到，一段冰壶剪就。

晚来庭户悄，暗数流光，细拾芳英黯回首。念日暮江东，偏为魂销，人易老、幽韵清标似旧。正簟纹如水帐如烟，更奈向，月明露浓时候。

又

月痕霜晕，雪染冰裁翦。车马尘中甚曾见。自扬州吟罢，踏遍西湖，堪爱处，偏是情高韵远。

冷香惊梦破，姑射人归，图画空遗旧妆面。问何事东君，先与春心，还又是、容易飞花片片。对暮寒修竹哽无言，更画角层城，夜闻吹怨。

又

辛未岁，攻媿舅氏辇石筑山于东楼之下，幽深窈窕，与十洲三岛相为胜概。攻媿辞荣念归而未获也，赋此寿之

东楼佳丽，缥缈风烟表。幻得楼山更深窈。有苍崖乔木，石磴鸣泉，尘不到，掩映十洲三岛。

平生丘壑趣，圭衮何心，自是清时重元老。想月下云根，鹤唳猿吟，人犹道、作计归游太早。待他年功退学商颜，却旋种木奴，缓寻瑶草。

又 上寿

梅窗雪屋，还赋蓬仙寿。闻说今年胜于旧。有芝书催下，竹史颁春，山好处，留待文章太守。

商霖消息近，缥缈闲云，一笑无心又出岫。纵高卧十年，八帙初开，天未许、闲向

人间袖手。问西州千骑几时来，对月鹤霜猿，也教知否。

又 寿外舅

扁舟入浙，便有家山意。全胜轺车驾边地。爱官尘不到，书眼争明，称寿处，春傍梅花影里。平生丘壑志，未老求闲，天亦徘徊就归计。想叠嶂双溪，千骑弓刀，浑不似、白石山中胜趣。怕竹屋梅窗欲成时，又飞诏东山，谢公催起。

望江南

疏雨过，芳节到戎葵。缠臂细交纹线缕，称身初试碧绡衣。闲步小亭池。

花下意，脉脉有谁知。试把花梢和恨数，因看胡蝶著双飞。凝扇立多时。

临江仙

南馆西池迎笑处，轻行不耐冰绡。粉香飞过碧阑桥。芙蕖争态度，杨柳学飘飘。

醉里鸾飙乘月去，碧云依旧迢迢。深情谁为寄娇娆。簟纹风外展，香篆过边销。

又

韩薪王之曾孙市船招饮，女乐颇盛。夜深，出一小姬，曰胜胜，年十二岁。独立吹笙，声调婉抑，四座叹赏。已而再拜乞词，为赋此曲

洞府堂深花气满，娉婷绿展红围。个中年少出琼姬。双笼金约腕，独把玉参差。

子晋台前无鹤驭，人间空有清诗。何如
娇小伫帘帷。仙风知有待，凉月渐当时。

又

跨鹤云间犹未久，风流全胜年时。唤回
和气上梅枝。酒边春市动，琴外画帘垂。

长是细吟攻媿寿，还歌连桂新词。早催
鳧舄向南飞。一官传鼎鼎，四海看埙篪。

丑奴儿慢

湘筠展梦，还是带恨敲枕。对千顷、风
荷凉艳，水竹清阴。半掩龟纱，几回小语月
华侵。娉婷何处，回首画桥，朱户沈沈。

闻道近时，题红传素，长是沾襟。想当
日、冰弦弹断，总废清音。准拟归来，扇鸾
钗凤巧相寻。如今无奈，七十二峰，划地云
深。

木兰花慢

汀莲凋晚艳，又苹末、起秋风。漫搔首
徐吟，微云河汉，疏雨梧桐。飘零倦寻酒盏，
记那回、歌管小楼中。玉果蛛丝暗卜，钿钗
蝉鬓轻笼。

吴云别后重重。凉宴几时同。纵人间信
有，犀灵鹊喜，密意难通。双星分携最苦，
念经年、犹有一相逢。寂莫桥边旧月，可堪
频照西东。

又 赋雪

洒窗声未定，怪襟袖、峭寒欺。渐邑界空明，山河表里，玉幻琼移。天边占春最早，万花中、不遣一尘飞。清想吟鞭瘦倚，醉怜歌锦红围。

谁知。未去心期。慵酒更慵诗。算可人惟有，光浮茗碗，香浸梅枝。长安又惊岁换，笑吹来、空点发成丝。一舸沧江浩渺，几回归梦参差。

又 别西湖两诗僧

嫩寒催客棹，载酒去、载诗归。正红叶漫山，清泉漱石，多少心期。三生溪桥话别，怅薜萝、犹惹翠云衣。不似今番醉梦，帝城几度斜晖。

鸿飞、烟水淋漓。回首处，只君知。念吴江鹭忆，孤山鹤怨，依旧东西。高峰梦醒云起，是瘦吟、窗底忆君时。何日还寻后约，为余先寄梅枝。

又 寿具舍使母夫人

翠阴春昼永，乍帘幕、暖飘香。正玉节来归，斑衣戏舞，□□荧煌。椿期始开九秩，看芝兰、奕叶早传芳。都把一门瑞气，酿成九酝霞觞。

相将。诏墨趣星郎。乐事未渠央。渐锦封鸾诰，鱼轩象服，争贡萱堂。西池献桃未熟，醉西湖、日日想偏长。紫燕黄鹂院落，牡丹红药时光。

又

先君买屋蒲江，半属叶氏，似之五兄方并得之。
因举六帙之庆，并致贺札

向蒲江佳处，报新葺、小亭轩。有碧嶂青池，幽花瘦竹，白鹭苍烟。年华再周甲子，对黄庭、心事只翛然。都占壶天岁月，便成行地神仙。

十年。微禄萦牵。梦绕浙东船。更吾庐才喜，籓篱尽剖，门巷初全。何时归来拜寿，尽团栾、笑语玉尊前。吟寄疏梅驿外，思随飞雁行边。

浣溪沙

午睡醒来策瘦筇。几痕茸绿径苔封。石榴初□舞裙红。

中酒情怀滋味薄，肥梅天气带衣慵。日长门巷雨馀风。

卜算子

续续露蛩鸣，索索风梧语。瘦骨从来不奈秋，一夜秋如许。

簾冷卷风漪，髻滑抛云缕。展转无人共此情，画角吹残雨。

又

双鬓晚风前，一笛秋云外。木叶飞时看好山，山亦于人耐。

意到偶题诗，饮少先成醉。笑折花枝步

短檐，此意无人会。

又 水仙

佩解洛波遥，弦冷湘江渺。月底盈盈误
不归，独立风尘表。

窗绮护幽妍，瓶玉扶轻袅。别后知谁语
素心，寂寞山寒峭。

又 忆梅花

寒谷耿春姿，遥夜乘幽兴。忆得和香载
月归，醉里清魂醒。

霜月解随人，不解将疏影。想见江南万
斛愁，云卧衣裳冷。

满庭芳

辛未岁，闻表兄王和叔秘监林屋既成，乃作彩
舫，幅巾雪鬓，徜徉湖山间，望之为蓬瀛仙翁也。
因赋此以寿之，俾舟人歌以和渔唱

盘谷居成，辋川图就，便从鸥鹭寻盟。
泛溪窈窕，游钓寄高情。尚忆儿童旧地，疏
帘外、烟雨新晴。微吟罢，渔歌响答，欸乃
醉中听。

蓬瀛。归计早，下帆坐阅，涛浪堪惊。
爱闲身长占，风澹波平。夜雪何时访戴，梅
花下、同款柴扃。还知否，清时未许，野渡
有舟横。

夜行船

暖入新梢风又起。秋千外、雾萦丝细。

鸠侣寒轻，燕泥香重，人在杏花窗里。

十二银屏山四倚。春醪困、共篝沈水。
却说当时，柳啼花怨，魂梦为君迢递。

瑞鹤仙 赋芙蓉

坡诗云：“芙蓉城中花冥冥。谁其主者石与丁。
中有一人长眉青。炯如微月澹疏星。”故末章及之。
(题从永乐大典补)

江南秋欲遍。正莼际鲈分，酒边螯荐。
青林雁霜浅。问风流何事，试华偏晚。凌波步远。
误池馆、薰风笑宴。梦回时，细翦荷衣，尚倚半酣妆面。

深院。绮霞低映，步障横陈，暮天慵倦。
无言笑倩。尊前恨，仗谁遣。似重来鹤驭，
锦城依旧，无复仙风宛转。念疏星澹月，长眉甚时再见。

菩萨蛮

芙蓉香卸桐阴薄。水窗未雨凉先觉。何
处理秋裳。月高砧杵长。

袂罗新恨悄。展转屏山晓。长是卷帘时。
翠禽相对飞。

又

烛房花幌参差见。疏帘镇日萦愁眼。巫
峡小山屏。梦云犹未成。

带霜边雁落。双字宫罗薄。二十四阑干。
夜来相对寒。

又

翠楼十二阑干曲。雨痕新染蒲桃绿。时节又黄昏。东风深闭门。

玉箫吹未彻。窗影梅花月。无语只低眉。闻拈双荔枝。

鹊桥仙 菊

寒丛弄日，宝钿承露，篱落亭亭相倚。当年彭泽未归来，料独抱、幽香一世。

疏风冷雨，澹烟残照，日日重阳天气。帽檐已是半欹斜，问瓮里、新篘熟未。

又 寿谢法□

槐阴阴暑，荷风清梦，满院双成俦侣。阶庭一笑玉兰新，把酒更、重逢初度。

丹书漫启，清云垂上，莫忘八篇奇语。功成休驾玉霄云，且长占、赤城佳处。

又

澄江晓碧，群山秋静，人与江山俱秀。最声吹下紫泥封，看宣猷、风流依旧。

□袍对引，鱼轩徐驾，小队旌旗陪后。万家指点寿星明，更把菊、登高时候。

摸鱼儿 九日登姑苏台

怪西风、晓来敲帽，年华还是重九。天机袞袞山新瘦，客子情怀谁剖。微雨后。更雁带边寒，裊裊欺罗袖。慵荷倦柳。悄不似

黄花，田田照眼，风味尽如旧。

登临地，寂寞崇台最久。阑干几度搔首。翻云覆雨无穷事，流水斜阳知否。吟未就。但衰草荒烟，商略愁时候。闲愁浪有。总输与渊明，东篱醉舞，身世付杯酒。

夜飞鹊慢

骄嘶破清晓，分恨临期。花下恁月明知。馀光是处散离思，最怜香霭霏霏。牵衣搵弹泪，问凄风愁露，划地东西。留鞭换佩，怕匆匆、已是迟迟。

凉怯几番罗袂，还燕别文梁，萤点书帏。一自秋娘迢递，黄金对酒，争忍轻挥。新来院落，雁难寻、帘幕长垂。怕凋梧敲径，惊回旧梦，应也颦眉。

秋霁

虹雨才收，正抱叶残蝉，渐老云木。银汉飞星，玉壶零露，万里素秋如沐。倚颿抱独。盼娇曾记郎心目。向艳歌偏爱，赋情多处寄衷曲。

凄凉漫有，旧月阑干，夜凉无因，重照颓玉。扇纨收、鸾孤蠹损，一番愁绪黯相触。回首寒云空雁足。露井零乱，已是负了桐阴，可堪轻误，满篱种菊。

虞美人 九月游虎丘

清尊黄菊红萸佩。两度云岩醉。帽檐今

日更清狂。冷雨疏风、著意过重阳。

故宫历历遗烟树。往事知何处。漫山秋色好题诗。吟罢阑干、独自立多时。

渔家傲

小阁腾腾人似醉。鸣阶簌簌霜林坠。起向楼头看雪意。云犹未。雁声一片江风起。

官里从容何日是。偷闲著便寻幽事。见说小桥清浅水。梅欲蕊。吟边陡觉添风味。

又

檐玉敲寒声不定。水仙瓶里梅相映。半缕篝香云欲暝。窗几静。月华时送琅玕影。

不用五湖寻小艇。吾庐剩有闲风景。薄醉起来行藓径。多幽兴。悠然一霎风吹醒。

又 寿白石

白石山中风景异。先生日日怀归计。何事黄冈飞雪地。偏著意。画堂却为东坡起。

人说前身坡老是。文章气节浑相似。只待鼎彝勋业遂。梅花外。归来长向山中醉。

醉梅花

叶行之府判自号从好居士，外舅赵西林先生上足也。文学政事皆不愧师承。宣路虽不逮，而寿过之。结屋姑苏台之北，种花弄孙以自适，世念甚轻。今七十有四矣，耳目聪明，髭鬣未白。因其初度，赋醉梅花一首寿之

传得西林一派清。年华垂过欠官称。居

无多地花常好，客有来时鹤自鸣。

分蕊馆，驻筵星。齐眉相对眼尤明。弄
孙教子婆娑醉，岁岁疏梅入寿觥。

贺新郎

彭传师于吴江三高堂之前作钓雪亭，盖擅渔人之窟宅，以供诗境也。赵子野约余赋之

挽住风前柳。问鸥夷、当日扁舟，近曾
来否。月落潮生无限事，零乱茶烟未久。漫
留得、莼鲈依旧。可是从来功名误，抚荒祠、
谁继风流后。今古恨，一搔首。

江涵雁影梅花瘦。四无尘、雪飞风起，
夜窗如昼。万里乾坤清绝处，付与渔翁钓叟。
又恰是、题诗时候。猛拍阑干呼鸥鹭，道他
年、我亦垂纶手。飞过我，共尊酒。

沁园春 双溪狎鸥

几叶凋枫，半篙寒日，傍桥系船。爱洞
门深锁，人间福地，双溪分占，天上星躔。
破帽飏寒，短鞭敲月，此地经行知几年。空
赢得，似沈郎消瘦，还欠诗篇。

沙鸥伴我愁眠。向水驿风亭红蓼边。有
村醪可饮，且须同醉，溪鱼堪鲙，切莫论钱。
笠泽波头，垂虹桥上，橙蟹肥时霜满天。相
随否，算江南江北，惟有君闲。

又 戊辰岁寿攻媿舅

台色齐辉，一点长庚，夜来更明。渐日

添宫线，功催补袞，春回梅萼，香趁调羹。
鹤禁班高，槐庭恩重，八帙駉駉人共荣。谁知道，
纵身居公辅，心似书生。

东楼见说初成。有帘卷江山万里横。想高情长羨，
碧云出处，清时未计，绿野经营。东阁郎君，南宮进士，
管领孙枝扶寿觥。齐眉醉，笑尊前乐事，真个全并。

贺新郎 姑苏台观雪

十顷涵空碧。画图中、峥嵘幻玉，乱零吹壁。倚遍危阑吟不尽，
把酒风前岸帻。记当日、西湖为客。谁翦吴松江上水，笑乾坤、
奇事成儿剧。还照我，夜窗白。

崇台目断清无极。引枝筇、琼瑶步软，印登临屐。娃馆娉婷知何在，
泪粉愁浓恨积。故化作、飞花狼籍。旧事悠悠浑莫问，有玉蟾、
醉里曾相识。聊伴我，夜吹笛。

又 送曹西士宰建昌

万里岷峨路。笑归来、野逸萧闲，旧时风度。玉陛金闺春引处，
迟却京华步武。漫赢得、西湖佳趣。香篆琴丝帘影外，有朝云、
夜月和鸥鹭。都辨我，醉中句。

飞鳧又报匡庐去。怕赤霄、班里依然，有人留取。头黑功名浑好在，
漫浪从渠赋予。但爱我、襟期相遇。满把一觴为君寿，有风荷、
万顷摇清暑。聊为此，釂金缕。

太常引 趋省闻桂偶成

梦回金井卸梧桐。嘶马带疏钟。草面露

全宋词 卢祖皋

痕浓。渐薄袖、清寒暗通。

天低绛阙，云浮碧海，残月尚朦胧。吹面桂花风。峭不似、红尘道中。

小阑干 种桂戏成

露华深酿古香浓。一树□云丛。窗间试与，闲培秋事，聊寄幽悰。

钩帘静对西风晚，尘外小房栊。轻阴澹日，浅寒清月，想见山中。

倚阑令

惜春心。步花阴。怕春深。风扬游丝吹落絮，满园林。

日长帘幕沈沈。朱阑畔、斜弹琼簪。笑摘梨花闲照水，贴眉心。

满江红 齐云月酌

楼倚晴空，炎云净、晚来风力。沧海外、等闲吹上，满轮寒璧。河汉低垂天欲近，乾坤浩荡秋无极。凭阑干、衣袂拂青冥，知何夕。

登眺地，追畴昔。吴越事，皆陈迹。对清光只有，醉吟消得。万古悠悠惟月在，浮生袞袞空头白。自骑鲸、仙去有谁知，遥相忆。

又 寿王永叔秘监表兄

拟问扁舟，归来趁、蓬莱寿席。还又向、

月城迢递，岁寒为客。多竹襟期居已就，一川图画□堪觅。想玉笙、霜鹤拥踟蹰，真仙伯。

身早退，头翻黑。心最懒，闲偏适。更新来膝下，始看袍色。安石正多人望在，子公何用緘书力。但年年、把酒为梅花，寻消息。

烛影摇红 十月十四日寿藏春孟侍郎

千载风云，庆符良月先呈瑞。旧家阴郭帝恩浓，圭袞公侯地。不道蝉联鼎贵。对秋灯、依然风味。紫囊归去，绿野闲来，青毡都未。

琴鹤相随，小山花竹便幽意。满襟和气是藏春，日觉诗名起。已动金瓯姓字。早梅□，□□□□，□□□□，□□□□，□□□□。

月城春 寿无为赵秘书

五云腾晓。望凝香画戟，恍然蓬岛。玉露冰壶，照神仙风表。诗书坐啸。唤淮楚、满城春好。雨谷催耕，风帘戏鼓，家家欢笑。

南湖细吟未了。看金莲夜直，丹凤飞诏。鬓影青青，办功名多少。持杯满酌。听千里、载歌难老。试问尊前，蟠桃次第，红芳犹小。

临江仙

六鹤飞来松帐晓，菊迟梅早年光。西池

移宴到萱堂。笙箫清弄玉，环佩暖回香。

未问诰花金五色，新来乐事难量。双添雏凤趁称觞。争书八十字，分抱彩衣旁。

贺新郎

春色元无主。荷东君、著意看承，等闲分付。多少无情风与浪，又那更、蝶欺蜂妒。算燕雀、眼前无数。纵使帘栊能爱护，到如今、已是成迟暮。芳草碧，遮归路。

看看做到难言处。怕宣郎、轻转旌旗，易歌襦裤。月满西楼弦索静，云蔽昆城阆府。便恁地、一帆轻举。独倚阑干愁拍碎，惨玉容、泪眼如红雨。去与住，两难诉。

陆凝之

夜游宫

东风捏就腰儿细。系滴粉裙儿不起。从来只惯掌中看，怎忍在、烛花影里。
酒红应是铅华褪。暗蹙损、眉峰双翠。夜深点鞦绣鞋儿，靠那个、屏风立地。

念奴娇

远山一带，溯晴空、极目天涯浮白。枫落鸦翻谈笑处，不觉云涛横席。酒病方苏，睡魔犹殢，一扫无留迹。吴帆越棹，恍然飞上空碧。
长记草赋梁园，凌云笔势，倒三江秋色。对此惊心空怅望，老作红尘闲客。别浦烟平，小楼人散，回首千波寂。西风归路，为君重喷霜笛。

陆 象 泽

贺新凉 送灵山冯可久通守浔阳

笛唤春风起。向湖边、腊前折柳，问君何意。孤负梅花立晴昼，一舸凄凉雪底。但小阁、琴棋而已。佳客清明留不住，为匡庐、只在家窗里。湓浦去，两程耳。

草堂旧日谈经地。更从容、南山北水，庾楼重倚。万卷心胸几千古，仰首骎骎紫气。正江上、风寒如此。且趁霜天鲈鱼好，把貂裘、换酒长安市。明夜去，月千里。

陆游

赤壁词 招韩无咎游金山

禁门钟晓,忆君来朝路,初翔鸾鹄。西府中台推独步,行对金莲宫烛。蹙绣华鞞,仙葩宝带,看即飞腾速。人生难料,一尊此地相属。

回首紫陌青门,西湖闲院,锁千梢修竹。素壁栖鸦应好在,残梦不堪重续。岁月惊心,功名看镜,短鬓无多绿。一欢休惜,与君同醉浮玉。

浣沙溪 和无咎韵

懒向沙头醉玉瓶。唤君同赏小窗明。夕阳吹角最关情。

忙日苦多闲日少,新愁常续旧愁生。客中无伴怕君行。

其二 南郑席上

浴罢华清第二汤。红绵扑粉玉肌凉。娉婷初试藕丝裳。

凤尺裁成猩血色,螭奩熏透麝脐香。水亭幽处捧霞觞。

青玉案 与朱景参会北岭

西风挟雨声翻浪。恰洗尽、黄茅瘴。老惯
人间齐得丧。千岩高卧 ,五湖归棹 ,替却凌烟
像。

故人小驻平戎帐。白羽腰间气何壮。我
老渔樵君将相。小槽红酒 ,晚香丹荔 ,记取蛮
江上。

水调歌头 多景楼

江左占形胜 ,最数古徐州。连山如画 ,佳
处缥缈著危楼。鼓角临风悲壮 ,烽火连空明
灭 ,往事忆孙刘。千里曜戈甲 ,万灶宿貔貅。

露沾草 ,风落木 ,岁方秋。使君宏放 ,谈笑
洗尽古今愁。不见襄阳登览 ,磨灭游人无数 ,
遗恨黯难收。叔子独千载 ,名与汉江流。

浪淘沙 丹阳浮玉亭席上作

绿树暗长亭。几把离尊。阳关常恨不堪
闻。何况今朝秋色里 ,身是行人。清泪浥罗
巾。各自消魂。一江离恨恰平分。安得千寻
横铁锁 ,截断烟津。

定风波 进贤道上见梅赠王伯寿

敲帽垂鞭送客回。小桥流水一枝梅。衰

病逢春都不记。谁谓。幽香却解逐人来。

安得身闲频置酒。携手。与君看到十分开。少壮相从今雪鬓。因甚。流年羁恨两相催。

南乡子

归梦寄吴檣。水驿江程去路长。想见芳洲初系缆，斜阳。烟树参差认武昌。愁鬓点新霜。曾是朝衣染御香。重到故乡交旧少，凄凉。却恐它乡胜故乡。

其二

早岁入皇州。尊酒相逢尽胜流。三十年来真一梦，堪愁。客路萧萧两鬓秋。蓬峤偶重游。不待人嘲我自羞。看镜倚楼俱已矣，扁舟。月笛烟蓑万事休。

满江红

危堞朱栏，登览处、一江秋色。人正似、征鸿社燕，几番轻别。缱绻难忘当日语，凄凉又作它乡客。问鬓边、都有几多丝，真堪织。

杨柳院，秋千陌。无限事，成虚掷。如今何处也，梦魂难觅。金鸭微温香缥缈，锦茵初展情萧瑟。料也应、红泪伴秋霖，灯前滴。

其二 夔州催王伯礼侍御寻梅之集

疏蕊幽香，禁不过、晚寒愁绝。那更是、巴东江上，楚山千叠。敲帽闲寻西瀼路，鞭鞭笑

向南枝说。恐使君、归去上銮坡，孤风月。

清镜里，悲华发。山驿外，溪桥侧。凄然回首处，凤凰城阙，憔悴如今谁领略。飘零已是无颜色。问行厨、何日唤宾僚，犹堪折。

感皇恩 伯礼立春生日

春色到人间，彩幡初戴。正好春盘细生菜。一般日月，只有仙家偏耐。雪霜从点鬓，朱颜在。

温诏鼎来，延英催对。凤阁鸾台看除拜。对衣裁稳，恰称球纹新带。个时方旋了、功名债。

其二

小阁倚秋空，下临江渚。漠漠孤云未成雨。数声新雁，回首杜陵何处。壮心空万里，人谁许。

黄阁紫枢，筑坛开府。莫怕功名欠人做。如今熟计，只有故乡归路。石帆山脚下，菱三亩。

好事近 寄张真甫

羈雁未成归，肠断宝箏零落。那更冻醪无力，似故人情薄。

瘴云蛮雨暗孤城，身在楚山角。烦问剑南消息，怕还成疏索。

其二

风露九霄寒，侍宴玉华宫阙。亲向紫皇香

案 见金芝千叶。

碧壶仙露酝初成 ,香味两奇绝。醉后却骑
丹凤 ,看蓬莱春色。

其三 次字文卷臣韵

客路苦思归 ,愁似茧丝千绪。梦里镜湖烟
雨 ,看山无重数。

尊前消尽少年狂 ,慵著送春语。花落燕飞
庭户 ,叹年光如许。

其四

岁晚喜东归 ,扫尽市朝陈迹。拣得乱山环
处 ,钓一潭澄碧。

卖鱼沽酒醉还醒 ,心事付横笛。家在万重
云外 ,有沙鸥相识。

其五

华表又千年 ,谁记驾云孤鹤。回首旧曾游
处 ,但山川城郭。

纷纷车马满人间 ,尘土污芒屨。且访葛仙
丹井。看岩花开落。

其六

挥袖别人间 ,飞蹶峭崖苍壁。寻见古仙丹
灶 ,有白云成积。

心如潭水静无风 ,一坐数千息。夜半忽惊
奇事 ,看鲸波暝日。

其七

溢口放船归 ,薄暮散花洲宿。两岸白苹红
蓼 ,映一蓑新绿。

有沽酒处便为家 ,菱芡四时足。明日又乘

风去 ,任江南江北。

其八 登梅仙山绝顶望海

挥袖上西峰 ,孤绝去天无尺。拄杖下临鲸海 ,数烟帆历历。

贪看云气舞青鸾 ,归路已将夕。多谢半山松吹 ,解殷勤留客。

其九

小倦带馀醒 ,澹澹数椽斜日。驱退睡魔十万 ,有双龙苍壁。

少年莫笑老人衰 ,风味似平昔。扶杖冻云深处 ,探溪梅消息。

其十

觅个有缘人 ,分付玉壶灵药。谁向市尘深处 ,识辽天孤鹤。

月中吹笛下巴陵 ,条华赴前约。今古废兴何限 ,叹山川如昨。

其十一

平旦出秦关 ,雪色驾车双鹿。借问此行安往 ,赏清伊修竹。

汉家宫殿劫灰中 ,春草几回绿。君着变迁如许 ,况纷纷荣辱。

其十二

秋晓上莲峰 ,高蹑倚天青壁。谁与放翁为伴 ,有天坛轻策。

铿然忽变赤龙飞 ,雷雨四山黑。谈笑做成丰岁 ,笑禅龕柳栗。

鹧鸪天 送叶梦锡

家住东吴近帝乡。平生豪举少年场。十千沽酒青楼上,百万呼卢锦瑟傍。身易老。恨难忘。尊前赢得是凄凉。君归为报京华旧,一事无成两鬓霜。

其二 葭萌驿作

看尽巴山看蜀山。子规江上过春残。惯眠古驿常安枕,熟听阳关不惨颜。慵服气,懒烧丹。不妨青鬓戏人间。秘传一字神仙诀,说与君知只是顽。

其三

梳发金盘剩一窝。画眉鸾镜晕双蛾。人间何处无春到,只有伊家独占多。微步处,奈娇何。春衫初换曲尘罗。东邻斗草归来晚,忘却新传子夜歌。

其四

家住苍烟落照间。丝毫尘事不相关。斟残玉瀣行穿竹,卷罢黄庭卧看山。贪啸傲,任衰残。不妨随处一开颜。元知造物心肠别,老却英雄似等闲。

其五

插脚红尘已是颠。更求平地上青天。新来有个生涯别,买断烟波不用钱。沽酒市,采菱船。醉听风雨拥蓑眠。三山老子真堪笑,见事迟来四十年。

其六

懒向青门学种瓜。只将渔钓送年华。双双新燕飞春岸，片片轻鸥落晚沙。歌缥缈，橹呕哑。酒如清露鲈如花。逢人问道归何处，笑指船儿此是家。

其七 薛公肃家席上作

南浦舟中两玉人。谁知重见楚江滨。凭教后苑红牙版，引上西川绿锦茵。才浅笑，却轻颦。淡黄杨柳又催春。情知言语难传恨，不似琵琶道得真。

暮山溪 送伯礼

元戎十乘，出次高唐馆。归去旧鹓行，更何人、齐飞霄汉。瞿唐水落，惟是泪波深，催叠鼓，起牙樯，难锁长江断。

春深鳌禁，红日宫砖暖。何处望音尘，黯消魂、层城飞观。人情见惯，不敢恨相忘，梅驿外，蓼滩边，只待除书看。

又 游三荣龙洞

穷山孤垒，腊尽春初破。寂寞掩空斋，好一个、无聊底我。啸台龙岫，随分有云山，临浅濑，荫长松，闲据胡床坐。

三杯径醉，不觉纱巾堕。画角唤人归，落梅村、篮舆夜过。城门渐近，几点妓衣红，官驿外，酒垆前，也有闲灯火。

木兰花 立春日作

三年流落巴山道。破尽青衫尘满帽。身如西瀼渡头云，愁抵瞿唐关上草。春盘春酒年年好。试戴银幡判醉倒。今朝一岁大家添，不是人间偏我老。

朝中措 梅

幽姿不入少年场。无语只凄凉。一个飘零身世，十分冷淡心肠。

江头月底，新诗旧梦，孤恨清香。任是春风不管，也曾先识东皇。

其二 代谭德称作

怕歌愁舞懒逢迎。妆晚托春醒。总是向人深处，当时枉道无情。

关心近日，啼红密诉，剪绿深盟。杏馆花阴恨浅，画堂银烛嫌明。

其三

冬冬雉鼓饯流年。烛焰动金船。彩燕难寻前梦，酥花空点春妍。

文园谢病，兰成久旅，回首凄然。明月梅山笛夜，和风禹庙莺天。

临江仙 离果州作

鸠雨催成新绿，燕泥收尽残红。春光还与

美人同。论心空眷眷 ,分袂却匆匆。 只道真情易写 ,那知怨句难工。 水流云散各西东。 半廊花院月 ,一帽柳桥风。

蝶恋花 离小益作

陌上箫声寒食近。 雨过园林 ,花气浮芳润。 千里斜阳钟欲暝。 凭高望断南楼信。 海角天涯行略尽。 三十年间 ,无处无遗恨。 天若有情终欲问。 忍教霜点相思鬓。

其二

桐叶晨飘蛩夜语。 旅思秋光 ,黯黯长安路。 忽记横戈盘马处。 散关清渭应如故。 江海轻舟今已具。 一卷兵书 ,叹息无人付。 早信此生终不遇。 当年悔草长杨赋。

其三

水漾萍根风卷絮。 倩笑娇颦 ,忍记逢迎处。 只有梦魂能再遇。 堪嗟梦不由人做。 梦若由人何处去。 短帽轻衫 ,夜夜眉州路。 不怕银缸深绣户。 只愁风断青衣渡。

钗头凤

红酥手。 黄滕酒。 满城春色宫墙柳。 东风恶。 欢情薄。 一怀愁绪 ,几年离索。 错错错。

春如旧。 人空瘦。 泪痕红浥鲛绡透。 桃花落。 闲池阁。 山盟虽在 ,锦书难托。 莫莫

莫。

清商怨 葭萌驿作

江头日暮痛饮。乍雪晴犹凜。山驿凄凉，
灯昏人独寝。

鸳机新寄断锦。叹往事、不堪重省。梦破
南楼，绿云堆一枕。

水龙吟 荣南作

樽前花底寻春处，堪叹心情全减。一身萍
寄，酒徒云散，佳人天远。那更今年，瘴烟蛮
雨，夜郎江畔。漫倚楼横笛，临窗看镜，时挥
涕、惊流转。

花落月明庭院。悄无言、魂消肠断。凭肩
携手，当时曾效，画梁栖燕。见说新来，网萦尘
暗，舞衫歌扇。料也羞憔悴，慵行芳径，怕啼莺
见。

秋波媚 七月十六日晚登高兴亭望长安南山

秋到边城角声哀。烽火照高台。悲歌击
筑，凭商酌酒，此兴悠哉。

多情谁似南山月，特地暮云开。灞桥烟
柳，曲江池馆，应待人来。

其二

曾散天花蕊珠宫。一念堕尘中。铅华洗
尽，珠玑不御，道骨仙风。

全宋词 陆游

东游我醉骑鲸去 ,君驾素鸾从。垂虹看月 ,天台采药 ,更与谁同。

采桑子

宝钗楼上妆梳晚 ,懒上秋千。闲拨沈烟。金缕衣宽睡髻偏。

鳞鸿不寄辽东信 ,又是经年。弹泪花前。愁入春风十四弦。

卜算子 咏梅

驿外断桥边 ,寂寞开无主。已是黄昏独自愁 ,更著风和雨。

无意苦争春 ,一任群芳妒。零落成泥碾作尘 ,只有香如故。

沁园春 三荣横溪阁小宴

粉破梅梢 ,绿动萱丛 ,春意已深。渐珠帘低卷 ,筇枝微步 ,冰开跃鲤当时岂料如今。漫一事无成霜鬓侵。看故人强半 ,沙堤黄阁 ,鱼悬带玉 ,貂映蝉金。许国虽坚 ,朝天无路 ,万里凄凉谁寄音。东风里 ,有灞桥烟柳 ,知我归心。

其二

一别秦楼 ,转眼新春 ,又近放灯。忆盈盈倩笑 ,纤纤柔握 ,玉香花语 ,雪暖酥凝。念远愁肠 ,伤春病思 ,自怪平生殊未曾。君知否 ,渐香消蜀锦 ,泪渍吴绫。难求系日长绳。况倦客飘

零少旧朋。但江郊雁起,渔村笛怨,寒缸委烬,孤砚生冰。水绕山围,烟昏云惨,纵有高台常怯登。消魂处,是鱼笺不到,兰梦无凭。

其三

孤鹤归飞,再过辽天,换尽旧人。念累累枯冢,茫茫梦境,王侯蝼蚁,毕竟成尘。载酒园林,寻花巷陌,当日何曾轻负春。流年改,叹围腰带剩,点鬓霜新。交亲。散落如云。又岂料如今余此身。幸眼明身健,茶甘饭软,非惟我老,更有人贫。躲尽危机,消残壮志,短艇湖中闲采莼。吾何恨,有渔翁共醉,溪友为邻。

忆秦娥

玉花骢。晚街金辔声璁珑。声璁珑。闲敲乌帽,又过城东。

富春巷陌花重重。千金沽酒酬春风。酬春风。笙歌围里,锦绣丛中。

汉宫春 张园赏海棠作 园故蜀燕王宫也

浪迹人间。喜闻猿楚峡,学剑秦川。虚舟泛然不系,万里江天。朱颜绿鬓,作红尘、无事神仙。何妨在,莺花海里,行歌闲送流年。

休笑放慵狂眼,看闲坊深院,多少婣娟。燕宫海棠夜宴,花覆金船。如椽画烛,酒阑时、百炬吹烟。凭寄语,京华旧侣,幅巾莫换貂蝉。

其二 初自南郑来成都作

羽箭雕弓,忆呼鹰古垒,截虎平川。吹笳

暮归 野帐雪压青毡。淋漓醉墨 ,看龙蛇、飞落
蛮笺。人误许 ,诗情将略 ,一时才气超然。

何事又作南来 ,看重阳药市 ,元夕灯山。
花时万人乐处 ,敲帽垂鞭。闻歌感旧 ,尚时时、
流涕尊前。君记取 ,封侯事在 ,功名不信由天。

月上海棠

成都城南有蜀王旧苑 ,尤多梅 ,皆二百余年古木
斜阳废苑朱门闭。吊兴亡、遗恨泪痕里。
淡淡宫梅 ,也依然、点酥剪水。凝愁处 ,似忆宣
华旧事。

行人别有凄凉意。折幽香、谁与寄千里。
伫立江皋 ,杳难逢、陇头归骑。音尘远 ,楚天危
楼独倚。

其二

兰房绣户厌厌病。叹春醒、和闷甚时醒。
燕子空归 ,几曾传、玉关边信。伤心处 ,独展团
窠瑞锦。

熏笼消歇沈烟冷。泪痕深、展转看花影。
漫拥余香 ,怎禁他、峭寒孤枕。西窗晓 ,几声银
瓶玉井。

乌夜啼

金鸭余香尚暖 绿窗斜日偏明。兰膏香染
云鬟腻 ,钗坠滑无声。

冷落秋千伴侣 ,阑珊打马心情。绣屏惊断
潇湘梦 ,花外一声莺。

其二

檐角楠阴转日 楼前荔子吹花。鹧鸪声里
霜天晚 叠鼓已催衙。

乡梦时来枕上 京书不到天涯。邦人讼少
文移省 闲院自煎茶。

其三

我校丹台玉字 君书蕊殿云篇。锦官城里
重相遇 心事两依然。

携酒何妨处处 寻梅共约年年。细思上界
多官府 且作地行仙。

其四

世事从来惯见 吾生更欲何之。镜湖西畔
秋千顷 鸥鹭共忘机。

一枕苹风午醉 二升菰米晨炊。故人莫讶
音书绝 钓侣是新知。

其五

素意幽栖物外 尘缘浪走天涯。归来犹幸
身强健 随分作山家。

已趁馀寒泥酒 还乘小雨移花。柴门尽日
无人到 一径傍溪斜。

其六

园馆青林翠樾 衣巾细葛轻纨。好风吹散
霏微雨 沙路喜新乾。

小燕双飞水际 流莺百啭林端。投壶声断
弹棋罢 闲展道书看。

其七

从宦元知漫浪 还家更觉清真。兰亭道上

多修竹 随处岸纶巾。

泉冽偏宜雪茗 粳香雅称丝莼。 悠然一饱
西窗下 天地有闲人。

其八

纨扇婵娟素月 纱巾缥缈轻烟。 高槐叶长
阴初合 清润雨馀天。

弄笔斜行小草 钩帘浅醉闲眠。 更无一点
尘埃到 枕上听新蝉。

真珠帘

山村水馆参差路。 感羁游、正似残春风
絮。 掠地穿帘 知是竞归何处。 镜里新霜空自
恼 问几时、鸾台螯署。 迟暮。 谩凭高怀远 书
空独语。

自古。 儒冠多误。 悔当年、早不扁舟归
去。 醉下白苹洲 看夕阳鸥鹭。 菰菜鲈鱼都弃
了 只换得、青衫尘土。 休顾。 早收身江上 一
蓑烟雨。

好事近

混迹寄人间 夜夜画楼银烛。 谁见五云丹
灶 养黄芽初熟。

春风归从紫皇游 东海宴暘谷。 进罢碧桃
花赋 赐玉尘千斛。

柳梢青

故蜀燕王宫海棠之盛 为成都第一 今属张氏

全宋词 陆游

锦里繁华。环宫故邸，叠萼奇花。俊客妖姬，争飞金勒，齐驻香车。

何须幕障帟遮。宝杯浸、红云瑞霞。银烛光中，清歌声里，休恨天涯。

其二 乙巳二月西兴赠别

十载江湖，行歌沽酒，不到京华。底事翩然，长亭烟草，衰鬓风沙。

凭高目断天涯。细雨外、楼台万家。只恐明朝，一时不见，人共梅花。

夜游宫 记梦寄师伯浑

雪晓清笳乱起。梦游处、不知何地。铁骑无声望似水。想关河，雁门西，青海际。

睡觉寒灯里。漏声断、月斜窗纸。自许封侯在万里。有谁知，鬓虽残，心未死。

其二 宫词

独夜寒侵翠被。奈幽梦、不成还起。欲写新愁泪溅纸。忆承恩，叹馀生，今至此。

蔌蔌灯花坠。问此际、报人何事。咫尺长门过万里。恨君心，似危栏，难久倚。

安公子

风雨初经社。子规声里春光谢。最是无情，零落尽、蔷薇一架。况我今年，憔悴幽窗下。人尽怪、诗酒消声价。向药炉经卷，忘却莺窗柳榭。

全宋词 陆游

万事收心也。粉痕犹在香罗帕。恨月愁花,争信道、如今都罢。空忆前身,便面章台马。因自来、禁得心肠怕。纵遇歌逢酒,但说京都旧话。

玉蝴蝶 王忠州家席上作

倦客平生行处,坠鞭京洛,解佩潇湘。此夕何年,来赋宋玉高唐。绣帘开、香尘乍起,莲步稳、银烛分行。暗端相。燕羞莺妒,蝶绕蜂忙。

难忘。芳樽频劝,峭寒新退,玉漏犹长。几许幽情,只愁歌罢月侵廊。欲归时、司空笑问,微近处、丞相嗔狂。断人肠。假饶相送,上马何妨。

木兰花慢 夜登青城山玉华楼

阅邯郸梦境,叹绿鬓、早霜侵。奈华岳烧丹,青溪看鹤,尚负初心。年来向浊世里,悟真诠秘诀绝幽深。养就金芝九畹,种成琪树千林。

星坛夜学步虚吟。露冷透瑶簪。对翠凤披云,青鸾溯月,宫阙萧森。琅函一封奏罢,自钧天帝所有知音。却过蓬壶啸傲,世间岁月駸駸。

苏武慢 唐安西湖

澹霭空蒙,轻阴清润,绮陌细尘初静。平

桥系马 ,画阁移舟 ,湖水倒空如镜。掠岸飞花 ,
傍檐新燕 ,都似学人无定。叹连年戎帐 ,经春
边垒 ,暗凋颜鬓。

空记忆、杜曲池台 ,新丰歌管 ,怎得故人音
信。羁怀易感 ,老伴无多 ,谈麈久闲犀柄。惟
有恹然 ,笔床茶灶 ,自适笋舆烟艇。待绿荷遮
岸 ,红蕖浮水 ,更乘幽兴。

齐天乐 左绵道中

角残钟晚关山路 ,行人乍依孤店。塞月征
尘 ,鞭丝帽影 ,常把流年虚占。藏鸦柳暗。叹
轻负莺花 ,谩劳书剑。事往关情 ,悄然频动壮
游念。

孤怀谁与强遣。市垆沽酒 ,酒薄怎当愁
酽。倚瑟妍词 ,调铅妙笔 ,那写柔情芳艳。征
途自厌。况烟敛芜痕 ,雨稀萍点 ,最是眠时 ,枕
寒门半掩。

其二 三荣人日游龙洞作

客中随处闲消闷 ,来寻啸台龙岫。路敛春
泥 ,山开翠雾 ,行乐年年依旧。天工妙手。放
轻绿萱牙 ,淡黄杨柳。笑问东君 ,为人能染鬓
丝否。

西州催去近也 ,帽檐风软 ,且看市楼沽酒。
宛转巴歌 ,凄凉塞管 ,携客何妨频奏。征尘暗
袖。漫禁得梅花 ,伴人疏瘦。几日东归 ,画船
平放溜。

望梅

寿非金石。恨天教老向 ,水程山驿。似梦

全宋词 陆游

里、来到南柯 ,这些子光阴 ,更堪轻掷。 戍火边尘 ,又过了、一年春色。 叹名姬骏马 ,尽付杜陵 ,苑路豪客。

长绳漫劳系日。 看人间俯仰 ,俱是陈迹。 纵自倚、英气凌云 ,奈回尽鹏程 ,铗残鸾翮。 终日凭高 ,谏不见、江东消息。 算沙边、也有断鸿 ,倩谁问得。

洞庭春色

壮岁文章 ,暮年勋业 ,自昔误人。 算英雄成败 ,轩裳得失 ,难如人意 ,空丧天真。 请看邯郸当日梦 ,待炊罢黄粱徐欠伸。 方知道 ,许多时富贵 ,何处关身。

人间定无可意 ,怎换得、玉鲙丝莼。 且钓竿渔艇 ,笔床茶灶 ,闲听荷雨 ,一洗衣尘。 洛水秦关千古后 ,尚棘暗铜驼空怆神。 何须更 ,慕封侯定远 ,图像麒麟。

渔家傲 寄仲高

东望山阴何处是。 往来一万三千里。 写得家书空满纸。 流清泪。 书回已是明年事。

寄语红桥桥下水。 扁舟何日寻兄弟。 行遍天涯真老矣。 愁无寐。 鬢丝几缕茶烟里。

绣停针

叹半纪 ,跨万里秦吴 ,顿觉衰谢。 回首鹓

行 英俊并游 ,咫尺玉堂金马。气凌嵩华。负
壮略、纵横王霸。梦经洛浦梁园 ,觉来泪流如
泻。

山林定去也。却自恐说著 ,少年时话。静
院焚香 ,闲倚素屏 ,今古总成虚假。趁时婚嫁。
幸自有、湖边茅舍。燕归应笑 ,客中又还过社。

桃源忆故人 并序

三荣郡治之西 ,因子城作楼观 ,曰高斋。下临山
村 ,萧然如世外。予留七十日 ,被命参成都戎幕而去。
临行徙倚竟日 ,作桃源忆故人一首。

斜阳寂历柴门闭。一点炊烟时起。鸡犬
往来林外。俱有萧然意。

衰翁老去疏荣利。绝爱山城无事。临去
画楼频倚。何日重来此。

其二 应灵道中

栏干几曲高斋路。正在重深处。丹碧未
乾人去。高栋空留句。

离离芳草长亭暮。无奈征车不住。惟有
断鸿烟渚。知我频回顾。

其三

一弹指顷浮生过。堕甑元知当破。去去
醉吟高卧。独唱何须和。

残年还我从来我。万里江湖烟舸。脱尽
利名缰锁。世界元来大。

其四

城南载酒行歌路。冶叶倡条无数。一朵

鞦韆红凝露。最是关心处。

莺声无赖催春去。那更兼旬风雨。试问
岁华何许。芳草连天暮。

其五 题华山图

中原当日三川震。关辅回头煨烬。泪尽
两河征镇。日望中兴运。

秋风霜满青青鬓。老却新丰英俊。云外
华山千仞。依旧无人问。

极相思

江头疏雨轻烟。寒食落花天。翻红坠素，
残霞暗锦，一段凄然。

惆怅东君堪恨处，也不念、冷落尊前。那
堪更看，漫空相趁，柳絮榆钱。

一丛花

尊前凝伫漫魂迷。犹恨负幽期。从来不
惯伤春泪，为伊后、滴满罗衣。那堪更是，吹箫
池馆，青子绿阴时。

回廊帘影昼参差。偏共睡相宜。朝云梦
断知何处，倩双燕、说与相思。从今判了，十分
憔悴，图要个人知。

其二

仙姝天上自无双。玉面翠蛾长。黄庭读
罢心如水，闭朱户、愁近丝簧。窗明几净，闲临
唐帖，深炷宝奁香。

人间无药驻流光。风雨又催凉。相逢共话清都旧，叹尘劫、生死茫茫。何如伴我，绿蓑青箬，秋晚钓潇湘。

隔浦莲近拍

飞花如趁燕子。直度帘栊里。帐掩香云暖，金笼鹦鹉惊起。凝恨慵梳洗。妆台畔，蘸粉纤纤指。宝钗坠。

才醒又困，厌厌中酒滋味。墙头柳暗，过尽一年春事。罨画高楼怕独倚。千里。孤舟何处烟水。

其二

骑鲸云路倒景。醉面风吹醒。笑把浮丘袂，寥然非复尘境。震泽秋万顷。烟霏散，水面飞金镜。露华冷。

湘妃睡起，鬟倾钗坠慵整。临江舞处，零乱塞鸿清影。河汉横斜夜漏永。人静。吹箫同过缙岭。

昭君怨

昼永蝉声庭院。人倦懒摇团扇。小景写潇湘。自生凉。

帘外蹴花双燕。帘下有人同见。宝篆拆官黄。炷熏香。

双头莲 呈范至能待制

华鬢星星，惊壮志成虚，此身如寄。萧条

全宋词 陆游

病骥。向暗里。消尽当年豪气。梦断故国山川，隔重重烟水。身万里。旧社凋零，青门俊游谁记。

尽道锦里繁华，叹官闲昼永，柴荆添睡。清愁自醉。念此际。付与何人心事。纵有楚旌吴檣，知何时东逝。空怅望，鲙美菰香，秋风又起。

南歌子 送周机宜之益昌

异县相逢晚，中年作别离。暮秋风雨客衣寒。又向朝天门外、话悲欢。瘦马行霜栈，轻舟下雪滩。乌奴山下一林丹。为说三年常寄、梦魂间。

豆叶黄

春风楼上柳腰肢。初试花前金缕衣。袅袅娉娉不自持。晓妆迟。画得蛾眉胜旧时。

其二

一春常是雨和风。风雨晴时春已空。谁惜泥沙万点红。根难穷。恰似衰翁一世中。

醉落魄

江湖醉客。投杯起舞遗乌帻。三更冷翠沾衣湿。袅袅菱歌，催落半川月。空花昨梦休寻觅。云台麟阁俱陈迹。元来只有闲难得。青史功名，天却无心惜。

鹊桥仙

华灯纵博 ,雕鞍驰射 ,谁记当年豪举。酒徒一一取封侯 ,独去作、江边渔父。轻舟八尺 ,低篷三扇 ,占断苹洲烟雨。镜湖元自属闲人 ,又何必、君恩赐与。

其二

一竿风月 ,一蓑烟雨 ,家在钓台西住。卖鱼生怕近城门 ,况肯到、红尘深处。潮生理棹 ,潮平系缆 ,潮落浩歌归去。时人错把比严光 ,我自是、无名渔父。

其三 夜闻杜鹃

茅帘人静 ,蓬窗灯暗 ,春晚连江风雨。林莺巢燕总无声 ,但月夜、常啼杜宇。催成清泪 ,惊残孤梦 ,又拣深枝飞去。故山犹自不堪听 ,况半世、飘然羁旅。

长相思

云千重。水千重。身在千重云水中。月明收钓筒。

头未童。耳未聋。得酒犹能双脸红。一尊谁与同。

其二

桥如虹。水如空。一叶瓢然烟雨中。天教称放翁。

侧船篷。使江风。蟹舍参差渔市东。到

时间暮钟。

其三

面苍然。鬓皤然。满腹诗书不直钱。官
闲常昼眠。

画凌烟。上甘泉。自古功名属少年。知
心惟杜鹃。

其四

暮山青。暮霞明。梦笔桥头艇子横。苹
风吹酒醒。

看潮生。看潮平。小住西陵莫较程。莼
丝初可烹。

其五

悟浮生。厌浮名。回视千钟一发轻。从
今心太平。

爱松声。爱泉声。写向孤桐谁解听。空
江秋月明。

菩萨蛮

江天淡碧云如扫。苹花零落莼丝老。细
细晚波平。月从波面生。

渔家真个好。悔不归来早。经岁洛阳城。
鬓丝添几茎。

其二

小院蚕眠春欲老。新巢燕乳花如扫。幽
梦锦城西。海棠如旧时。

当年真草草。一棹还吴早。题罢惜春诗。

镜中添鬓丝。

诉衷情

当年万里觅封侯。匹马戍梁州。关河梦断何处，尘暗旧貂裘。

胡未灭，鬓先秋。泪空流。此生谁料，心在天山，身老沧洲。

其二

青衫初入九重城。结友尽豪英。蜡封夜半传檄，驰骑谕幽并。

时易失，志难成。鬓丝生。平章风月，弹压江山，别是功名。

生查子

还山荷主恩，聊试扶犁手。新结小茅茨，恰占清江口。

风尘不化衣。邻曲常持酒。那似宦游时，折尽长亭柳。

其二

梁空燕委巢，院静鸠催雨。香润上朝衣，客少闲谈麈。

鬓边千缕丝，不是吴蚕吐。孤梦泛潇湘，月落闻柔橹。

破阵子

仕至千钟良易，年过七十常稀。眼底荣华

全宋词 陆游

元是梦 ,身后声名不自知。营营端为谁。

幸有旗亭沽酒 ,何妨茧纸题诗。幽谷云萝
朝采药 ,静院轩窗夕对棋。不归真个痴。

其二

看破空花尘世 ,放轻昨梦浮名。蜡屐登山
真率饮 ,筇杖穿林自在行。身闲心太平。

料峭馀寒犹力 ,廉纤细雨初晴。苔纸闲题
溪上句 ,菱唱遥闻烟外声。与君同醉醒。

上西楼 一名相见欢

江头绿暗红稀。燕交飞。忽到当年行处、
恨依依。

洒清泪。叹人事。与心违。满酌玉壶花
露、送春归。

点绛唇

采药归来 ,独寻茅店沽新酿。暮烟千嶂。
处处闻渔唱。

醉弄扁舟 ,不怕黏天浪。江湖上。遮回疏
放。作个闲人样。

谢池春

壮岁从戎 ,曾是气吞残虏。阵云高、狼烽
夜举。朱颜青鬓 ,拥雕戈西戍。笑儒冠、自来
多误。

功名梦断 ,却泛扁舟吴楚。漫悲歌、伤怀

吊古。烟波无际，望秦关何处。叹流年、又成虚度。

其二

贺监湖边，初系放翁归棹。小园林、时时醉倒。春眠惊起，听啼莺催晓。叹功名、误人堪笑。

朱桥翠径，不许京尘飞到。挂朝衣、东归欠早。连宵风雨，卷残红如扫。恨樽前、送春人老。

其三

七十衰翁，不减少年豪气。似天山、凄凉病骥。铜驼荆棘，洒临风清泪。甚情怀、伴人儿戏。

如今何幸，作个故溪归计。鹤飞来、晴岚暖翠。玉壶春酒，约群仙同醉。洞天寒、露桃开未。

一落索

满路游丝飞絮。韶光将暮。此时谁与说新愁，有百啭、流莺语。

俯仰人间今古。神仙何处。花前须判醉扶归，酒不到、刘伶墓。

其二

识破浮生虚妄。从人讥谤。此身恰似弄潮儿，曾过了、千重浪。

且喜归来无恙。一壶春酿。雨蓑烟笠傍渔矶，应不是、封侯相。

杏花天

老来驹隙駉駉度。算只会、狂歌醉舞。金杯到手君休诉。看著春光又暮。谁为倩、柳条系住。且莫遣、城笳催去。残红转眼无寻处。尽属蜂房燕户。

太平时

竹里房栊一径深。静愔愔。乱红飞尽绿成阴。有鸣禽。

临罢兰亭无一事，自修琴。铜炉袅袅海南沉。洗尘襟。

恋绣衾

不惜貂裘换钓篷。嗟时人、谁识放翁。归棹借、樵风稳，数声闻、林外暮钟。幽栖莫笑蜗庐小，有云山、烟水万重。半世向、丹青看，喜如今、身在画中。

其二

无方能驻脸上红。笑浮生、扰扰梦中。平地是、冲霄路，又何劳、千日用功。飘然再过莲峰下，乱云深、吹下暮钟。访旧隐、依然在，但鹤巢、时有堕松。

风入松

十年裘马锦江滨。酒隐红尘。万金选胜莺花海，倚疏狂、驱使青春。吹笛鱼龙尽出，题诗风月俱新。

自怜华发满纱巾。犹是官身。凤楼常记当年语，问浮名、何似身亲。欲寄吴笺说与，这回真个闲人。

真珠帘

灯前月下嬉游处。向笙歌、锦绣丛中相遇。彼此知名，才见便论心素。浅黛娇蝉风调别，最动人、时时偷顾。归去。想闲窗深院，调弦促柱。

乐府初翻新谱。漫裁红点翠，闲题金缕。燕子入帘时，又一番春暮。侧帽燕脂坡下过，料也记、前年崔护。休诉。待从今须与，好花为主。

风流子 一名内家娇

佳人多命薄，初心慕、德耀嫁梁鸿。记绿窗睡起，静吟闲咏，句翻离合，格变玲珑。更乘兴，素纨留戏墨，纤玉抚孤桐。蟾滴夜寒，水浮微冻，凤笺春丽，花研轻红。

人生谁能料，堪悲处、身落柳陌花丛。空羨画堂鹦鹉，深闭金笼。向宝镜鸾钗，临妆常

晚 绣茵牙版 ,催舞还慵。肠断市桥月笛 ,灯院
霜钟。

双头莲

风卷征尘 ,堪叹处、青骢正摇金辔。客襟
贮泪。漫万点如血 ,凭谁持寄。伫想艳态幽
情 ,压江南佳丽。春正媚。怎忍长亭 ,匆匆顿
分连理。

目断淡日平芜 ,望烟浓树远 ,微茫如荠。
悲欢梦里。奈倦客、又是关河千里。最苦唱彻
骊歌 ,重迟留无计。何限事。待与丁宁 ,行时
已醉。

鹧鸪天

杖屦寻春苦未迟。洛城樱笋正当时。三
千界外归初到 ,五百年前事总知。吹玉笛 ,渡
清伊。相逢休问姓名谁。小车处士深衣叟 ,曾
是天津共赋诗。

蝶恋花

禹庙兰亭今古路。一夜清霜 ,染尽湖边
树。鸚鵡杯深君莫诉。他时相遇知何处。
冉冉年华留不住。镜里朱颜 ,毕竟消磨
去。一句丁宁君记取。神仙须是闲人做。

渔父 灯下读玄真子渔歌 因怀山阴故隐 追拟

石帆山下雨空蒙。三扇香新翠箬篷。苹
叶绿 蓼花红。回首功名一梦中。

又

晴山滴翠水摇蓝。聚散渔舟两复三。横
埭北 断桥南。侧起船篷便作帆。

又

镜湖俯仰两青天。万顷玻璃一叶船。拈
棹舞 拥蓑眠。不作天仙作水仙。

又

湘湖烟雨长莼丝。菰米新炊滑上匙。云
散后 月斜时。潮落舟横醉不知。

又

长安拜免几公卿。渔父横眠醉未醒。烟
艇小 钓车腥。遥指梅山一点青。

恋绣衾

雨断西山晚照明。悄无人、幽梦自惊。说
道去、多时也 到如今、真个是行。远山已是无
心画 小楼空、斜掩绣屏。你嚟早、收心呵 趁
刘郎、双鬓未星。

采桑子

三山山下闲居士 巾履萧然。小醉闲眠。

风引飞花落钓船。

水龙吟 春日游摩诃池

摩诃池上追游路，红绿参差春晚。韶光妍媚，海棠如醉，桃花欲暖。挑菜初闲，禁烟将近，一城丝管。看金鞍争道，香车飞盖，争先占、新亭馆。

惆怅年华暗换。黯销魂、雨收云散。镜奁掩月，钗梁拆凤，秦筝斜雁。身在天涯，乱山孤垒，危楼飞观。叹春来只有，杨花和恨，向东风满。

月照梨花 闺思

霁景风软，烟江春涨。小阁无人，绣帘半上。花外姊妹相呼。约樗蒲。

修蛾忘了章台样。细思一饷。感事添惆怅。胸酥臂玉消减，拟觅双鱼。倩传书。

又 闺思

闷已萦损。那堪多病。几曲屏山，伴人昼静。梁燕催起犹慵。换熏笼。

新愁旧恨何时尽。渐凋绿鬓。小雨知花信。芳笺寄与何处，绣阁珠栊。柳阴中。

夜游宫 宴席

宴罢珠帘半卷。画檐外、蜡香人散。翠雾霏霏漏声断。倚香肩，看中庭，花影乱。

全宋词 陆游

宛是高唐馆。宝奁炷、麝烟初暖。璧月何妨夜夜满。拥芳柔，恨今年，寒尚浅。

如梦令 闺思

独倚博山峰小。翠雾满身飞绕。只恐学行云，去作阳台春晓。春晓。春晓。满院绿杨芳草。

失调名

飞上锦裯红皱。

解连环

泪淹妆薄。背东风伫立，柳绵池阁。漫细字、书满芳笺，恨钗燕筝鸿，总难凭托。风雨无情，又颠倒、绿苔红萼。仗香醪破闷，怎禁夜阑，酒醒萧索。

刘郎已忘故约。奈重门静院，光景如昨。尽做它。别有留心，便不念当时，雨意初著。京兆眉残，怎忍为、新人梳掠。尽今生、拚了为伊，任人道错。

大圣乐

电转雷惊，自叹浮生，四十二年。试思量往事，虚无似梦，悲欢万状，合散如烟。苦海无边，爱河无底，流浪看成百漏船。何人解，问无

常火里 ,铁打身坚。

须臾便是华颠。好收拾形体归自然。又何须着意 ,求田问舍 ,生须宦达 ,死要名传。寿夭穷通 ,是非荣辱 ,此事由来都在天。从今去 ,任东西南北 ,作个飞仙。

江月晃重山 雪

芳草洲前道路 ,夕阳楼上阑干。碧云何处望归鞍。从军客 ,耽乐不思还。洞里仙人种玉 ,江边楚客滋兰。鸳鸯沙暖鹧鸪寒。菱花晚 ,不奈鬓毛斑。

陆游妾某氏

生查子

只知愁上眉，不识愁来路。窗外有芭蕉，
阵阵黄昏雨。

逗晓理残妆，整顿教愁去。不合画春山，
依旧留连住。

陆 蕴

感皇恩 旅思

残角两三声，催登古道。远水长山又重到。水声山色，看尽轮蹄昏晓。风头日脚下，人空老。

匹马旧时，西征谈笑。绿鬓朱颜正年少。旗亭斗酒，任是十千倾倒。而今酒兴减，诗情少。

陆淞

念奴娇 和李汉老

黄橙紫蟹 ,映金壶潋滟 ,新醅浮绿。共赏西楼今夜月 ,极目云无一粟。挥麈高谈 ,倚栏长啸 ,下视鳞鳞屋。轰然何处 ,瑞龙声喷蕲竹。

何况露白风清 ,银河澈汉 ,仿佛如悬瀑。此景古今如有价 ,岂惜明珠千斛。灏气盈襟 ,冷风入袖 ,只欲骑鸿鹄。广寒宫殿 ,看人颜似冰玉。

瑞鹤仙

脸霞红印枕。睡觉来、冠儿还是不整。屏间麝煤冷。但眉峰压翠 ,泪珠弹粉。堂深昼永。燕交飞、风帘露井。恨无人 ,与说相思 ,近日带围宽尽。

重省。残灯朱幌 ,淡月纱窗 ,那时风景。阳台路迥。云雨梦 ,便无准。待归来 ,先指花梢教看 ,却把心期细问。问因循、过了青春 ,怎生意稳。

陆 睿

瑞鹤仙 梅

湿云黏雁影。望征路愁迷，离绪难整。千金买光景。但疏钟催晓，乱鸦啼暝。花惊暗省。许多情、相逢梦境。便行云、都不归来，也合寄将音信。

孤迥。盟鸾心在，跨鹤程高，后期无准。情丝待翦。翻惹得，旧时恨。怕天教何处，参差双燕，还染残朱剩粉。对菱花、与说相思，看谁瘦损。

八声甘州 送翁时可如宛陵

问缠腰跨鹤、事如何，人生最风流。怕江边潮汐，世间岐路，只是离愁。白马青衫往事，赢得鬓先秋。目送红桥晚，几番行舟。

兰佩空馀依黯，便南风吹水，人也难留。但从今别后，我亦似浮沲。敬亭上、半床琴月，记弹将、寒影落南州。秋声里，塞鸿来后，为尔登楼。

甘州 寿贾师宪

满清平世界庆秋成，看看斗三钱。论从来活国，论功第一，无过丰年。办得闲民一饱，馀事笑谈间。若问平戎策，微妙难传。

玉帝要留公住，把西湖一曲，分入林园。有茶炉丹灶，更有钓鱼船。觉秋风、未曾吹著，但砌兰、长倚北堂萱。千千岁，上天将相，平地神仙。

阎丘次杲

朝中措

横江一抹是平沙。沙上几千家。得到人家尽处，依然水接天涯。

危栏送目，翩翩去鹧，点点归鸦。渔唱不知何处，多应只在芦花。

吕本中

采桑子

恨君不似江楼月，南北东西。南北东西。
只有相随无别离。

恨君却似江楼月，暂满还亏。暂满还亏。
待得团团是几时。

又

乱红天绿风吹尽，小市疏楼。细雨轻鸥。
总向离人恨里收。

年年春好年年病，妾自西游。水自东流。
不似残花一样愁。

西江月

渺渺风吹月上，蒙蒙雾挟霜回。百年心事老相催。
人在夕阳落外。

有梦常嫌去远，无书可恨来迟。一杯浊酒两篇诗。
小槛黄花共醉。

又 熟水词

酒罢悠扬醉兴，茶烹唤起醒魂。却嫌仙剂点甘辛。
冲破龙团气韵。

金鼎清泉乍泻，香沈微惜芳薰。玉人歌断恨轻分。欢意厌厌未尽。

朝中措

病香无力傍栏干。风雨送春还。一枕晓来清梦，无人说似西山。

匆匆笑语，时时邂逅，草草杯盘。莫谓杂花时候，便忘梅蕊冲寒。

南歌子

驿路侵斜月，溪桥度晓霜。短篱残菊一枝黄。正是乱山深处、过重阳。旅枕元无梦，寒更每自长。只言江左好风光。不道中原归思、转凄凉。

虞美人

梅花自是于春懒。不是春来晚。看伊开在众花前。便道与春无分、结因缘。

风前月下频相就。笑我如伊瘦。几回冲雨过疏篱。已见一番青子、缀残枝。

又

平生臭味如君少。自是君难老。似依憔悴更谁知。只道心情、不似少年时。

春风也到江南路。小槛花深处。对人不是忆姚黄。实是旧时风味、老难忘。

浣溪沙

暖日温风破浅寒。短青无数簇幽栏。三年春在病中看。

中酒心情浑似梦，探花时候不曾闲。几年芳信隔秦关。

又

共饮昏昏到暮鸦。不须春日念京华。迩来沈醉是生涯。

不是对君犹惜醉，只嫌春病却怜他。愿为蜂采落残花。

长相思

要相忘。不相忘。玉树郎君月艳娘。几回曾断肠。

欲下床。却上床。上得床来思旧乡。北风吹梦长。

减字木兰花

去年今夜。同醉月明花树下。此夜江边。月暗长堤柳暗船。

故人何处。带我离愁江外去。来岁花前。又是今年忆去年。

菩萨蛮

客愁不到西池路。残春又逐花飞去。今日傍池行。新荷昨夜生。

故人千虑绕。不道书来少。去住隔关河。长亭风雨多。

又

高楼只在斜阳里。春风淡荡人声喜。携客不嫌频。使君如酒醇。

花光人不会。月色须君醉。月色与花光。共成今夜长。

又

登楼一望南山雪。使君风味如新月。月向雪前明。主人今夜情。

平生相与意。老病犹堪记。对酒为君欢。酒杯嫌未宽。

踏莎行

雪似梅花，梅花似雪。似和不似都奇绝。恼人风味阿谁知，请君问取南楼月。

记得旧时，探梅时节。老来旧事无人说。为谁醉倒为谁醒，到今犹恨轻离别。

清平乐

故人何处。同在江南路。百种旧愁分不

去。枉被落花留住。

旧愁百种谁知。除非是见伊时。最是一春多病，等闲过了酴醾。

渔家傲

小院悠悠春未远。牡丹昨夜开犹浅。珍重使君帘尽卷。风欲转。绿阴掩映栏干晚。

记得旧时清夜短。洛阳芳讯时相伴。一朵姚黄髻髻满。情未展。新来衰病无人管。

生查子

残春雾雨余，小院黄昏后。说道觅新词，把酒来相就。

酴醾插髻云，岁岁长依旧。不是做词迟，却怕添伊瘦。

满江红

东里先生，家何在、山阴溪曲。对一川平野，数间茅屋。昨夜冈头新雨过，门前流水清如玉。抱小桥、回合柳参天，摇新绿。

疏篱下，丛丛菊。虚檐外，萧萧竹。叹古今得失，是非荣辱。须信人生归去好，世间万事何时足。问此春、春耘酒何如，今朝熟。

浪淘沙

柳色过疏篱。花又离披。旧时心绪没人知。记得一年寒食下，独自归时。

归后却寻伊。月上嫌迟。十分斟酒不推辞。将为老来浑忘却，因甚沾衣。

又

柳塘新涨。艇子操双桨。闲倚曲楼成怅望。是处春愁一样。

傍人几点飞花。夕阳又送栖鸦。试问画楼西畔，暮云恐近天涯。

生查子 离思

双双小凤斜，淡淡鸦儿稳。一曲渭城歌，柳色饶春恨。

离觞洗别愁，酒尽愁难尽。宝瑟雁纵横，谁寄天涯信。

又 离思

人分南浦春，酒把阳关盏。衣带自无情，顿为离人缓。

愁随苦海深，恨逐前峰远。更听断肠猿，一似闻弦雁。

蝶恋花 春词

巧语娇莺春未暮。杨柳风流，恰过池塘

全宋词 吕本中

雨。芳草满庭花满树。无情胡蝶飞来去。
睡起小奁香一缕。玉篆回纹，等个人分
付。桃叶不言人不语。眉尖一点君知否。

如梦令 忆旧

海雁桥边春苦。几见落花飞絮。重到柳
行西，懒问画楼何处。凝伫。凝伫。十顷荷
花风雨。

宣州竹 墨梅

小溪篷底湖风重。吹破凝酥动。一枝斜
映庾门深。冷淡无言香泛、月华清。
已经轻瘦谁为共。魂绕徐熙□。耻同桃
李困春容。肯向毫端开发、两云中。